



Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di
Firenze.
CFMAGL. 1.6.126






Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di
Firenze.
CFMAGL. 1.6.126




Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di
Firenze.
CFMAGL. 1.6.126





Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di
Firenze.
CFMAGL. 1.6.126

FRANCISCI
CAESARIS AVGVSTI
MVNIFICENTIA.

1. 6. 126








LOANARIS
CASA

Amantissimo mio ^{to} fatto ³ sava ³ off


Antonio breich in c. Se quale andando comandando comandando a uoghe
Se alquanto noi uoghe mandando mandando Ragionamento
Se al qua al moto A molto 48 492. 1. Giouangeron

Antonio 1999. 4. 17. 8 Aristoteli Logica 6. 92. 1. Antonio breich
Antonio breich 1999. 4. 17. 8 Antonio breich

Al molto 1999. 4. 17. 8 Antonio breich in euangelij
Al molto 1999. 4. 17. 8 Antonio breich in euangelij
Al molto 1999. 4. 17. 8 Antonio breich in euangelij



III
692
Jacobi Gadii Sarsy
Florentini



IOANNIS CASÆ
LATINA MONI-
MENTA.



Quorum partim versibus, partim
soluta oratione scripta
sunt.

CVM PRIVILEGIO.




FLORENTIAE

In Officina Iuntarum Bernardi Filiorum.
Edita 1111. Id. Iun. 1564.

IOANNIS CASAE

LATINA MONI-

MENTA



Quorum partim veribus partim
soluta oratione scrip-
ta sunt.

CVM PRIVILEGIO.



FLORENTIAE

In Officina Iunctarum Bonarum Florentinae
Editum. M. DC. LXX.



HANNIBAL ORICELLARIUS
PETRO VICTORIO
SAL.



Non videor mihi posse amplius ob
preces multorum, qui vndi-
que idem hoc etiam atq; etiam
petunt, vel potius flagitant,
in consilio permanere: nec, quæ
primum suppressenda censue-
ram, IOANNIS Casæ,
auunculi mei, latina ingenij monimenta domi tenere:
quibus omnibus omnis hominum generis postulatis, non
parui apud me ponderis, accessit auctoritas tua: qui
diligenter mihi suastisti, ut hoc sine vlla dubitatione
facerem: nec paterer diutius tam suaues admirabilis
naturæ fructus reconditos abditosq; iacere, priuaremq;
cupidos ipsorum magna solidaque voluptate, quam se
inde hausturos sperant, nec frustra ita, ut tu idem as-
seuerabas, ac sine causa sperant. Cum tu igitur au-
ctor accesseris, vel (ut verius loquar) sponsor, qui qua-
si damni infecti promiseris: meque hoc tuo periculo fa-
cere iusseris, vix possum amplius tot honestorum homi-

num voluntati refragari. quare totam rem tibi trado,
& amoris tuo magno erga auctorem ipsum fideiq³ com-
mitto: facies igitur quod ex dignitate illius, commu-
nique utilitate esse iudicabis. Unum ego illud doleo et
molestum in primis fero, quod ea, quæ maiore animo,
nec minori (ut arbitror) consilio, aut iam inchoaue-
rat, aut tota mente complexus fuerat, absolueret, non
potuit: ita enim fortasse sitis illa ingens, quæ animos
fere omnium inuasit, legendi ipsius scripta, expleri po-
tuisset. nisi potius ipsa eo pacto excitata fuisset: neque
enim modus ullus est, finisque honestarum & ingenuo
viro dignarum voluptatum, sed, quanto plus aliquis ea-
rum capit, tanto magis desiderio ipsarum inflamma-
tur, ac semper ulterius aliquid ardentius appetit.
Unde autem id factum sit tu probe nosti: vel cuncti
potius, qui cognitum hominem habuerunt, atque in
iisdem, quibus ipse, locis aliquando vixerunt: cui enim
perspecta non sunt multa magnaue ipsius occupatio-
nes? cui itidem inaudita est imbecillitas corporis, dolor
que acer articulorum, quo sæpe ille miserabilem in mo-
dum conficiebatur? ut de vitæ si non breuitate, saltem
non longinquitate taceam, cum illa potissimum ætate
mors eum oppresserit, qua mens hominis perfici incipit:
et plenos integrosq³ fructus edere potest. Sed huic quo-
que rei tu occurris: affirmasque huiusmodi partus
optimorum ingeniorum non ex numero moleque ipso-
rum, sed ex vi naturaq³ spectari debere: & hanc sem-
per consuetudinem fuisse eorum, qui recte & ordine
iudicarunt:

indicarunt : quorum institutum verum esse, multis & veterum & recentium laboribus perspicui posse . cum videamus quædam parua monimenta ingeniosorum hominum in honore & pretio esse : alia autem magna aliorum , qui non tam polite sua scripta limarunt : nec laborem illum emendandi tulerunt , contemni magnopere ab eruditis, et omni laude carere . nihil vero ipsum minus unquam studuisse, quam populo placere : contentumque semper fuisse omnibus in rebus iudicio paucorum . postremum autem hoc quin verum sit, ac prorsus isto modo se habeat, non possum inficiari . Restat igitur vnum, quod valde me pungit : vereor enim ne parum pie faciam, si aduerser voluntati mortui, & hominis eius mortui, cuius in primis voluntatem ratam esse & mandata omnia firma optare, & pro viribus etiam eniti debeo : non multos enim dies ante, quam e vita discederet, cum mentio facta esset horum laborum, quid fieri de illis vellet, siquid ipsi accidisset, plane significauit : deleri enim funditus ipsos, in ignemque imponi statim imperauit . cum tamen socios multos habeam huius culpæ, si culpa illa appellanda est, exiuerintque omnibus temporibus alij, qui hac in re vltimæ voluntati mortuorum non obtemperarint, sed potius communi bono consuluerint, studioque ac cupiditati honestorum virorum morem gesserint, facilius (vt opinor) crimen hoc sustinebo, & a manibus ipsius mortui veniam impetrabo . Nuper certe idem factum est ab heredibus, summi ac singularis viri, Francisci Guicciardini:

ni: qui cum historiam illam suam, tantopere nunc omni-
bus probatam, imperfectam ac minime expolitam re-
linqueret, mandauerat diligenter ut occultaretur, vel
potius interrogatus a scriba, dum testamentum com-
poneret, quid de illa statueret, magno, & constanti ani-
mo respondit, comburatur. illi tamen recte fecisse exi-
stimantur, quod ipsam ediderint: & non solum scele-
re liberantur, verum etiam eximia quadam laude di-
gni putantur, & maximo beneficio cunctos mortales
affecisse creduntur. Idem igitur mihi euenturum, si
idem effecero prorsus confido. id est apud multos me
gratiam initurum, & affinem quoque, mecum mihi igno-
turum. Presertim cum id, quod ille omnino voluit, prae-
stari a me nulla ratione potuerit: neque enim valeo plu-
rimos cohibere, in quorum manus iam pridem non pau-
ca scriptorum illorum peruenerunt, & ne ipsi ea diuul-
gent impedire. quod iam de non nullis ipsorum usu ve-
nit, ac non sine magno meo dolore factum est. Post-
quam igitur animo ipsius satisfieri vix potest: cum i-
psa undique emanent, ac formis etiam ubique excu-
dantur, existimaui me rectius facturum, si omnibus
ijs de causis ipse illa integriora correctioraque edidis-
sem, atque ita assiduus vocibus multorum, acerrimisque
desiderijs obsecunda sem. Quod tamen tui iudicii esse
volo, & (ut initio dixi) a te totum proficisci, cum dili-
genter prius, an fieri debeat, cogitaris. (Cur enim ego
in hac re non sequar sententiam tuam, & quod tibi
probatum fuerit, id verum esse prorsus putem, quem
de

de his litteris recte existimare posse vna omnium voce
compertum atque exploratum est. auunculus certe
meus tibi primas deferebat, ac de tua eruditione diui-
nitus sentiebat. Sed, vt omittam nunc doctrinam, &
præclaram multarum honestarum artium cognitio-
nem, illud in primis me in hac opinione confirmauit,
quod video, quanto amore illum mortuum prosequare,
quantæq; beneuolentiæ memoriæ ipsius colas. (ur igitur
hoc tue potissimum curæ non committam, quod v-
num nomen ipsius plurimum illustrare potest, & ab o-
mni iniuria temporis, obliuioneq; vindicare? nam, cum
mos semper fuerit, vt tu optime scis, consuetudoque
etiam veterum illorum Græcorum, doctissimorum vi-
rorum, labores suos mittendi ad fortunatos homines
& maximos reges, quod ita putarent se patrocini
multum gratiæq; suis scriptis comparaturos: nec non
laudis etiam aliquid illorum ipsorum nomini allaturos,
cum aliter se cupidos eorum esse ostendere non possent,
statui ego, quidquid honoris ac dignitatis hoc pacto ad
quempiam peruenire potest, tibi potissimum deferre, &
tuis proprijs laudibus ingenijque commendationibus ag-
gregari. Quem animi mei sensum tibi non semel an-
tea significauit: et si tu semper id modestiæ causa vehe-
menter recusasti. in eo vero ego non solum iudicium
meum sequor: & id, quod magnopere multis modis con-
uenire intelligo, facio; verum etiam aliquo pacto vo-
luntati illius, cuius honeri laudique ambo toto animo
studemus, pareo: quodque ipse præstare non potuit, &
ad

ad exitum perducere, gero: scio enim illum in animo
habuisse magnum opus efficere, ac subtiliter copioseq;
de tribus plenioribus polioribusq; linguis, tamquam
alterum M. Varronem, vno volumine disputare, ac
tuo nomini vigilas has suas, qui in idem studium toto pe
ctore incubueris, & ad summam intelligentiam ipsa
rum perueneris, apte (vt aiebat) congruenterq; dica
re: & si ille doctissimus vir suum in primis proprium
que sermonem celebrauit: ipse vero non eum tantum
in quo natus erat, sed Græcum etiam Latinumq;, cu
ius imago quadam ac vestigium noster est, frequenta
re & colere cogitabat, & veterem etiam ipsorum ori
ginem fontemq; aperire: atque omnem denique coniu
ctionem ipsorum ornatumq; explicare. Cum igitur
magnus hic ipsius conatus impeditus fuerit: & in me
dio cursu tam præclara voluntas fracta, qua ego ra
tione potui, volui desiderium ipsius implere. Quare
hoc amantissimi tui hominis leto animo munus accipe:
teq; id ab auctore ipso, architectoq; huius operis accipe
re existimato, qui tui semper studiosissimus fuit, ac
dum vixit demum (nihil enim maius excogitare valeo
ad ostendendam egregiam ipsius voluntatem erga te)
cumulate tibi in amore respondit. Vale Roma.
Idib. Nouemb. M D L X I I I.

PETRVS VICTORIVS
HANNIBALI ORICEL
LARIO S.



QUOD mihi suauissime Hanni-
 bal onus imposuisti, quam-
 uis sua sponte magnum fue-
 rit, numquam tamen graue
 mihi duxi: libenter enim id
 tuli: & in singulis ipsius par-
 tibus tractandis voluptatem
 non paruum inueni. nam,
 quod in primis alicui mole-
 stum esse potuisset, dubium
 que ipsum habere, an edi hæc scripta oporteret, mihi ne-
 gotium non exhibuit: nec ullam in partem suspensum
 me tenuit: iam pridem enim mecum statueram rectum
 hoc esse; dolebamq; potius tam sero id fieri: ac de re, que
 scrupulum non magnum in se haberet, tantopere deli-
 berari. Impulit autem me in hanc mentem, fecitque ut
 certi proffusus animi essem de omni hoc facto, iudicium;
 quod olim feceram de ingenio doctrinaq; huius eximij
 viri, in quo me socios comitesque multos habere præcla-
 re intelligebam: qui & ipsi existimabant nihil limatius,
 ac politius his monumentis inueniri posse: nihil auctoris
 ingenio acutius perfectiusque. Quos certe fructus an-
 tea admirabilis nature ipsius videram: videram autem
 multos: hanc profecto opinionem de illo in animo meo
 excitant. Possem autem multa de summo ingenio hu-

b ius

ius hominis : infinitaque cura , quam in hoc genere scri-
ptorum poneret , vere prædicare , quæ me ab omni repre-
hensione culpaque temeritatis (vt opinor) vindicarent : at
que id non tam vt me tibi , cui hæc omnia nota & perspe-
cta sunt , quam vt alijs omnibus purgarem . Sed , cum
res in eum locum iam venerit , vt cuncti mortales ex his
præclaris monumentis specimen aliquod capere illarum
rerum facile possint , vel potius perfecte de ipsis existima-
re , iudicia ipsorum non præoccupabo : nec crimen arro-
gantiæ subibo . de his solum alienis scriptis illud ex animo
pronuntiabo , quod M . Cicero aliquando de suo quo-
dam libro , quem valde probabat , ac perfectum vndique
esse arbitrabatur , in epistola quadam scripsit . me non re-
cusare , si forte aliter quam ego sentiam , de illis aliquan-
do existimatum fuerit , quin quantum de his libris , tan-
tundem de mei iudicij fama (si vlla ipsa est) detrahatur .
Nam non parui etiam ponderis , vt hoc securo animo fa-
cerem , apud me fuit , quod videbam hos viros his scriptis
sempiternæ memoriæ commendatos , quorum laudem ac
gloriam libenter omnes probi & honesti homines audi-
turi essent , ac si quid etiam maculæ ac vitij aspersum fo-
ret in eorum splendore decoreque illustrando , ipsum il-
los dignitate eorum captos , & iucunditate illa persusos ,
non animaduersuros . improbum vero fuisset , ac nefarij
sceleris profecto simile , tam præclarum argumentum oc-
cultare , ac vitam horum honestissimorum virorum per
petuis tenebris dicare : quamuis enim ingenti ipsorum
virtuti scriptores deesse potuisse non videantur , non ta-
men (nisi fallor) facile parem huic nostro , & iudicio , &
facultate dicendi , præconem illa inuenisset . Quod ve-
ro pertinet ad labores , quos magnos variosque sustinui ,
vt liber purgatus & ab omni macula vacuus exiret , om-
nem ego hanc molestiam indignitatemque deuoravi ,
vt amici hominis laudi honorique seruirem : nec vm-
quam odiosos mihi labores illos esse cognoui , non modo
enim

enim ipsos grata memoria sodalis condidit, sed omnem
penitus inde tristitiam amaroremque depulit. Leuauit quo-
que non nihil hunc meum laborem, quod eodem tempore
me gratum tibi facturum esse cognoui, quem etiam per-
spexi eidem rei toto animo studere, ac curare quanta ma-
xima diligentia posses, ut hæc affinis tui monumenta inte-
gra prodirent. in quo ego officium hoc tuum vel pieta-
tem potius, vehementer laudo: ac maius quidem te in il-
lum beneficium contulisse iudico, cum memoriam ipsius
ita viuam tenueris, quam si illum in vitam reuocasses:
cum enim ille mortalis natus esset, necessario non multo
post extinctus fuisset. hæc autem (ut spero) eterna erunt,
& nulla iniuria temporis vetustateque delebuntur.

Remitto igitur ad te librum excusum, & iam commu-
nem omnium, publicumque factum, qui prius tuus pri-
uatusque erat, vel potius magis nunc, quam umquam,
tuum, cum ornet plurimum, atque omni dignitate au-
geat eum, qui tibi auunculus fuit, ac veris proprijs-
que ipsius laudibus celebret, non suspectis & aliunde,
ut sæpe contingit, ascitis. quin autem redundet quo-
que in te aliquid huius gloriæ dubitandum non est: neque
etiam parui illud estimandum. Gaude igitur non parum
eximio hoc tuo ac præstanti bono, contigisseque tibi in
vita cum alijs multis animi & fortunæ donis, ut nascerere
e forore huius præclari viri: & si es tuo nomine nobilissi-
mus, non mediocri tibi laudi ducito: præstatoque te di-
gnum, ut facis, tanta sanguinis egregiæque virtutis con-
iunctione. quin certe te ille plurimum amarit, & summa
cura studioque mores ingeniumque tuum expoliuerit,
dubium non est. Sed hæc non sunt huius temporis: Il-
lud magis addendum est, & ipso tota hæc epistola conclu-
denda. Gratum admodum, acceptumque mihi munus
tuum fuisse, præclarissimum honestissimumque mune-
rum omnium, existimareque me beneficio hoc valde ho-
norem meum creuisse, postquam, de quo tecum prius se

b 2 dulo

dulo egeram, efficere noluiſti, vt perſonam aliquam tan-
to dono digniorem inuenires: ſatis enim me, ſatſque te-
ſtimonijs ipſius crebris in hoc volumine ornatum puta-
bam, ac mihi aliquo modo eternitatem partam rebar.
Nam conſuetudinem illam antiquorum Græcorum non
improbo, quam tu in tuis litteris attigiſti. vnde memo-
riæ proditum eſt quendam ex illis, ſapientiæ ſtudioſum,
habitum fuiſſe eo tempore contumacem, qui nullum vni-
quam ſuum opus ad principem aliquem virum miſerit,
cum multa præclare ſcripſiſſet, quaſi eos contempſerit,
& illo honore indignos putarit. Romani vero ſcripto-
res, illi veteres: & qui floruerunt ante, quam reſp. in vni-
uſe poteſtatem caderet, hoc non faciebant, neq; inſtitutum
illud ſeruabant, quia maiores nullos ſe, aut opulentioreſ
habebant: quare ad amicos, familiaresque ſuos hoc tradu-
cebant, quos tu imitari voluiſti, cum tamen contra hac
arſe magna copia ipſorum ſit. Sed poſtquam tu aſſir-
mas hoc etiam in mentem auctori ipſi veniſſe, vt me hu-
iſcemodi aliquo munere honeſtaret, non poſſum
id, vt cetera ipſius omnia conſilia factaque,
non magnopere laudare: eoque nomi-
ne immortales tibi gratias agere.

Vale. Florentia IIII. Id.

Iun. MDLXIII.

PETRVS VICTORIVS
LECTORI S.



NON putavi alienum huma-
nissime lector de non nullis
te admonere, quæ tibi cogni-
ta esse oportet initio huius
noui operis perlegendi: non
tam nostri muneris ornan-
di causa, et auctoris ipsius
celebrandi, quam ut laborem tuum leuem, et in-
struam te ita, ut uerius iudicare de omnibus his
paruis ingenij magni monumentis possis. præser-
tim autem ijs ipsorum partibus, in quibus quip-
piam ignoratum aut existimationi ipsius labis ali-
quid adportare, aut sensum animi tui impedire pos-
set, diligentius id faciam. nam quædam sunt, quæ
nulla mea opera egent: nec suspensum te ullo pa-
cto tenere possunt, quia non minus ipse quam ego,
statim ut legeris, percipies cuiusmodi illa sint,
et quantum ipsis tribui debeat. Hæc autem sunt
primum carmina, quæ primum etiam locum obti-
nuerunt. illa uero uarijs temporibus condita sue-
re,

re. quamuis maiorem ipsorum partem scripserit
postremis uitæ suæ annis, cum se in Euganeos
montes abdidisset: recessumque illum coleret, in
quo non paruo temporis spatium bene beateque ui-
xit, nam et multo melius illic, quam alibi umquam,
ualuit, & totum se litteris scriptiōibusq; inuol-
uit: unde si se auelli passus non esset, & uolumen
adhuc eum superstitemque haberemus: & uolumen
hoc plenius, copiosiusq; manibus tereremus.
Sed multo plus apud eum consilia aliorum ualue-
runt, quam uerum ipsius iudicium, quod fecerat
de fortunæ uarietate, inconstantiaq; rerum huma-
narum; quæ non satis prudentia consilia inuitum
ipsum illinc retraxerunt, & quasi de statu mentis
deiecerunt. Huius autem animi ipsius testis e-
go (ut opinor) non omnino leuis esse possum, qui
cum eo illo ipso tempore totum pæne diem locutus
sum in itinere: cum ille, pontificijs litteris euoca-
tus, Flaminia uia Romam profisceretur: oc-
curri autem ipsi Disauri: uisus enim mihi est non
ualde securi animi fuisse de euentu illius consilij,
doluitque sibi inuito, ac recusanti extortam fuisse
bonam mentem, in qua manendum sibi esse, quod
reliquum erat uitæ, secum deliberauerat. Quod
sequitur in editione hac: pertinetque ad uitam no-
stram informandam, & multis grauiusque mole-
stijs liberandam, multo prius ab ipso scriptum fue-
rat: cumque illud sæpe Romæ lectum & ponde-
ratum

ratum esset ab eruditis & ingeniosis uiris, quorum
in ea urbe omni ætate magna copia fuit, semper
eorum iudicijs maxime probatum fuit, & summis
laudibus in cælum sublatum, & propter oratio-
nis elegantiam & propter sententiarum gravita-
tem, totiusque illius disputationis acumen & sub-
tilitatem. Vita præterea Petri Bembi, in qua
ille litteris mandanda multum laborauit, ut amici
hominis, & qui in iisdem studijs, quibus ipse dedi-
tus erat, totus occupatus fuerat, atque in ipsis ui-
tam cum summa laude consumpserat: (quamuis in
ipsa nihil amicitiae dederit, & omnia summa cum fe-
de uereque exposuerit) perfecta ab eo expolitaque
fuit. Contareni uero uitæ, numquam satis lauda-
ti hominis, quamuis omnes graues & honesti uiri in
eius doctrina, probitate, castitate, prudentia, pie-
tate erga deum celebranda inter se contendere ui-
deantur, non omnes numeros absolutionis assecuta
est, neque extremam auctoris manum obtinuit:
ut, quemadmodum ille uir integer, & undique per-
fectus absolutusque fuerat, ita etiam libellus, qui ui-
tam ipsius explicat, & cuncta hominis consilia fa-
ctaque memoriæ prodit, nulla parte mancus debilis
que foret. Inuidisse igitur tantæ ipsius gloriæ ali-
quo modo fortuna uisa est, nec passa fuisse, ut quem
admodum in huius summi uiri uita nihil labis aut
culpæ inesset, ita etiam omnis macula notaque ab
his politissimis scriptis abesset. quanto magis au-
tem

tem illa fini extremoq; propinqua est, tanto magis
rudis inchoataq; est. quod ijs omnibus, qui legent,
cognitum esse debere existimaui. ne siquid forte
illic incuriae uitijq; aliquando offendatur, illud au
ctori assignetur: ipsiusq; inscitia aut negligentia
commissum esse credatur: nemo enim est scriptor
eruditus, laudisq; alicuius et gloriae cupidus, qui
non diligenter sua scripta relegat, ac nouo quo
dam studio laboreq; suo illa purgare ac nitidio
ra reddere conetur: cum hic noster in primis in
ea re diligens accuratusque foret, & plurimum
studij in suis omnibus laboribus emendandis adhi
beret, quod morte praeventus, aut subitis magnis
que occupationibus inde abreptus, praestare in
eo, quod maxime ornare & omni uirtute expolire
cupiebat, non potuit: cum argumentum ex senten
tia nactus esset, & quod omnem ornatum lumen
que orationis sustineret. patet autem quanto ani
mi ardore aggressus hoc sit, & quale quasi uesti
bulum aditumq; huius praecleari operis struxerit.
Restat nunc, in quo maior adhuc scrupulus, mea
sententia, est: quodque magis me sollicitat honoris
causa huius praestantissimi uiri, labor quem po
suit in uertendis in Latinum sermonem contioni
bus Thucydidis: cum enim semper arduum esse ac
difficile existimaui conuertere aliquid e Grae
cis scriptoribus (siquis recte & cum mediocri
etiam laude manus hoc obire uelit: nam, ut pleriq;
hoc

hoc faciunt, qui nullo ornatu adhibito, nullo sele-
lectu uerborum, nullo iudicio, quo quo modo sen-
tentias expressisse contenti sunt. si hoc etiam ipsum
præstare possent, nihil est tam proclive & para-
tum in primis semper durum & laboriosum puta-
ui attingere hunc scriptorem, & aliquam ipsius
partem in alium quempiam sermonem comporta-
re. contiones uero has propter obscuritatem sen-
tentiarum, orationisq; breuitatem, ne dicam aspe-
ritatem & durtiem, maiorem adhuc molestiam in
se continere non sine causa (ut arbitror) credidi.
Et tamen hic noster tot tantisque difficultatibus
deterritus non est, sperauitque se posse studio &
diligentia sua ipsas superare: uel potius ingenij &
industriæ suæ periculum facere uoluit: experiri
que, ut fuit semper auidus ueræ laudis ac gloriæ,
an ex hoc quasi certamine honeste discedere pos-
set, & tamquam palmam inde domum reportare:
nihil enim sibi umquam facile pronumq; proposuit,
sed semper cum ijs, qui summum locum in qualibet
laude tenent, contendendum putauit, & aliquos
etiam ipsorum fortasse uicit & omni honore spolia-
uit: hoc enim uerius esse puto: cum compertum ha-
beam, maiorem partem horum laborum ab ipso ex-
ercitationis causa fuisse susceptam, cum maiora
quædam meditaretur, ac doctrina ingenioque suo
digniora. ipsas tamen quoque edendas putauit, ma-
gis utilitatis aliorum causa, quam illius ipsius de-

A coran

corandi, qui multum operæ ac diligentia in ipsis po-
suit, quippe cum nihil, temptatum ab ipso, iudicem
negligendum: huiusmodique, ut nullum fructum
ferre possit studiosis, habendum. nec tamen hoc
quoque (ut apparet) opus absoluit. nam conatum
hunc magnum ingenij ipsius summam laudem inuen-
turum fuisse, si exitum habuisset, dubitandum non
est: fecisset enim, ut prudentissimi grauiusq; scri-
ptoris orationes subtilissimæ et magnorum consilio-
rum plenissimæ, eleganter et erudite scriptæ, ab ijs
etiam legi possent, qui illius ipsius sermonis, quo
primum scriptæ fuere, rudes & expertes omnino
sunt: ac ne nunc quidem, & si omnes illæ expressæ
non sunt, dici potest id non aliquo modo præstitis-
se: uel prope saltem ad id ipsum accessisse: qui enim
primi ad rem aliquam arduam aggrediuntur, ra-
tionemque illius laboris superandi ac uiam mon-
strant, ij aliquo modo illius negotij, difficilisq; ope-
ris confectores haberi & appellari possunt. Siqui
autem extiterint, qui in aliquibus locis ab hoc no-
stro interprete dissentiant: atque alium fuisse sen-
sum auctoris, quam qui ab ipso expressus est, con-
tendant, ij meminisse debebunt, semper habitas es-
se has orationes obscurissimas, & ijs etiam tempo-
ribus, quibus sermo Græcus uigebat, & hic lucu-
lentus scriptor in manibus disertorum erat, nego-
tium ipsas faceßere solitas ijs, qui ipsas accurate le-
gerent, quippe cum M. etiam Cicero ita de illis
existima

existimauerit. & hoc suum iudicium monimentis li-
terarum mandarit : cum enim Thucydidem ipsum
magnopere laudasset, quamuis, contra sententiam
quorundam, oratori nullo modo utilem, nec foren-
si generi dicendi accommodatum affirmasset, hæc
addidit. Ipsæ illæ contiones ita multas habent ob-
scuras abditasque sententias, uix ut intelligantur.
Si igitur tanta caligo ipsas semper textit, ut uix lu-
minibus penetrari ad multas partes ipsarum eo quo
que tempore potuerit, quid mirum si nunc, in maio-
re multo harum rerum cæcitate, diuersa ingenia,
& ea quidem acuta & ualde exercitata, diuersos
sensus inde eliciunt, & aliqua opinionum uarieta-
te distrabuntur. Nam iudicium huius nostri aucto-
ris nullo modo arbitror contemnendum, cum sit no-
tum omnibus & exploratum quanta fuerit acies in-
genij illius, & quantam curam diligentiamque ille
adhibere sit solitus in ijs omnibus, quæ litteris pro-
debat, & in manus eruditorum peruentura uide-
bat. præter quam quod cum ille natura consuetu-
dineque factus esset ad res magnas publicasque &
cogitandas & administrandas, multo melius ad
occultos hos reconditosque sensus peruenire pote-
rat, quam qui numquam in re publica gubernanda
uersatus esset : nec ullo tempore cogitationem ali-
quam talis hominis propriam suscepisset. conside-
ret demum secum, si forte ipse antea hoc opus ag-
gressus esset, quam sæpe multumque secum dubita-

A 2 tu=

turus fuisset, & in non paucis fortasse locis hæsu-
rus, ut humanius clementiusque postea de scriptis
aliorum iudicet. nam hoc in primis genus exercita-
tionis expositum esse uocibus maleuolorum, & fa-
cile ab obrectatoribus reprehendi accusarique
posse, omnes nouerunt: nulli enim adhuc in hoc ne-
gotio ita felices fuerunt, ut non incurrerint in ma-
ledicta inuidorum: inuenerintque aliquos, qui ex
eorum erroribus laudem sibi comparare studie-
rint. Sed hoc relicto, in quo ille aut uacuis est ab
hoc omni periculo maloque, aut si qua illic offensio
est, nostra est, qui ea, quæ ipse animi causa exer-
citationisque studio scripserat, edere, & in ma-
nus doctorum hominum tradere uoluimus: cum
sciamus ipsum plures epistolas summa, elegantia et
eruditione refertas uarijs temporibus scripsisse,
paucas tamen, quas ederemus inuenire potuimus:
cum bona pars illarum aut amissa sit, aut una cum
alijs quibusdam ipsius diuersi generis scriptis custo-
diatur, quæ in his locis collocata sunt, ut his tem-
poribus commodè tractari, inuestigareque non po-
tuerint. Nam doctam illam & grauem episto-
lam: si tamen epistola ipsa appellanda est, quæ an-
te historiam Petri Bembi sine nomine iam excusa-
fuerat, putavi auctori restituendam: quod enim i-
psum tunc mouit, postquam ut scriberet eam coa-
ctus est, ne cuius esset eo tempore intelligeretur
(noluit enim existimari nimis honoris cupidus, si
suum

suum nomen in fronte alieni operis, & illius quidem
ualde illustris & clari, adfixisset: nec suæ digni-
tatis id esse ullo pacto arbitrabatur) cum incom-
modi nihil nunc gignere possit, non putavi attenden-
dum: contra enim hoc tempore nulli alij rei stude-
tur, nisi ut quantum fuerit ingenium hominis ab o-
mnibus intelligatur: atque ita ope horum monimen-
torum uiuum ipsum celebrequ; contra tenebras mor-
tis uetustatemque teneatur. quare non putavi
partum illum esse negligendum, qui & ipse meo iudi-
cio ad nomen ipsius celebrandum ualde aptus est.
quod autem narraui, uerum esse noui cuncta illa
nobilis & beata ciuitas. Si ipsæ igitur, quæ adhuc
latent & abditæ sunt: & hæc, quæ reddita ipsi
est, colligi potuissent, non parum (ut arbitror)
uolumen hoc auxissent, et utilitatem etiam non par-
uam ijs, qui legerent, attulissent. Idem etiam ac-
cidit de alijs non nullis, quæ præclare inchoaue-
rat, ut alia de causa, quia scilicet plane perfecta
non sunt, ipsa coniungi cum his non potuerint, &
specimen quoque & ipsa dare cum reliquis magni in-
genij, singularisq; doctrinæ huius summi uiri. Sed
multo maior iactura fuit, quod ipse mature extin-
ctus est, qui non solum hæc, quæ instituerat, absolue-
re & expolire potuisset, uerum etiam alia maio-
ra multo & grandiora conficere. quod ipse, ut iam
dictum a me est, & multis quoque notum, tota men-
te cogitabat, & magna cupiditate huius eximij o-
peris

peris efficiendi ardebat : is enim profecto fuit, &
tali ingenio præditus is uir, ut, si diutius uixisset,
gloriam omnium, qui inferiore hac ætate uixe-
runt, omni genere suorum scriptorum, non solum
adæquaturus, uerum etiam superaturus esset.
Vale.

Pateat vniuersis & singulis qualiter R. Do.
Alexander Strozza Præpositus Flor. In-
quisitor hæreticæ prauitatis, visis latinis
monimentis Ioannis Casæ, partim versis
bus, partim soluta oratione scriptis, ea tã-
quã in nullo discrepantia a sancta & cath.
doctrina sacrosanctæ Rom. ecclesiæ im-
primendi facultatem concessit, Die 7, mē-
sis Iunij. 1564.

Alexander Strozza.

In hoc volumine continetur.



<i>Arminum Liber,</i>	<i>1</i>
<i>De officijs inter potentiores,</i>	
<i>& tenuiores amicos.</i>	<i>27</i>
<i>Petri Bembi vita.</i>	<i>53</i>
<i>In historias Petri Bembi praefatio.</i>	<i>77</i>
<i>Epistola ad Ranutium Farnesium Car.</i>	<i>82</i>
<i>Epistola ad Petrum Victorium.</i>	<i>85</i>
<i>Gasparis Contareni vita.</i>	<i>89</i>
<i>Plures orationes Thucididis</i>	<i>145</i>
<i>Epistola Petri Victorij ad Jo. Casam</i>	<i>201</i>

IOANNIS CASAE
CARMINA.



LAMINII manes, instar mi-
hi numinis umbra
Flaminij, hæc campis cernis ab
Elysij?
An tibi, quæ nostri fuerat tam
feruida cura

Cocytus nigris eluit amnis aquis?
Tu solitus Priuliq; ausus compescere inanes,
Et molli versus frangere voce truces.
At nunc ille malo Galateum carmine vexat,
Et sanctum nobis pellit ab vrbe virum.
Tu ne ausus Priuli Galateum pellerè ab vrbe,
Aspera; in dulcem dicere verba senem?
Tu ne auctor Romæ montani vt munera vici,
Furnosi vt curam præferat ille laris?
Aureus ille senex, vitæ cui licia Parcæ
Intacta ducunt candidiora niue?
Qui nec Principibus, vrbi nec scilicet agræ
Formidet medicas adplicuisse manus?

B

Quemq;

CARMINA

Quemq; adeo nemorum custos, pecorisq; magister
 Mandarit sacro summus adesse gregi,
 Hinc eat, & fuscas ignoti ad flumina Melphæ
 Pascere cum vili coniuge pergat oves?
 Quid si animis iuuenumq; senumq; est illius æque
 Dulcior Hybleis alba senecta fauis?
 Quid si illum retinent quicumque Amaryllida curant,
 Huius ad exemplum peccet ut illa minus?
 Uxorem hunc tamen ad vetulamq; humilemq; releges,
 Frigida ut in viduo ne cubet illa toro?
 Quæ puras pridem didicit perducere noctes,
 Et monitis casta est & proba facta viri.
 Sed tu Flamini potius iam nobilis umbra,
 Et multum insigni conspicienda lyra:
 Nite ceca huius cepere obliuia lucis,
 Cum tibi mors avidas intulit atra manus:
 Huc ades, & Priulum compescas; nam male nobis
 Iandudum insolito versus in ore sonat.

VT capta rediens Helene cum coniuge Troia,
 Lento homine atque animi lenis, nimiumq; remissi,
 Incidit in eadem ipsam & funus forte sororis,
 Quam præceps miseri virtus iugularat Orestis,
 Succisam de more comam missura sepulto
 Germanæ cineri, fertur dempsisse capillo
 Vix tandem e summo paulum, ne forte placeret
 Tonsa minus metuens Spartanis improba mæchis:
 Haud aliter Calatee malis erroribus actus

Nuper

Nuper ego, & Phrygios nautas, Paridemq; secutus
Aufugi longe: atque idem, redijt tamen vt mens
Ad sese peregre nimium remorata, proterua
Ornamenta fugæ sensim lenteq; repono:
Parui etenim refert Veneris ne cupidine, vt illa,
Incensus, pulchra vel saucius ambitione,
Tramite declinem recto, violemq; pudorem.
Debueram dudum crinem secuisse decorum:
Hoc est argentum, comites, & stragula, cœnas,
Lususq; & musas missas secuisse loquaces,
Intrepidus nuper curatae mentis & acer
Corrector: sed enim prauus populi pudor obstat;
Hunc propter pauidi phaleris amicimur ineptis:
Nec sicci madidam audemus, veriti bene potum
Conuiuiam vulgus, collo dempsisse coronam.

Dedecus ambitio pulchrum est, vitiumq; fauentis
Laudatum populi studio: I bone quo tua uirtus
Te uocat, i pede fausto, et nomen laudibus auge,
Aequales aiunt comitesq; piq; propinqui:
Quod si natura, aut ratio, uirtutis habendos
Germanas propriasq; notas euincat honores,
Publice ut as signant, extemplo ut noscere, nummus
Quanti quisque siet, possint: per turbida Ponti
Curramus rapidi maria, & gelidas properemus
Ipsa hieme in media tantum ad decus ire per alpes,
Obliti podagræ, neruos urentis & artus.

Nunc prauos inter tituli discrimen inanes,
Atq; bonos nullum signant: sæpe & toga pectus

B ij

Candidius multo, & maius pulla arctaq; texit,
 Quam laxi, Tyrioq; infecti murice amictus:
 Nam si legitimum nobis virtutis inurant
 Fasces & tituli signum; mercetur honores
 Ipsa vel vita, informis ne prodeat: inq;
 Excusus, Priulusq; bonus, simplexq; Fæternus,
 Prudens & vera virtutis cultor uterq;
 Vitrea quos numquam titillat gloria, febris
 Purgatos huius. Nos quamvis cesserit horror.
 Atque æstus, sani nondum tamen vsque valemus;
 Sicq; animus positam reminiscitur ambitionem,
 Vulnus ut obductum prurit tamen, hæret a fello
 Ut nudo clitellis nonnumquam vlcus in armis.

Vos agite aureolum tondete a vertice crinem
 Lasciuo huic capiti, atque domi cohibete, seueri,
 Non Menelaus vi, erronem me: tu, Priulusq;
 Utroque & melior Polus (quod dicere vestra
 Pace mihi liceat) nitidaq; extrudite Roma
 Restantem: ut duri mulam quandoque cerebri,
 Luctantem in trivio, atque equiti parere negantem;
 Sibilo agunt primum & magnis clamoribus; inde
 Prosiliunt longis armati fustibus: illa
 Nixa diu, tandem plagis deterrita currit.

SI te cura vigil sophiæ delectat: & acre
 Ingenium vires si sufficit, utere porro
 Munere tam claro diuum: sic rectius atque
 Commodius multo, longeque decentius æui

Quod

IOANNIS CASAE

Quod tibi cumque neant parca victurus amica.
 Nec de te plebis quæ sit sententia, magni
 Securus pendas: ignarum pleraq; vulgus
 Prauo metitur modulo: tu negliges, & isto,
 Qui nunc te exercet, fugias decedere campo:
 An populi arbitrio quisquam, plebisq; bonorum
 Posthabeat sanus plausum, quem iure feres tu:
 Quandoquidem cunctos quicumque feruntur eisdem
 In spatijs, iam recto nimirum ac sapiente
 Iudice præcurris Bembo: cum hic interea nos
 Desidiæ arguimur populo; ne forte probari
 Credideris genus hoc vitæ simplex: etenim ad res
 Versiculis, missisq; iubent accedere nugis:
 Ex umbra & tenebris in solem exire, diemq;
 Et gnauim me segnem culpant: Altera blando
 Pars animum integrum queritur me dedere amor
 Per luxum, & patruum verbis obiurgat acerbi:
 Qui simul ac stomachum, quamquam permulta ferenti
 Ut placem, moriunt: rege ro grauiora receptis:
 Ut proprium seruas auri sceleratus aceruum
 Undiq; congestum: neglectis, iura fidemq;
 Exponis tota venalem, legibus, vrbe:
 Cum miserum atque inopem deiectum rure paterno
 Deseris, atque adeo prudens, nummisq; redemptus
 Prodis: & emunctum producta lite clientem
 Usque adigis, dum ades etiam proscribat auitas:
 Turpiter aut ultro seruis, plerumque furentis
 Mancipium domini: Manibus teni ferre catinum

Cananti

Cœnanti ingenuis? aliam ten' sumere mentem
 Deterioris heri ad nutum atq; aliam? haud animo par
 Est generi, quicumq; suos apud ortus honeste
 Imperio abiectus paret, trepidusq; ministrat.

Quid quod amicitia, caro dum cuncta lucello
 Metiris, cultus tu nullos, nullaq; nosti
 Officia: anormiq; decor concinnus inepto
 Quid distet nescis? pecudis næ nos cute tectam
 Naturam inspicimus. quid publica cum geritur res
 Per te, si furtis quo sit locus atq; rapina,
 Bellorum causas iussus præcidere, nutris;
 Desidia, aut tu me censor culpaueris otii?

Flagras ambitione, ardesq; cupidine sæua
 Purpurei, haud uitam hanc mores ue decentis, amictus.
 Uror amoris ego haud me dignis ignibus; esto
 Quando ita me insinulas; quid tum? peccamus uterq;:
 Nil est cur tu me prior incuses, grauiora
 Offendens multo, & nimium distantia recto:

Nam qui uel paruo conductus peierat, & qui
 Tamquam turbata victum sibi queritat unda
 Piscator, pacem bellis ubi miscuit, idem,
 Iudicium atq; crucem si demas, ire latrones
 Inter iam uelit & ingulare homines. sua quisq;
 Defendunt lenes uitia & minuunt; aliena
 Carpere pleriq; austeri, nimiumq; seueri.

Adde quod incurata gerens, serpentinaq; intus
 Ulcera corrupto tandem pulmone peribis;
 Purgandum illius cum te committere morbi

Non

Non medico studeas ; annus non vnus & alter
Imminuat quicquam : pulchris macrescere captum
Diuitijs frustra tantum doleamus amici :
Ne mea post paulo febrisq; reliquerit ultro
Frigidior veniens morbum cum leniet atas,
Intereaq; veterinus non animum grauis vrget ,
Ne tamen insequitur populus : quid si nihil omni
Est actum in vita nobis , quod ledere quemquam
Possit ? non ego rem, mihi sollers quam pater auxit ,
In Venerem effundam , neq; lite petitus amator
Iniusta, omittam fundumq; laremq; tueri:
Nec fuerim , mimam quo sit mihi laxius unde
Munerer, vsquam inopi nimium contractus amico :
Deniq; non mos , non atas alienior : adde
Ille etiam laqueo statuit qui nectere collum
Aurata ne trabe, an de putri pendeat ulmo
Si quicquam referre putas ; quam ego honestius ac tñ
Intereo ; seu me Musis & Apolline claro ,
Seu quis me pulchro captum culparit amore :
Ne tamen insequeris colloq; ac faucibus anguis
Inflat viro vitam deducere inertem
Indignum clamat fucos, segnem malus vrget :
At tecum siquis sic egerit : Itur ad urbem
Europa ex omni , credo , vt vestigia summo
Inspiciant veteris veneranda in colle Quirini :
Sive in Auentino Romæ . ac non perditus exul
Expes vt quisq; est, huc se se contulit, vt si
Bargulum ad Illyricum dicas , latrociniumq;

Con-

Concessum; nimium merito dicatur acerbis.

Oderit & rabidum populusq; patresq; venenum.

Non ego: nec vulgi si irritor vocibus hoc nunc

Immeritum quemquam latrarim: possum ego multos

Exinere e numero, turpis contagia morbi

Quos nulla attigerint, sanos, recteq; valentes:

Sincerum ut Molsæ pectus, lauere salubres

Pierij quem fontis aqua: puroq; Camæna

Curatum cantu seruant. studioq; referti

Spectatus dudum tanto plausuq; theatri

Ubaldinus, inops agriq; larisq; paterni,

Virtutis locuplex. populo spectante Quirini

Hunc non donatum scæna decedere turpe est.

In mulieres nuptas Hippolyti.

Ex Euripide.

C Oncinnum in auras luminis hominum malum

Cur protulisse dixerim te feminas

Iuppiter? etenim erat si serendum hominum genus,

Haudquaquam oriri debuit de femina:

Sed emere liberorum oportuit sibi

Semina genus mortalium, ferens tua

In templa tantum aut aris, aut auri grauis,

Ferrine, quanti vnus foret quisq; pretij,

Domosq; habere feminis sine liberis.

Nam nunc in ædes vehere cum malum parant,

Extemplo opes pro eo rependunt patrias.

Atque

Atque hoc liquet malum esse magnum feminam.
Namq; ad alienos pellit hanc ex ædibus
A se pater progeneratam & eductam, suis,
Additq; dotem, ut liberet sese malo:
At ille contra, stirpem in ades noxiam
Qui ad se recepit, letus est cum pessimam
Pulcherrime ornat statuam, & auro & purpura
Certat, beatas sumptibus miser domos
Exhaustiens: atque hæret: etenim splendidis
Affinibus gaudis uxorem asperam
Perfert: proba at si ea, sed propinqui futiles
Euenerint, bono miseriam comprimit.
Verumtamen commodius euenit, quibus
Nullius vxor sedet in ædibus preti,
Ac fatua: nam sapientem ego odi feminam:
Ne ea nec intra venerit limen domus,
Quæ, quam mulierem sapere par est, plus sapit:
Facilius etenim perspicaces edocet
Astutias, dolosq; Cypris improba:
At fatua mulier ob stoliditatem sapit.
Penetrare nempe ad feminas oportuit
Nulli licere familiarium, simul
Sed beluarum includere rabiem domi
Loqui insciam, sermonem ut inferre alteri
Ipsæ nequirent, nec alij illas adloqui:
Nunc facinora, intus quæ mala mala cogitant
Domina, foras hac familiares efferunt.

Cum ab Vrbe profectus, Venetias iret.

HUmida Tyrrheni fugientem flamina venti
 Calumq; pestilens Lati,
 Ne Venetum excipient mitissima littora, & aure
 Salubriores, putribus
 Iam membris semio, & podagra turgentibus acris
 Quæ flare suerunt nec mala
 Imbuta tussi, neq; in ipsis fluctibus udae
 Faerne, mireris licet:
 Prorsus, qui Romam liquit, rerum ille carebit
 Pulcherrimo spectaculo;
 Nec cœtum æque illustrem hominū, nec Palladis æque
 Instructa pectora artibus,
 Terrarum ut cunctas lustret circumuagus oras,
 Offendet vsquam gentium;
 Fragmina nec muri aspiciet maiora uetusti
 Non diminutis urbibus;
 In primis Bromij latices & frigida siccis
 Requiret idem faucibus
 Pocula lympharum sub terras condita opacas,
 Aut fossa Lucanam in niuem:
 Ipse ego, seruenti delapsam ex imbrice lympham
 Nuper, nec altos in scrobes,
 Et uappam, salices inter quæ nata palustres
 Ceni saporem patrij
 Potanti offundet, medijs feruoribus, ardens

Arente

*A*rente fauce traxero:
*A*st idem hospitibus placidos & dulcia pacis
 Impertientes commoda
*M*ortales cernam, & locupletem ciuibus urbem
 Disspar probantibus nihil:
*C*ernam lorica m uolentam, ensesq; superbum
 Inermibus suffragijs
*C*onstrictum, & dira execratum cadis amorem
 Longe exulantem gentium:
*I*llic cum cano prudentia sera capillo
 Paret uicissim, & imperat:
*I*llo se nusquam propendens contulit equum
 Bonae comes concordiae,
*F*raudibus Hesperia ut pulsū est, timuitq; rapacis
 Uncas licentiae manus.

De Vbaldino Bandinellio.

TA M caro capiti iam nimium diu
 Munus Melpomene lugubre, Naniam
 Debemus: querulam prome puer byram.
 Siccis non ego te genis,
 Mœrore aut vacuus pectora lurido
 Laudabo: neq; desiderium morae
 Nostrum diminuunt, aut hominum atterens
 Furtim tristitiam dies.
 Te morum studium, te sapientiae
 Cura, & nobilium fecerat artium

C ij

CARMINA

Ubaldine quies gnaua, operosaq;
 Musarum oria diuitem,
 Non auri, pauidis addere mentibus
 Cordacem validi sollicitudinem,
 Non ostris, experiens quod reparat *Ligur*
 Nobis merce superflua:
 Irritet, fugiens pauperiem, æquora
 Iracunda leui nauita palmula;
 Aestatem Libyæ perferat igneam
 Idem, idem Aemonias nives,
 Vestigans lapides, femina quos petis
 Vel flauo capiti, vel tereti decus
 Collo. Mentibus Atlantiades *Deus*
 Calcar subdere inertibus
 Ludens dum cuperet, fertur inutile
 Prompsisse aurum, acuens illo hebetes, uti
 Exercet puerum non vegetum nuce
 Mater sedula futili:
 At fortes (quoniam robore stat suo
 Virtus, Peliaca ut quercus, & æquoris
 Saxum Carpathij) nec famula decet
 Auscultare pecunie,
 Nec firmos fragili fidere: desinit
 Fortuna, ut subitis auctior imbribus
 Extemplo aret aquæ riuus inops sua,
 Nimbos si pepulit *Deus*.
 Tu dulcem es Latij copiam adeptus, &
 Graium diuitias, & dominam urbium
Artem:

*Artem: quo mihi nunc & patriæ occidis
Nulto flebilior tuæ:*

Arni mæret enim fluminis accola,

Florens ingenijs accola fluminis

Arni, tot te animi compositis

Theſauris, tacitum mori:

Ut nauium pelago præcipitans notus

Vertit; quæ remorans, largiter alueum

Impletat ſpatioſum: illa Arabum ferens

Gazas, illa ebur Indicum,

Et gratum redolens thus ſuperis ferens,

Et pexa e folijs vellera ſericis,

Aetnae Cereris plenaq; frugibus,

Portus ſtrenua patrios

Ditaret, populos & procul oppidis

Effuſos ſtudio ad ſe raperet lucri:

Nunc ſeni arbitrio voluitur Adria

Cecis obruta fluctibus.

At tu, progenies aurea fulmine

Gaudentis Iouis, o deſere ne meum

Carmen, Ne uſa: diu ſed vigeat ſacri

Cuſtos pagina nominis.

Hic me Caſtaly tramitis arduos

Flexus, Aeoliae hic me docuit Lyrae

Ictus; O nebulam obliuio & arceat

Furnam a nomine ſplendido

Noctem: ne volucris filia temporis

Ne rubiginis atra admoueas meis

Dentem

*Dentem carminibus, neu nigra nubibus:
Condas Italiae decus.*

*Ad Hannibalem Oricellarium nepotem,
diligentissime cauendum esse ab
adulatoribus.*

MEntem blandicia perdere credulam
Norunt non secus, ac mortiferas male
Nultra melle nouerca
Olim cum medicant dapes.
Viro imbuta malo dulcia murmura
Mendacis fuge lingua; & teneras neque
Falsis laudibus aures
Admoris, cupidus puer
Verarum, bona mi decipit indoles;
Et tete excutias, tinniet improba
Nugas cum modulans vox;
Quas atro rapidi ferent
Cum fumo borea & puluere sordido:
Ni quicumque libens dicier audies
Verbis, te labor illum
Rebus finxerit arduus.
Sensus ut iuueni pelliciu intimos
Virgo candida, cum turgidulas tegens
Nulla veste papillas
Molli illum recipit sinu,
Sic laudes animum, vera ubi concinunt,
Per

Permulcere solent : nec mulier tamen
 Ut cantu sine dulcis
 Spernit psallere tibia,
 Sic virtus, populus si taceat, sedens
 Cessabit : nihilo nec minus obsita
 Noctis ferueat umbra,
 Et deserta silentio,
 Quam cum per medias incluta ducitur
 Urbes, & celebris voce fauentium
 Direpta hostibus arma
 Affigit foribus deum.
 Cum laudis faciem sumpserit impudens
 Fraus, affinixerit & cum tibi non tua
 Blanda nomina voce,
 Et dulcem illecebram struet;
 Ne te præcipitem trudat amor tui,
 Ne nugis capiare, vt volucris solet
 Dulci paruula cantu.
 Tecti vepribus aucupis.

Ad Fortunam.

EXpers consilij, quæ pede lubrico
 Incedis, zephyris mobilior Dea
 Et fluctu Ionij incertior æquoris;
 Te, cum leta sinum pandis, & vberes
 Fundis diuitias, ac miseris ades
 Improvisa, boni progeniem Ionis

Dicunt:

Dicunt. Tu ratio, tu sapientia,
 Servatrix eadem crederis urbium,
 Virtutisq; sedens in solio nites;
 Sed mox torua domos regum ubi concutis,
 Et congesta diu munera, turribus
 Deiectis, subito turbine dissipas,
 Vana te comitem stultitiæ ferunt
 Deliram; Immeritum tu, titulo bonis
 Dempto, nobilitas; frena superbiæ
 Atris tu manibus detrahis ebræ
 Successu, & ruere hanc sic temere ad suum
 Rides arbitrium, mox humilem truces
 Vultus deposituram: Ouinam meæ
 Oblita ostiolum prætereas domus,
 Seu tu sanguineis oppida territans
 Bellis, ingrederis per Latium fera,
 Seu pacemq; gerens, & populos beans
 Pennis inuolitas uersicoloribus:
 Nam sic instabilem uisere te meos,
 Vel letam atq; hilarem, pertineam lares.

De Francisco Tornuno Cardinali.

QUO tollor pauidus? quo feror insolens?
 O quæ Castalijs fontibus aureos
 Crines, osq; lauis virgineum, genus
 Magni Melpomene Iouis,
 Cruri purpureos indue candido

Soccos

Soccus : nam iuga transmittimus alpium
Soli : unus enim est mi comes argui
Mendaci metuens pudor :
Vatem diua tuum tu moneas uia :
Si pure colui uestra puer sacra
Feruens mente noua , si senior tua
Nunc uestigia persequor
Quercus umbriferas inter & ilices
Quærens ærias . Non ego diuitum
Vanis edidici perstrepere auribus
Empto carmine : non ego
Corruptus pretio nunc meditor parum
Casta ducere te ad uestibulum domus .
At tu prome puer , prome age barbiton
Cessantem nimium diu .
Spartanus ueluti , per nemus asperum
Dumis insidiantem ut pecori lupum
Egit , cum fremitu & laude fauentium
Pagorum redit ad gregem ,
Villorumq; globos sanguine sordidos
Fert rictu generoso , e iugulis feri
Uulsos hostis , aquas sic repetit sui
Tornunus Rhodani , bene
Defensa Hesperia clarus , & impigri
Compresso celebris militis impetu ,
Bellona ancipitis numina militis
Horrere immemoris diu :
Alterna sedenim ille admonuit serum

D

Fortuna

Fortune, celeri uertere turbine
 Gaudentis uacuum corpus, uti choros
 Lasciua iuuenes ubi
 Ducunt, & Zephyris huc agitantibus
 Atq; illuc, Phrygio Sidonias acu
 Illusas chlamydes, instabili citæ
 Lustrant atria poplite.
 Directa ingrediens passibus æquitas
 Ad normam paribus, nec modulo sibi
 Maiore, atq; alijs commoda diuidens,
 Quorum non dubia est comes,
 Illos ære micans non peditum cohors,
 Non sauis equitum turma frementium
 Horrens cuspidibus terreat, aut mari
 Vectæ caruleo rates:
 Nam recto fauet, & iustitiam bono
 Plerumq; æquus alit Iuppiter exitu,
 Obscuram & tonitru, & fulmine territans
 Fraudem, atq; implicitos dolos
 Nudans. At uigilem fallit amabilis
 Acrem simplicitas, & super aneas
 Accersita fores, & super ardua
 Pernix mania transilit.
 Hanc puro retinens in gremio fouet,
 Sincere Italiam & diligit hospitam
 Tornunus, patriam cuius uti suam,
 Natorum, & memor aureæ
 Cuius coniugis: hunc purpureus pudor,
 Elutisq;

Elutisq; fides candida sordibus,
 Et pressa digitis ore. silentium
 Arcanum insequitur, neq;
 Infandumq; nefas ense domans Themis
 Districto comitem se negat inclito
 Impolluta seni, mundaue ueritas
 Albo lucida pallio.
 Ergo permadidos felle animos nigro
 Regum diluere est ausus, & aspera
 Permulcere manu pectora turbida
 Plena ira, intrepidam struens
 Pacem, quæ manibus sanguineis diu
 Attrectata, magis post niteat, uelut
 Fulgentes lapides, æraue lucida
 Cum tergere uolunt, luto
 Conspurcant: id agens egregius senex
 Celtarum procerum sanguis, & oppida
 Firmans obtinuit Marte labantia
 Quassante, & miseris suas
 Urbes restituit ciuibus, impigram
 Pacem, tela cruenta inter & asperos
 Procudens sonitus ferri: etenim gelus
 Torpens quam peperit timor
 Pacem, seruiet illa, horrisoni simul
 Bellonæ strepitus ingruerint fera,
 Imbellis. sedenim desine feruidos
 Dulcis Melpomene modos:
 Nam nec cuncta pudor fert, neque ueritas

D ij

Cum

Cum lucro alma decorum explicuit caput
Semper : tum melius tecta silentio
Virtus inuidiam latet .

Sunt qui versiculo minutiore ,
Verum pernitiendo atq; perfluenti ,
Tamquam palladi liquore oliui
Complures properent linire chartas :
Atque , araneoli angulos domorum
Ut tela tenui solent replere
Quantumuis facile , ore fila paruo
Nentes longa , ita compleant libellos
Totos uersiculo minutiore :
Hi vatum in numero an ne sint habendi
Vulgus viderit , atque si qua vulgo
Pars vatum est similis , quibus Thalia
Flacci sordeat , optimi poetæ ,
Quod is uersiculo minutiore
Atque perfacili atque perfluenti
Totas spreuerit occupare chartas .

De Margarita regis Gallorum sorore.

HEU mos, ut atris saepe coloribus
Contaminatus purum animum inquinat
Vix eluendis sordibus per
Tedia solliciti laboris :
Ne vitreis & fontibus & coma

Silue

Silvæ virentis letum, & amabile
Ruris silentium sequentem
Aoniæ puerum camœnæ
Mersere sacri gurgite fluminis,
Intacta ut essem candidior niue:
Immunda sed mox polluit me
Roma luto nimium tenaci,
Quod longa nec dum discutiat dies,
Sacri nec amnes hactenus abluant;
Quin horret & me, & ora ceno
Fœda nigro refugit Thalia.
Vulgus venenis vertere Colchicis
Plerasque mentes aptius, eripit
Sensus priores, atque mutat
Alba nigris, maculisque gaudet:
Impurus atra quem populus manu
Tractarit, ille & decolor & niger
Erit diu, obductamque facem
Vix iterans remouebit annus,
Notam relinquens: at mihi candida
Mandanda uirgo est regia pagina
Farnesio iubente, bacca
Purius illa nitens Eoa,
Intaminato digna cani, deæ,
Est ore, lucis Castalijs deæ
Quæ vulgus arcetis profanum,
Et nitido prohibetis amne,
O tetra tandem consilia hæc bonæ

Oblivioni

Oblivioni tradite turbida;
 Labemque nobis rore sacro
 Abluite, illuuiemque vulgi.

Deflet mortem Horatij Farnesij.

TE flebimus flos Hesperia puer
 Madente multis carmine lacrimis;
 Et, debitam laudi Thalam,
 Nenia lugubris occupabit:
 Ille, ense pectus qui tibi candidum
 Traiecit, iisdem vulneribus Lati
 Cecidit & spes, & uirescens
 Italiae decus ense carpsit
 Horati eodem. Non ego sauciam
 Ictu parentem mortifero tuam
 In lacrimas culpam ruentem,
 Nec nudae gemitus puella
 Compescere ausim carmine: lugeat
 Immo illa dulces funere nuptias
 Miscens amaro, nec sat umquam
 Te misera illacrimata sterit:
 Iam nec capillo parcere, nec genis
 Aequum puella est regia, lacrimis
 Efflagita Martem cruentum
 Uberibus, pueri cadentis
 Dulces ocellos, & tua gaudia,
 Quae conciderunt exorientia:
 Ut stella, quae nix dum coorta
 Hesperium

Hesperium occultitur sub aquor .
Non ille auorum , nec soceri immemor :
Dulcique flagrans igne tui , neci
Utro obuios gressus superbos
Intulit , intrepidumq; pectus
Obiecit hosti , qua uiolentius
Bellona nigris feda cruoribus
Est uisa Martis saeuientis
Sanguineas glomerare turmas .
Nunc letus umbras uulnera nobiles
Ostentat inter pulchra , nemus tenens
Beatum , ubi Hectorque & Latini
Sunt ueteres , Rutulique Reges :
At Thespis o grata sororibus
Oblitosi pellere temporis
Idonea umbram , atraque moris ,
Gloria , vulneribus mederi ;
O trade Musis & Polyhymniae
Custodiendum nomen Horatii
Clarum , & domum Farnesiorum
Hanc Latij , Italiaeque lumen .

In Petrum Victorium .

Nobis Calliope magnum alienum aes superest uetus :
Nam pridem ratio scripta mihi est pectore in intimo :
Tu quaeso patere a te soliam quidquid id est dea .
Non Victorius est exiguis uersibus , aut hura

Aptandus

Aptandus tenui: vester amat Phœbus eum, neq;
 Ulli plura bonum munifica crediderim manu
 Largitum: uber enim sicut ager, ruraq; pampino
 Nitida florida lacchi, & Bromio & frugibus oppida
 Circum plena hilarant, muneribus diues Apollinis
 Etruscos populos ingenij fruge bona bonus
 Ille enutrit alens. Sic senior uertice Pely
 Olim Phyllirides frondifero semifer uberi
 Graios nobilium seminio dicitur artium
 Ditaſe. Ille dies e medio tollere qui poteſt
 Ritu Cecropio scripta tibi clara volumina
 Victori, eripiet roriferis sidera noctibus
 Idem subtrahet & piscibus, idem æquora nantibus.
 Contages populi te tetigit lurida morbidi
 Numquam, te ambitio curriculum prætereunium
 Obliquis oculis aspiciens nec pepulit, neq;
 Illi roboris hoc attribuit Iuppiter, ut sacrum
 Phæbo discutiens commoveat pectus, originem
 A Cæo licet, & Porphyrione a ualido trahat
 Conatis solum Calicolum scandere fratribus.
 Non res, cui cumulus semper abest, cuncta ue metiens
 Aurum te pupugit: te nitidum Mæsa salubribus
 Fontis Castaly lauit aquis candida, tu meæ
 Es lumen patriæ percelebris: sat mihi fructuum
 Ignaua hæc tulerint exilia in montibus asperis
 Quæſita, argueris deſidia ni tibi debitum
 Carmen, ni ue inopis quod citharæ dinumerem modos,
 Acceptum id mihi te ferre neges, iureq; reſpuas.

O que

O qua terrificos vicina e turre cietis
 Tot nocte æra sonos tinnula, totq; die;
 Si mihi uentura noctis dormire licebit
 Per tot tinnitus particulam misero,
 Nec cum defessos iam iam contingeret ocellos,
 Vos metuet subito, diffugietq; sopor,
 Ipse ego cras vobis ultro tortiq; rudentis
 Spiras, & firmo e robore fulcra dabo;
 Tutius ut sonitu boreamq; laceßere sauo
 Positis posthac, & maria, & tonitrus.

CUM cinctam nimbis, & nigra nube sedentem
 Deficient olim flammea tela Iouem:
 Cum sueta in pontum plenis decurrere ripis
 Precipitem sistant flumina prona pedem:
 Fluctibus & raucis Siculum pertundere litus
 Ionij cum iam desinat unda maris:
 Tunc quoq; vicinis suspensa in turribus æra
 Cessabunt bombos edere raucisonos.

CUM mare nec fremitus edet, nec sibila venti,
 Nec nimbi, abruptis nubibus igne, sonum:
 Et cum nubigenæ Thaumantidis ora sinumq;
 Deficiet croceus, purpureusq; color:
 Cum pontum nitidi pisces, cum littora pictæ
 Conchæ, cum densum deferet umbra nemus:
 Turre tua tunc Corneli dulcissime raucos
 Tinnula cessabunt æra ciere sonos.

F I N I S.

E

O que terrificos vicina e tunc cetera
 Te nocte ora sonos tinnit, et ipse die
 Si nubi nemine nocte dormire licet
 Per tot tinnitum periculis infesto
 Nec tunc despectus iam non continget ocellor
 Vos nec tunc subnoctis diffundit sopor
 Ipse ego cras vobis alio tunc tinnit
 Spiritus et summo e robore subnoctis dabo
 Tinnit in sonitu periculis lacrimis sano
 Postquam postquam postquam postquam



Cum tinnit in sonitu periculis lacrimis sano
 Postquam postquam postquam postquam
 Tinnit in sonitu periculis lacrimis sano
 Postquam postquam postquam postquam
 Tinnit in sonitu periculis lacrimis sano
 Postquam postquam postquam postquam

Cum tinnit in sonitu periculis lacrimis sano
 Postquam postquam postquam postquam
 Tinnit in sonitu periculis lacrimis sano
 Postquam postquam postquam postquam
 Tinnit in sonitu periculis lacrimis sano
 Postquam postquam postquam postquam

DE OFFICIIS INTER POTENTIORES ET

TENVIORES AMICOS:



MAGNA omnino veteres, diuturna-
que molestia caruisse mihi videri
solent: qui non, quo modo nobis
fere institutum est, ingenuos ho-
mines, sed plane seruos in famula-
tu habuerint: quorum ad victum,
cultumque, & ceteras vite oportu-
nitates, opera ac ministerio vte-
rentur. Nam cum hominis natu-
ra celsa, ampla, & erecta sit, longeque ad imperandum
magis, quam ad parendum accommodata, in eam vigen-
tem atque integram herile imperium, quod nos facimus,
exercere qui volunt, ij molestum negotium, atque odio-
sum aggrediuntur. Itaque veteribus in edomitos iam, &
quasi mansuefactos, quippe quos prius aut compedes, er-
gastulumque; aut a pueritia vsque captiuus animus ener-
uasset atque emollisset, neque difficilis, opinor, neque in-
iucunda dominatio fuit. Nobis contra cum robustis, va-
lentibusque, & tamquam adhuc feris res est, qui & pro-
pter naturæ spiritus dominatum aspernantur & oderunt,
& propter libertatem dominis etiam resistunt: rationem
quidem dominationis iniquius interdum, sæpe tamen iu-
re, ab ipsis heris requirunt & repetunt: ex quo querela-
rum, expostulationum, litium plena sunt omnia. Sice-
nim est profecto: Nam iniusti rerum nostrarum ratiocina-
tores sumus: ac, cum sua quisque, quam alius æque bona
nimio carius æstimet, eoque plus in omni ratione ferat ex-

E ij pensum,

penfum, quam acceptum referat, res conuenire non potest: hinc acerba illa sane querimonia atque exprobratio. Ego me domi tuæ contriui: contraque. Ego te sustentavi, alui, in honore habui. Quam quidem inter homines controuersiam, quodque dissidium, ut, quantum est in nobis, sedemus & componamus, a nobis, hoc est ab hominis officio minime duximus esse alienum. Quamobrem, cum in eam cogitationem sæpè numero incumberem, præcepta quædam, & tamquam artem de necessitudine, & communione ea, quæ potentes inter, ac tenuiores coniugatur, quæque ab ea re, quam imitari plurimum visa est, seruitutis, acerbum sane nomen inuenit, degenda composui, eamque litteris mandare institui, ut labore nostro, si modo, quod cupiebamus, aliqua ex parte assecuti sumus, normam utrique haberent, ad quam dirigere si se vellent, ijs commoditatibus, propter quas eam coniunctionem, quæ sane vna omnium maxime turbulenta videtur, copulassent, placide, tranquilleque fruerentur.

Quoniam igitur communionis, societatisque vnus cuiusdam inter homines præcepta tradimus: plures autem sunt hominibus inter ipsos, & variæ communitatum species, quarum aliud alijs propositum sit: principio hæc ipsa, de qua sit nobis hoc tempore explicandum, fecerni a ceteris, seiungique debet; ut, quamquam de omnibus quædam communiter præcipi soleant, quæ ad vberiore[m] quandam, amplioremque artem pertinent: tamen, quoniam huius quoque generis separatim præceptiones sunt, eæ a nobis distincte, dilucideque exponantur. In omni itaque societate vincienda aut voluptatis dulcedine, fruendæque iucunditatis studio homines ducuntur, aut rerum, quibus utuntur, facultatem, potentiam, opes & copias, ceteraque id genus adipisci, tuerique, aut etiam adaugere volunt: quæ omnia in rationem utilitatis cadunt: aut honesti, rectique, ac decori pulchritudine & splendore excitati, illectique rapiuntur. Ac priori quidem in genere (exemplis enim res fiet apertior) libidinosi amores sunt, & quæ deliciæ appellantur,

lantur, ceteraque eiusdem modi. Vtilitatis autem genus latissime fufum est: continet enim rempublicam primum vniuerfam; deinde singulas fere ciuitatis partes: nam inita est ciuibus communiter inter ipsos societas eam ob causam, vt congregati, salui, incolumesque esse possent: tum multę questus, lucrique causa communionem sunt priuatim contractę. Tertium autem genus amicitiam complectitur, non hanc popularem, sed illam bonorum, cum scilicet honestum, laudabile, decorum, non emolumento captans aliquo, sed sua ipsum vi ac dignitate inductos homines virtutis amantes coniunxit arte, atque deuinxit. Tenuiores autem homines cum se ad principum ciuitatis amicitiam applicant: contraque clari, potentes, opulenti cum obscuros, infirmos, exiles in contubernium, ac familiaritatem recipiunt, neutri fere honestatis decorem consecrari, ac ne attendere quidem videntur, sed vtilitatem modo, aut voluptatem sequi. Id ex eo intelligere licet, quod neque illi bonos quosdam viros, iustosve, aut fortes, ac moderatos, quibus inseruiant, sed gratiosos, ac locupletes, si vtrumuis liceat, delegerint, & fortunis ditati confestim, tamquam id operis habuerint, discedunt, aut certe cupiunt: atque hi rursum laboriosum quemlibet, aut industrium, & sollem, frugique exquirunt, eosque insigniori aliqua virtute præstantibus longe præferunt. Quare, quæ de vera illa, & germana amicitia præcipiuntur, cum morum similitudo, & conuenientia bonorum animos stabili quodam amore, & caritate deuinxit, huic necessitudini conuenire non poterunt: diuersorum enim generum eadem præceptiones esse non possunt: neque vero eadem esse genera, quorum exitus, finesque diuersi sunt. Atque alia est etiam humanarum societatum diuisio: nam aut pares inter se copulantur, quales fratrum coniunctiones sunt: aut dispares: cuiusmodi parentum est, ac liberorum inter ipsos communitas. Per multum vero refert ad inueniendi officij rationem, vtro quis in genere, eam, qua de agimus, necessitudinem constituerit: quamquam in promptu id quidem est:

ambigi

ambigi enim non potest, quin ad posterius referatur. Sed cum fere constet, dispares hoc amicitie genere copulari, illud parum percipiunt, aut certe non satis constanter ad extremum usque retinent. Stabiliendum est enim, firmandumque quid sit illud, cuius prestantia princeps in hac necessitudine, & tamquam herus cernatur, ne vagari, errareque huius ignoratione cogamur. Principem igitur locum non, ut plerisque in rebus, ita hoc in genere doctrina, nec etas, nec nobilitas, nec vero virtus obtinet, sed pecunia modo & dignitas, & potentia dominatur. Atque hec quidem ut concurrant omnia, optabile est: sin minus, vel vni deseruiendum est. Satis est autem ad hoc argumenti, quod saepe vnius conuersione fortune, ratio omnis amicitie commutatur, multique cum ijs, quibus diu, tamquam preferunt, non modo exaequantur, sed etiam ijs ipsis efficiuntur humiliores: a quibusque antea coli soliti sint, eosdem aut pecunia auctos, aut honoribus amplificatos contra ipsi reuerentur atque obseruant. Quamobrem sit hoc ceterarum communionum, si quibus ita videtur, prescriptum, & tamquam formula, ut, quod in vnoquoque boni sit, subductum habeant: ac tantidem se quisque faciat, quanti sit, tantidemque ab amico aestimari se vel postulet, vel patiat. Nobis autem alio quodam modo rationem institutam esse, intelligendum est: plerisque enim fallit; quorum est error tollendus, ne, quod faciunt, turbent omnia. Cum igitur ratiocinabuntur, meminerint adnumerari, appendique par esse non omnia, sed pecuniam modo, atque potentiam; quando ea est hec societas condicione contracta, ut potentibus, ut locupletibus propter id ipsum, quod opulenti sunt, tribuantur omnia. Quare qui se se paupertatem ferre posse non tam negant, quam re ipsa ostendunt, quibus quesito opus est, quique aliena egere se fatentur potentia, desinant molesti esse: neque ingenium, aut nobilitatem, aut doctrinam, quibus rebus, quamquam pretiose alioqui sane sunt, ne ipsi quidem magnopere confidunt, magnum quoddam pondus habere postulent, ut comparari se propterea

pterea, quod ijs instructi sint, superioribus, aut etiam anteferi putent oportere. At vir ego, inquit, sum melior, eruditior, nobilior, vna modo re inferior, quæ ipsa non in virtute posita est, sed ex fortuna pendet; Sit ita sane: mitto enim, quod plerumque nimium semet ipsos diligunt, nimium amplexantur; sed, vt ita sit, tenendum tamen illud, nihil in hac communione relictum esse ijs rebus, quas illi commemorant, loci: principem esse pecuniam, imperium obtinere potentiam placuit: accepta semel condicio est, quæ aut tunc recusanda fuit, cum ferebatur, aut ne nunc quidem improbanda. Fuit olim apud Aethiopas lex, vt eum regem facerent, qui procerissimus reperiretur. Num igitur philosophus, brevis si forte fuerit, atque Aethiopiæ regnum affectet, non ea lege puniendus sit? Atqui sapientia proceritati, omnique corporis staturæ longe antecellit: ne mo negat id quidem: sed ea tamen Aethiopes lege viuunt, quam violare sit nefas: sic nos eam seruare legem debemus, quam nobis, quasi populo, vsus, vitæque communis promulgauit, & tamquam suasit, quamq; adeo ipsi sanximus.

Tantum enim abest, vt quicquam adscribendum cuiquam sit, præter id, cuius haberi semel rationem placuerit, vt sepe id ipsum, adiectis ijs, quæ plurimi alioqui sunt, vilius efficiatur: vt meretrix pudore deterior est: ad quæstum enim eius æstimatio refertur, quem pudor, quamquam laudabilis ipse per se, tamen imminuit: petulantia vero, tametsi sua ipsa vi, naturaque turpis, auget. Neq; vero aliam ob causam quibusdam in ciuitatibus institutum est, vt eximia quadam virtute ciues populi arbitrio innocentes relegarentur, isque mos ab Aristotele, quanto, qualique philosopho? non admodum improbatur, nisi, quod cum vna equabilitate res eorum publica contineretur, omne, quod emineret, cuiuscumque tandem id modi esset, amputandum, & tamquam complanandum censebant: vt ne virtuti quidem, sese nimium attollenti, parcerent. Quare diuitiæ tantum, atque opes in ea re censenda, atque æstimanda ponderentur, quibus semel principatus, & dominatio

minatio data est : reliqua circumcidantur : his se virtus, nobilitas, doctrina submittat : hoc qui recusant (magnus est autem numerus) seditiosi vt in republica ciues, sic in amicitia turbulenti existimandi sunt. Vinciuntur igitur necessitudine hac longe potentia ac diuitijs dispare : vinculum autem est non caritas, sed vtilitas : ex quo illud conficitur, quod antea quoque dictum est a me, errare eos, qui hanc necessitudinem verè illius, iustæque amicitiae legibus temperari putant. Nam hoc quoque genus importunum est, magnam quandam, æquabilemque beneuolentiam, atque ardorem amoris requirentium : distinguenda sunt enim necessitudinum genera, ne temere omnia ab omnibus expectentur : quibus enim sua cuique priuatim vtilitas proposita pene ex conuentu sit, eos nostra causa tantum velle putare, vt alienum commodum anteferant suo, temere optantis est, non considerate iudicantis. Neque vero eadem vtrisque proposita vtilitas est, sed operam atque obsequium a tenuioribus potentes expetunt : inopes contra a diuitibus, atque honoratis pecuniam, aut dignitatem : illi enim, vtpote diuitijs affluentes, nullum sequuntur emolumentum, sed id modo attendunt, quod eam sibi coniunctionem ad dignitatis splendorem honorificam, ad victum autem, cultumque, atque res gerendas, cum iucundam, tum vero multis sane locis peropportunam esse intelligunt. Inferiores autem propter paupertatem, atque inopiam, pecuniae fructum, aut dignitatem querunt : tum propter imbecillitatem factiosos, opulentosque amicos sibi, tamquam adminiculum, parant. Quibus ita constitutis, quoniam expedit cum vnaquaque in re eum nos bene cognitum habere, qui cum negotium nobis futurum sit, tum in huiusmodi necessitudine vel in primis refert non ignota nobis esse eorum, quibus cum viuimus, studia & voluntates, vt vel ad eas nos dirigamus, vel rem totam, si modo fieri possit, repudiemus ; opere pretium est, locupletum, ac potentium, contraque tenuium, atque inopum naturam, & tamquam formam quandam, & speciem, quoad possumus, inuestigare,

gare, in medioque ponere. Neq; vero exquisitam quandam ad rationem exigi hæc a nobis debebunt: quoniam nec omnibus æque in rebus subtilitas quærenda est, nec vero postulandum, ut prescius agatur, quam ipsarum, quæ subiectæ sunt, rerum vis & natura patiatur. Ac locupletes quidem ita fere sunt morati, ut superbia, & fastidio efferantur: perinde enim affecti viuunt, quasi bonis omnibus affluant: & quoniam, quanti vnumquodque sit, æstimari se re nummis soleat, eaq; ratione argento venire omnia, quia eo ipsi abundant, omnium penes se rerum pretium esse opinantur. itaq; beati sibi videntur. Ad hoc accedit, quod homines magnam partem in re facienda, atque exaggeranda occupatos, diuitijsque inhiantes vident. Quare illarum possessione, tamquam excellenti inter homines bono quodam, quod vnum expetant, quodque admirentur omnes, ipsi gloriantur: reliquos autem despiciunt, nec homines putant: quæ quidem arrogantia insolentiaque ea quoq; re augetur plurimum, neque adeo immerito, quod multos multa locupletem rogare necesse est: tum arbitrantur sese dignos esse dominatu: propter copias enim, quibus ipsi affatim præditi sunt, dominationem, regnumque expeti putant. Gloriosæ itaque, atque insolentes diuitiæ sunt: eadem petulantiam habent, superbiæ comitem: difficile est enim, nisi si forte ratio adsit, prudentiaq; secundo fortunæ cursu non auferri. Eorundem est diffluere luxuria: nam & delicati, mollesque sunt, & copiarum ostentatione beati videri volunt. Ad summam stulta pecunia est, sed fortunata, & felix. Præterea autem multo hæc sunt eadem nouis in diuitijs deteriora, quam in veteribus vitia: repente enim diuites facti sunt, abundandi, ut ita dixerim, imperiti; ut plerique Romæ: in quo si qui fortasse fuerint, qui de trahi sibi a nobis querantur, ij meminisse debebunt, non hunc nobis de hominibus, sed ipsa de re institutum esse sermonem. Potentium autem mores partim cum locupletum natura, & consuetudine congruunt, partim aliquanto sunt etiam probiores: nam & honorum studium in his

F est,

est, & animus virilis, atque ad agendum promptus: præbet enim potentia facultatem, & propter dignitatem grauitas quædam inest. Ac de locupletum quidem, ac potentium moribus hætenus. In paupertate vero atque inopia omnia ijs contraria reperientur. Sic igitur animati erga potentes & pecuniosos tenues amici esse debebunt, vt illorum incommoda, contumelias, iniurias, ineptias non modo facile perferant, sed amanter etiam tegant: eosque, quo ad fieri possit, diligant: colant quidem certe omnibus locis, atque obseruent: diligere enim volunt, propterea quod existimant, a quibus amentur, ijsdem se se probari. Itaque cum omnia sibi diuites arrogant, amicorum obsequijs, atque obseruantia magnopere delectantur: sui enim de se iudicij habere eos ascriptores putant. Difficile est autem diligere eum, quem non probes: nihiloque factu facilius sic moratos, quemadmodum dictum est, probare: verumtamen, vt ait Tiresias ille,

Quando pauperiem missis ambagibus horres,
deuoranda hæc sunt, ferendumque equo animo, quod corrigere nequeas: præsertim cum non virtute, & probitate hæc necessitudo contineatur, sed emolumentis, & fructu. Stulte igitur faciunt, atque inutiliter, qui, tamquam Horatianus Dauus, decembri in dominos abutuntur libertate:
Tu, cum sis, quod ego: & fortassis nequior: pernitiōsa enim hæc sunt, præsertim aduersus potentiam, superbiamque. Quare non modo dici, proferrique hæc non expedit, sed ne cogitari quidem sine detrimento possunt: retrahunt enim nos ab obsequio, & cultu potentis amici, sine quo contineri necessitudo hæc diutius non potest. Non minus, est autem eorum vitium, damnum certe idem, qui de superioribus amicis in omni sermone absentibus detrahunt, eosque, quos reuereri, & colere non modo decet, sed etiam fructuosum est, ledunt. Itaque dupliciter accusandi sunt, & quod ab officio recedunt, & quod eorum cum factis minime consentit oratio: cum eo enim re viuunt, quem sermone improbant. Superbi etiam, atque arrogantes monendi sunt, atque,

que, vt ab hoc studio defistant, hortandi : nam nihil obsequio, atque obseruantia tam est aduersarium, quam arrogantia : obseruamus enim & colimus, quos insigni aliqua re antecellere nobis putamus : omnia autem sibi qui arrogant, ne illi longe abest vt cuiquam obsequi velint. Ac sunt omnino quidam nulla de re tam solliciti, quam vt ne cuiquam succumbere, aut quicquam cuiquam concedere videantur : ij se se inferiores appellari, mortis instar putant, pauperiores tantum dici volunt : austeri, tristes, duri, omnia summo iure, se uere agentes, atque acerbe : qui si appellentur modo, continuo ad calculos abeant, confestim sua, atque aliena digitis metiantur : rationem subducant, a qua ne punctum quidem cuiusquam causa decedere ius esse arbitrentur : ij, vt antea dictum est, ad aliud studium traducendi sunt, ne etatem sollicite anxieque degant, & ea exacta, frustra, quod nihil processerit, fortunam, quod facere solent, accusent, cum ipsi in culpa sint. Nobis autem leui homine opus est, molli flexibilique ingenio predicto, qui & de suo iure decedere didicerit, & parere fortunae : idque animo hilari, aut certe equo facere possit, vt non appareat coactum obsequi : nemo enim, quem colit, illi inuitus obtemperat. Quoniam igitur superbiae occurrendum est, nihil est autem ad eam molliendam, ac demulcendam valentius obseruantia, atque obsequio, in eo exiles, atque inopes amici elaborare debebunt, vt in superiores omne officium, omnemque cultum conferant : id partim in dictis apparebit, partim in factis. In sermone igitur, & congressionibus non modo comitas, & suauitas adhibenda est, sed quaedam etiam reuerentia : assentatio autem, de qua mox dicitur, procul amouenda. Permultum vero id refert : nam neque quicquam est, quod tam crebro incidat, quam vt loquamur ; & ad conciliandos hominum animos summa in oratione vis est. Illa igitur primum cautio adhibeatur in verbis, vt summissa, vt humilia sint, vt prope abiecta : blandum enim in saeculum incidimus, cuius in errore nihil est cur versari nos cum reliquis pudeat : contumax est non mo

do monere, sed etiam consilium dare: reprehendere vero non ferendum. Longum est autem singula persequi. Quare genus ipsum indicasse sit, opinor, satis. Deinde, repugnandum, si qua in re forte fuerit, ut pedetemptim, timideque fiat, & tamen & raro, & non nisi necessario: neque enim est obsequentis aduersari: sæpe autem in congregationibus, aut in conuiuijs disputationes inducuntur incertis, aut subtilibus de rebus, in quo docti quidam homines, & ingeniosi facere sane imprudenter solent: arripiunt enim ipsi tamquam suo iure sermonem, obloquuntur, interturbant, pertinaciter resistunt, redarguunt denique, idque acerbe, atque acriter: non sunt hæc obseruantia, aut obsequij signa. At non mea, inquit, culpa est, quod homo rudis, atque illitteratus, & fortasse hebes, de rebus obfcuris atque inuolutis balbutiens me laceffat, irriter, in contentionem vocet, præsertim eam ipsam artem, ad quam disputatione pertineat, professum. sed parcendum tamen est, quasque cum amico lucteris, non cum aduersario, non est viribus utendum: scitum est enim in loco cedere, aut succumbere: victoria vero sæpe perniciem habet: ex quo vetus illud *ῥῆμα καὶ μέγα*. At difficile est, inquit, præsertim concalescentis iam altercatione animis tum in eo ipso, quod profiteamur, cuiquam nos cedere videri, pati non possumus. Ego neque hoc disputo, & si postulant, etiam concedo: Illud teneo, atque denuntio, inutile id illis esse; plane etiam perniciosum. Quare superbiam excutiant, animum molliant, aut amicitiam se se gerere nescire fateantur. diligenter etiam caueant, ne quando committant, ut cum potenti amico iocari aggrediantur, nisi ab eo ipso inuitati, ac prope iussi: inest enim in ioco equabilitatis significatio, & securitas quædam, qua superbia irritatur: cauillationem autem, & dicta superiorum, quamquam habebunt sæpe aculeum, & contumeliam, hilaritate & lepore excipiant: iracundiam, nequa forte erumpat (efferuescet enim illa quidem) quam diligentissime poterunt, comprimant: ac, ne si acrius quidem pupugit, quicquam mordere audeant: neque

que enim est obedientis, doloris sui poenas persequi: quo autem cuiquam vberius erit ingenium, atque acutius, eo difficilius is præstare hoc poterit: multa enim occurrent falsa, quæ vix reticebit: Estque omnino haud quaquam mediocris patientiæ, cum sæpe vapules: telum autem semper teneas, numquam referire: sed iracundia tamen perquam diligenter cohibenda est, neq; cum superiore, ne iusta quidem de causa, concertandum: nam & victi oderunt, & pares cum discedunt, tamen vinci se putant. Itaque alio se se conuertunt, & eos, quorum tractata semel læsit asperitas, in posterum non attingunt. Quo autem modo iucunda consuetudine, assiduisque sermonibus, & comitate superbia molliitur, ita silentio, seueritate, & tristitia recrudescit: tum stultum est, quorum contumelias perpeti necesse habeas, eorum non ferre iocos, Quare ita se se tenues comparare amici debebunt, vt potentis vel immoderatam in iocando licentiam, non modo bonam in partem accipiant, sed etiam, quo familiarius tractentur, habere se gratiam significant. Reliqua vero in vitæ consuetudine ea moderatio adhibeatur, vt in sermone plurimum hilaritatis: plurimum & festiuitatis insit, non effusæ, sed ad voluntatem nutumque diuitis amici omnis oratio temperetur: tristitia vero, & taciturnitas absit, quæ minime amabiles, & plerumque inuisæ, suspectæque sunt: quos enim tristes animaduertunt, ijs se suspicantur non satisfacere. Præcidatur etiam loquacitas: est enim reuerentis adhibere modum: neque vero sermonem ipsi priores inducant, nisi si forte iussi sint aliquid in medium, consumendi otij causa, vt fit, proponere: ad superiores enim pertinet iudicare, qua potissimum de re velint audire; neque immerito is arguitur, qui præfestinet, vbi herus adsit, præloqui. Quod autem dictum a me est, procul ex hac consuetudine amouendam assentationem esse, videamus, quam vim habeat: non sum enim nescius, secus a plerisque solere præcipi: qui cum adulationem vnam omnium rerum fructuosissimam esse contendunt, facile permultos nominant haud magni pretij homines,

mines, qui vna assentatione adiuti, non modo diuitias pararunt, sed ad summos etiam dignitatis gradus irrepperunt; sed, quamquam ab vtilitate profecta hæc ratio est, non debent honestatis, & iustitiæ obliuisci. Itaque, ne quid turpitudinis, lucri causa, contrahatur operam dabunt, tuebunturque iustitiam, si non summam illam bonorum, at hanc popularem saltem vulgi: etenim vnum pecuniæ fructum sequi si volumus, neque honestatem audimus, eos ipsos superiores amicos spoliemus licet, aut aduersarijs prodamus. Cauendum est igitur, quamquam ab vtilitate profecta hæc ratio est, ne longius si progressi erimus, iustitiæ fines transgrediamur. Quid est autem, quod ab honestate longius absit, quam assentatio, & blandicia? quarum cura & nutrimentis hominum educuntur, sæpe etiam gignantur, & procreentur vitia. Metuet igitur,

Scurrantis speciem præbere, professus amicum.

Finitima est autem obsequio blandicia: tum in vnaquaque re difficile est statuere quatenus: sunt enim vitia cum virtutibus prope continentia, aut ita certe inter se coniuncta, vix vt appareat commissura: sed quædam tamen est regula, qua vt qui volent, neque a probitate discedent, & vtilitati tamen consulent. Est igitur in congressionibus sermonis quædam temperatio, & modus, quam quidem virtutem, cum ea vocabulo carere videretur, ab amicitia mutuati, *φιλικῶν* Peripatetici nominauerunt: quod, eius compotes qui sint, talem ad omnem congressum humanitatem, affabilitatemque adhibeant, qualem adhibere inter se amici consueuerint. In eo autem posita est, vt neque omnia ad voluntatem loquamur, & petulantia tamen absit, & tristitia, austeritasque vitetur. Ad eam autem mediocrem retinendam per magni refert, qui cum loquere, quique ipse sis: id quale sit, vt pleraque omnia, in ijs animaduerti maxime potest, qui, longo quodam interiecto tamquam interuallo, inter se distant, vt in parentibus, & liberis, vt in priuatis, & ijs, qui sunt in magno aliquo imperio: quæ enim in priuatum commode dicta existimantur, eadem in magistratum

tum collata petulantia habentur non ferendę. Ac parentes quidem obiurgare flagitium est, magistratum nefas, parem vero non dedecet. Hanc in sermone mediocritatem retinere hic noster vel mordicus debet: lubricus enim locus est, ut neque ad assentationem delabatur, minimeque sit amarus, aut agrestis. Id autem, nisi quid me fallit, ea ratione efficere non incommode poterit, si, quę superiore in amico probanda erunt, ea & suo loco, & pleniore etiam aliquanto, ut dicitur, ore laudabit, peccata vero non attinget omnino: ad pares enim amicos monitio, atque obiurgatio, non ad inferiores pertinet. Qui vero ea laudant, quę non probant, improbi hominis funguntur officio, & vani, ac fallacis, & fraudulentı. Omnis autem sermo verecundia plenus esse debet: non modo quia sic omnino bene moratos decet, sed quia securitatem etiam petulantia pręferre videtur. Absit igitur obscenitas: tętre etiam, immundaęque res ne appellentur, singulisque cum dictis, tum factis significatio quędam insit, non negligere tenuem amicum, quid de se superior sentiat. Prouideant etiam, ut gestus, motus, incessus, status, sessio, accubatio, manus, oculi, vox, non ineptijs modo vacent: est enim id alius cuiusdam disciplinę pręcipere, sed ut reuerentiam quandam erga potentem amicum, cultumque indicent. Remouean- tur igitur cachinni, & clamores, & palęstrici quidam motus; tum oscitatio frequens, atque excreatio, reliquaęque id genus, quę soluti, liberi que sunt animi, ad amicorum æquabiles congressiones referuentur. Vestitus etiam ratio habeatur, ut elegans, ut mundus, ut aptus sit: volunt enim ostentatione diuitiarum, quemadmodum dictum est, beati videri: tum ad luxuriam pertinet, quorum utantur ministro, eos non agrestes, nec sordidatos habere, sed elegantes, & ornatos. Quamquam autem in sermone plurimum cultus obseruantiaque elucet, permultum tamen etiam in factis apparet. Quamobrem superioribus inferiores pręsto sint, obsequantur, obtemperent, neque re tantum ipsa, sed etiam significatione quadam, & specie: nihil enim necesse est

est tantas amicorum cateruas domi alere : ad speciem comparantur, & pompam. Quare ne hæc quidem negligent : adsint, astent, sectentur, assiduitatem præstent, molestiam caueant : neque sic cogitent, non hæc sibi datas esse partis, sed certum quoddam munus assignatum : sunt enim communes inferiorum omnium amicorum. Qui vero cunctantur, qui tergiuersantur, & cessant, perniciosum genus in hanc communionem inducunt : parce enim, ac restricte munus ipsi suum cum exequuntur, potentem amicum prope admonent, ut benignitatem ipse quoque suam contrahat, ac minutatim, exigueque præbeat omnia. In rebus autem gerendis, curandisque mandatis, primum fides, integritasque præstanda est, non modo quia decet, rectumque est, sed quia fructuosum est etiam : quos enim fideles experti sunt, ipsi se se totos committunt, & tradunt, eoque bene etiam illis facere coguntur. Deinde cura, & diligentia, & sollertia, quasi in re propria adhibeatur, maior etiam si fieri possit : quo difficilior est cura rerum alienarum. Sed hæc communia societatum omnium : illud huius coniunctionis est proprium. Neque enim, quod commodissimum, aptissimumque quaque in re fuerit, spectare debebunt, sed illud modo attendere, quod maxime potenti amico probeatur : id quod una in re notatum ad reliqua omnia transferri poterit. Qui igitur villo fere in gradu dignitatis locati sunt, homines eruditos, atque in scribendo exercitatos seorsum parant, qui de omnibus rebus, quæcumque inciderint, epistolas componant, ut ex superiorum amicorum nomine reddantur : ipsi persæpe ea præcepta seruantes, quæ magno labore didicerunt, hominibus illitteratis, a politaque, & accurata oratione abhorrentibus suas lucubrationes non probant : optima quæque, aptissimaque inducuntur : omnia peruertuntur, retexuntur omnia. Quid igitur est tui consilij ? illud scilicet Euripidis de Phœnissis :

Potentium stultitia perferenda est :

Et (quamquam difficile factu est)

Vna cum insipientibus desipiendum.

Vnam

Vnam igitur habebunt non scriptorum modo, sed etiam actionum omnium regulam, potentis amici voluntatem, ac iudicium: ad eam se formabunt, eaque metientur dicta, factaque omnia: neque vero perpendent, quam recta sit, aut praua, sed tantum elaborabunt, ut eam bene cognitam, obseruandoque notatam habeant: dabuntque operam, non ut recte, si quid mandatum est, curent, sed ad voluntatem superioris amici apte, atque accommodate. Itaque inferior amicus imperium herile discat, ut quod frons velit, oculi sciant. Hec fere sunt inferiorum partes, atque officia amicorum, vel stirpes potius quædam atque initia, e quibus ea orta, ac profecta sunt: expositis enim generibus, singulas tamen secare, ac persequi partes, cum infinitum duximus, tum vero etiam minime necessarium. Locupletibus vero & factiosis multo, ne errent, huiusmodi præceptiones attentius audiendæ, retinendæque sunt: est enim potentia, nisi si quis artem, hoc est, rationem adhibeat, ipsa per se licentior. Itaque solutam eam, ac liberam paulo si diutius siueris, ubi se corroborauit, exultat, effrenateque effertur, ac ruit. Quid enim mereat quis, ut non nullorum, quos significari a me, quam nominari est æquius, immanem, ac barbaram superbiam ferre velit? qui quidem eo usque sunt odio digni, nihil ut mirum sit, si abiectissimi quoque homines egestatem, vel summam perpeti malint, quam eos non modo ferre, sed ne aspicere quidem. At tenues, atque inopes, satis ab ipsa necessitate, quod sui sit officij, admonentur: & si quid tamen peccent, sane haud deesse corrector potest. Statuant igitur diuites se quoque legem tenere: quando patrium etiam ius quibusdam quasi cancellis natura circumscripsit, quos transire nefas, impiumque sit: nec quos fortuna, atque opibus anteeunt, eos tamquam desertos omnino, ac neglectos, pro nihilo habeant: nec vero abiectissimum quoddam obseruantie genus, cultumque seruitio proximum omnes ab omnibus requirant: dilatantur enim interualla, contrahunturque, quibus alij alios præcurrunt. Ad eorum igitur magnitudinem, & spatium tenuium

G

nuum

nuium officia amicorum referantur: neque enim par est Superiorum omnium præstantia. Itaque deum (plurimum enim inter se distantibus in rebus id, quod monstrare volumus, apparebit maxime) deum igitur veneramur, & colimus: homo autem paulo locupletior sacrificium sibi quoque ad aram fieri ab inopi amico si postulet, insaniat: nec claros quidem, atque illustres ciues pari obseruantia colimus, ac Persarum regem. Ut igitur inferioris partes sunt, obsequium ut præstet non grauate, sed libenter, nec semper monitus, sed sæpe ultro: ita superioris contra est officium, eorum sedulitate nec abuti, nec acerbe obsequium exigere: sicque cogitare, amicorum uti se se opera, si non gratuita, at voluntaria, at certe libera, non autem seruis imperitare: liberi enim sunt, nec lege tantum (nam id quidem perspicuum est) sed etiam natura: siquidem is natura seruus est, cuius vnum est, aut certe præcipuum, in corporis, membrorumque usu positum munus: quique ita rationis est participes, illam ut sensu percipiat, non ea ipse ut præditus sit: ij autem, quos iandudum inferiores amicos appello, non ut operarij quidam, ac baiuli, membrorum robore, ac laertis, sed potius industria, & ingenio, & rerum usu, animi denique viribus, non corporis commendantur. Liberi igitur sunt: verum consuetudo, atque dicendi mos famulatum, ut antea quoque dictum est, tristi sane verbo, conjunctionis huius necessitudinem nominauit: sed idem tamen molliuit: etenim vel superiores qui sunt amici apud eos, quos diligunt, quamquam tenues sunt, seruitutem seruare se se, quia ita mos est dicendi, dicunt: ut iam beneuolentiæ id, obseruantiaque nota, non seruitij vocabulum sit. Sed verum inuestigantes de rebus, opinor, potius, quam de nominibus sollicitos esse oportet. Nam quamdiu veteribus seruos bella suppeditarunt, nec habere eos lege prohibitum est, nihil magnopere fuit, cur liberorum opera, & ministerio vterentur. Itaque nihil mirum, si non suum propriumque est ei rei vocabulum impositum, quæ fere esset incognita. Vbi vero & bellica nostris in hominibus fran
gi

Si virtus cœpta est, atque hominem religionis socium seruitute premere impium existimatum, verisimile est, ut infiminitio homines mercedula adducti eum facere quæstum occiperint, ut opulentioribus Seruorum vice ministrarent: deinde vero re paulatim in morem inducta honesti quoque homines eum ipsum quæstum non sint aspernati. Verum sero viguit hic quidem mos, eo scilicet demum tempore, cum iij medio sublati sunt, qui ei rei nomen cudere, & tamquam fabricari poterant. Itaque in re noua vetus vocabulum quod vsurpemus, nisi quid me forte fallit, non est: nouare autem nobis quidem non licet: jis enim hæc tractare conamur vocibus, quæ multis antea sæculis prope conticuerunt, quam hæc inuenta communio sit. Sed nos eo redeamus, vnde digressi sumus. Tenuiores igitur amicos ad famulatum vsque qui deprimunt (quotus autem quisque est, qui id non conetur efficere?) iij non modo inhumaniter faciunt, atque inclementer, sed etiam iniuste, ac plane tyrannice. Cuius enim est dominatus, in xysto multas horas quotidie ambulantes amicos adesse ad vnum iubere, eosque apertis capitibus dextra, sinistra stantes ne respicere quidem? Regibus igitur hæc, atque huiusmodi imperia relinquuntur: qui verò parem illis præstantiam assecuti non sunt, definant eorum speciem affectare: ne & suis odio fi, inuisique sint, & irrideantur ab alienis. Nihiloque clementius illud est, cum leui quaque de causa contumelijs, conuicioque, & clamoribus honestos sæpe homines consecretantur: idque palam in publico. Quid vos seruis faceretis? ut enim sit impotentium amicorum ferre omnia, vestrum certe est, quantum eos oneretis, videre. Nam qui eousque proterui sunt, atque effrenati, ut manus etiam hominibus liberis afferant, eos tamquam desperatos aliquos coercendos censemus, non admonendos. Negat Aristoteles, vllum esse officium, quod in seruum, quia quidem seruus sit, tueri dominus debeat: sed quia homines tamen serui sunt, aduersus eos quoque humanitatis leges inuiolatas seruari censet oportere. Nec vero illud incommode, quod falsus ille

G 2 Sauria,

Sauria, quamquam seruus, & quidem nequam, homini libero respondit in iurgio.

Tam ego homo sum, quam tu.

At ij ne liberos quidem homines putant, quorum etiam durior est, quam bestiarum quarundam, apud eos causa: etenim quibus equis ipsi vehi consueuerunt, eos curari diligenter student, neque labore nimio defatigari, fessosque recreari, & conquiescere volunt: hominibus vero quando aut quisquam parcit, aut medetur, aut vlla in re consulit? aut quod nam Romę genus est tam omni indignitate, atque iniquitate exercitum, quam potentium tenues amici? sunt hæc non modo Christianę caritati, atque humilitati repugnantia, sed ab humanitate quoque hac communi, longe, longeque abhorrent. Ne igitur humanitatem fortuna obruat, neque opes, & potentia libertatem coerceant. Difficile est autem omnibus in rebus modum non solum tenere, sed etiam, qui sit, cogitatione inuestigantes statuere: variantur enim officia personis, temporibus, ætatibus, rerum natura, hominum moribus, locorum consuetudine, rebus alijs prope innumerabilibus: quam quidem varietatem vno aspectu intueri, & comprehendere, hominis est acute, celeriterque dispicientis. Nos neque acius cernere nos quicquam putamus, neque id magnopere nunc quidem necesse esse arbitramur: satisfieri enim huic loco posse statuimus, si precipiemus vt ea, quę superius memorata sunt, retinere velint. Sunt autem duo; vnum, vt amicorum obsequio, atque opera tum clementer, & benigne, tum etiam iuste, hoc est, congruenter, vtantur; alterum, vt ipsi minime sint amari, minimeque difficiles ac morosi. In munibus igitur assignandis, dandisque negotijs, personarum ratio, & delectus habeatur, vt, si quid sordidius tractandum inciderit, vilissimo cuique mandetur: neque per homines nobiles, quod nonnulli peruersitate quadam adducti student, verrantur edes, aut e triclinijs, conclauibusve immunditię efferantur: laboriosa vt ne imbecillis, ne ve sub turpia quędam honestis, aut ludicra & leuia grandioribus natu impendantur.

rentur. Nec enim Homerus Phœnicem Achillis iussu pocula ministrantem facit, hominem senem & grauem, sed adolenscentem, æqualemque suum Patroclum. Illud etiam præstent, vt nihil omnino cuiquam maioris aut oneris imponatur, aut laboris, aut contentionis, nisi necessario, aut certe magna de causa: præcipit enim humanitas, vt ne aliena sollicitudine, & cura, præsertim quæ grauior sit, tamquam animi causa, abutamur. Nam ij quoque, qui serui plane sunt, ferre hæc grauius, egreque pati solent.

Hæc heri immodestia coegit me,

Qui hoc noctis a portu ingyatis excitauit:

Non ne idem hoc luci me mittere potuit?

Ferramenta, & vectes, reliquumque instrumentum animale habuisse Dædalus dicitur: num igitur eum censemus, aut quæ ferræ essent opera, cœlo mandare solitum, aut eam ipsam, cum moliendum tamen nihil esset, vetuisse quiescere? Hunc igitur imitentur, sitque imperium in amicos iustum, & clemens: Qui vero acerbe ab amicis operas exigunt, qui semel atque iterum cessantibus fuscensent atrociter, qui se se implacabiles, atque inexorabiles præbent, præterquam quod iniuriam faciunt, non amicorum cateruis se se stipatos esse cogitare debent, sed hostium. Atque etiam est in sermone, & conuictu superiorum comitas quædam, vel seueritas potius, sed humanitate, & iucunditate condita, qua præditi qui fuerint, eos domestici amici, quasi parentes verebuntur, non autem, vt tyrannos, metuent, eoq; etiam diligunt. Omnes enim, quem metuunt, eundem oderunt. Verum plerique familiaritatem nimiam vitare dum volunt, quod apud eos, qui in consuetudinem se se penitus immerferint, retinere se dignitatem vix putant posse, contumaces sunt, atque inhumani. Ac fuit omnino Deïoces quidam Medus, vir sapiens in primis, qui cum propter iustitiam, vt est apud Herodotum, rex esset constitutus, cum alia multa dicitur habuisse salutariter instituta, tum illud in primis, quod ad maiestatem pertinet: quæcumq;

cumque enim inciderent, transegisse per interpretem dicitur, ut Medorum audiret ipse neminem, neque cuiquam aspiciendi sui potestatem faceret. Metuebat scilicet vir magnus inuidiam: ægrequelaturos sentiebat ciues suos, qui cum pari dignitate tam multos annos vixissent, eum ipsum tanto sibi honore præferri. Huic igitur malo occurri ea ratione putauit posse, si se se non familiaritati modo, sed etiam oculis ciuium subtraxisset: fore enim, ut paulatim ab ea, quam de se cogitationem habere soliti essent, desueti, maius quiddam animo conciperent & mente: sic est enim omnino: nam quæ incognita, intractataque habemus, ea maiora plerumque animo nobis fingimus, & suspicamur esse. Neque vero ego is sum, qui superioribus id præcipiam, ut se se inferioris ordinis amicis, quasi germanis fratribus, patefaciant ac nudent: sit hoc simplicis, sinceræque amicitiae proprium: sed, ut hoc non probarim, ita austeros, tristesque, & duros esse eos nolim. Recte autem Deioces, ut in Barbaris quidem, dominationeque noua: quamquam multa eum secuta esse incommoda necesse est, in primisque illud, quod æqualium, quod suorum, quod ciuium denique consuetudine, & conspectu caruit. Dignitatem igitur potentes retineant, sed bono modo; audiantque, negotijs curisque vacui, domesticos amicos, & quidem humaniter, benigneque respondeant: interdum etiam ultro ipsi appellent, familiariter quoque garriant, dentque se se ad lenitatem: ut intelligant homines tenues non tamen seruiliter se tractari. Est enim hominis natura minime dominationis patiens; quo magis seruitutis, ac famulatus species, quæ ut in suis appareat, de industria quidam efficere solent, occultanda est, atque opprimenda. Sed est etiam in nonnullis malitia quædam simulata comitas, qui, quo diutius amicorum operis fruantur, gratis homines miseros, atque abiectos spe producant, & clementiæ, bonitatisque simulatione lactant, ut annorum multorum labores vna cum blanda appellatione compensentur. Tollatur igitur meretricius hic mos; malitiaque, & fraus non ex hac consuetudine solum,

lum, sed e tota vita pellatur: nec, pecunia fraudare quem-
piam si turpe putamus, vitæ, atque ætatis alienæ fructus in-
tercipere, frustrariq; per bonitatis speciem homines vel a-
micos, vel certe familiares, tenuēs quidem atque inopes,
rectum, honestumque censeamus. Callida est etiam, ma-
litiōsaque eorum interpretatio, qui, quod tenuibus amicis
non iniuste, aut grauius imperarint, quodque in eos inge-
nio, leni, & clementi sint, vigilias, labores, curas, pericula,
damna omnia dissoluta illis esse existiment, affatimque sa-
tisfactum autument: quasi vero id initio spectatum sit, vt
obsequium obsequio, ac non pecuniæ fructu, atque emolu-
menti compensaretur. Neque enim citharædum, in epu-
lis qui caneret, ijdem si conduxerint, atque is vbi postridie
mercedem exigit, assidere hominem iubeant, audireque se
vicissim vel modulatus canentes, non iniusti sint: non e-
nim commodata oblectatio est, eandem vt reponere æ-
quum sit, sed quasi vendita. Quomodo autem superiorum
incommoda, & contumelias inopes perpeti decet, neq; id
patienter solum, sed etiam demisse, ita vicissim, si quid of-
fensum ab inferioribus forte sit, si quid repertum vel in na-
tura est, vel in moribus vitij, æquo animo, tolerabiliterque
ferre id superiores debent. Quam enim difficile sit ad alie-
num arbitrium, sensumque viuētem, vt cum dicta, tum
facta, tum ipse mediusfidius motus, gestusque ad alienam
voluntatem dirigatur, nihil offendere, nusquam incurrere,
ex eo intelligere licet, quod ne, ad nostrum quidem iudici-
um, ad libidinemq; cum viuimus, facile nobismetipsis satisfa-
cere solemus. Prouideant igitur, ne, si quid aut quotidiano
in ministerio minus apte, minusve eleganter forte ceciderit,
aut, in rebus mandatis gerendis, non exquisitam quandam
sollertiam, industriam, diligentiam, celeritatem præstite-
rint tenues amici, continuo exscandescant, atq; efferanturi
racundia: quod faciunt quidam, & sane furenter, & sæpe.
Nihil est enim facilius, quam per alium efficere, quod ve-
lis, qua id ratione commodissime fieri possit, optantem co-
gitatione designare: sed facientes multa impediunt, multa
inter-

interturbant, & retrahunt. Quamobrem cum indulgere potentes inopum peccatis equum est, tum se se ipsos excutere perscrutarique decet; ne, si quid forte in animo mendilatuert, quam ipsi culpam sustinere debent, eam amicis attribuant: sepe enim usu venit, ut superiorum inconstantia, peruersitate, festinatione, iracundia, leuitate bene, ac prudenter instituta, procurateque res, accurateque, ac diligenter administrata conturbentur, secusque cadant: Ex quo illud e vetere comoedia:

Quam arduum, dii boni, negotium est,

Dementi hero cum seruitutem seruias.

Caueant igitur hoc quoque: neque in amicos stomachum erumpant, cum irati sibi met ipsis esse debeant. Quoniam autem non beneuolentia, neque caritate adducti, sed premiorum illecti spe, quemadmodum antea quoque dictum est, ad hanc coniunctionem accedunt, procurandum est, ut, qui suas partes diligenter, accurateque peregerint, qui obseruantiam, & sedulitatem, fidemque, & sollertiam presterint, ne laborum suorum premio, ac mercede fraudentur. Ac quo modo ad inferiorum quidem officium pertinet, ut ne quicquam acerbius exigere videantur, neque potentem amicum flagitent, neue vrgeant, sed tantum admoncant, & rogent, idque verecunde (longe enim ab obsequio, atque obseruantia recedit, qui ad summam illam rationem, ac veritatem ius suum persequitur, eamque ob causam indigne parentes ferre solent, cum a liberis in iudicium vocantur: exequari enim cum ijs se nolunt) sic hesitantis est, atque adeo iniuriam cogitantis cunctari, expectareque; dum admonearis, ut, quod debeas, dissoluas. Est enim plane debitum, ne forte errent, ut, quorum vita in nostris commodis consumitur, eos remuneremus. Non igitur beneficium se se dare arbitrentur, neque in gratie loco potentes, atque opulenti ponant, cum bene de se meritos tenues amicos facultatibus augent, ac locupletant: sed ita existiment, obsequij se, atque obseruantie premium soluere, iustum quidem ac debitum: quaque ipsi mensura operas, industriamque

striamque ab illis exegerunt, eadem retribuunt mercedem, imitenturque terræ, agrorumque consuetudinem, qui, a quibus diligentius coluntur ac laboriosius, ijs vberiores fructus ferunt: præterquam enim, quod officio facient satis, utilitati etiam consulunt: grati enim habebuntur ac benefici: atque ea re omnium erga se voluntates, studiaque amicorum excitabunt, ut summa alacritate, summaque contentione adsint, obsequantur, obtemperent. Illud etiam summo opere vitandum est, in quod plerique solent incurrere, ut domesticis, familiaribusque amicis male ne sit, neve cibaria restrictè nimium dent, ne vilissima quæque, & contemptissima confectentur, ne algeant, ne esuriant: nam id quoque in mercedis, non in gratiæ loco ponendum est, ut illi, sua quisque pro dignitate, alantur. Qui vero aut demensum quasi servis, exigue sordideque præbent; aut, si quis quid commiserit, si quis uspiam cessauerit, id cibo & potione subducenda vindicant, dupliciter reprehendendi sunt; & quod illorum in se cum odia, tum etiam voces irritant, a quibus diligi, colique velint; & quod, per quos lautitiam, magnificentiamque ostentari, elucereque volunt (nullam enim aliam ob causam tantos suscipiunt sumptus) per eosdem illorum Sordes, avaritiæque detegitur, atque efferatur. Huc accedit, quod aspere, auareque tractati, de potentis amici benignitate cum semel desperarunt, in posterum quoque eum contemnunt. Itaque neque dant operam, ut illius sibi gratiam concilient, & si quam etiam collectam habent, dilabi facile patiuntur: neque enim gratis diligere, ac ne diligi quidem, nisi ex ea re ad se utilitas redeat, volunt. Itaque aut nulli, aut vilissimus quisque in officio est: utilitas enim, quæ huiusmodi necessitudinem constituit, eadem tollit. Quamobrem sua quoque interesse potentes statuere debent, ut, quoad fieri possit, alacres, speique bonæ plenos inferiores amicos habeant, amantesque sui, ultroque, ac libenter obsequentes: id assequuntur, si leniter, si humaniter utentur imperio, & si bene, benigneque merentibus fecerint. Nunc vero imitantur plerique

H ciuita-

ciuitatum quarundam leges, non sapientissimas illas quidem, quæ poenæ, supplicijq; metu detertere improbos ab iniustitia tantum conantur, satisque habent, si illud præstiterint, uti facinorosis inutile sit peccare, aut plane etiam criminofum. Rectius autem est eas sequi, quæ regiæ a Xenophonte appellantur: eæ enim efficiunt non modo, ut peccare inutile, perniciosumq; sit, sed etiam, ut recte facere sit fructuosum, cum præmia bonis, fortibusq; proponant. Studeant igitur potentes, ut voluntario amicorum obsequio vtantur: ita enim demum potentia iucunda est, si in volentes eam exerceas: in inuitos autem, ac repugnantes, imperium ijs dedisse mihi deus videtur, quos dignos iudicauit, qui ita adfecti viuerent, quemadmodum Tantalus, quem apud inferos ferunt semper secundæ mortis metu torqueri. Callidum est etiam quorundam, versutumque consilium, qui domesticos inferiores amicos inter se congruentes metuant, eoque in discordijs dissidijsq; in familia commouendis, odijsq; fouendis, atq; alendis sunt occupati: conspiraturam enim in patremfamilias consentientem domum aiunt; dissidentem autem inter se cum eo conuenturam: qui si in improbos inciderunt atque infideles amicos, quid est, cur cauere eos, quam coercere, aut omnino ijs carere malint? Sin probos, integrosque nacti sunt, metuere nihil attinet: qui autem esse potest discrepantium inter se amicorum usus? Addiscant igitur imperij gerendi rationem: neque enim facilis quædam res est, aut peruulgata: ac, si verum querimus, ne humanitatis quidem vsquequaque, sed magna ex parte diuinitatis: verum ea doctrina ab alia quadam arte petenda est, quam qui tenebunt, næ illi facile præstabunt, ut ab ijs, qui inter se vel fraterne diligant, colantur ipsi, atq; amentur plurimum: ea tamen illud habet præceptum saluberrimum, quo iubentur, qui cum aliquo imperio sunt, eorum quibus dominantur, voluntates, beneuolentiamque collectam, & comparatam habere: nam & dominatio tutior est ac munitior, & obtemperantium usus tum fructuosior, tum longe, multumque iucundior. Quo magis accufandi

fandi sunt, qui æternum cum familia sua bellum susceperunt, qui non modo suorum patrocinium non suscipiunt, sed etiam ipsi oppugnant, & quasi aduersarijs atque inimicis, quibus possunt locis, incommodant, ac, quo quemq; industriorem, fidelio remque experti sunt, eo deprimunt magis, veriti scilicet, ne, si semel emerferint, vel ad alium se conferant, vel rem suam agere velint: rectius autem erat, quomodo veteres efficiebant, ut seruus sibi liberos haberent, eos, qui liberaliter seruirent, sic hos a mercenaria, & seruilis, ad gratuitam, & liberalem amicitiam illos euocare: neque vero rectius tantum, sed etiam utilius. Quod est enim prædium, quæue possessio tam opima, tamque omnium fructuum ferax, & fertilis, quam amicus est? Quantum vero interesse putamus, per gratuitos ne amicos res nostra, nosque ipsi curemur, an per hosce, in quibus amicitia simulachra vix illa quidem apparent? amicitia vero ipsa plane longe abest. Etenim, qui vitæ suæ, velut vsuram, locant, id fieri non potest, quin laborum mercedulam, spemque dubiam utilitatis spectent, se seque respiciant, deque se vnus anxij sollicitique sint. Itaque, quomodo coloni, qui non suos, sed de dominis conductos, fundos colunt, nec arbores ferere, nec fundum instruere, nec vero villam ædificare ornareue volunt, sed eam modo culturam adhibent, quæ præsentis fruges, quam minimo fieri possit impendio; quam vberimas habeat; sic id, quamdiu quidem, tamquam operarij aliqui, deseruiunt, nulla re augeri, aut amplificari superiores amicos student, neque dant operam, illi ne nudi, inanesque sint, sed, ipsi ut quam breuissimo temporis spatio quamplurimum auferant, in eo laborant. Vbi vero a quaestu ad caritatem, atque amicitiam ingenuam illam, ac gratuitam tracti sunt, iam, quasi agrorum domini, non illud modo attendunt, quantum ex ea coniunctione vno illis, aut altero anno reficiatur, quantumque ex ea re capiant, sed, uti nos ornatos, beneque cultos habeant, id vero curant, atque enituntur. Itaque, amore ac beneuolentia complexi nos, omnem laborem suscipere, omneque adire periculum gestiunt

H 2 nostra

nostra causa non secus quidem ac sua: nec iam defatigantur, aut conquiescunt, aut separatim sibi quicquam a nobis prospiciunt: quæ quidem amicitia, nisi superbia humanitatem obterat, nisi hominis ponamus naturam: immanitatem autem beluarum induamus, sua ipsa sponte oriatur, atque alescat: nihil est enim, quod homini accidere iucundius possit, quam hominis consuetudo, præsertim congruentis: ut sapientem quoque, qui hæc tractant, in solitudine beatum fore negent. Nihil est autem proclivius, quam ut, quorum iucunditate oblectemur maxime, ea diligamus, atque amemus plurimum. Magna præterea est conuictus, & contubernij, ad hominum animos benevolentia implicandos, uis. nam bestiarum quoque nonnullarum animaduertere desiderium licet, cum ab ijs eas distrahas, quibus cum pauci consueuerint: ut, qui eum, cuius fidem experti sunt, industriam probant, mores laudant, cuiusque benevolentiam, atque amorem erga se perspectum, & cognitum habent, non corde ament, neque cum eo opes suas æquabiles faciant, naturæ mihi vim adferre uideantur humanæ.



PETRI BEMBI VITA.



PETRVS BEMBUS VENETIIS
 natus est, annis post Christum
 ortum MCCCCLXX. patrem
 habuit Bernardum Bembum,
 hominem, cum vetere nobili-
 tate, tum doctrina, tum etiam
 dignitate clarissimum: nam res
 Venetum publica a certis no-
 minatim familijs administra-
 tur: eę clarę habentur: reliqui
 ciues; quamquam sunt eorum multę amplę honestęq; fa-
 milię, neque genus suum magnopere extollunt, & in sua
 quique re gerenda occupati, ciuitatis procurationem fere
 non attingunt. Inter eas familias Bembi antiquissima stirpe
 orti, cum omni tempore in rep. floruerint, ampli in primis,
 illustresque numerantur. erat pręterea Bernardus suo e-
 tiam priuatim nomine, propter iuris scientiam, qua pluri-
 mum excellebat, apud ciuitatem multum admodum gra-
 tiosus; & propter summam prudentiam, multiplicemque
 rerum vsum, propterque vitę grauitatem, magna in homi-
 ne erat auctoritas. Hic cum a sua ciuitate ad populum Flo-
 rentinum legaretur, qua in legatione obeunda biennium
 domo abesse Venetorum legibus cogeretur; faciendum si-
 bi esse existimauit, vt Petrum filium, quamquam admodum
 is tum puer erat, secum educeret; propterea quod Floren-
 tinorum instituta parum a Venetorum moribus illo tem-
 pore abessent: non dum enim sub vnus dominatione illo-
 rum

rum erat respublica, sed nobilitatis fere arbitrio regebatur, & quod ea ciuitas prestare ingenijs creditur, acui puerum, in quo iam tunc præclara indoles elucesceret, volebat: tum Italicam linguam, qua non elegantissime Veneti, illis præfertim temporibus, vterentur, emendari in illo, Florentinorum hominum consuetudine, existimabat posse: nam omnium Italiæ nationum commodissime eam loqui ciuitatem autumant. Nec vero patris consilium filij sefellit industria: sic enim excitatum puerile Bembi ingenium Florentiæ est, sic teneræ pueri aures, animusq; puro ac dulci illo Etruscorum sermone imbutus, vt iam inde a prima adolescentia, multa cum Latine, tum vero Thufce a se scripta ediderit, quibus nihil hominum auribus politius, nihil omnino elegantius, aut suauius accidere possit. Iacebat omnino temporibus illis eloquentia: inquinata enim loquebantur; nullus erat verborum delectus, nullum scriptorum discrimen. nam & ipse negligebatur Cicero, vel contemptui potius erat; & Cæsarem propter historiam modo cursim & negliger legebant; Terentium, Virgilium, bonos ceteros, in ludo tantum, idque perpauci, ediscebant: post puerilem illam disciplinam sumebat eos in manus nemo. duros, obscuros, asperos scriptores adamabant; confectabanturq; abditas, abstrusasque historias, aut fabulas: qui ijs ineptijs referri essent auctores, ij eruditi numerabantur: itaque vnus Ouidius de veteribus in honore erat. ergo, si verum quærimus, nihil ante Bembi ætatem Latine scriptum octingentis ipsis annis, aut eo amplius est, quod Romam illam veterem redoleat; aut magnopere lectione dignum sit: solœcismum enim vitabant, quantum quidem ex arte grammatica didicerant, idque ipsum haudquaquam semper: id vnum præstare qui poterant, Latine loqui sese putabant: nulli, qui purus ille, incorruptusq; veterum Romanorum sermo esset, nouerant; ac ne suspicabantur quidem. Parebat atq; idem eorum error, qui Italice scribebant: qui cum duos haberent scriptores, mea quidem sententia, vel cum Latinis, vel cum Græcis conferendos: nam alterius versus et
suau-

suauitatis plurimum habent & dignitatis: & varijs ingenij,
aut etiam artis luminibus referti sunt, & animum sæpe per-
mouent atque impellunt; vt de amore ne Græcus quidem
quisquam melius; alterius oratio dulcis, copiosa, polita, or-
nata, mollis, faceta, rem ante oculos ponens, vt geri ea, quæ
legas, non narrari videantur. Hos cum haberent auctores
duos, vtrumque in suo maxime genere excellentem, scribe-
bant ipsi inepte, abiectissimis verbis; nullus erat orationis or-
natus, nullæ homine erudito dignæ sententiæ, nulla compo-
sitionis, aut numerorum ratio: licet in manus sumere, quæ
tunc multi scriptitarunt: præter vnum Politianum, illum-
que ipsum minus dulcem, minus omnino elegantem, quam
vt legisse Petrarca lectissimos versus videatur; ceteros ad
vnum indignos dicas, qui in scriptorum numero habeantur.
vnum scurrile vigeat genus; in eo sane ridiculi non-
nulli; sed ipsi quoque multis in locis inertes ac languidi.
Hanc igitur inter erroris atque inscitie caliginem Bembus
ad veterum scriptorum tamquam lumen ac lucem respexit
primus, primusque ab hominibus, magnis quidem horta-
tionibus, magno suo labore, multis reclamantibus ac repu-
gnantibus, impetrauit, vt Ciceronis, vt Virgilij, vt Cæsa-
ris similes sese in dicendo, quam Apuleij, Macrobij, Sta-
tijque esse mallent; cum contenderet oportere, qui scri-
berent, eam dicendi formam, quæ optima esset, habere ani-
mo & cogitatione comprehensam; ad eam tamquam ad e-
xemplum aliquod orationem scriptionemque suam dirige-
re; Demosthene autem, aut Cicerone perfectius in dicen-
do aliquid promere se posse qui profiterentur, sua quidem
sententia nimium subire oneris, nimium suis fidere viri-
bus; quorum etiam iam olim errore ac temeritate factum
esse existimabat, vt malos multos scriptores haberemus:
nam, cum nonnulli a Cicerone discedere, sui que plane esse
vellent, cum aliter, atq; ille, dicere studerent; quoniam is
perfectus, absolutusque esset; deterius dicere cogebantur.
Hæc Bembus cum dictitaret, cumque etiam litteris manda-
ret, egre ille quidem, sed multis tandem persuasit, spretos

ac

ac repudiatos antea scriptores optimos illos, repeterent :
 propositosque sibi ad imitandum haberent . quoquidem
 Bembi labore, quibusque præceptis, quantum eloquentia
 adaucta sit, cuius facile est noscere; si ea, quæ ante hanc
 illius disciplinam scripta sunt, cum huius ætatis scriptori-
 bus conferantur. Ea obita legatione domum Bembus cum
 patre redijt, iam bonarum artium studijs incensus, iam elo-
 quentiæ, ac scribendi magno quodam amore flagrans. ita-
 que in Siciliam vsque ad Constantinum Lascarem Græca-
 rum litterarum causa profectus, trienniumque ibi commo-
 ratus est; tantumque ingenio, labore, assiduitate profecit,
 vt Græce non modo optime sciret, sed etiam polite, lucu-
 lenterque scriberet: atque in Sicilia cum esset Latine de Ae-
 tne incendijs scripsit ad Angelum Gabrielem: qui liber,
 ab eo editus, in manibus hominum eruditorum non sine
 aliqua laude versatur. Post eam peregrinationem celeriter
 Bembus affecutus est, vt maxima apud omnes Italiae ciuita-
 tes, tum apud exterarum etiam nationes, eius esset ingenij ad-
 miratio: ita enim, vt res est, sic homines statuebant; per-
 difficile factu esse vnum atque eundem duabus linguis tam
 scite, tamque ornate copioseque vti posse; quodque pauci
 vno in sermone vnquam præstiterunt, vt præclare scribe-
 rent, id ab adolescente Bembo & in Latina & in Italica ora-
 tione effici, omnibus, qui de ijs studijs aliquid iudicare pos-
 sent, permirum videri necesse erat: præsertim id ipsum in
 vtraque lingua & prosa oratione & versibus, id quod Cice-
 ronem ipsum expertum, sunt, qui negent assequi potuisse.
 Ac miramur profecto interdum, quid causæ sit, cur, cum
 oratori poeta maxime finitimus sit, negent fieri posse, vt
 idem orator bonus, idem egregius poeta euadat; idque non
 hominum modo existimatione, sed etiam re ipsa comproba-
 tum esse: nullos enim, aut certe per paucos vtramque facul-
 tatem adeptos videmus: sed cum diuturno studio, magnif-
 que lucubrationibus vtraque ars egeat, non suppetit ad v-
 tramque tempus, atque otium: & quoniam longa exercita-
 tione, assiduoque vsu consuescimus aut oratorie dicere, quod
 vitio

vitio maxime datur versus scribentibus, vel poetice, quod contra in prosæ orationis scriptoribus vitiosum in primis habendum est: si quis vtrumq; studium copularit atq; coniunxerit, magnæ cuiusdam intelligentiæ, acrisque iudicij est, præstare alterum genus, ne incurrat in alterum. præterea oratorum, poetarumq; ingenia atque naturæ contrariæ propemodum inter se sint, oportet: hi enim ratione atque humanitate reguntur; illos, furoris afflatus ac diuinitas quædam, impellit: atq; omnino proximis, coniunctisq; in rebus facilius a recto declinatio, ac lapsus est, reprehensio vero vel insignior: creat enim errorem similitudo; & cum uarium est, celeriter, propter rei similis comparisonem ac propinquitatem, inuersio animaduersa internoscitur ac reprehenditur. Neque ij tamen nos sumus, qui aut Ciceronis versus valde improbandos existimemus, aut Platonem atque Aeschinem (vtrumque enim versus in adolescentia scriptitasse memoriæ proditum est) malos, contemptosque fuisse poetæ credamus. Post Siciliensem illam peregrinationem, per paucis interiectis annis, Ferrariam Bembus pater Prodominus missus est: eum magistratum, magnum in primis atque honorificum, illis temporibus Veneti, virtute belli partum, victoriæque tamquam insigne, gerebant in aliena ciuitate. eo quoque cum patre filius exijt: sicque eo in oppido per diu fuit, ut cum ab omni iuuentute, ab omni que nobilitate plurimum coleretur, tum uero Herculi Estensi, maximo ac fortissimo uiro, qui in ea ciuitate imperium obtineret, Lucretiæ Borgiæ, quam in matrimonio Alphonsus habebat, gratus in primis, acceptusque esset. Per idem tempus, cum annos natus esset haud amplius xxvi. eos sermones, qui Asulani ab eo inscripti sunt, confecit; opus omnium pigmentorum flore atque colore distinctum. feminas omnino cum adolescentibus de amore loquentes amoenissimis quibusdam in hortis facit, ita lectissimis verbis festiue ac venuste, ita sententijs copiose atque ornate, nihil ut eius oratione cum vberius, tum vero suauius modulatusve esse possit. eos libros tanta hominum, mulierum etiam medius

I fidijs

fidius approbatione & tamquam plausu exceptos recentes esse meminimus, ut ex templo cuncta eos Italia cupidissime leccitavit atque didicerit: ut non satis urbani, aut elegantes ij haberentur, quibus Asulanæ illæ disputationes essent in cognitæ. erat per id tempus Urbini Guidusubaldus Feltrius, vir maxime spectata, maximeque nobilitata virtute: is suæ ciuitatis tenebat imperium; atque cum eo Helisabetha Francisci Gonzagij, qui itidem ciuitati imperabat, soror, nupta erat: cuius de mulieris laudibus mira quædam litterarum monumentis, cum ab alijs multis, tum etiam ab hoc ipso Bembo mandata sunt. Ac datum est profecto Urbini ciuitati, ut non suos domi modo principes omni genere laudis claros atque insignes habeat, sed etiam, ut ex alienis ciuitatibus mulieres, quas illi in matrimonium duxerint, lectissimæ fere, præstantissimæque illi seminarum omnium obtingant: Nam præter eam, quæ a me appellata est, Helisabetham Gonzagiam, habuit Franciscus maria huius Guidiubaldi pater ex eadem familia uxorem Eleonoram, quæ proximis diebus mortua est, omni muliebri laude præter ceteras ornatam atque illustrem. Nec vero de Victoria Farnesia, quando in hunc sermonem venimus, fileri vilo modo potest (quamquam inuitus facio, ut de ijs, qui nunc sunt, dicam aliquid) cuius quidem mulieris modestia ac pudor ingenuus illud profecto præstitisset, quod Periclem aiunt dixisse, primam in muliere laudem esse, ut ne de virtute quidem illius vlla ad viros fama emanet: sed nulla ratione occultari tanta primariæ feminae virtus potest, quin ad viros quoque emergat, ac suo ipsa splendore se prodatur. Fortunatus igitur Guidusubaldus cum sua illa animi magnitudine atque equabilitate, suaque illa prudentia, tum vero hac tali coniuge, vitæque socia. Sed cum Urbini quem admodum dicere incœperam, Guidusubaldus atque Helisabetha Gonzagia essent, hominum excellentium peraman-tes, perque hospitales, conueniebant ad eos ex omni Italia, ut quisque præstanti aliqua in arte præcelleret: eo cum Bembo quoque forte venisset; præcipuo præter ceteros in honore

*Helisabetha Gonzaga
vixit annis 40*

nore haberi coeptus est: multa enim habuit Bembus, quæ,
ad hominum animos conciliandos, plurimum valere con-
fueuerunt: nam & in forma summa quædam oris species ac
dignitas inerat, & in statura ac proceritate decor; mira præ-
terea in moribus suauitas quædam lenitasque amabilis; dul-
cisque cum sermo, tum tota vite, victusque consuetudo mi-
tis ac clemens: ad ea cum præclara ingenij vis ac natura acce-
deret, expetebatur, scilicet vnus omnium, maxime ab illu-
stri illo virorum, seminarumque conuentu: quibus rebus ef-
ficiebatur, vt multum domo abesset, Urbini que fere viue-
ret: quam rem multum etiam vicinitas adiuuabat, atque vl-
tro citroque Pisaurum quidem vsque perfacilis atque expe-
dita nauigatio: ita factum est, vt minus domi honores assue-
sceret admirari, minusque ambitionibus implicatum ani-
mum haberet. At vero id pater reprehendere, grauiter
ferre, ac prope patrio iure, vt vxorem duceret, vt remp. ca-
pesseret, atque ex ordine magistratus peteret, imperio cõ-
gere: fit enim fere, vt qui in libera ciuitate, præsertim cla-
ra atque opulenta, viuant, omnia ad honores referri putent
oportere; id vnum consecantur & expetant, vt dignitates,
vt magistratus adipiscantur: si quæ sint laudes, quæ alio per-
tineant, eas aut non agnoscunt, aut leues atque inanes iudi-
cant: atque hæc liberorum populorum consuetudo, quam
quam per se ipsa, vique sua fortasse minus probanda, est: nec
enim compendij, honorisve causa, si ad veram illam ratio-
nem dirigas, petendi magistratus sunt, ciuibusve alijs vllò
studio, aut vlla contentione præripiendi; sed vnus reip. ra-
tio habenda est, eiusque vnus vtilitati, salutique seruien-
dum; vt dignioribus concedamus; & sæpe delatus nobis
maior aliquis, aut magistratus, aut imperium, aut cura-
tio, si minus ei rei gerendæ nos idoneos sentiamus, acci-
piendus non sit, aut etiam deponendus: nec enim errare
patriam, pati æquum est. Sed, quoniam non viuatur cum
perfectis hominibus, percommode popularis hæc ambitio
cecidit: honorum enim cupiditate incensi, non ad suum se-
quisque format atque instituit arbitrium, sed ad populi, ci-

uitatisque iudicium, consilia, mores, vitam, voluntatemque instituunt; dantque operam, non ut sibi ipsi, aut alijs fortasse quibusdam probati sint; sed, ut populo, ciuitati que, a qua honores scilicet expetant, placeant: ita fit, ut vna, eademque perpetuo permaneat ciuitatis forma, atque vna, eademque sit omnium ciuium communiter disciplina; neque singulorum priuatim studijs, voluntatibusque variatis, reip. quoque ratio atque institutio vertatur atque mutetur; quam quidem cautionem, prudentiamque, vna, præter ceteras omnes, Venetorum ciuitas semper adhibuit; ut domesticos suos mores diligentissime retineret, essetque plane sua, neque quicquam exterum infundi in ciuitatem, aut vlla infici se peregrinitate pateretur. Cum igitur Bembo pater in eum cursum, quem tenuerat ipse, quemque summa cum laude, plausuque confecerat, filium induceret atque compelleret, ille contra alia spatia, cursusque alios animo agita-
ret, quamquam patri obsequi suadebat pietas, ciuium consuetudo hortabatur, propinqui, necessariique efflagitabant; tamen sic animo cogitabat, cuius ipse gloriæ cupidus esset, eam ad se non a suis modo ciuibus, sed ab omnibus etiam gentibus ultro deferri; prehensandum sibi eius rei causam neminem esse, supplicandum nemini, nullius suscipiendas inimicitias, nemini os lædendum: vnam enim esse, ex omni laudum genere, ingenij gloriam, qua, sine vlla cuiusquam querela, perfrui, ad extremum usque, homines soleant: honores imperitæ modo multitudinis testimonium præferre; ingenij laudem ac famam, etiam intelligentium hominum, habere probationem: nec vero aut voluntatum mutationem, aut fortunæ temeritatem extimescere; sed stabilem, firmamque etiam ad posteros commendationem habere: postremo permultos omnibus ætatibus exoriri, quorum opera, pro sua cuiusque parte, reip. geri possit; at, cuius ingenij monumentis ciuitas ornetur, ne multis quidem sæculis vnum extare, aut alterum: satis verò iam Bembo, magnos honores in republica, ad illustrandam familiæ dignitatem, esse consequutos, satis nobilitatam, maiorum suorum rebus

rebus gestis, suæ memoriæ stirpis esse; quando & vetustissima templa a suis iam olim gentilibus constructa, ea scilicet, quæ Iuliano dedicata sunt, Bemborum nobilitatem illustrent, & pietatis sint testes; & Francisci Bembi eius, qui, multos annos ante Patriarcham Venetijs institutum, sacrorum antistes ac pontifex fuit, memoria, gentis vetustatem ostendat; tum maritima imperia, clarissimæque Francisci item Bembi victoriæ; tum Marci, qui a Cyprijs interfectus est; aliorumque multorum ob remp. susceptæ calamitates, interitusque, Bemborum et virtutis, & in patriam caritatis testimonio sint: nec vero ne in præsentia quidem defuturos, qui stirpis, gentisq; gloriam tueantur atq; adaugeant; habere sese Carolum fratrem, in quo mirificam ingenij indolem, maximam virtutis spem inesse intelligat; esse præterea cum aliis nonnullos, tum Ioannem mattheum Bembum summa itidem virtutis & ingenij spe præditum adolescentem. Et vero hic quidem, nec Bembi de se iudicium sefellit, & multis, magnisq; in rebus domi, forisque perutilis reip. ciuis est, semperque fuit: nam Carolus, priusquam patriæ prodesse per ætatem potuisset, extinctus est: vnam hanc litterarum atque ingenij laudem minus illos adhuc esse adeptos: eam se in suam gentem inferre cupere, ac propemodum etiam se id perficere, ac præstare posse compertum habere: sin honores sectari velit, certo scire, minus eam sibi rem ex sententia successuram, quam inuitus suscipiat, & iniucundam existimet; & multa præterea a natura impedimenta habere se, sibi ipse sit conscius: nam & blandiri ei qui possit, quem fortasse minus aut probet, aut diligit, pudore sese quodam ingenuo impediri; & existimationem suam vulgi voluntati, comitiorumq; casibus, & tamquam vndis, quotannis commissam esse, propter animi quandam aut libertatem, aut, si quibus ita videtur, fastidium, pati non posse; nullam autem omnino rem facilem esse, quam inuitus facias. Scire sese illam alteram honorum atque ambitionis incertam, ac periculorum plenam viam, plus fortasse utilitatis, plus apud parui, angustiq; animi homines splendoris

Aurea lena

doris polliceri; sed eam se sequi malle, quæ plus veræ solidæque dignitatis habeat: ut enim fructuosos fundos parare utilius sit: voluptarios autem, atque animi modo causa institutos, honestius ac magnificentius; sic, illam ambitionis rationem vberiores in vulgus fructus fortasse ferre, hanc certe bonarum artium ac litterarum institutionem, plus apud præclara hominum ingenia magnificentiæ, plus honestatis ostendere: ac, ne multa, nihil ægrius factum est, multis filij contentione, multa contra patris, matris quoque Helenæ Marcellæ, primariæ femine, castigatione, sæpe etiam obiurgatione, quam, ut ne singulare ac prope diuinum Bembi ingenium, ad bonarum artium studia atque ad has mansuetiores musas natum, vulgo atque imperitæ multitudini proderetur: sed peruicit tamen, ut, per parentes ac necessarios, perque ciues sibi suos aliquando vitam in litteris agere, idque vnum, relictis rebus, curare sibi liceret. Sed paucis post annis dum sese Bembus libris, litterisq; obruit, dum solitudines, recessusque sibi pro foro, sibi pro curia, proque comitijs per summum otium, summamque tranquillitatem habet; Ioannes Medices Cardinalis, is cui Leo. X. nomen postea inditum est, Pont. Max. Romæ creatur. Mos, consuetudoque Pontificum est, ut si quid publicæ priuatæve rei incidat, quod prolato opus non sit, quodque secreto per litteras agi oporteat, si quando, aut regibus, aut ciuitatibus respondendum, aut si quid postulandum ab ijs sit, si quid denique paulo maioris negotij implicitum cum aliquo est, id, quasi per familiares epistolas, transigant: eas litteras cera obsignant; nam publicis decretis in plumbo signum est: earum litterarum scribendarum negotium datur hominibus, ob scribendi prudentiam, atq; elegantiam, eruditissimis; ob muneris, locique dignitatem, grauissimis atque honestissimis, ob autem rerum pondus ac magnitudinem, summa fide, summaque probitate præditis: ij magna cura ac diligentia conquiruntur, magnis præmijs euocantur. Eum Leo morem cum vehementer probaret, cumque ad dignitatem pertinere arbitraretur, diligentissimeq;

cum

eum retinere vellet, sine vlla dubitatione Bembum accersiri, eique muneri, negotioque preponi iubet. Magnam in spem, magnam in dignitatem vocabatur Bembus: munitissimus enim Leo, liberalissimusque & habebatur & erat: ipsi autem res erat familiaris pertenuis; vix vt necessarios sumptus suppeditaret, idque ipsum magno Caroli fratris, quem sui amantissimum, obseruantissimumque habebat, labore atque industria: confluebant præterea ad Leonis famam ac bonitatem, vt quisque in quaque excellebat arte, aut disciplina; vt propemodum homini erudito, Roma abesse, turpe esset. Huc accedebat reprehensores suos conuincendi studium quoddam; cum quanti suæ illæ artes fierent, quas illi nulli rei esse dicerent, quasque, tamquam nugæ ac deliramenta, sæpe Bembo objicerent, ostendendi magna data esset occasio: nec vero a suo vetere instituto, aut a litteris abduci sese propterea arbitrabatur, quippe, qui ad scribendum inuitaretur, qua vna in re omnis sibi cura atque opera posita semper fuisset. Proficiscitur Romam Bembus, cum annos natus esset tres & quadraginta; preponiturque epistolis Pont. Max. nomine scribendis; eoque in munere gerendo datur illi socius, & tamquam collega, Iacobus Sadoletus is, qui postea Cardinalis factus est. Scripsit eorum vterque eas epistolas cum plane Latine, quod ante id tempus neque acciderat vlli, nec adeo fieri posse villo modo homines existimabant; ac, si verum querimus, ne cogitabant quidem: nostri enim homines, sæpe etiam transalpinæ nationes, sic Latine scribebant, vt suæ quisque ciuitatis tamen loquendi formam, consuetudinemque retineret; ac Latinis verbis, quamquam ne id quidem vsque quaque, Gallice nihilominus, aut Italice, nescio quo pacto, loquerentur: sed eæ epistolæ cum plane Latine a Bembo, Sadoletoque scriptæ sunt; tum vero summa a doctissimis, exercitatissimisque hominibus adhibita est elegantia, summaque dignitas; id quod ex ijs libris intelligere licet, qui a Bembo editi, epistolas a se Leonis. x. nomine scriptas continent. Cum itaque Pontifici Bembus, homini nec natura hebeti, nec in scribendo rudi,

rudi, cumulatissime satisfaceret, magno ab eo honore afficiebatur: tantum porro in illum suae liberalitatis Leo contulit, ut, qui Romam pauper tandem uenisset, suis ex fructibus Sest. amplius cxx. caperet, Pontificis plane beneficentia diues factus. Fuit ætas, tempusque illud humanitatis suauitate nimia prope quadam perfusum; ut delectationum multarum studia seculi illius licentiæ, propemodum omnium permisso, concessa essent: nec enim ne uoluptatum quidem quarundam blandimenta nimium seuerè aspernabantur; sed multa ad oblectationem, multa ad ludum data erant cuiusque ordinis, cuiusque ætatis hominibus: nec uero religioni habebatur, honestos, grauesque homines in hortis uisos esse; aut paulo liberiore in conuiuio, symphonia cum caneret, & mulieres accumberent, interfuisse: quamquidem seculi illius nimium plane profusam hilaritatem, eorum temporum, quæ sequuta sunt, tristitia, uehementer corripuit, magnoque opere castigauit: quo magis vereor, id, quod dicturus sum, ne multis secus, atque est, de Bembo, existimandi aliquid det loci. Sed quoniam nobis susceptum id est, ut de illius vita, non de laude, dicamus, ne hoc quidem reticendum nobis esse arbitrati sumus. Ac si fere, ut mores, consuetudinesque, locorum, aut ætatum, pro ratione sibi, proque disciplina homines habeant: denique, quod fieri vident, licere putant; atque id, quod in præsentia minus reprehenditur, in posterum quoque tolerabile, concessumque fore arbitrantur. atque omnino apud omnes gentes, etiam, quæ natura grauius sunt, fieri consueuerunt moribus leuiora. In ea igitur morum, sæculique licentia, eximia forma mulier quædam perpulisse Bembum dicitur: neque, diu resistentem, continere eum se a lapsu potuisse, præsertim qui nullis dum sacris initiatus esset: verum ea, ut temporibus illis lapsio, ut hac ætate fortasse labes, eum habuit euentum, ut magno, si modo naturam audire volumus, fructu compensaretur: suscepit enim ex ea muliere liberos tres; qui ut nominentur a me, res propemodum postulat, nec ipsi nolunt; Lucilium, Torquatum, & Helenam Bembam,

bam, feminam lectissimam, quæ cum Petro Gradenigo pri-
 mario adolescente nupta est: cui etiam liberos ex se se pepe-
 rit; totiusque orbis terrarum præclarissimam ciuitatem ci-
 uibus nobilissimis auxit: ut, si qui sunt, qui in eo Bembum
 grauius accusandum censeant, meam illi quidem ad suam
 sententiam adscribant licet: sed ij tamen se meminerint id
 improbare factum, quod infectum esse, optare certe non
 audeant. Nec vero in litteris modo scribendis Bembi fidem
 atque eruditionem Leo periclitatus est; sed etiam in rebus
 agendis hominis prudentiam, sollertiamque plurimum a-
 damauit. itaq; cum conspirare aduersus Galliæ regem cum
 Cæsare Maximiliano, cumque Hispaniarum rege catholi-
 co, ita reip. temporibus postulantibus, cogitaret; misit de
 ea conspiratione Bembum ad Venetorum senatum, qui
 eam magnopere ciuitatem hortaretur, uti a Gallorum, qui
 bus cum consenserat, amicitia discederet, ac sese cum Pon-
 tifice, reliquisque conspirationis auctoribus, ducibusque se-
 dere & societate coniungeret. Habita est a Bembo in Vene-
 torum senatu ea de re oratio pergrauis sane perque vehe-
 mens, quam etiam scriptam reliquit: perlegant eam nostri
 homines; nihil Italice scriptum, grauius ornatiusve ea ora-
 tione, dicent esse. Tenebatur præterea impendio magis
 Bembus studio signorum antiquorum, idque genus rerum
 reliquarum, credo, quod eam pulchritudinem, ordinem,
 partium conuenientiam, quam mente atque animo in scri-
 bendo vnus cerneret præ ceteris, ijs etiam minus liberali-
 bus in artibus cum propemodum agnosceret, paulo magis
 commouebatur. atque omnino fingendi pingendique ar-
 tem poeticæ ex altera parte aiunt respondere: illa enim ani-
 morum, hæ sensuum mulcendorum magistræ: quam qui-
 dem ingenij doctrinæque causam, ij, qui nostra ætate eous-
 que harum rerum cupiditate efferuntur atque insaniunt,
 magno ut propterea ere in alieno sint, cum afferre homi-
 nes sine ingenio, sine litteris, non possint, quam morbi fu-
 rorisque sui rationem allaturi sint, ipsi videant: quid enim
 attinet, cum animum partim per se, vique sua turpem ru-

K

demque,

demque, partim maleuolentia, inuidia, perfidiaque inquit
natum gererent: domum modo atque hortos, villasque, tot ver
suris faciendis, tot frustrandis, fraudandisque creditoribus,
affabre factis signis ex marmore, aut ex ære ornatas habere?

Cumque in dictis factisque honestatis faciem nunquam, ne
insomnis quidem, aspexerint, decorem pulchritudinemque;
tanto in ære ac lapidibus opere adamare? equidem nec do
mum, nec villam, nec vero oppidum umquam, non modo
exornatum, sed ne satis quidem mundum dixerō, ubi illi
cum ea feditate, cum istis animi sordibus habitent. Nam si
qui sunt, qui talium rerum intelligentiam, tamquam suam, in
reliqua vita, munditie atque elegantie, aut rectarum artium,
in quibus ipsi excellant, corollarium quoddam adferant, id
quod in Bembo usu euenerat, istis non modo suscensendum
non est, sed etiam gratie habende sunt: at, qui omnium di
sciplinarum expertes, in omni vita rudes atque agrestes, hu
ius unius studij commendatione nitantur, aut in eo non vir
tutis quasi appendiculam, sed tamquam vitiorum ac scele
rum suorum, ut ipsi sperant, integumentum, ut ego inter
pretor, additamentum quoddam, querant; istis non modo
acriter vituperandi, sed etiam vehementer illudendi sunt.
Sed cum tenui Bembo valetudine atque imbecilla esset, cum
que noctu magnis lucubrationibus, magnis vigiliis scribe
re necesse haberet; nam interdiu, cum a Pontificis latere di
scedere vestigium vix liceret, cumque multi audiendi, salu
tandi, deducendi, honestandi, ut Romanus ferebat mos,
essent; relinquebatur otij nihil: grauem diuturnumque in
morbum incidit; ex quo cum ægre ac difficulter conuale
sceret, nec recreari reficique videretur posse, de medici con
silio, ipsius Pont. hortatu, cæli mutandi causa, Patavium
petijt: atque eo anno Leo moritur. Incredibile dictu est,
quanta animi alacritate, quantaque letitia Romanis labori
bus, curisque liberatus, longa sane, annorum nouem, ipso
rum intermissione facta, optatum ad otium studiumque
suum vetus sese Bembo receperit; nullum ut urbis urbana
rum rerum, aut deliciarum desiderium in eo resedisse, li
quido

quido appareret. Et vero eos, qui a pueris, bonarum artium studijs dediti, aetatem egerunt in litteris, mordere in adolescentia interdum solet, quod a rebus agendis absint: quod si casus eos forte aliquis ab otio ad agendum euocauerit atque traduxerit, nã illi rem totam, quam, incognitam dum haberent, admirabantur, expertam atque perspectam, præ suo vetere studio, contemnunt. quid enim in se continet, quod magnopere aut laude, aut etiam appetitione dignum sit, præclara ista agendi sollertia? si modo rem inspicimus, ac speciosa illa vocabula, communitas, utilitas, salus hominum, paulisper ab hac disputatione faceessant, rogamus: quia enim tota in re non ratio, sed, maximam partem, fortuna dominatur, quamque non prudentia, sed plerumque (non enim libet semper dicere) malitia, regit; quid aut gloriæ, aut iucunditatis inesse possit? quasi enim cum ludas tesseris, neque contra eius ludi formulam ut venias, aduersarioque ut fucum facias, animum inducere velis, si te is, qui cum ludas, contra sine vlla dubitatione circumueniat, atque decipiat, numquam tu tantum scientia atque artificio profeceris, ut cum illius dolo atque fallacia certare possis; sic in hominum vita hac, & tamquam alea, cum viri boni, ut a iustitiæ certa quadam præscriptione, ne latum quidem vnguem, discedant, abduci sese nullis aut honorum, aut pecuniæ præmijs patientur; alij autem vulgo fraude, præstigijs, sæpe periurio, perfidiaque pugnent, vincitur nimirum simplicitas calliditate, ingenuitas impudentia, pudor molestia, fides scelere, veritas mendacio: itaque tardi, parumque efficaces habiti boni inter improbos, ludibrio sæpe sunt.

Careant igitur insigni hac rerum gerendarum laude homines litteris dediti, animo non modo equo, sed etiam hilari; ac sic habeant, nihil fere honestati hominum, in vita hac communi, esse relictum loci; sed scelus pleraque, ac turpitudinem inuasisse; quamque operam dare se reip. maximam plerique prædicent, eam omnem, communis rei simulatio ne, in sua quemque priuatim utilitate augenda positam, occupatamque habere. Vnos omnino excipio Venetos; Nam

K 2 Chri-

Christiana quidem res communis Romæ, non hominum consilio, sed dei immortalis mente, regitur. Vnos igitur Venetos excipio, quorum præclarissima in rep. optabile statuam esse versari: quam quoniam peregrinis nobis non licet capeßere; nec verò ea ciuitas, post hominum memoriam, prudentissima ac fortunatissima, nostræ, aut cuiusquam opis eget, illam, vt pote libertatis arcem, prudentiæ gymnasium, iustitiæ domicilium, veneremur: otium autem hoc ignobile litteratum, adolescentes senesque retineamus. quam quidem Bembus prudentiam studio ac voluntate huius sententiæ auctoribus præclare emensus, re atq; exitu ad extremum vsq; præstare non potuit: nam, cum Patavij multos iam annos esset, in ciuitate quietis ac tranquillitatis plenissima, ab omniq; contentione, ambitioneq; longe ac multum remota; cumq; omnem curam, cogitationem, operam, ad ea studia, quæ a puero adamasset, celebranda, contulisset, vel in ijs iam consumpsisset potius, magno quodam casu clementem illam vitam, quietam, tranquillamq; prope iam decurso spatio, atque ætate iam fere exacta, recusans atque ingratis coactus est mittere. Erat Romæ temporibus illis, vir summus atq; clarissimus, singulari prudentia, admirabili animi magnitudine præditus, Alexander Farnesius Cardinalis is, qui Paulus III. appellatus est, qui, simul ac Pont. Max. factus est, extemplo tanto imperio ac potestate accepta, vt initium rerum, actionumque suarum ab illustri aliqua laude duceret, faciendum sibi esse existimavit, vt, qui quaque in ciuitate, quibusque in terris homines essent, illustri quadam aut pietatis, aut prudentiæ, aut doctrinæ laude, celebrati; illos vltro ipse, eam dignitatem haudquaquam petentes, ac ne tale quidem quicquam suspicatos, amplissimum in cardinalium collegium cooptaret. ea re sperabat cum pontificatus, collegijque, tot clarissimorum hominum accessione facta, auctum iri maiestatem; tum, specimen se quoque suæ virtutis maximum cum dedisset, magnam de se famam, opinionemque esse facturum: itaq; semel atque iterum, magna cura, magna adhibita

bita diligentia, summos viros peruestigauit atque delegit, quibus grauissimam illam dignitatem, nimio a plerisque opere saepe frustra ac nequicquam expetitam, vltro mandaret: quo facto, opinione maiorem est gloriam consequutus. Sed, ut ut alijs ea res euenit, Bembo quidem perincommode cecidit, quod suo ex otio, suaque e solitudine dulci illa erutus, rursus in eam turbam, molestiamque senex rapere tur, a qua, vix dum inclinata etate, se se tamen cupidissime vindicasset: etenim cum praestantes denuo gloria viros Paulus conquireret, atque indagaret, quos in collegium legeret; occurrit in primis homini Bembo: is forte Venetijs erat. Gaudeo, gaudeo, optima post homines natos, atque amplissima ciuitas, cum inuestigaretur perquirereturque virtus, ad te iterum potissimum ventum esse. etenim cum bonorum, prudentiumque hominum res Christiana publica egeret, sumperat a te scilicet, iam antea, Gasparem illum Contarenum, Italici nominis lumen; in quo, cum summa probitas, castimonia, moderatio, prudentia cum summa doctrina atque eruditione contenderet, eius ipsius insignita pietate ac religione longe eae laudes omnes vincebantur: ergo de tua magnorum virorum copia bis suppeditatum paucis annis rei Christianae communi est: semel in Contarenos, iterum in Bembo. Ad eum cum Pauli missu Carolus Gualterutius Fanensis, vir apprimus bonus, nauusque & industrius, venisset cum diplomate, cumque eius dignitatis insignijs, ille enimvero recusare ac deprecari, neque abduci, nunc demum etate confecta, pati se posse dicere, a quiete ac solitudine illa, quam vnquam, rerum omnium iucundissimam, antiquissimamque, iam inde a prima adolescentia habuisset; magnas tamen sese Pontifici, magnas collegio gratias agere atque habere; quod senectutem suam honorificentissimo de se iudicio, clarissimoque decreto tantopere honestatam voluissent. cum in eo, multos iam dies, perseveraret, neque de sententia depelli posse videretur, nihil propius factum est, quam, ut Romam Gualterutius, re infecta, reuerteretur. Non sum nescius multos fore, qui nostrae oratio-

rationi hac in re parum fidei habeant: plerique enim omnes,
 quid de aliena voluntate credendum sit, de sua coniecturam
 faciunt: itaque incredibile multis visum iri intelligo, Bem-
 bum id verè atque ex animo aspernatum esse, quod omnes,
 fere summa cupiditate, expetendum atque optabile esse exi-
 stiment; tametsi scribimus hæc recenti huius facti memoria,
 multisque, qui in agendo adfuerunt, superstitibus, quos,
 mendacij atque impudentiæ nostræ conscios ac testes, habe-
 re, cur velimus causa nulla est. Sed quoniam par eorum pec-
 catum esse censemus, qui mentiri in historia audent, atque
 eorum, qui dicere verum reformidant; mendacij speciem,
 verum cum dicturi essemus, non horruimus. Erat perin-
 uidiosum futurum, respui tantam dignitatem, præsertim
 quæ non honoris modo splendorem, sed etiam muneris con-
 tineret officium: eam enim ob causam collegium dicitur
 Cardinalium a maioribus institutum, ut ij & adsint Pontifi-
 ci, & ad omnia reip. tempora præsto sint; egerimeque la-
 turus eam rem Paulus erat; quod minui Christianæ ciuitatis
 maiestas, cuius ipse princeps constitutus esset, videbatur, at-
 que eius priuatim & consilium condemnari, & auctoritas
 contemni, qui non beneficium modo Bembo a se datum ex-
 istimaret, sed etiam onus quoddam officij pro sua potesta-
 te impositum: ut si de suo ille honore putaret sibi liberum
 esse recusare. dicto certe pontificis audientem non esse, in
 eo vero & collegium, quod sanctum esset, & Pontificem
 violari. itaque adcurrunt ad eum vndique amici ac necessa-
 rij; agunt, hortantur, obsecrant, si sua ipse gloria minus mo-
 ueatur, gentis ac posteritatis tamen memoriam nomenque
 respiciat; ac tantam dignitatem in domum suam illatam ne
 ipse a sese abiudicet. Parum primo Bembo eorum mo-
 ueri oratione; ut pote qui eadem sæpenumero audisset iam
 olim prope omnia, ac refutasset: ubi vero ad eum Petrus
 Landus adiit, qui ciuitatis, haud multo post, princeps fuit;
 qui vnus apud Venetos magistratus amplissimus est, idem-
 que perpetuus; isque longa atque accurata oratione cum
 eo agere cœpit, cum ostenderet quantum ea re subiturus es-
 set

set offensionis atque inuidiæ; quam indigne Pont. Max. quam grauitèr omnem sacerdotum amplissimum ordinem eam ignominiam ferre necesse esset; cumque adderet numquam hæc, sine nutu atque consilio dei immortalis, accideret solere; diligenter videret, ne diuino numini refragaretur; tum vero, animo sane suspenso ac perturbato, hominem Bembus in præsentia dimittit, rem in diem posterum differt; & quoniam religionem sibi iniecisset, diligentius deliberaturum sese pollicetur. Postridie eius diei, cum res homini in religionem plane venisset: fuit enim non versuta hæc, atq; ad hominum opiniones captandas simulata, quam in multis videmus, rugis supercilioque horridam, tristitia; sed, vere atque ex animo, pietatis colentissimus; proximum in sanum mane ingressus est. Erat tum forte sacerdos ad aram, atque historiam de ijs, quæ a Christo dicta, aut gesta in terris sunt, quod euangelium appellamus, clara voce, ut mos sacrificium facientibus est, effari incoeperat: uix dum pedem in templum intulerat Bembus; ac sacerdos Petre, ait, sequere me. ea uero illi uox, dei prope ipsius ore miti, uisa est. Itaque, cum omnem ex animo dubitationem sustulisset, quasi dei accitu, Romam proficisci statuit: magnus fit domum eius omnium hominum atque ordinum concursus, frequens gratulatio, maximus totius ciuitatis plausus. ille uero, paucis post diebus, siluas, recessusque suos, in quibus placatam, tranquillamque vitam prope omnem traduxisset atque exegisset, crebro appellans, atque identidem respectans, Romam ire perrexit. Vere hoc dicere possum; sic homini hoc discesu hilaritatem prorsus excussam, ut eius pristinam iucunditatem, suauitatemque amici, familiaresque ex illa die desiderauerimus, atque, in omne tempus amissam esse, doluerimus. Cultus est Romæ Bembus cum a bonis plerisque omnibus Contareno, Sado leto, Cortesio, Morono cardinalibus amplissimis, hominibusque eruditissimis; tum vero præcipue a Reginaldo Polo, homine, dei immortalis, dubio procul, beneficio, ex ultima usque Britannia ad nos vecto, vel de celo potius, si modo

do dictu' fas est, lapso; cuius de laudibus, quamquam de tam præclara ac plane diuina virtute nemo satis digne vquam loquetur, alius mihi profecto dicendi locus dabitur. hoc certe haud facile in præsentia dijudicare audeam; plus ne eam insulam, multis vulneribus Christianæ reip. per summam impietatem infligendis, nocuisse dicam; an, quod in illo solo talis, tantusque vir ortus & procreatus sit, vnde vere, planeque Christianæ pietatis, vitæque exemplum petere mus; profuisse. Is igitur cum Bembo familiarissime vixit; cumque senis optimi multas, magnasque animi dotes maximi fecit; tum vero apertum, simplexque hominis ingenium, suæ ipsius voluntati atque naturæ consimile ac par, plurimum semper adamauit. Sed, cum diligentissime Bembus coleretur a multis, summo etiam a Paulo honore afficiebatur; tantaque apud eum fuisse gratia dicitur, vt nullam vquam rem ab eo postularit, quin perfecerit atque abstulerit: sedenim hoc non solum auctoritatis, gratiæque fuit, sed etiam moderationis & pudoris. Tum ea erat Bembi, in dicenda sententia, libertas, ea simplicitas, eaque in omni vita clementia atque ingenuitas inerat; vt, si ante eum Paulus mortem obijisset, quod natura postulare videbatur, aliquot enim annos illum Paulus antecessit ætate, creatum iri eum Pont. Max. plerique compertum haberent. Sed, cum equo Bembus forte veheretur, paulum in ostio ad parietem latus offendit; qua ex plaga, homo senex ac debilis, in febriculam incidit; atque ex ea, cum sensim extenuari, conficique se intelligeret, cumque mortem multos dies quasi præstolatus esset, animo non modo forti, sed etiam æquo; vt de sua illa migratione cum amicis, interdum etiam iocaretur; diem suum pie, sancteque obiit. Cultus erat iam pridem omni officio Bembus ab Hieronymo Quirino Ismerij filio; homine partim genere ac nobilitate, partim fide, munificentia, humanitate, morum suauitate ac dulcedine, clarissimo. Is illi statuum mortuo posuit nobili artificio factam ex marmore, atque eam celeberrima Antonij in æde Patavij locauit; inscripsitque in basi in hanc fere sententiam: propterea

propterea a se illam statuam Bembo statutam, atque in publico positam esse, ut cuius animi simulacra orbis terrarum cerneret, eius ne corporis quidem desideraret imaginem. Fuit omnino perpolitum Bembi ingenium, perq; acre; maximeque perspicax, acutumq; iudicium; plurima in alios, in se nimium pæne multa inquirens; in seligendis, collocandisque verbis, multum ponebat operæ, atque in ea re magnam cum prudentiam, tum vero etiam diligentiam adhibebat: hoc enim vnum sibi persuaferat esse, quod in oratione nouitatem, & quasi, patrijs moribus conseruatis, peregrinitatem tamen quandam effingeret; quæ, cum multum omnibus in rebus admirationis habeat, ob id ipsum plurimum etiam non modo dignitatis, sed etiam iucunditatis adferre solet. Ac profecto, quantum intelligere nos possumus, præclare hoc, quod difficillimum semper habitum est, Bembus præstitit, vt, cum minus fere vsitate loqueretur, hospitum speciem tamen effugeret. quod si qui sunt, qui vulgi opinionione ducti, quotidianam hanc tritam, communemque dictionem in hominum eruditorum, aut versibus, aut prosa oratione vel postulent, vel expectent, atque ob eam causam Bembi oratione, quæ a plebeio ac peruagato hoc tabernariorum atque opificum sermone longe dissonat, minus delectentur; ij erunt ex eorum numero, qui de ijs studijs existimare aut leuiter, aut nihil possint. C. quidem Cæsar, vt litteris proditum video, & ipse bene loquendi laudem, non populi consuetudine, sed multo studio, multisq; litteris, & ijs quidem reconditis & exquisitis, assequutus est; & cum de ratione Latine loquendi ad Ciceronem ipsum accuratissime, pluribus quidem libris, scriberet, verborum delectum originem dixit esse eloquentiæ. Iure igitur Bembus, maiore quadam cura, in verbis eligendis torquebatur, præsertim cum Etrusce scriberet: itaque noua, splendida, decoraque eius in primis oratio est: parum enim fidei consuetudini semper habuit; quod ea partim varia atque inconstans, partim etiam vitiosa atq; corrupta esset; & quoniam ne Romam quidem, nec adeo Athenas illas ipsas Atticas,

L

qui-

quibus temporibus eloquentia maxime floruit, diutius tenere illud potuisse scriptum legerat, ut ne barbarie earum infuscaretur atque inquinaretur oratio; repudiandum sibi hunc sermonem, qui nunc est, statuebat esse; atque eum, qui fuerat in Etruscis olim hominibus purus atque emendatus, cum minus dum exterarum nationum in Italiam confluxerat, adsciscendum: qui cum illi non de populo, futili inanique doctore, discendus esset; sed e veterum libris, grauisimis auctoribus, percipiendus; illud etiam eadem opera adsequebatur, ut eius, dignitatem, grauitatemque haberet oratio: nam quotidianus quidem, vulgarisque hic hominum sermo, e sordidis artibus maximam partem ductus, multum ex officina, multum e taberna, e sellaque redoleat, necesse est. Sunt igitur Bembi de ratione Etrusce loquendi libri tres in dialogo mirabiliter scripti; quibus profecto effectum est, ut, quod homines Etrusce loquantur, non bene modo iam consuetudinis sit, quam tamen fluxam atque instabilem videmus esse, sed iam etiam scientiæ ac rationis, quæ mutari nullo modo possunt: quamquam video non deesse, qui, cum cogitandi laborem ferre ipsi aut nolint, aut etiam nequeant, Bembi scripta non tam expurgata, quam religione nimia prope quadam attenuata esse contendant. Sed sit sane suus cuique modus: difficile est enim, in omni re statuere quatenus: & tamen, si cum aliorum libris Bembi scripta conferantur, facile iudicium erit: mihi quidem eius oratio vehementer probatur: non modo, quia elegans, noua, splendidaque est, &, ut ita dicam, nobilis; sed, quia est etiam, Isocrateo prope more, vber atque ornata. Sunt etiam eius versus Etrusce scripti, & quidem permulti, graues atque pleni, ut hanc quidem laudem, si modo nos de ijs rebus existimare aliquid possumus, Bembo a ceteris omnibus concedi, necesse sit: in ijs est carmen de Caroli fratris morte: videor mihi hoc vere affirmare posse, neminem umquam tam plane, tam ornate, tam dolenter quemquam luxisse, atque illis Bembus versibus fratris obitum lamentatus est. Scripsit præterea volumina epistolarum aliquot: quarum

quarum paulo magis decoram video a nonnullis locutionem existimari. suum cuique omnino iudicium; eamque ob causam difficillimum est, omnibus æque placere: nam, vt Theognis ait, laudatus a Platone poeta,

οὐ δὲ γὰρ ὁ γούρ

οὐδ' ὅων παύτας ἀνδρείας, οὐτ' ἀνέχων.

mihi quidem, cum has epistolas cum ijs, quæ a Græcis, Latinisve scripta olim sunt, contuli; valde hæ cum illis congruere videntur. Sed pollutas pleriq; lue quadam etiam nunc aures habemus; nec plane dum e vulgi facie enatauimus atque emerfimus: paucos enim adhuc bonos auctores Etrusca habuit lingua, quibus lectitandis nostrorum hominum expoliretur, expurgareturque iudicium. Itaque homines ornata, factæque orationis infueti, nec pulchritudinem intelligunt, aut cernunt, & splendore ipso præstrikti læduntur; præsertim qui in veterum Græcorum ac Latinorum libris vsque adeo versati, volutatique non sint, vt illorum virtutes aut transferre ipsi in sua scripta, aut in alienis agnoscere non possint: atque Etrusce quidem a Bembo scripta hæc sunt. Latine vero de Aetna ad Angelum Gabrielem scripsit adolescens; quem video libellum illi postea Seni non valde probatum fuisse: de Virgilij Culice, & Terentij fabulis librum vnum: de Guidoubaldo Feretrio, atque Elisabetha Gonzagia ad Nicolaum Teupolum librum itidem vnum, qui valde doctis omnibus probatus est; a Gabriele quidem Faerno, homine eruditissimo atq; huius generis acerrimo existimatore, in cælum fertur. Sunt etiam Bembi, præter eas epistolas, quæ Leonis nomine ab eo scriptæ sunt, suarum quoque priuatim epistolarum volumina; ac seorsum epistola de imitatione ad Ioannem Picum libri prope instar, sane perlegenda. sunt prætera eius versus Latini multi, dulces, elegantesq; vt me quidem æque propemodum, ac veterum illorum poetarum scripta, delectent. scripsit etiam magna cura, magnaque assiduitate ciuitatis suæ historiam, nudiusculam illam quidem: est enim vnum Cæsarem imitatus; sed puram in primis atque illustrem.

L 2

IOANNIS CASAE
AD ILLVSTRISSIMVM,
AC SAPIENTISSIMVM

Venetiarum Principem,

Franciscum Donatum

In Historias Petri Bembi.



VLTAE sunt artes, Illustrissime PRINCEPS, quod tu minime ignoras, cum ad vitam sustentandam inuentæ, tum ad cultum, aut etiam ad iucunditatem, voluptatemq; ab hominibus excogitatæ: quarum in singulis qui excellenti quadam scientia aliquando præter ceteros præstiterunt, magno apud omnes gentes in honore habiti sunt. nec vero iniuria id quidem: nihil est enim præstantius, nihil omnino homini laudabilius, quam de hominum genere bene, quoquo modo possis, mereri; eamque cognationem, quam a natura habeamus, nostra quoque opera, hoc est dandis beneficijs, artius etiam astringere. Quod si harum commoditatum, utilitatumque effectoribus tantus honos habendus est singulis: quibusnam tandem aut litterarum, aut operum monumentis eius gloriam digne illustrabimus, si cuius ars, ac disciplina tanta sit, vt vniuersa illa contineat ac complectatur? aut si quis harum omnium artium moderator, & tamquam architectus, quatenus quamque, quoque modo progredi deceat, indicet atque præscribat? est enim difficilis illa quidem, & ardua in præclaris nonnullorum hominum inge-

ingenijs, ceterarum omnium princeps, ac magistra, minime tibi quidem incognita, facultas quedam, quę ciuitatum procurationem sibi vindicet, & reip. regendę muneri pręposita sit. atque eam artem ciuilem rationem, eandemque prudentiam licet appellare. cuius quidem disciplinę qui compotes sunt, non vna modo, aut altera re separatim hominibus commodare, ac prodesse, sed vniuersam eorum gubernationem suscipere volunt: nec illud efficere solum conantur, illi priuatim vt libere, vt tuto, vt iucunde, sed vt bene etiam beateque publice viuant. Quamobrem tanti, ac tam pręclari operis artifices, non vt reliquarum artium magistri laudibus solum extollendi sunt, sed etiam, si modo dictu fas est, in deorum immortalium numero, quibus cum humanarum rerum procurationem propemodum communem habeant, venerandi atque colendi. atque horum artificum vestro in senatu maxima omnino facultas est, semperque fuit: id quod res ipsa declarat: nec enim tanta, tamque opulenta, ac beata ciuitas vel constitui initio potuit, vel deinceps tantopere augeri & crescere; nec vero vno, eodemque statu, & tamquam habitu tot sæcula, id quod nullis gentibus, vt totius vetustatis memoriam quam longissime repetamus, vsu euenit, manere, sine eximia quadam prudentia, sineque admirabili ac diuino cum patrum vestrorum, tum vestro, qui nunc eam talem tantamque tuemini ac regitis, consilio. Ac video equidem pluribus, quam vos, gentibus aliquot annos dominatam olim esse ciuitatem vnam, aut alteram. verumtamen (libere enim dicam, quod sentio) imperium bello partum sæpe feritatem, sæpe violentiam, atque iniustitiam, fortunę quidem certe temeritatem semper habet. at bene domi constituta res, sineque vllō ciuitatis motu tot sæculorum diuturnitate firmata, vna, eademque reip. ratio moderata & concors, ea vero tota virtutis est, ac prudentiæ. itaque in bello illæ, atque inter arma cum stetissent, in pace atque in otio conciderunt; quippe, quæ non ratione, sed viribus nixę erant: nec enim quietis, hoc est parendi vicissim atque imperandi, artes didicerant.

VOS

vos pacis, id est iuris, atque æquitatis studia, quæ vincula sunt ciuitatis, cum domi coleretur, nihilominus foris belli gloria floruitis. etenim cum ciuilis illa, quæ modo a me appellata ratio est, duabus contineatur partibus, bellicarum, atque vrbana rerum scientia, & tractatione: illi, cum bellicam laudem nimio adamasent opere, alteram reip. partem incultam propemodum reliquerunt: vos vtramque quidem, sed præcipuam, vt par fuit, maxime adepti, complexique estis. ergo ex omni Italia, tamquam e turbulento ac formidoloso mari aliquo, tanta hominum vis ad vos confluit, vestramque in urbem se se, quasi in portum, refert, vix vt iam capere tantam multitudinem suis illa tectis possit: qui cum e suis ciuitatibus in vestram migrant, protectiores ab iniurijs fore domi se se vestræ aduenas, quam suæ ciues, certe confidunt. Maxima igitur laus vestræ reip. vobisque magnis, clarisque in ea ciuib. debetur; quæ in eo munere, quod de humanis omnino muneribus longe præstantissimum sit, vna excellat plurimum. præstant enim alij alijs virtutibus populi. vobis autem id vnum proprium perenneque est, rem tueri publicam; hoc est humanum genus animi ratione, non felicitate aliqua, quæ casum habeat necesse est, & varietatem fortunæ propriam, conseruare: hæc enim & stabilis ipsa est, & diuturnitas atque adeo, quoad res humanæ ferre possunt, perpetuitatem, quod vestra est resp. consecuta, parere consuevit. Fortunati igitur ciues tui.

Te vero equidem semper beatum, semper gloriatione dignum existimaui: cum propter multas, magnasque virtutes tuas, animi magnitudinem, continentiam, suauissimos, eosdemque castitatis, religionis, pietatis plenissimos mores, dulcem illam tuam, vberemque dicendi copiam; tum vero propter diuinam istam animi tranquillitatem, atque æquitatem. Cum enim tot annos in hac post hominum memoriam clarissima rep. summa cum gloria versatus sis; cumque dignitatis præstantia quam plurimis semper anteieris: communis iuris æquabilitatem transisti numquam, ac ne cogitasti quidem. quin etiam (memini enim me de hoc ipso

Bembo

BEMBO sepe audire) cum tua te virtus multos iam ab hinc annos ad summam amplitudinem perduceret; tuaque præclarissima patria ad istum honoris gradum, quem vnum altissimum habet, ipsa te tollere cuperet, atque adniteretur, deque tua gloria sollicita esset: liberaisti tu eam omni cura, atque alijs quibusdam, in istum locum magna quadam pro operatione festinantibus, cum anteuertere posses, vltro celsi sti. magnifica vero laus, honorem, tantum præsertim, cuius cupiditate ceteri inflammentur, tam modice concupiscere. sed eadem tamen ipsa resp. simul ac data facultas est, iam dudum tibi debitam, tibi que reseruatam dignitatem istam ad te scilicet eundem cupidissime detulit. neque tamen, ne sic quidem, æquabilitatem animi tui tu illam veterem amisisti. atque hoc ipso in honore maximo gerendo, cum grauitatem ac dignitatem sic adhibeas quasi reip. humanitatem, facilitatemque, vt tuam, retines. ita nec ciuitatis maximæ clarissimæque maiestas desideranda est; nec optimi, præstantissimi que ciuis humanitas requirenda. Quid, quod duarum maxime insignium virtutum, integritatis, ac prudentiæ tuæ, duos esse certissimos testes videmus, paupertatem alterius, summam alterius tuam apud omnes gratiam, atq; auctoritatem? quò quidem ex testimonio intelligere omnes necesse est, ita te in rep. administranda ad octuagesimum vique annum ætatem contriuisse, vt publicas res sic procurares, vt tuas; sic autem ab ijs manus abstineres, vt ab alienis: ita factum esse, vt, cum tu sic animum induxisses tuum, vt bono ciui gratis reip. seruiendum esse statueres; illa contra egregiæ tuæ erga se voluntatis tibi præmium, quod habuerit præclarissimum, laudis & gloriæ tribuere cupierit. Ac mihi quidem in te intuenti verum omnino videri illud solet, quod a sapientibus traditum est. aiunt enim homines ferreis alios, alios æreis, quosdam argenteis animis gigni: esse etiam paucos illos quidem, sed tamen nonnullos, quibus aurea animorum natura data est, ijsque seorsum regendarum ciuitatum munus a Deo assignatum: illos alios, quo suam quemque aut duritia, aut vilitas impellat, ferri: at vos ex illo aureo

aureo genere natura ipsos per vos locupletes atque honoratos, ad salutem ciuium, populorumque incolumitatem, vitamque omnium quietam & beatam ortos, nec honores concupiscere, & diuitias contemnere, & generosarum volucrum ritu, cælum modo spectare, vbi vobis ciuitatum rectoribus, ac conseruatoribus certum locum, ac diffinitum esse teneatis. Quæ cum ita se se habeant; tam præclari hominum maximorum cœtus atque concilij instituta, tam diuturnæ reip. moderationem, tam eximiæ ciuitatis magistratum descriptionem, opes & copias, tum res vestras domi bellicque gestas, a populis gentibusque alijs audiri, manareque ad posteros, non iam ad vestram modo gloriam pertinet, sed etiam ad eandem ipsam, in qua versamini atq; exercemini, hominum salutis curam: habebunt enim exterę nationes non modo, quod magnopere laudent, quodque admirentur plurimum, sed etiam quod imitari cupiant, vndeque exemplum petere possint, qualem esse optimam, firmissimamq; remp. ac statum ciuitatis maxime diuturnum, maximeque expetendum, oporteat. Quare rerum vestrarum historia hæc, quam Petrus Bembus Cardinalis vir idem clarissimus, idem scriptor vnus omnium politissimus, scripsit, merito & flagitata iam pridem a multis est, & expectata semper ab omnibus. quid enim aut ad delectationem iucundius, aut ad disciplinam (est enim historia vitæ magistra) grauius, constantius ve esse possit, quam ciuitatis omnium prudentissimæ leges, mores, instituta, consilia, magnarum variarumque rerum casus atque euenta, de omnium dulcissimo elegantissimoque auctore audire; eoque ipso nec in mendacio gratiam quærente, nec in veritate similitatem ex timescente? fuit enim Bembi non stilus modo purus & elegans; sed animus etiam sincerus in primis ac simplex. qui cum summa iam senectute patriæ vestræ rogatu, vel iussu potius, res vestras gestas scribere aggrediretur, neque ad hanc ætatem, memoriamque nostram peruenire se se scribendo posse confideret; sæpe mecum locutus est, & quidem crebro te appellans, cum permoleste ferret excludi se se tem

M

pore

pore a tuarum laudum, tuique similium commemoratione, qua nos re commoti faciendum nobis esse duximus, ut eius historiam ad te potissimum mitteremus, optimi scilicet senis virique clarissimi, atque hominis disertissimi plenas grauitatis, plenas auctoritatis, plenas dignitatis lucubrationes; ad sanctissimum itidem, e germanoque illo Platonis auro senem, in clarissima post homines natos rep. principem, ciuemque vnum omnium facundissimum. Accipies igitur tu illam, non a nobis quidem, sed a Bembo per nos tibi missam: patriæque tuæ vtrumque gratulabere: eadem enim res maxime scripture, ac memoria dignas ad historiam supeditauit; eadem grauissimum luculentissimumque suarum rerum gestarum scriptorem, ac testem peperit.

IOANNES CASA
RANVTIO FARNESIO

CARDINALI S.



NON eram equidem nescius, eum iam in locum progressam esse virtutem tuam; ut amplissimo isto honoris ac dignitatis premio diutius carere non posset. Cum enim superioribus mensibus, permultos dies ut tecum essem, mihi contigisset, facile, præsertim id curans atque attendens, intelligere potui, non modo eximiam quandam ac prope diuinam animi, & ingenij in te indolem elucere, sed ipsos iam apparere virtutis fructus; eosque, præter ætatem ipsam, plenos atque vberes. Itaque non dubitabam, quin Paulus Pont. Max. qui eo usque virtuti semper fauit, ut eam in alienis ultro tam sæpe hominibus illustrauerit, passurus non esset, uti illa in suis inornata iaceret. Sed, quamquam exploratum tu quidem meritumque ac prope debitum, summum istum honorem assequutus es; tamen vel hoc ipso nomine, quod istud hono-

honoris insigne, virtutis premium citius, quam aui tui, hominis sanctissimi, in te beneficium omnes dixerint, tibi plurimum gratulor, neque cuiquam concedo; quamquam omnium bonorum flagrare in te studia & voluntates, certo scio: ut plus me voluptatis ac latitiæ ex ea re ceperit. id, quod ego tametsi pro mea in te, fratremque tuum, virum maxime illustrem, Cardinalem Farnesium, clarissimamque in familiam vestram obseruantia, mea ipse sponte fecissem, tamen eo etiam non equidem magis, sed, nescio quomodo, libentius facio, quod excitarunt me litteræ tuæ, quibus nihil excogitari potest humanius: inuitas enim me non ad gratulandum modo tibi dignitatem tuam, sed etiam ad eam tecum vna fruendam; in quo ego cum suauissimos tuos mores, maximeque in me propensam voluntatem tuam agnosco, tum dupliciter lætor, & quod tantum patrociniū, quantum in tua esse auctoritate & gratia par est, promptum mihi paratumque esse intelligo; & quod de tua bonitate atque humanitate, tanta dignitatis accessione, nihil diminutum esse perspicio. tametsi numquam, id quidem aliter fore, putavi. Sed ad illud redeo; ut non modo istam tibi dignitatem gratuler plurimum, magnopereque gaudeam, ne fortunam quidem honori tuo defuisse; sed multo etiam magis ea relater, beatumque esse te prædicem: ἀγαθὸς γὰρ ὁ ἀνὴρ οὐδ' αἰμονεῖ: Sic enim est profecto. nam, cum fortuna bonis comitatur, vix tum demum laudem habet & plausum; improborum autem, aut etiam obscurorum hominum, prosperitatis inuidia est comes. Quo magis enitendum tibi est, omnique cura, studio, labore, industria perficiendum, ut hominum summam de te expectationem, quam prima tua isthæc ætas, tam vario laudis genere florens, tamquam ver futuram anni vbertatem ostendere solet, sic excitauit, non modo expleas, sed etiam superes. Perge igitur, qua cœpisti, eadem celeritate & cursu ad virtutem contendere: neque de tuo pristino labore, assiduitate, diligentia, industria, quicquam remiseris: breui enim & obrectatorum vocolas, si quæ concitata sunt, comprim-

M 2 mes,

mes, & Pont. Max. amplissimi que collegij vestri, in te cooptando, iudicium non comprobabis solum, sed etiam illustrabis; perficiesque, ut nullum esse tam nouum, tamque exquisitum honorem, qui in amplificanda dignitate tua extracordinarius videri possit, omnes & intelligent & fateantur. Qua quidem in re, pro eo quanti te facio, sepe multumque de te cogitans, grauem tibi constitutam esse aduersariam video: est enim non ineptiarum modo, sed vitiorum etiam omnium altrix & procreatrix assentatio: ea igitur animum tuum, qui & natura firmus est, & educatione ac disciplina corroboratus, quamquam est illa quidem temeraria atque impudens, fortasse nonnihil verebitur. Sed eadem tamen, etate, quæ tua lubrica est ac periculosa, tum potentia, quæ solet esse licentior, freta, adoriri te minime dubitabit. quæ cum & fallendi & impellendi omnes vias nouerit, omnium temporum momenta teneat, omniaque ad voluntatem loquatur, omnes autem cupiditates exfuset, eadem ijs ministret omnia, semouenda tibi a te est, proculque ab animo, atque auribus tuis eius præstigiæ & quasi cantiones, remouenda. Quod tibi quidem facile factu erit: est enim vna simplexque cautio. etenim, si eos audies, si ijs aures tuas dederis, quorum monitis ac præceptis animus tuus excultus, tamquam astrum, enitet ac splendet; si eos, qui tibi hactenus iter monstrarunt, duces habebis, nihil errabis, atque ad virtutem, quamquam *μακρὸς τε καὶ ὀξύς οἶμος ἐπὶ ἀντὶ*, quam celerrime peruenies. Verum sentio me ab eo, quod his litteris propositum fuerat, aberrasse longius: fecisseque insolentius, qui te, in eo præsertim, in quo gratulatione magis vtendum fuit, cohortari ausus sim. Sed dabis mihi profecto veniam, tuæ laudis ac gloriæ studiis incenso, si sim ardentius fortasse elatus, quam tua summa dignitas, pudor

que meus postu-

lauerit.

IOANNES CASA

ARCHIEP. BENEVENT.

PETRO VICTORIO S.



VVM forte ad quotidianas occupationes meas podagra accessisset sane molesta: redita, mi VICTORI, mihi sunt litterae tuae. Eo factum est, ut serius ad eas tibi responderem, quam nostra summa coniunctio postulabat. Sed eas tamen litteras eruditionis atque elegantiae plenas: amore autem singulari illo in me tuo etiam redundantes, gratissimas, iucundissimasque mihi accidisse scito. Quod enim vir omnium doctissimus, atque in iudicando acerrimus, pedetemptim, verecundeque dissentire a nobis aggrediebare, in re praesertim haud magni apud me ponderis: veterem tuam erga me benevolentiam, amantissimique animi gratum obsequium agnoscebam. Quod autem Electre orationem aliorum, atque ego, alijque multi acceperamus, interpretabare: idque stilo illo tuo subtili, atque presso, qualis eruditorum hominum sermo inter se de studijs litterarum disputantium esse debet, declarabas: in eo ingenij, doctrineque, & eloquentiae tuae vis, lumenque mihi iam pridem cognitum, elucebat. Verum tamen, quod ad me attinet, omni ego te molestia libero: siquidem in eo expeditissima mea ratio est. Nos enim poetarum more uti se res dederit, ita vel populi, vel eruditorum hominum sententiam nostro quodam iure sequimur, atque alias si sit opus, aliter de eadem re dicimus. Quare, mi VICTORI, optimos adolescentes, mihi que iure carissimos, qui apud te erudiuntur in litteris, posthac, mea quidem causa, sententiam tuam ne celaueris: neque id amicitiae tribues, quod ab amicitia plurimum discrepat, ut expurgare iudicium nostrum non audeas. Atque adeo sic habeto, nihil mihi in litteris tam plane esse exploratum atque comperitum, quam quod tu idem probes, atque confirmes: quamquam

quam de his quidem Euripidis versibus nonnulla mihi in mentem veniebant, cur in pristina illa mea interpretatione propemodum perseverarem. Primo enim vix mihi verisimile fiebat, calamitosissimę virgini, in tanto capitis sui, fratrisque sui discrimine, otium ad contemplandam, ac prædicandam Helenę pulchritudinem fuisse, præsertim quam odisset, quam etiam diris statim prosequeretur, cuique deos iratos atque infensos optaret: propterea quod se fratremque suum, totamque Græciam euertisset. Nam ita Helenę personam tractare Euripidem par fuit, vt Electrę personę, quam in manibus habebat, ne obliuisceretur. Deinde Helenę pulchritudinem, quę nulla ei mulieri sua culpa obtingerat, indigne ferentem Electrā facere, fortasse nihil attinuit: at lasciuia, & formę, cultusque importunum illud studium, in fororis cęde, & luctu, in domus, familięque ærumna, atque excidio reprehendere, ac detestari: id verò cum Electrę persona congruere, nisi te aliter arbitrari viderem, plane putassem. Nam quod ait Electrā, suę huiusce orationis initio, ad ingenium naturamque referri mihi aptius videbatur, quam ad corpus & pulchritudinem posse: sic enim interpretamur. Quam magnę ingenij sunt, ac naturę in vtramque partem vires: ferimur enim natura alij ad perniciem, alij ad salutem, vt quique proclives ad virtutem, aut ad vitia sumus: pessundedit ergo Helenam non forma, sed ingenium. Nam pulchritudo quidem multis sæpe malo, multis sæpe salutis fuit. Quod video idem præcepisse eos, qui de finibus bonorum disseruerunt: vt ea sententia, quam duobus his versibus complexus Euripides est, vix futura vera sit, si hoc sensisse illum defendimus: qui pulchritudinis composes sint, salutare quiddam habere: at inuerecundum, impudicumque animi ingenium qui possident, ijs ea res semper calamitati est, numquam salutis. Helenę quidem certe non pulchritudo profuit, sed ingenium obsuit. Id igitur mihi accusare videbatur infelix Electrā, pannisque obsita, torridaque: Helenam inclinata iam etate meretricium animum illum pristinum retinere, quum fugę infamiam illam

subijc-

subijisset, propter quam in publicum etiam prodire, non au-
dere ipsa se fateretur. Castissima scilicet puella vehementer
indignatur, queriturque, eam iam prope anum factam, ne
malo quidem doctam, deterreri a lasciuiā ac petulantia pos-
se. Ipsum quoque verbum Mulier, nescio quid vitupera-
tionis praeferre visum olim mihi est, quum illud nescio
quid versiculorum lusimus. Est eadem, quæ solet: non He-
lena, inquit, sed mulier. Illud etiam interdum suspicari mi-
hi veniebat in mentem, si ad cutem totondisse Helenam ca-
pillum Euripides significaret, dicturum illum fuisse potius
ἐν χροῖ, aut ἐν βαῖδι, quam παρ' αὐπας τεύχας: quod video
doctis nonnullis idem placere. Sed hæc tu melius scilicet,
vel longe potius omnium optime: nam nos quidem vehe-
menter sane occupati, non tam ut aliquid statueremus;
quam ut aliquid ad epistolam tuam rescriberemus, cursim
hec ad te exarauimus. Quare ad illud redimus, quod ini-
tio scriptum a me est: pro sexcentis mihi auctoritas, iudici-
umque tuum rationibus semper erit: eaque mihi loci
huius, aliorumque omnium interpretatio erit
certissima, quam tibi maxime probatam
esse intellexero. Vale xi.

Calend. Febr.

MDLVI.

GASPARIS CONTARENI, VITA.

*Non suo loco posita, quia sero ad nos
missa est.*



VM per multum inter laudationem atque historiam interesse oportere facile intelligerem; propterea quod illa virtutis modo præconium quærit: hæc veritatis in vtramque partem testimonium continet; sæpe mihi de GASPARIS CONTARENI vita cogitanti veniebat in mentem,

vereri, ne, si eam litteris mandassem, laudare me hominem magis quam, qui eius vitæ cursus fuisset, narrare voluisse, multi arbitrarentur. qui cum commemoratum a me de illo nihil viderent, quod esset a laude seiunctum, quæ reprehensionem habitura fuissent, dedita opera a me prætermissa esse existimarent. Sed cum laudatoris sit, de cuius laude dicit, eius bona verbis amplificare, aliquid etiam alieni adfingere; vitia oratione attenuare, aut etiam silentio præterire; in altero facile præstare possum, ut hic meus commentarius plurimum a laudatione dissentiat: nec enim sermone nostro Contareni virtutem augere conandum nobis est: in altero, ut de eius vituperatione indicem nihil, non nos, sed res ipsa laudationi persimilem narrationem nostram efficiet. Quod si qui erunt, qui cum plus de aliena virtute prædicari sentiant, quam quantum de sua ipsi sibi polliceri soleant, aut egre id fe-

N rant,

rant, aut orationi meæ fidem non habeant, ij sic cogitare debebunt; dici hæc a nobis de eo, qui iam non sit: qui- que cum suæ ciuitatis probis viris omnibus, tum aliarum gentium, exterarumq; nationum clarissimis quibusque hominibus notus, beneq; cognitus fuerit. quorum cum magna pars sit superstes, nulla nobis causa est, cur de mor- tuo mentientes, tot viuorum, illustrium præsertim ho- minum, vanitatis impudentiæque nostræ testimonia col- ligere velimus: clarorum autem virorum laudibus, fa- uere potius quam obrectare omnes debebunt. mihi cer- te aut de Contareno tacendum fuit: aut de eo, ni menti- ri forte maluisssem, cum laude dicendum.

*intelligendum in uia
de presentia uide*

VENETORVM Ciuitas optime morata, optimeque constituta est: id ex eo intelligere licet, quod vna tempe- ratione, vnīs legibus, sine vlla seditione, sine vllō intesti- no malo, annos eorum respublica amplius mille manet: quodque a paruis inijs profecta ad eam opulentiam at- que ad id imperium, quod videmus peruenit: complu- res vrbes, easque magnas atque florentes, socias vectigales- que habet: Corcyra, Creta, Cipro, multis magnisq; in- sulis, transmarinisque prouincijs dominatur. Classē instructam paratamque habet, quantam nullus rex, nul- læ nationes valeant comparare. Ea ciuitas vna omnium, de quibus memoriæ proditum sit, libertatis equabilita- tisque maxime amans, maximeque retinens est: quippe quæ durissimis quondam Italiæ temporibus; seruitutem fugiens, e continenti sese in vndas æstusque coniecerit; fortunisque omnibus relictis, vnā modo secum extule- rit libertatem, atque in ea tuenda tot sæculorum spātium versata, studium voluntatemque, vsu etiam atque exerci- tatione corroborauit. Itaque libertatis fortasse nomen a- libi quoque gentium inuenias; libertatem ipsam puram atque incorruptam, ab omni metu vacuam, vtinam aspicere in alijs ciuitatibus, vti quondam fuerat, deorum nobis beneficio aliquando liceat. Illud salutare institu- tum mordicus a Venetis retentum est, vt reipublicę at- tingendę,

intelligendum

tingendę præter quam ijs, qui initio in ciuitatem conue-
nerunt, quique germani Veneti & tamquam aborigines
sunt, potestatem præterea facerent nemini; nisi si quan-
do deliberata re, bene de republica meritis, eius vrbis in-
quilinis, alij sue quibusdam, id ius nominatim ad hodie-
num diem concessum est. Ex eo igitur priscorum gene-
re ciuium Aloisius Contarenius fuit, cum prudens pater-
familias & locuplex, tum præstans senator & nobilis: at-
que is Polyxenam Malipetriam in matrimonio habuit,
feminam primariam; ea, cum aliquot iam peperisset pue-
ros, neque ij diutius viuerent, ad amicas æqualesque di-
citur rursus prægnans retulisse; a quibus, ut sunt plerę-
que mulieres religiosæ, admonita esse dicitur; uti qui na-
tus esset puer, ei nomen imponeretur vnum ex ijs nomi-
nibus, quibus vocati ij reges sunt, qui ad Christum deum
nostrum paruulum ac lactantem venerunt: fore enim ut
vitalis esset. Cum salua igitur paucis post diebus peperis-
set, puerum nominari GASPAREM iussit, qui primus
eius familiæ hoc nomine appellatus est. Is ubi adoleuit
magna in eo ingenij indoles erat, magna ad litterarum
studia propensio: itaque facile Aloisius pater, consilium,
quod de puero ceperat, mutauit: mercaturis enim illum
faciendis, rei que augendę, quippe cui multę atque am-
plæ multis in locis res rationesque cum multis essent con-
tractę, filium scilicet natu maximum Venetijs destinaue-
rat: est enim fere in liberis ciuitatibus, mercaturis rem-
querere, nobilitati quoque non modo non turpe, sed, si
bono modo fiat, etiam honestum. verum ubi pueri inge-
nium naturamque, maius quiddam spectare atque polli-
ceri intellectum est, consilium illud de mercatura fundi-
tus pater abiecit; neque vlla in re filij voluntati ac studio
defuit. Is ubi quod satis esset operæ Antonio Iustinia-
no, Laurentioque Bragadeno Venetijs visus est dedisse:
nam ij publice a ciuitate constituti erant, qui iuuentu-
tem in dialecticis, atque in philosophia erudirent: Pata-
uium profectus, Petro Pomponatio Mantuano, magno

nobilique philosopho, in disciplinam sese tradidit. Erat in adolescente naturæ vis peracris illa quidem, & ut mihi videbatur, peracuta, sed tamen nescio quomodo magnitudine & firmitate potius præstans; & quod maxime rem continet, ad sapientiæ studia accommodatum & tamquam philosophum inerat ingenium: memoria omnino valebat plurimum: huc accedebat animi ac victus vitæ que totius constantia quedam, ut, quam semel instituisset rationem, de ea non defatigatione, non pigritia, non voluptate depelleretur. Opinio est in omni vita re venerea illum omnino usum esse numquam, defixa mens scilicet in eo studio, cui se ab ineunte ætate dederat: eoque capta atque alta, nihil præterea concupierat. itaque celeriter affecutus est, ut æqualium magister, graviorum natu magistrorumque tamquam equalis, & compar haberetur. certum temporis spatium, horarum sane haud amplius trium, meditationi & bibliothecæ attributum, & tamquam sepositum habuisse dicitur, cui tempori nec umquam quicquam detraheret nec fere adderet; qui reliquus erat dies in congressionibus amicorum, colloctionibusque consumebatur: eæ de litteris scilicet erant, ut in suo studio, ne cum vacare quidem videretur, cessaret. Idque ipsum, nihil agens, ageret tamen urgeretque propositum, & tamen animum a contentione relaxaret. Illud etiam narrari nobis ab eo ipso meminimus, cum diceret numquam se in omni adolescentia commisisse, ut mane aliquid postridie aggrediretur ediscere, quin prius ea que pridie percepisset, diligentissime reminiscendo recordatus esset: vitandam enim a fortiorum consuetudinem aiebat, qui crudi sese tamen ingurgitant, quoque magis cibo replentur, oneranturque, minus virium, minus valetudinis habent. in eo igitur cursu, cum sedulitate magis quam contentione aut labore admirabiles progressus efficeret: atque eos, qui in eodem curriculo erant, longo intervallo antecederet, mortem Aloisius patenter obiit. Duo de viginti ille annos natus erat eo tempore.

re. liberorum autem, magnum sane numerum, filios septem, quattuor filias, præterea magna cum multis contracta implicitaque negotia, Aloisius reliquerat. Atque odiosum omnino negotium est homini in cogitationis ac doctrinæ studijs occupato, familiaris rei procuratio; ut minus mihi mirum videri soleat, Democritum, nobilem quondam philosophum, ut ea cura, eoque impedimento liberaretur, omnes fortunas suas, sicuti litteris proditum est, abieciſſe. Verumtamen quamquam inuitus ac mærens discedebat a litteris, tamen Patauio profectus est: atque eandem illam animi moderationem æquabilitatemque adhibens, fratribus partim in Apuliam, partim in Alexandriam (ibi enim magnas societates Aloisius pater habuerat) distributis, partim Venetijs relictis; bene domi constitutis rebus Patauium reuersus est: studiumque haudquaquam longo interuallo a se intermissum, cupide renouauit. in ea vrbe doctissimorum hominum plena, ac liberalibus artibus affluenti, aliquot annos commoratus est: cum in principibus iam philosophis numeraretur, atque eius nomen plurimum in dies increbresceret. Atque hoc loco postulari exigique a nobis arbitrati sumus, ut, qui eius progressus & quale tamquam iter ad percipiendas fuerit disciplinas, demonstraremus. A primis igitur dialecticæ elementis profectus sic omnem philosophiam perlustrauit, ut illius singulas tamquam oras non videret modo atque inspiceret, quod plerique facimus, sed in vnaquaque etiam illius quasi regione commoraretur & habitaret. itaque illud affecutus est, nihil in ea ut arte, ita copiosa & magna atque varia, tam esset magnum atque arduum, aut tam minutum atque paruum, quod eius aut diligentiam lateret aut fugeret intelligentiam: nihil autem tam abstrusum aut reconditum, quin promptum illi expositumque quamuis subito esset atque ex tempore. Eius nos rei per magnum quondam specimen cepimus: nam cum Florentiæ forte essemus, qua ille Roma profectus, iter in Germaniam habebat

bat ad Cæsarem erant in ea vrbe, cum alij complures in ea philosophia, quæ de natura est, docti atque exercitati, tum duo præter ceteros PETRVS Victorius & FRANCISCVS Medices, quorum erat vtriusque & natura admirabilis & exquisita doctrina; tum studium ardens in vtroque ac peracre vigeat, flagransque & singularis in vtroque industria: sed alterius breue tempus doctrinæ augendæ & declarandæ fuit; Victorius qualis vir, quantusque iam tum esset, ea, quæ nunc est eius doctrina, libri que ab eo editi declarant: ij per eos dies ad Contarenum sane ventitabant, a quo nos quoque non fere discedebamus: hoc affirmare possum, cum omnis inter eos sermo esset de physicis, nullius rei mentionem esse factam a summis illis viris, ingenio præstantibus, animo vacuo, otio abundantibus, studio incensis, tempore paratis, a bibliotheca & litteris recentibus, quin eam Contarenus, & memoria teneret, & intelligentia comprehensam haberet, & oratione tam facile explicaret, quam quæ facillima sunt. Præstabat id non tam credo memoria, qua tamen valebat, ut antea dictum est (natura enim quoque plurimum ille excellenti fuit) quam ipsa, via ac ratione percepta, doctrina: sic enim eum ipsum dicere solitum esse accepimus. Non modo certam artium multarum inter se quandam naturalem esse dispositionem, ut aliam alia suo quæque loco deinceps tamquam subsequatur, & cum priori posterior quasi coagmentetur: sed vnius quoque eiusdemque cuiusvis scientiæ si quis ordinem & tamquam seriem conturbauerit atque resciderit, ad exitum perueniri non posse: magnoque in errore versatos, superioris ætatis homines aiebat esse, qui multa properantes transilirent; aut vllam artem ediscere se posse dissipatam arbitrarentur, aut mutilam atque hiantem: amputatis enim inter scissisque disciplinis progredi perueniri que ad scientiam non magis posse, quam interruptis iter pontibus confici. Vnum autem omnino sibi comitem ac monitorem ad Aristotelis iter, multis sæpe obstructum difficultatibus, Thomam Aquina-

Aquinatem asciuerat, hominem non contentionis, sed veritatis amantem. qui & subtilitatem habeat, nec ultra, quam par est, progrediatur acumine; atque idem articulatim partiteq; ac distribute doceat; doctus etiam Græcis Latinisq; litteris erat. Poetas Homerum, Virgilium, Lucretium, Horatium lectitauerat atq; didicerat. Itaq; cum non artis factitandæ, sed eruditionis liberalisque doctrinæ fruendæ causa, philosophiæ se dedidisset, omnes tamen artifices, magistrosque omnes, non scientia modo, sed fama quoque & celebritate facile superabat. Erat hominis vita atque victus non tam excultus atque expolitus, quam cum grauitate quadam simplex ac lenis placatusque; oratio inculta illa quidem atq; inornata, sed hoc ipso, quod omni careret fuco elegans ac cum auctoritate. nulla mollities, nullæ, ne in adolescentia quidem, animi aut corporis deliciæ; sermo nulla assentatione suffusus, nulla animus maleuolentia infuscatus. Et cum festiuitas leposque haud magnopere adesset, aberat etiam rusticitas atque tristitia. Quin etiam hoc ab eo dici memini; de uorare sese certorum hominum (qui in aliqua vitæ parte claudicarent) incommoda aut etiam vitia solere, simulac de bonis, quibus illi excellerent, aliquid degustasset. Ac cum Galeatius Florimontius, qui nunc Suefæ episcopus est; vir cum omnibus honestis artibus perpolitus, tum præcipue castus atque integer, tum religione ac pietate in primis incensus; in notandis autem reprehendendisque amicorum vitijs vnus omnium maxime acer ac liber: castigator nonnumquam etiam subamarior, atque is a Contareno in fratris locum diligebatur. Cum ille igitur nobis audientibus nequire se satis mirari diceret, illum, qui omnium esset mundissimus ac sanissimus, cum hominibus quibusdam, quos ipse appellabat, id, quod nobis minime necesse est, qui turpitudine aliqua, tamquam morbo, adfecti atque inquinati haberentur, tam sæpe conflicari. Quæ ille cum sane commotus ac stomachans diceret. Quid nos, inquit Contarenius, numquam ne ab-

finthio

sinthio aut scamonee radice curari nos patimur? Quid
 ni? inquit ille. Ergo inquit Contarenus earum potio-
 num exorbemus sapores tæterrimos, vt suco epoto, illi-
 us iuuemur vi salutari, horum vitia, si qua sunt, non de-
 uorabimus, & tamq̃ amaritiam perferemus atq; exor-
 bebimus, vt illorum tamquam vescamur virtute, atque
 alamur bonis? quid autem ipsis nobis fiet, si amandum
 statuerimus, nisi qui perfectus absolutusque fuerit, esse
 neminem: laudare se, quod in quoque probaret, liben-
 ter aiebat, quod reprehenderet, vituperare non se neces-
 se habere. Hanc animi æquitatem, hanc tam præclaram
 maximarum artium doctrinam, alia longe ijs maiora bo-
 na decorabant. Summa integritas, summa innocentia,
 pietas, non hæc quæ facie, motu, amictu commendatur,
 quam in multis cernimus, simulata, & specie, atque ora-
 tione hominum opinionem captans, sed solida, nuda, sin-
 ceraque, in mente atque in animo inerat. quibus ille re-
 bus instructus, cum magnum eius esset nomen, magna-
 que non solum laus, sed etiam admiratio, aliquanto citi-
 us quam constituerat Patauio decessit. Nam cum omnis
 prope dixerim terrarum orbis eo tempore contra Vene-
 tos conspirasset, tæterrimumque ei ciuitati bellum intu-
 lisset afflictis Venetorum opibus, Patauio ipso obseſſo, nec
 multo post amisso, maturius omnino, quam in animo ha-
 bebat, inuitus, non dum discendi fiti scilicet expleta, do-
 mum se se recipere coactus est. Erat eius ætas non dum
 firmata, vt reipublice operam nauare posset: itaque in ijs
 sese studijs aliquot annos continuit, cum eius domus tam
 quam bonarum artium gymnasium quoddam ab ijs, qui
 doctrinæ desiderio tenebantur, frequentaretur. Verum
 tamen ad rempublicam vbi primum accessit, eius inge-
 nium, quod de Hortensio est memoriæ proditum, tam-
 quam Phidiæ signum, simul aspectum ac probatum est.
 itaque cum tres & triginta tum haberet annos, a ciuitate
 ad Cæsarem Carolum hunc V. in Germaniam orator
 (sic enim Veneti appellant) est missus. Legationis mu-
 nus

Quid
otio-
o, illi-
on de-
exsor-
atque
andum
it, esse
liben-
e neces-
claram
ora bo-
centia,
datur,
que ora-
ada, sin-
ille re-
magna-
o citi-
omnis
Vene-
intu-
lo, nec
imo ha-
ta, do-
n dum
e in ijs
us tam
ijs, qui
erum
inge-
tam-
m est.
itate
ator
mu-
nus

nus magnam apud Venetos habet dignitatem, magnam ad summos honores magistratusque adipiscendos commendationem; sepeque a multis vna petitur, & in comitio suffragijs oratores magna ambitione creantur. Gerebat illis temporibus in Italia bellum Cæsar cum rege Galliæ, cum quo illi antea quoque continentia bella intercesserant, atque cum eo Pont. Max. Leo X. se se coniunxerat: cum rege Veneti conspirauerant, atque omnis impetus belli ad mediolanum confederat; nam eam urbem Gallis Venetisque defendentibus, Cæsaris ac Leonis copię oppugnabant. Ad eum, qui cum bellum suæ erat ciuitati, planeque ad hostem ire se Contarenius intelligebat, apud quem exploratoris, non legati locum obtinere eum necesse esset, atque ipsa res cogeret. Accedebat etiam quod Cæsarem quibuscum inimicitias exercebat, ijs solere esse amariorem audierat: illisque maxime, qui Gallorum fauerent rebus. Itaque animo sane commoto ad Cæsarem adiisse dicitur; nam & sponte ipse sua verecundus, ingenio quodam, quod tamen sine segnitia esset, pudore fuit. Verum eadem illa doctrinæ, castitatis, ingenuitatis, innocentie opinio, multo ante eius aduentum ad exterarum quoque nationes perlata, Cæsaris illi animum voluntatemque conciliauerat; nam amare ille plurimum ingenuos apertosque hominum animos dicitur. Itaque ut semel in primo illo, qui ei cum Cæsare fuit, congressu, hilari vultu acceptus & comiter appellatus est, faciles ad eum de inde semper aditus habuit: & illo, quamquam ciuitati erat iratus, non modo pacato, sed etiam propicio usus est. Ac paulatim cum eam, quæ antea de se fuerat, opinionem magis ac magis in dies confirmaret atque augeret, iam ipsi Cæsari non modo gratus, sed etiam familiaris erat. Itaque cum certior factus esset, Gallorum Venetorumque copias in Insubris fusas superatasque, Gallos ex oppido esse expulsos cæde & fuga suorum, qui eam rem nuntiarent Contareno misisse dicitur, atque ijs præcipisse, ut de incommodo, quod Veneti acceperant, retice-

O

auctoritatis est in ea ciuitate magistratus, cui ab eo nomen inditum est, quod præcipua, magna atq; ampla procuratio demandata illi est, ærarij ac vectigalium, quæ in continenti, Veneti magna atq; ampla habent; nam eum magistratum illi Sapientes terræ firmæ appellant. hanc quoque potestatem Contarenius statim renuntiata legatione, maxima totius ciuitatis voluntate, omnibus suffragijs adeptus est. Habuit de ea ipsa legatione, more maiorum, orationem in senatu vberem ac plenam, cum de Cæsaris ingenio, voluntate, institutis, opibus, copijsq; disfereret; earumque nationum, ad quas adiisset, mores, leges, facultates, consilia exponeret: quæ cum ab eo distinctius scilicet atque eruditius dicerentur, quam Veneratorum hominum aures audire ad eam diem consueissent; tanta diligentia, tantoque silentio atque attentione audiebatur, vt vocis bonitas, qua ille sane exili fuit, non magno opere desideraretur. Non sum vulgi opinionis, iudicijque nescius: arbitrantur enim philosophiam, hominum, vitæque huius communis quasi corruptelam esse quandam: atq; eos, qui in studijs cogitationis ac doctrinæ, paulo vltius progrediente ætate versati sint, homines in solitudine atque in angulis educatos, curiæ lucem aspicere, aut in huius ciuilibus turbæ, ac fori strepitu & concursatione, & in rerum agendarum tumultu, & tamquam acie, sine magna animi titubatione negant ausuros esse consistere, hominum consuetudinis imperitos, legum, morum, sermonum, voluntatumque ignaros, atque a communi vita et hominum sensibus, victuque longe multumque abhorrentes: sic vulgo existimant. Sed falluntur sane, multoque id aliter euenit. Nam, qui, tamquam inermes, ad proelium & pugnam; sic nullis aut leuibus doctrinæ præceptis, quasi armis, instructi ad rem publicam accedunt, ij artem, quam facere intendunt, vnam quidem omnium maximam ac difficillimam, reipublicæ patriæque periculo discere coguntur; atque vt in vetere Græcorum prouerbio est, dolio faciendo figlinam

aggrediuntur percipere: idque ipsum de malis auctori-
bus, magistrisque sane inscijs atque improbis, vulgo & fo-
ro. Quamquam nobilitari homines iisdem Græci in foro
aiunt: qui si hoc sentiunt, virtutem, vt maiore in luce
posita locataque sit, ita magis magisque splendescere atq;
illustrari, ipsi sane videant, vbi nam eam potissimum in
bono lumine collocent: sin illud præcipiunt, a populo,
bene viuendi rationem, tuendarumque ciuitatum disci-
plinam peti oportere, aut in foro cum reliquis mercibus
expositam, virtutem venire, nã ego, mihi locum modo
demonstrari, magno emere possum. Sed non est ita.
Nam sponte quidem sua, aut prudentiam hominum ani-
mus atque ingenia non magnopere gignunt; aut huius
nobis ætatis, tamquam sterilitas quædam vehemenrer la-
mentanda est. quibus autem opinionibus imbutæ eo-
rum mentes, & tamquam consitæ, ad remp. e populi di-
sciplina, & quasi cultura prodire soleant operæpretium
est attendere. Nam ij, qui animum philosophiæ præce-
ptis excoluerunt, regendarumque ciuitatum artem edi-
dicerunt; neq; timidi sunt, quod scientia earum rerum,
quas quisque tractet, animum addere, non adimere so-
let; neque audaces ac temerarij, quod stultitia ac temeri-
tas plurimum ab arte ac sapientia dissident. Reipublicæ
vero gubernator ille de populo, nec ignauiam a verecun-
dia segregare, neque præcipitem aut pertinacem ciuem
seiuungere a forti atque constanti magnopere nouit, nisi
vsu demum atque experientia doctus, cum sæpe lapsus,
sæpe deceptus multa in rep. offenderit, & ciuitatis pericu-
lo ac detrimento (vt antea a me dictum est) prudentiam
didicerit. Philosophia autem, quæ vel maxime in effin-
gendis, atque ad virtutem conformandis, hominum sen-
sibus atque motibus occupata sit, & vt vt illi morati tan-
dem sint, quemadmodum cum ijs conflictari non incom-
mode queamus, vias rationesque tradat, neque ab homi-
num abhorret moribus, & qui sit optimus reipublice sta-
tus, intelligit, & quibus artibus, inclinatae ruentesque ci-
uitatis

uitates subleuentur, tenet; & ad eas, quę non optimis institutis ac legibus temperatę sint, accommodari se se tamen non recusat: remediaque temporum, locorum, casuumque incommodis adhibet salutaria. eadem multa de hominum vitijs, quęque eorum cautiones sint præcipit. eadem qui, cuique arti, cuique fortunę, cuique animi aut corporis affectioni, mores sensusque comitari soleant, comonet. Ad eam doctrinam tam fructuosam, tamque optimam vbi vsus quoque atque exercitatio accessit, tum vero præclari illi ac singulares ciues existunt: qualis vel in primis Contarenius sua in republica fuit: qui cum ingenuarum artium in gremio educatus & tamquam philosophię alumnus quidam, ad agendum descendisset, maximo quę sibi vsui ea præcepta, quę olim imbiberat, esse intelligeret, suos ciues hortari non desistebat, vt ea peruestigarent, quę de naturis humani generis, deque rerum publicarum gubernationibus a philosophis explicantur. Nec vero occultabat hoc ipse de se; nam a principio, cum primum in senatum lectus fuit, sæpe factum esse aiebat, vt in suggestum ascendere, sententię dicendę causa, cum cuperet, ausus non sit; quod pudore quodam & rei insolentia retraheretur: eamque rem magno sibi dolori esse solitam; itaque in animo habuisse, nisi eum animi timorem ac verecundiam peruinceret, ad rempublicam posthac non accedere, suumque locum alijs concessurum, quibus ad dicendum animus non deesset: nec enim verum esse, fortibus ac strenuis ciuibus ab ignavis timidisque locum præripi: verum nihil necesse fuit, talis ciuis prudentia ac consilio rep. priuari. Nam paucis mensibus, cum se se animo facile confirmasset, sic sententiam dicebat, vt neminem magis prudenter, magisque compositè loquutum vmquam fuisse constaret. Docebat ille quidem verbis, quam maxime poterat, proprijs, cum partite ac distincte, tum memoriter ac copiose. animos autem cum oratione minime conaretur impellere, auctoritate ipsa vehementer permouebat & fide, lingua celeri ac volubili le-

porem atque ornatum illum oratorium neque adhibebat, neque adhiberi æquum esse censebat: animos enim ciuium inflecti atque incitari, quo maxime tempore sedatos rectosque eos esse oporteret, cum consilium capturi de rep. essent, turpe atque inutile esse existimabat: eosque, qui magno quodam conatu orationis vim ad sensus atque impetus animorum & motus commouendos admouerent; si id suæ priuatæ vtilitatis causa susciperent, improbe; si reip. causa, arroganter sine controuersia facere aiebat; quod tantum sibi sumant, vt non communi remp. consilio regi velint, sed suo; quamque ipsi probarent sententiam, in eam ceteros ciues non adducere, sed compellere studerent. Eodem tempore Contarenus Brixie præfectus renuntiatus est. eum magistratum capitaneum Veneti appellant: quo cum proficisci cogitaret: iamque impedimenta imposita in lintrem haberet, repente horribilis nuntius adfertur; Romam a Cæsaris militibus captam, Pontificem Max. in arcem compulsum, urbem ipsam diripi ac vastari. quibus rebus Venetias nuntiatis, magnus subito cum dolor, tum etiam terror inuasit. Itaque mutato consilio Contarenus, cum vereretur alijs armis Brixiam egere, quam, quibus se se ipse assuescebat, consilio atque auctoritate, eum magistratum recusauit. atque interim otium a rep. nactus, studijs scilicet suis illis pristinis obsequebatur. Bellum, cum grauis hæc plaga accepta est, cum Cæsare Veneti, ac Clemens VII. Pont. Max. communiter gerebant; sed totius imperij summa tradita erat Franciscomariæ Vrbinatium principi, quem illi ducem appellant; eum Veneti suarum copiarum seorsum ducem habebant; nam ciuem terrestres copias ducere, per leges non licet: ac cum deditione facta, Clemens iam complures menses in custodia a Cæsaris militibus asseruaretur, cumque vrbs depopulandæ, vastandæ, incendiandæ, modum homines feri ac barbari sibi statuerent nullum; cui rei Cæsarem, quod longe abesset gentium, cum maxime cuperet, negant potuisse occurrere: commoti

moti rei indignitate atq; acerbitate Christianorum principes plerique omnes inter se de Pont. Max. e custodia educendo conspirauerunt. eius rei causa concilium Ferrariæ indictum est, quod Alphonsum Estensem, qui eius vrbis imperium, a maioribus acceptum, eo tempore obtinebat, maximi animi hominem, reique militaris peritissimum, adiungi sibi vehementer studebant: a quo cum propter consilium ac virtutem, tum propter oppidi opportunitatem, opes, bellicque instrumenta, quibus ille abundaret, earumque rerum omnium facultates, quæ ad bellum vsui erant, multa, magnaque auxilia subministrari sibi ad id bellum intelligebant posse. Eo Galliæ Britannique reges Legatos miserunt cum mandatis homines nobilissimos; idem & ij, quibus Pontificis Max. salus priuatim curæ erat, fecerunt, & Mediolanensis dux Franciscus Sfortia. Eodem Veneti Contarenum mittunt: maxime enim eorum reipublicæ intererat eam conficirem, propterea quod cum Pontifice, quemadmodum dictum a me est, societate & fœdere coniuncti, continentibus bellis, non longe ab suis finibus, cum Cæsare contenderent. Eo concilio peracto, atq; haud ita multo post pontifice liberato, ad eum Cõtarenus, suæ ciuitatis iussu legatus profectus est. Magna erat eo tempore omnium rerum perturbatio, magni Galliæ, Italiæque totius videbantur motus impendere. quod & Clemens ipse iniquissimo animo contumeliam, quam acceperat, ferre existimabatur, quod per pacis simulationem circumuentus in hostium potestatem venisset, quod superbe crudeliterq; tractatus, & in deditionem receptus tamdiu in custodia fuisset retentus, atque ad extremum quod non dimissus, sed elapsus e manibus & cathenis esset: quod omnia exempla cruciatuque in suos editi Romæ atque in omnibus vicis, & oppidis essent. Accedebat quod Florentini Hippolytum atque Alexandrum Pontificis fratrum filios, qui ipsius potentia in ea vrbe imperium antea obtinuisent, e ciuitate eiecerant, quod ille grauissime atq; in

dignissime ferebat: eius dolor quam in partem erumperet, expectabatur ab omnibus. Eadem Galliae regis causa erat, atque condicio: nam & bello superatus captusque, tantum se de veteri virtutis opinione, deque bellica gloria deperdidisse, maximo erat illi dolori; & sui liberorumque suorum mercatu (ut ipse existimabat) nundinationeque illa Caesaris, hostili scilicet in eum odio exarserat. Tum Veneti multis de causis Franciscum Sfortiam in regnum restitui volebant: atque eam rem ad suam rempublicam magnopere pertinere arbitrabantur. quibus omnibus rebus efficiebatur, ut, in tanta animorum incitatione & discordia renouari in Italia bellum necesse esse, omnibus videretur. Interim Clemens cum Caesare in gratiam redierat, amicitiamque conciliauerat: &, quo liberius in patriam iracundiam exercere posset, iustissimas suas in Caesarem minuerat inimicitias; & suas illi iniurias aut condonauerat, aut vicissim pacis simulatione, idoneum doloris sui ulciscendi tempus expectabat. Atque cum Caesaris duces & exercitus, illius nomine Florentiam oppugnarent, faciendum sibi esse existimauit, ut propius ipse accederet: itaque Bononiam sese contulerat. Eo Caesar quoque ex Hispania venit, ut a Pont. Max. cuius vnus ea potestas est, diadema ceteraque imperij insignia acciperet. atque ei aduenienti cum obuiam Contarenus extra urbem processisset, dicitur eum Caesar per quam longo sane interuallo a se visum agnouisse, atque ijs oculis, eaque vultus hilaritate eum aspexisse, ut id a multitudine, quae visendi causa prodierat, & omnes vias oppleuerat, animaduerneretur; atque ex ea re coniectura fieret, rem inter Caesarem & Venetos conuenturam: id quod exitus comprobauit. Nam praeter omnium opinionem, in tanta animorum incitatione & discordia, tot vltro citroque illatis acceptisque iniurijs ac detrimentis, cum pacificationi locus vix vllus videretur esse relictus, recessum tamen ab armis est, paxque inter omnes constituta. Quae res per

per Contarenum acta magna ex parte & confecta, cum
 suæ ciuitati gratissima atque optatissima accidisset, mirifi-
 ce eius & gloriam & auctoritatem auxit, vt nullam rem
 tantam, aut tam difficilem esse censerent, quin eam ille
 animo & cogitatione suscipere, & consilio tueri, & au-
 ctoritate atq; industria conficere posset. Memoria teneo
 me Romam illis temporibus venisse; tantus erat omni-
 um, qui in ea vrbe tunc aderant, de Contareni doctrina,
 prudentia, continentia, pietate, consensus, tantaq; admi-
 ratio, vt non amarent modo eum, qui tunc erant ciuitatis
 principes, sed etiam vererentur & colerent. Atq; omnino
 multa præclare legibus sancita sunt apud Venetos, in his,
 quod vetantur legati ab his, ad quos missi sunt, vlla aut
 munera, aut beneficia accipere; quod vtinam aliæ quæ-
 dam ciuitates aut reperissent, aut repertum a Venetis, i-
 mitari saltem vellent; ne suos ciues (id quod vsu fere eue-
 nit) plerosque foris venales, domi hostes haberent. quam
 diu enim absunt neglecta, quam susceperunt, reipublice
 cura, a quibus locupletari se sperant, eorum gratiam au-
 eupantur, atque ijs se se venditant: iidem domum reuer-
 si, beneficijs ac muneribus alligati, atque deuincti, quam
 patriæ caritatem debent, eam alienis, sæpe etiam hostibus,
 præstare ac persolvere coguntur. ita dum alij aliorum
 aut regum aut nationum rem gerunt, deserta nimirum
 a ciuibus publica res eorum iam pridem labat & corrui-
 t. At Contarenum eæ ciuitates, apud quas magna cura, sum-
 maque fide ac diligentia rem suam publicam gessit, præ-
 clarissimis muneribus donauerunt: tot enim tamque va-
 riarum gentium constantissimo consensu mirifice proba-
 tum, summoque laudatum opere, maxima dignitate, exi-
 stimatione, gloria muneratum, ditatumque domum di-
 miserunt. Seuerissimis legibus Venetijs ambitus constri-
 ctus est; suffragium ne per se, neve per alium quemquam
 rogent interdictum est. itaque cum a ciuitate ipsa vniuer-
 sa, non a singularibus ciuibus nominatim, petendi magi-
 stratus sint: idque sæpe (iidem enim eosdem magistratus,

P

certis

*optima profecto ex malo
 num ex temporis multu
 no.*

in actis

hic docet

certis intermissis temporibus, crebro gerunt) vna virtute
 nixam omnium ciuium ambitionem esse oportet: vt qui
 sapissime amplissimas dignitates adepti sint, ij nō amico
 rum aut propinquorum diligentie, aut tenuiorum homi
 num officij, aut etiam fortasse auaritiæ, sed ipsius resp. cer
 tissimum de se testimonium habeant: nam multis lo
 cis reprehendendi erroris sui ciuitati facultas datur: itaq;
 sæpe vsu venit, vt, qui semel primo aliquem honorem
 cunctis suffragijs assecuti sint; ijdem, iterum petentes, re
 pullam ferant. Quo maior eorum ciuium splendor est,
 qui omnium dignitatum cursum & tamquam spatia &
 circuitum iterum & sæpius sine vlla offensione confecer
 rint. ij clarissimi apud ciuitatem sunt: ijs honos ab omni
 bus ætatibus, omnibusque ordinibus habetur. ij, cum o
 pibus & potentia ne infimos quidem ciues antecendant,
 dignitate, existimatione, auctoritate, gloria anteferun
 tur omnibus: eadem est enim ciuium omnium parque
 species, vna toga, eaque simplex; nullus omnino non mo
 do comitatus, sed ne comes quidem; vt primi ciuitatis (si
 quis illorum consuetudinis ignarus interuenerit) vni de
 multis facile videri possint. Sed ij, quoquo venerint, sa
 lutantur, appetuntur: ijs in vijs deceditur, obuiam itur:
 in curia, in foro assurgitur: vt mihi virtus nudata phale
 ris omnibus & aduenticijs ornamentis exuta, in vna ea ci
 uitate sua ipsa pulchritudine & lumine nitere ac splende
 scere semper sit visa. Prorsus visendæ Venetiæ sunt, non
 propter vrbis modo eximiam pulchritudinem, nouita
 temq; antea inauditam. etenim maximā formosissimam
 que vrbe, in medijs excitatam æstibus sese e fluctibus e
 rigere, quis non miretur? naues onerarias maximas, pas
 sim ad priuatorum ianuam religatas, triremes in plateis
 nauigantes, quis sine magna admiratione ac voluptate as
 pexerit? Mihi quidem sic videtur, hanc profecto vrbe
 si conspiciata modo esset antiquitas, Neptunum nimi
 rum aliquem ex profundo ac latebris excitasset, atque
 eum celsissima illa tecta struentem ac fabricantem fecis
 set:

set: qui tametsi nullus scilicet vnumquam fuit, tamen si sit, aut esse si possit aliquis, nullum illi attribui munus aut opus illa vrbe præclarius posset: aut quod magis diuinæ conueniret nature. Sed hæc oculorum, illa animi ex eius vrbs cognitione voluptas capitur, vt equidem sentio, vel maxima, quod unæ dominantur apud eos leges: ijs & magistratus obtemperant, & ciues eque ad vnum omnes: atque eo vsque mihi potentiam execrata prudentissima ciuitas videtur, vt neminem vnum vlli magistratui præesse passa sit. terni, quini, feni, deni imperia, potestates, singulos magistratus gerunt. vt non solum domini os, quo nulla tætrior, nulla oculis detestabilior obijci species potest, aspiciendum ciuibus non sit; sed ne domini quidem imago & similitudo, aut effigies. Quamobrem spectatum exteræ nationes alacri animo Venetias eant; nec vrbs modo causa, quod dicere institueram, sed vel maxime ciuitatis, pulcherrimo totius orbis terrarum spectaculo sese ad eam diem caruisse profecto intelligent.

Postquam Roma Contarenius redijt, confestim ad summos honorum gradus sine vlla dubitatione vel controuersia elatus est. nam & maturius, quam ciuitatis consuetudo antea tulisset, Sapiens magnus factus est, & Cõsiliarius. qui duo magistratus summi apud Venetos sunt. neque dubium erat quin, si quis ex diui Marci Procuratorum collegio demortuus esset, eius Contarenius in locum substitueretur. ea vna procuratio perpetua Venetorum legibus est; id vnum ad honorum perfunctionem Contareno a fuit. Itaque sic in republica versabatur, vt etiam si litteras omnino non didicisset, illustrissimum tamen ciuitatis locum obtinere eum necesse esset. sic autem doctrinæ gloria celebrabatur, vt, tametsi rem publicam attigisset nõquam, ciuium omnium, qui fama ac nomine excellunt, clarissimus suo tamen nomine fuisset futurus. Accedebat Christianæ theologiæ singularis quædam atque exquisita cognitio: eaque non scientiæ modo aut ostentationis disceptationisve, sed vitæ ac disciplinæ

P 2 cau

causa comparata : ad eius enim praecepta animum mentemque referens, omnes suas cogitationes, consilia, actiones, vitam denique omnem conformauerat atque direxerat : vt non modo ad philosophorum regulas bene beateque, sed etiam ad Christianorum diuinum hoc prescriptum pie sancteque viueret. Est Venetijs quidam, quasi Romanorum, qui quondam fuit, campus ille atque comitium, quod magnum ab illis concilium nominatur. ad id concilium omnes, quibus ferre suffragium per aetatem licet, statutis diebus conueniunt. ibi cum Contarenus forte esset consiliarius, custosque positus fortibus, quibus Veneti in petendis magistratibus vtuntur; nam quorum fors exijt, ij pronuntiant quem potissimum sua sententia ei magistratui, cuius comitia habentur, gerendo idoneum esse existiment : itaque mirifico casu accidit, vt ibi cum esset, in vniuersae ciuitatis conspectu atque oculis, publice Roma allatae litterae sint, in quibus res omnibus noua, omnibus inopinata : illi quidem certe ipsi prorsus incredibilis, scripta esset, cooptatum Contarenum a Paulo Pont. Max. in Cardinalium collegium esse. Legerunt eas inter se litteras primum eius collegae; a quibus satis magno interposito ille intervallo, ad fortium urnas, vt dixi, asidebat. Itaque excepta inter legendum vox ab ijs, qui proximi confederant, susurro primum & rumore dubio, bonam euenire, felicem, faustamque eam illi dignitatem precante, ad aures Contareni profuit. ille vero respuere, nec adduci posse vt eam sibi rem narrari saltem pateretur : atque omnino ne aures quidem ad audiendum praebere. Verum recitatis palam litteris magna vniuersae frequentiae approbatione ac laetitia, inter se collocuti consurrexerunt collegae, atque ad eum cum magna, cum laetitia, tum etiam obseruantiae significatione adierunt. quod ille cum vehementer commotus recusaret, ac se se id aetatis ad aliud vitae genus negaret posse traduci, ad curiae vestibulum ab ijs, vniuerso eo concilio comitatus, deductus est. Cumque collegae, hominis

hominis honestandi studio, domum reducere eum summa contentione pergerent, prorsus non tulit. Erat eo tempore inter collegas Aloisius Mozanigus, grandior natu vir, qui apud ciuitatem gratissimus cum esset, princepsque consilij publici haberetur, sepe a Contareno de republica dissenserat: is ad eum gratulatum cum alijs non adiit, credo quod pedibus erat admodum infirmis. hic clara voce, ut a cuncto exaudiretur senatu, rei nouitate percitus, adiurans, cum frontem feriret ac Paulo malediceret, adfirmasse dicitur maximam ab eo ciuitati iniuriam fieri, quod eam ciue priuaret, quem illa vnum omnium habuisset optimum. Consilio dimisso, id enim is conuentus nomen habet, vniuersa ciuitas domum ad Contarenum leta atque alacris confluere cepit. ille vero suspenso animo incertusque, etiam nunc quid ageret, minus multo erat, quam ceteri, hilaris; nec mehercule iniuria. quid enim honos ille homini in re sua familiari ampla atque illustri, in republica principi, in toto orbe terrarum claro atque nobili, afferebat, praeter molestias ac labores? mutanda, vitae victusque quinquagesimo demum anno ratio tota & consuetudo; suae ciuitatis dediscendi mores, alienae ediscendi, haud parum quidem ab ea, ad quam ille se se exercuerat, disciplina abhorrentes; viuendum ad vnius hominis non semper prudentissimi, paene arbitrium atque nutum; comitatus magni alendi, saepe diu eodem censu; aliae cogitationes, consilia, instituta, officia, actiones, persona suscipienda prorsus alia. Sunt haec homini, equabilitatis ac dignitatis potius, quam potentiae atque opum cupido incommoda vehementer odiosa, graui ac molesta, praesertim si quis antepartis honoribus tamquam exsaturatus, & parta iam gloria contentus est. Saepe mihi narrauit vir omnium clarissimus atque grauissimus, quem Romae his paucis annis a sua ciuitate legatum, summa apud duos Pontifices Max. auctoritate summaque gratia vidimus, Paulum & Iulium tertios (in vtriusque enim tempora eius legatio incidit) Mattheus Dandalus: se se, cum
vehemen

vehementer auctor Contareno fuisset eius honoris accipiendi, qui non ab eo expetitus, sed ad eum delatus esset, magna contentione ratiocinandoque vix ægre ad extremum homini persuasisse, ne committeret, ut Pauli consilium, in quod non ille temere incurrisset, sed sine ulla dubitatione duce Deo deuenisset, aspernari videretur: præsertim his reip. Christianæ temporibus: multos enim fore, qui eam rem aliorum acciperent, atque ille faceret: quique in Romanam ecclesiam impietatis scelerisque nefarii Gasparem Contarenum, virum vnum omnium maxime pium, maximeque religiosum, subscriptorem habere gloriaturi, se seque in eo impudentissime iactaturi essent; quippe qui, cum a Pont. Max. ne beneficium quidem accipiendum sibi esse statueret, quid de causa illa tota iudicaret nemini dubium relinqueret. Hæc cum Dandalus diceret; adderetque, eos, qui Contareno æquissimi futuri essent, suspicatos tamen esse non ob animi magnitudinem atque æquabilitatem, tantam illum dignitatem a se remouisse, sed propter imbecillitatem atque ignauiam defugisse: peruenit homo grauis atque eloquens, omnique necessitudinis genere cum eo ab adolescentia coniunctus, cum propter affinitatem, tum præcipue propter morum, voluntatum, studiorum similitudinem, ut dubitantem confirmaret: atque in suam sententiam diu multum cunctantem ac tergiversantem perduceret: qui maximam partem eorum, quæ a me posita in hoc commentario sunt, nos docuit. Omnino verum id est, quod ait apud Euripidem Theseus, cum Herculem, quo tempore ille Athenas in exilium venit, multis honoribus ac beneficijs prosequeretur: sic enim ait. Laudem feremus omnium pulcherrimam vniuersa a Græcia, Fecisse cum memorabimur bonis bene: quod ille Græce optime, nos Latine ut potuimus. Verumtamen is est virtutis splendor, ut non modo ij, qui eius compotes sint, honore digni habeantur, sed etiam si qui honorem illis, qui adepti eam sint, habeant, honorati ipsi & clari ob eam rem euadant.

dant. Id, quod Theseus de se sperabat, Paulus etiam assequutus est: nec enim dici potest quantum in Contareni dignitate amplificanda suam ipse gloriam propagarit. Quamquam fuit ille suo quoque nomine insignibus laudibus ornatus, virque egregie magnanimus & plane maximus. Ab hoc tempore aliud tamquam vitæ exordium & quasi origo, Contareno nascitur. Antiquiores habentur Venetum mores, propterea quod inquinari se externis consuetudinibus ea ciuitas passa non est. victu & cultu non modo a luxuria longe absunt, sed etiam de lautitia hac, quæ plerasque Italiæ ciuitates nuper inuasit, per multum circumscripserunt: quippe qui prisco more esse se principes, quam videri malunt. consuetudo autem eorum moderatioque vitæ cotidiana discrepat illa quidem fortasse non nihil, sed ita, vt ad summam expolitionem desit forsitan aliquid; firmum autem quiddam ac solidum certe subsit, & leuitate atque ineptijs vacet. quod Romæ contra mihi visum est fieri: aptiores enim in conuictu & congressionibus Romani homines sunt: sed accersito quodam interdum genere, minimeque vernaculo. vitæ autem cultus lautior est, atque, vt video nonnullos existimare, etiam delicatior. in principibus quidem luxus pæne regalis; magnus equorum, iumentorumque numerus, multitudo familiarium; lauta, splendida, sumptuosa suppellex: vt dedisse mihi operam videantur non modo re magni vt essent atque clari, sed etiam specie ac pompa. Neque eo hoc dico, quod exterarum rerum, quæ ad dignitatem ac decorem pertinent, rationem non habendam esse existimem, aut quo mihi id arrogem, vt vtrius ciuitatis studia rectiora sint, diiudicare me posse profitear: sed illud affirmo, hanc quasi migrationem e sua in alienam, non illam quidem deterius, sed longe longeque aliter moratam ciuitatem Cõtareno, ingrauescente iam ætate, subitam ac repentinam necessario molestam fuisse. Verumtamen ita vitæ victusque mutatio facta ab eo est, vt ingenium tamen, institutaque illa sua pristina retine

tineret: nec vllos spiritus, tanta facta accessione dignita-
tis atque fortunę, sibi sumeret: sed probitas, affabilitas,
& eadem, quę in priuato fuerat, facilitas atque humani-
tas (quamquam inuidiosa illa, tantoque opere a multis ex-
petita purpura recens induta erat) integumentis inuolu-
ta, & quasi personata elucebat tamen, & agnoscebatur
ab omnibus. Nam cum intempestiui ipsi complures,
molestique sæpe essent, propterea quod omnibus præ-
sto ille semper erat, admonitus est a suis, non tam faciles
eius ordinis ceteros se se præbere consueuisse, sed certam
diei horam constitutam habere, antequam adiri ad se nõ
paterentur: neque cuiq̃ sui potestatem facerent. Qui-
bus ille respondit non se putare honorem illum sibi soli
esse datum, sed eius partem amicos, partem inopes homi-
nes & egentes iure sibi optimo vindicare. ad quorum ar-
bitrium viuendum sibi esse statueret, non ad suum: nec
enim æquum esse amicorum clientumque negotijs, tem-
pus, idoneum quod sit, a se præscribi, sed ab ijs ipsis, quid
rerum suarum occasiones ac momenta exigant, statui o-
portere. Itaque vt quique ad eum veniebant, statim ad-
mittebantur, ac quibus operam suam semel esset pollici-
tus, fidem in eo religiosissime seruabat; vt sæpe tenuium
aut miserorum hominum causa ad summos reges iterum
& sæpius adire non dubitauerit: cum id præcipue Chri-
stiani esse officij contenderet, id maxime hominum ge-
nus auxilio iuuare, quod maxime opis & auxilii egeret.
Quod iudicium ipsius etiam faciebat, vt reliquias Grę-
cæ nationis, multis grauibque malis conflictatas, soue-
ret, ac; quibuscumque rebus posset, subleuaret. accede-
bat autem huic animi propensione erga illos, vt miseros
& durissima seruitute oppressos, quod memor erat vete-
rum beneficiorum, quę vniuersi mortales ab erudita ea
gente accepissent: inde namque & bonas artes, & cuncta
ingenua studia profecta per omnes terras manasse affir-
mabat. Nam quin maiores eorum pietatem Christia-
nam, cultumque hunc optimum nostrę vitę strenue ad-
iuuissent,

iuuissent, dubitari non posse dicebat. cum Basilius, Chrysostomus, Nazianzenus quasi signiferi huius sanctissimi doctorum hominum gregis fuissent, qui pectora nostra excoluerunt, ac scriptis laboribusque suis veros ritus, ex plosis inde falsis opinionibus, eo in seuerunt. quare oportere nos, si grati esse velimus, lapides etiam stirpesque eius telluris amplexari, ne dum homines, cum quibus tot arctissimis vinculis coniuncti sumus, omni amore prosequi non debeamus. vigeat autem eo magis in animo ipsius hæc opinio, quia illos ipsos summos theologos, quos appellauimus, ut philosophos quoque eiusdem gentis, cotidie in manibus habebat. & eorum laboribus, vigilijsque se instructum esse recordabatur. Benigniores eum esse cum res non pateretur, quod proximum erat, fidem diligentissime præstabat, ut ad diem, quibus deberet, semper persolueret. quæ res a potentioribus non paucis neglecta, efficere solet, ut multis in locis sit fides angustior. neque hoc tantum maioribus in nominibus custodiebat: ad tempusque his, qui se grandiore pecunia iuuissent, respondabat (quod tamen ut faceret egre & urgente tantum aliqua necessitate committebat) verum etiam aduersus tunc homines, quibus aliquid deberet, se talem præbebat. quæ culpa moribus eorundem inherens, inquinat non parum eorum splendorem; miserosque illos creditores ad desperationem & laqueum aliquando adigit. Declarat quâ opere maculam hanc fugeret: quamque omni in re iustitiam coleret, vox edita aliquando ab ipso, quum forte audisset diocetem suum iubere minutum quendam opificem cras redire: castigatum enim illum iussit pecuniam eam statim dissolvere: addiditque, si unde id faceret, non esset, sumeret ex abaco vas, ipsumque diuenderet: arbitrari enim se tenuem illum hominem magis mercede sua, quam se argento illo, mensæque ornatu egere. Eodemque pacto toto animo abhorrebat ab indignis graui & honesto viro quæstibus: non pauci enim ne desit ipsis pecunia in minime necessarijs sumptibus, & ut ina-

Q

nem splendorem retinere possint, cogunt illam illiberatissima quavis ratione ac sordidissima. Quum igitur eo tempore, quo Bononiam legati nomine obtinebat, qui, pars illius muneris obeundi, illatarum iniuriarum causas audiebat, ita cum eo egisset (putabat enim Contarenum eiusdem animi esse, cuius plerumque sunt, qui negotijs illis implicantur.) Esuribimus profecto: nullum enim emolumentum parit imposita mihi cura: cunctaque in ciuitate concordiae atque otij plena sunt: inquit ille: Voluptatem magnam mihi nuntias, cupioq; hunc statum rerum permanere, videreq; diem illum, quo ego, vt habeam sumptum vnde faciam, mulam etiam, qua vehor, cum omni ornatu proscribere cogar. Non putavi autem alienum esse has etiam ipsius voces memoriae mandare. quum praesertim huiuscemodi breuia dicta, quia ab intimis sensibus proficiscuntur, subitoque prolata sunt, in singulis factis ac motibus animi, vt reliquis etiam casibus humanis, videantur in primis mores voluntatemque eorum, vnde erumpunt, indicare: eademque voces multum valere non sine causa semper existimatae sint, ad homines informandos: illosq; etiam emendandos, qui contrarijs vitijs tenentur. quam causam fuisse puto, cur plures & docti & prudentes viri sedulo multas collegerint, & volumina etiam ex ipsis confecerint. Saepemultumq; ineunte adolescentia cum iracundia, quae paulo sibi confueuisset esse molestior, quasi luctatum, ad extremum prostratam illam & domitam aiebat oppresuisse: non modo enim turpe, sed etiam miserum sibi semper visum, iracunditas a consilio atq; a nobismetipsis abscedere; quod de se Terentianus ille praedicaret, Prae iracundia Menedeme non sum apud me: Bibulum autem illum, qui cum L. Libone fuit ad Oricum (quamquam hoc scribonio ab inimicissimo homine memoriae traditum est, & qui quacumque re potuit, existimationem eius semper violauit) sibi nullius pretij hominem videri fuisse, qui cum de compositione agendum esset cum Caesare, ad colloquium non pro

prodiit, ob eam rem, quod furenter consueuisset irasci; ne res. maximæ spei, maximæq; utilitatis eius iracundia impedirentur. Itaq; non modo stomachantem, sed ne commotum quidem visum illum a se vniq; esse, qui cum eo familiarissime vixerunt, affirmant. vt nimium prope patiens ac lentus existimaretur: neq; ijs, qui in epulis, in cubiculo ipsi ministrarent, sæpe cessantibus, sæpe etiam peccantibus, non modo non conuicium faceret, sed ne verbo quidem malediceret. Quod igitur de non nullis doctis viris memoriæ proditum est; vt Socrate, Stilpone Megareo; quum illi natura propensi essent ad aliquod vitium, effecisse tantum eos studio ac diligentia sua, vt nullum vniquam in vita ipsorum vestigium rerum illarum apparet, id vere de hoc nostro prædicari potest: in illisque sine dubio Contarenius enumerari debet, qui vitiosam naturam compresserint: ac quidquid illic aliquod maius malum, si creuisset, ferre potuisset, tenerum adhuc & imbecillum fregerint, & omnes eius fibras extirparint. Superbiorem ipsum (de quo etiam supra non nihil significatum est) copia bonorum, quæ aut a fortuna acceperat, aut ipse suo labore industriaque quæsiuerat, non fecerat: in quod vitium passim multis, minoribus multo ornamentis decorati, ruunt. & sane hanc culpam ille, vt scopulum aliquem, magnopere vitabat. quod si vniq; in sermone aliquo aliquid a se forte prolatum intelligeret, quod tenuem modo umbram illius mali retineret, valde dolebat, vt contigit quodam tempore. Cum enim Paulus III. loqueretur cum ipso de augendo numero summorum antistitum, ostendissetque se in animo habere quosdam in eum ordinem cooptare, Contarenius minime probatos (quod ille etiam præ se ferebat, atque id tunc palam dicebat) videns ipsum suæ voluntati refragari Pontifex Max. inquit, ijs ipsis verbis. In situm fuit semper Cardinalibus, vt nouis repugnarent, ne sibi alij dignitate exequerentur, respondit igitur ille commotior quam solebat. Noli sanctissime pater ita de me existimare: cognitum. n.

Q 2 tibi

tibi plane est, quot ego nominarim, idoneam prorsus materiam huic operi efficiendo: & vnde fingi possint personæ tantæ dignitati sustinendæ aptæ. nam quod ad me attinet, non puto purpurâ hanc maximum esse eorum, quos in vita assecutus sum, honorum. Extrema hæc verba, illa occasione edita, statim ut domum redijt, doluit sibi excidisse, ut qui nolisset specimen aliquod a se vmq̃ datum, aut superbi hominis, aut inanis huius honoris & gloriæ cupidi. Quin etiam dictitabat amplissima sacerdotia plus in se oneris, quam splendoris habere: quoque maiora illa forent, eo molestiæ plus sollicitudinisque continere. quare se sæpe vicem dolere solitum eorum, qui Pontifices Maximi creati forent. quia pondus Aetna grauius humeris suis sustinerent. cuius iudicij Seleucus quoque rex quondam fuit: ille namque dixit; quæ vox eius monimentis litterarum mandata est a doctis viris, ut errorem eorum coarguerent, qui falso putant, opulētissimos quosque homines beatos esse, magnisque semper voluptatibus frui, cernentes splendorem vitæ illius ac florem; inquit igitur ille, nescire priuatos illius status incommoda: ideoque magnopere falli in iudicio de illo faciendo. quod si scirent tantum, quam arduum sit, ac molestiæ plenum, tot epistolas scribere ac legere, futurum prorsus ut diadema abiectum iaceret sine honore vlllo: nec quemquam inuentum iri tam stultum, qui ipsum tollet ac capiti suo imponeret. nec tamen non multo maioribus grauioribusque curis premi necessario illos, si munus suum fideliter obire vellent, qui vitam moresque eorum, quibus præsumunt, regendos susceperunt, animosque ab omni labe purgandos, quam qui in eo tantum eximio statu rerum suarum, regnoque conseruando, occupati sunt. Quum igitur hoc crimen Contarenius vehementer reformidaret, ac, si quis uere existimare posset, vacuus prorsus ab ipso foret, non tamen penitus potuit ea suspicione carere. Erat ille in omni suo sermone, tactoq; integer ac liber: remotus ab omnib. blandicijs orationis: acerrimus

acerrimus inimicus vanitatis illius, assentationisque, quæ nunc in locum inuasit simplicis veritatis, libertatisque loquendi, merito quondam magnopere probatæ. ob quod etiam ingenij bonum ferunt eum Carolo Cæsari valde acceptum fuisse, quum ob alias etiam animi dotes ab eo diligeretur. Hæc igitur probitas nuda, expertæque omnis fuci ac fallaciarum: quæque, vti eo venerat, ita se Romæ in longe alijs moribus, institutisque conseruat, causa fuit, vt superbiæ a non nullis insimularetur. quasi ille contemnens ceteros præ se, quidquid sentiret de omni re contra commoda illorum diceret: nec sua quicquam interesse putaret potentioribus aduersari. quam ansam quidam arripientes, ipsum, vt contumacem & inhumanum apud Paulum III. criminati sunt. quod nimis libere in senatu contra ipsum sententiam diceret, atque honestissimos quosque viros offenderet. ipse vero id diuerso consilio faciebat: neque vt impediret commoda aliquorum, sed vt religioni suæ & ei, quod rectum esse sentiebat, seruiret. Vt autem, quod non verum esset, nec ordine factum, quamuis intelligeret se apud aliquos offensurum, accusabat, ita gratiam aliorum astuta simulataque oratione non aucupabatur: cui rei ostendendæ in vtramque partem exemplum hoc satis accommodatum erit. Contigit aliquando, vt eo astante in senatu ageretur de Camarino in potestatem tradendo vni alicui Pont. Max. nepotum, eo genere iuris, quod feudum appellant. admonuit igitur Contarenius Paulum, vt ante quam de tanta re quicquid statueretur, colendæ iustitiæ causa, uacueque a culpa conseruandæ sanctissimæ sedis, mandaret vt iura Varanæ familie, quæ diu in possessione eius oppidi fuerat, diligenter noscerentur: ne iniuriæ aliquid ipsa in ea re acciperet. Hæc sententia, præsentis animo dicta, illa ipsa die per urbem sparsa disseminataque est: quare Hercules Varanus, qui Romæ tunc erat, statim domum ad Contarenum venit, gratiasque illi maximas egit, causamque eius suam totam commendauit. cui quidem ille, eadem animi

fin

simplicitate, quod tamen quidam ab agresti inhumano-
 que ingenio profectum potius dicerent, respondit.
 Non necesse erat te mihi isto nomine gratias agere: quod
 enim feci tunc, vt æquitati officioque meo satisfacerem,
 feci. nec quicquam amplius cogitationis suscipiam de ista
 re, præter id, quod mihi fides mea præscripserit, nisi ali-
 quid a Pontifice ipso, quod eo faciat, curæ meæ manda-
 tum fuerit. Blandus aliquis, illa occasione vsus, studuisset
 gratiæ illi, sine vlllo suo labore partæ, nouam gratiam ad-
 dere: animumque honesti viri inani spe, falsisque polli-
 citationibus, lactasset. Quare mihi venit in mentem ar-
 bitrari non paucis in rebus simile fuisse Contareni inge-
 nium naturæ moribusq; Dionis Syracusani: vt enim reli-
 qua, in quib. ipsis inter se magnopere conuenit, taceam,
 non deerant etiam in regia illa Dionysij filij (vt ab erudi-
 tissimis viris memoriæ proditum est) qui castissimi illius
 & integerrimi viri maximas virtutes & sane easdem has,
 propinquis vitiorum vocabulis deformarent, ac grauita-
 tem superbiam esse dicerent: libertatemque loquendi
 contumaciam vocarent: qui Dion, cum induci non pos-
 set, vt vna cum alijs peccaret, qui se omni genere vitio-
 rum contaminarent, eorum peccata videbatur dissimili-
 tudine vitæ coarguere. Fertur tamen ille durior fuis-
 se natura, tristiorque. vnde temperare indolem illam
 summo studio ipsum debere a doctissimo viro, studiosis-
 simoque gloriæ ipsius elegantissima voce dictum est: hor-
 tatus enim est Plato vt Gratijs hostias imolaret, suasitq;
 vt aliquid etiam daret moribus suorum temporum, insti-
 tutisque reliquorum mortalium. non quia id omnino ve-
 rum esset, sed quia ad congressus hominum frequentan-
 dos: benevolentiamque eorundem retinendam, obse-
 quium sæpe necessarium foret. Atque hæc priuati offi-
 cij sunt, illa publici; quod malas consuetudines tollendas
 curauit, illas veteres renouandas; quod multarum legum
 præclarissimarum auctor suusque fuit; quod in dicen-
 da sententia numquam inuidiam reformidauit, multaq;
 con

contra collegarum suorum commodum sæpe suscepit atque perfecit. Vitiosa quadam consuetudine duabus, sæpe etiam pluribus ciuitatibus, vnus & idem dabatur custos, qui Græco verbo episcopi appellantur: neque in ijs ipsis ætatis progressus expectabatur, qui annalibus Pontificum Maximorum legibus constitutus est; adolefcentuli, sæpe pueri, maximis administrationibus præficiuntur. Has atque huiusmodi alias prauas corruptasque consuetudines sua Contarenus sententia delebat: moresque sacerdotum hominum, nimium nonnumquam deformatos emendabat, magnaque sua ipse offensione communem reipublicæ leuabat inuidiam. Non eadem condicione est collegium Cardinalium ceterarumque ciuitatum senatus aut consilium; nam illæ ex ea, quam habent, ciuium copia in suos senatus, qui aptissimi visi sint, legunt. in collegium Cardinalium e toto orbe terrarum, qui aut doctrina, aut nobilitate, aut prudentia, aut probitate, religione, pietate excellunt, si Pontifici Maximo visum sit, eos cooptare licet: eoque factum est, vt summa is ordo amplitudine, summa auctoritate, summo splendore, omni ille quidem tempore fuerit; quippe e Christianorum flore decerptus atque collectus. Verumtamen ijs, de quibus institutus mihi sermo est, temporibus præcipuum quoddam in eo lumen enituit: propterea quod Paulus Pont. Max. magni atque acris iudicij vir, eximia singularique virtute homines nactus, ad eam illos dignitatem vltro ipse euocauerat. vt ei collegio, quod per se antea esset clarissimum, ea re lucis tamen permultum attulisse uideretur. Ex hac virorum clarissimorum copia, cum mittendus ad Cæsarem Legatus esset, Contarenus potissimum ad id munus delectus est: causa mittendi ea fuit. Vehementer erat Cæsar anxius sollicitusque, quod Germani, qui plurimum armis possunt, neque præsto illi in bellis erant, neque eum pecunia iuuabant; propterea quod maximis inter se seditionibus de religione contendebant, atque intestinis dissensionibus distenti, nullo illi

illi vsui esse poterant. Abiecti quidam perditique ac desperati homines, xxx. fere abhinc annis, iam pridem receptas rataque disciplinæ Christianæ sententias in controuersiam reuocauerunt, multitudiniquē persuaserunt imperitæ, uti a Romano Pont. quod caput Christianæ reip. atque ecclesiæ est, desciscerent, se seque in libertatem vindicarent. quod malum tarde initio serpens, ab ijs neglectum a quib. opprimi id & poterat & debebat, paulatim infimæ plebis, vulgiq; mulierum, animis, legum vinculis laxandis & dissoluendis, pollicendaq; cupiditatum multarum licetia in fraudem inductis, paucis annis opinione magis adcreuit. idemq; nefarius furor, postq̃ populare existimari coeptū est pietatem euertere, multos quoq; principes inuasit. Alios metus impellebat, veritos ne a suis defererentur, si ab illis dissentire pergerent, partim rerum nouarum studio, partim leuitate & stultitia, quod deo immortali, legibusque spernendis, fortitudinis opinionem facere se se de se nonnulli arbitrarentur; partim etiam auaritia, quod sacerdotum maximas amplissimasque possessiones publicatas, inter se partiebantur. multi tamen, quibus esset Deus pro sua ipsorum pietate propicius, veram integramque pietatem constantissime complexi, nullis permulceri illecebris, nullis illici præmijs, nullo timore depelli se se passi sunt. eaq; a maioribus, quæ acceperunt, instituta ad hoc vsque tempus fortissimo animo retinuerunt. Sed tanta inter utrosq; extitit non modo contentio ac disceptatio, sed iam concertatio atque pugna, tantumque exarsit odium, ut maximæ, bellicosissimæ, florantissimæ, atq; adeo, ante hunc furorem, religiosissimæ, optimæque de rep. meritæ nationis, vires, opes, & copię absumptæ, in se se ipsa conficienda atque delenda, sint. quibus rebus permotus Cæsar animo & cogitatione in ea cura defigebatur, si per compositionem minui id malum sedariq; discordiæ possent. qua de re cum omni contentione cum Germaniæ ciuitatibus ageret; primo Christianorum omnium concilium in ijs maxime locis indici postulauerunt,

stulauerunt, quo adire tuto ipsi possent; is erat locus nusquam gentium: quippe cum ab omnibus defecissent, nec ullis sese gentibus committere auderent, præterquam in eorum ipsorum finibus; ad id concilium venturos, eiusque decretis iudicijsque staturos se se pollicentur. id eo ab illis consilio fiebat, quod Pontificem Max. numquam eo descensurum sibi persuaserant. verum ubi probari a Paulo III. condicionem, ac ne de loco quidem, cuius iniquitate deterritum iri eum maxime sperabant, recusari senserunt; paulatim regredi, neque in eo quod ultro ipsi postulauerant, manere; dirimi controuersas per colloquium posse; id breuius, expeditius, certiusque esse, dicere; longum esse expectare, dum ex ultimis terris conueniretur. Omnia sibi Cæsar experienda existimabat, si vlla ratione mederi ei tanto malo posset. Itaque deliguntur homines docti ex utroque numero vndeni. ad colloquium venit; magna contentione, magna pertinacia, ab ijs, qui se ipsi Protestantes appellant, disputatur, atque in omni genere calumniæ delitescitur: eos ijs, qui ratas veteres sententias esse volunt, Catholicique appellantur, acriter refellunt, constantissimeque in sententia perseuerant. Ad extremum, cum concertationum exitus nullus reperiretur, nec quicquam inter eos conueniret, prorsus disiunctis discordibusque opinionibus, infecta re, a colloquio discedunt: quod, quoniam se absente factum erat, Cæsar sperans Germanos suum aspectum atque auctoritatem reueritos, aliquid de pertinacia atque calumnijs remissuros, iterum deligi homines iubet, qui colloquendi causa Ratisbonam conueniant: atque eo ipse proficiscitur, ut maiore auctoritate de concordia ageretur, simulque magnopere a Paulo III. per litteras petit, legatum ut ad se mitteret, qui ad rem tantam & tam grauem maxime esset idoneus. Paulus e tanta præclarissimorum hominum facultate & copia Contarenum sine vlla dubitatione delegit, atque hominem in Germaniam mittit; quod is & magnum iam antea eius gentis propter eas cau

R fas

fas, quæ commemoratæ a nobis sunt, haberet vsum, & Cæsari esset gratissimus: idemque innocentia, doctrina, prudentia, facilitas, animique moderationis, magna apud Germanos opinione excelleret: quique (id quod Cæsar magnopere postulauerat, maximeque ad rem pertinere arbitrabatur) in disputando minime esset ambitiosus, minimeque pertinax: eo cum venisset mirabiliter acceptus a Germania est, & magno in honore apud Cæsarem fuit.

Nam cum omnes Germaniæ principes, tum rex Romanorum ipse, officij, honorisque hominis causa, domum ad eum venit; & in sacris cerimonijsque solemnibus, datus ei locus est secundum Cæsarem primus: nihilque earum rerum, quæ ad homines magnos honestandos adhiberi consueverunt, in eo prætermisum est. quæ, tametsi ordini scilicet debebantur & dignitati, tamen cum alacrius aliquanto, tum etiam cumulatius, quam antea solita sint, personæ dicuntur esse persoluta. Accedebat quod Cæsar, iucundissima eius consuetudine & sermonibus delectatus, sæpe hominem ad se extra ordinem vocabat: cumque de grauioribus negotijs, deque re publica collocuti inter se essent, multa ad eum Cæsar de suis priuatim rebus referebat; multa de Geometria, multa de Geographia querebat quibus ille scientijs, quod eæ ad rem militarem (quæ illi spectanda erat maxime) pertinent, operam multam illis temporibus dabat. illa autem cum in promptu Contareni haberet, quod puerili disciplina erat in ijs artibus studiose versatus, omnia scilicet certa, dilucidaque respondebat. Quæ cum de Contareni apud Cæsarem familiaritate ac gratia, apud omnem autem Germaniam auctoritate & fama, Romam essent allata; ventum est in spem fore, vt res conueniret, mitigatissimæ Contareni lenitate & prudentia Germanorum animis terribilissimæ discordiæ tollerentur. quæ res quoniam maiorem in modum illi gloriæ futura erat, homini vehementer inuideri cœptum est. Nec deerant etiam Romæ, qui dicerent, nulla alia de causa ipsum Germanis gratum

tum acceptumque esse, nisi quia aduersarijs indulxisset; ac decreta, quæ pugnacissime defendere debebat, iisdem prodidisset. Hæ vero graues acerbæque voces ab ijs, qui equo animo laudem gloriamque Contareni non ferebant, emanabant: nec tantum illic, vbi plurimum ipsi obesse poterant, improbe mittebantur, verum etiam per omnem Italiam fusæ ac disseminatæ, magnopere illius estimationem ac dignitatem lædebant. quas tamen ille, magno animo præditus, rei que ipsius naturæ non ignarus, primo contempsit, ad eum namque maleuoli hi sermones inuidorum in Germaniam vsque delati sunt; simulque sperabat exitum earum rerum innocentiam suam, si demque patefacturum: cui sane ipse toto animo incumberebat. Contigit tamen tunc, quod sæpe in magnis arduis que rebus vsu venit, vt negotium illud, Christianæ reip. magnopere vtile, atque adeo salutare, in medio cursu fractum ac dissipatum sit. id autem magna ex parte factum est malitia fraudeque illorum, qui Cæsaris potentiam, quæ multum compositis rebus, Germaniæque pacata creuisset, suspectam habebant, suisque rebus periculosam existimabant. hi namque non modo veterum discordiarum fibras, vt oportebat, communis vtilitatis causa non euellabant, verum etiam nouarum simultatum semina occulte iaciebant, in aures eorum, quibus commissa res erat, insusurrantes, ac falsos quosdam metus eo inferentes.

Vt autem astuta hæc consilia rem remorabantur, & ne ad exitum adduceretur impediabant, ita subito exortum est, quod animos Germanorum ad longe alias curas traderet; finemque disputationi illi ac colloquio faceret: hoc autem fuit incursus Turcarum regis in Pannoniam cum maximis copijs, communisque hostis metus: nec enim effecit tunc timor ille, quod plerumque consuevit, magnopere exacerbatis animis, vt stimulum periculum tantum admoueret ad odia extinguenda & gratiam reconciliandam; sed potius spem, quæcumque erat, malorum illorum sedandorum eo tempore intercidit, ac su-

R 2 stulit.

stulit. Missis igitur sermonibus illis, quod factum est ex
tremo mense Quintili, ceperunt Germani arma: totos-
que se ad impetum illum coercendum, finesque suos tuen-
dos contulerunt. Cæsar vero aliam rationem inijt eius
periculi callido consilio propulsandi; quod a veteribus e-
tiam ducibus non semel usurpatum fuit, & satis tutum
semper utileque cognitum est: statuit. n. cum classe, quam
maximam adificauerat, ornaueratque, in Africam nauiga-
re: magno namque spatio Solimanus inde remotus, auxi-
lium illis locis ferre nullo modo poterat, & ne maiorem
etiam aliquam plagam in Græcia acciperet, non sine causa
metuere debebat. Urgebant præterea Caroli, ut hoc face-
ret, assiduæ preces Hispanorum, crebraque damna stimula-
bant, quæ cuncta illa maritima regio cotidie accipiebat,
ob frequentem irruptionem piratarum. adeo ut mare pe-
ne omne clausum illic foret. Quare ut tam grauibus ma-
lis regnum illud suum liberaret, deleretque maculam,
quam sibi videbatur suscipere ob tantam licentiam præ-
donum, statuit, ut dictum est, apparatus illius belli non de-
esse, sedemque nefariorum hominum, si posset, omni ra-
tione euertere: quamuis inimici timoris ipsum argue-
rent, quod ferocissimum hostem declinaret, ac tellurem,
quam maxime tueri debebat, tanto impendente pericu-
lo, destitueret: in Italiam igitur celeriter venit. Cum
vero muneri, quod sustinebat, non sine magna animi
sui molestia finem factum esse vidisset Contarenius, nec
se posse amplius nauare operam rei publicæ, vna cum Cæ-
sare reuersus est. Postea vero quam Tridentum ventum
est, imperatorem, ut se dimitteret, rogauit: velle enim
se, quum commodè id facere posset, ecclesiam suæ fidei
commisissam, quæ non longe inde abesset, inuisere: ac,
postquam publice non posset, priuatim religioni officio
que suo seruire. Venerunt tamen eo tempore Roma a
Pontifice Max. litteræ, quæ iuberent ipsum, persona le-
gati retenta, apud imperatorem esse, Mediolanumque vna
cum eo proficisci. in quam urbem ille, ut veteris imperij
iuris,

iuris, non multo ante receptam, volebat (vt moris est) cum pompa ingredi, indeque Lucam accedere. quo in loco Pontifex ipse Cæsarque statuerant simul congregari, ac de communibus rebus studiose agere. Accidit hoc in itinere res, quæ vehementer animum optimi viri commoueret: cum enim Brixiam ventum esset, ciuis eius loci, honestus sane vir, ac vetus amicus Contareni, qui ad ipsum salutatum venerat, quæsiuit ex eo simpliciter, quæ mens ipsum impulisset, vt capita, quæ ferrentur prolata ab aduersarijs, adeo absurda, & a vera ratione aliena, in Germania comprobaret. cui statim respondit ille; eas esse meras nugas, rumoresque prorsus inanes, & quos omnium aures respuere deberent. se namque, ne dum anceps quod esset, & in quo scrupulus aliquis resideret, sine auctoritate Pontificis Max. concessurus aduersarijs fuisset, ea etiam quæ rata in primis sunt & firma aliter recepturum non fuisse. non destitit auctor eius sermonis, sed addidit, rem aliter, atque ille putaret, se habere: neque .n. incertam esse, ac nullo auctore prolatam famam illam: se namque litteras vidisse ab eius ordinis homine, scriptas, summo viro, quem etiam nominauit, quæ id commemorarent, ac verum esse contenderent. non potuit tunc homo lenissimus sibi temperare, quin stomacharetur exclamaretq;. Digna vero merces hæc est meorum laborum: si vera sunt, quæ narras. statimque vt innocentiam suam, existimationemque tueretur, misit epistolam ad Pontificem Max. qua valde questus est de iniuria illa, sermoneque improbissimo, quem Roma profectum, ac per omnem Italiam ab iniquissimis dissipatum, contra dignitatem suam comperisset: rogauitque simul, vt, si penitus eum non aspernaretur, saltem se indicta causa ne condemnaret: nec quicquam de illa re secum statueret, ante quam ipse ad eum peruenisset: sperare enim se facile causam suam probaturum, ostensurumque, laude se ac præmio, non reprehensione aut pœna vlla, ob ea, quæ in Germania gessisset, dignum esse. Cum Medio-

lanum

lanum peruentum esset, quæ ciuitas omni genere lætitiæ, magnificentiaque apparatus Cæsarem excepit, mirifice suo quodam facto Contarenum Carolus decorauit, ac, quid sentiret de virtute, singularique probitate hominis, notum testatumque omnibus esse voluit: lateri enim suo ipsum in omni ea pompa herere voluit: cumque hoc ille modestiæ causa recusaret, sequereturque aliquanto post, mandauit humanissimus princeps vni e famulis, vt pæne inuitum ipsum traheret ac prope se collocaret, omneque id tempus, donec eo perueniret, quo paratum illi hospitium erat, consumpsit cum eo iucundissimis sermonibus. id vero quum personæ dignitati datum non sine causa aliquis arbitrari posset, licet tamen existimare, multum etiam ad hoc valuisse iudicium, quod fecerat de homine; quod putaret, vt qui veræ gloriæ non ignarus esset, eam rem non minus sibi, quam Contareno, laudi & honori futuram. Et sane litteris mandatum est, eius nominis primum Augustum Cæsarem, quum primum Alexandream, quam bello ceperat, ingressus est, in magna copia honestorum ac clarorum virorum, Areum, grauissimum & eruditissimum hominem, sibi adiunxisse, familiariterque cum eo solo in tanta illa lætitia, fortunæque suæ magnitudine locutum esse. quem etiam, vt magis eum ciues sui suspicerent ac fortunatum iudicarent, manu teneret: erat enim philosophus ille Alexandrinus. Sed aliæ quoque res, dum illic mansit, indicio esse poterunt, quantopere Contarenum diligeret: id quod animaduersum ab alijs opulentis viris, qui in eo comitatu erant, fecit vt omnes ipsum colerent, ac de illo celebrando quasi inter se contenderent. Cæsar, qui, vt supra ostendi, mare transire statuerat, quæ ad cursum illum necessaria erant, studiose parabat: imperaratque vt Genuam classis, propinquosque in portus cogeretur. quare, vt id celerius fieret, statuit sibi in eam urbem accedendum, indeque Lucam eundum, quo Pontifex Max. se venturum significarat. Contarenus igitur breuiore via se Lucam
con

contulit, atque illic, quod maxime cupiebat, post paucos dies Pontificem Max. vidit; qui sane hilari vultu, nulloque signo edito offensionis, ipsum accepit. nec multo post eodem imperator venit, qui non cessavit etiam in alijs magnis rebus, quas cum Paulo III. egit, multa prædicare de prudentia, industria, probitate legati; quibus omnibus virtutibus, in munere illo obeundo, usus fuerat in Germania: nec non questus est, quod Romæ multa falso iactata forent contra fidem & dignitatem ipsius, quum ille integre sincereque personam eam sustinuisset, ac negotia cuncta cum fide administrasset. cui statim sapientissimus senex: quique ignarus non erat artium marum, quibus plerique Romæ utuntur, aut invidia commoti, aut, si alios deprefferint, sperantes se in locum illorum inuasuros, respondit, sibi eximie cognitam esse ac probatam Contareni uirtutem; seque eam ob causam ipsum tunc in Germaniam misisse; tantumque oneris ei imposuisse; facturumque etiam breui, ut nemo dubitare possit de beneuolentia sua erga illum, ac, quo denique loco eum haberet, se omnibus declaraturum. Non contentus autem hoc Pontifex, ut omnem scrupulum ex animo Contareni euelleret, gauderetque ille secum tam præto erga se animo fortunatissimi hominis ac tam præclaro testimonio suarum virtutum, notum esse voluit ipsi eum sermonem: simulque suasit illi, ut contemneret maleuolas voces improborum, nec putaret eas quicquam valere ad existimationem suam violandam. fontem etiam huius mali aperire volens, testimonium citauit veterum poetarum, qui naturam inuidiæ versibus suis expresserunt; moremque illam habere tradiderunt, ut summa loca feriret non minus, quam venti editissima quæque appetere, ac violentius verberare consuerunt: omnique demum ratione, qua potuit, ostendit se eum valde carum habere: cumque etiam gratias amanter egisset pro susceptis laboribus, fecit ei potestatem, ut tot itineribus defatigatus Romam reficiendi sui causa breuiore via accederet: ipse namque

que vicinitate inuitatus, Bononiam profectus est; indeque Ariminum venit, ac Flaminia denique via Romam reuersus est. non dum autem duobus mensibus transactis, memor eius quod dixerat, de augenda dignitate Contareni, legatum ipsum Bononiæ declarauit: quæ publica cura prouinciaque reliquas omnes superat, quas intra suos fines imperiumque status reip. possidet. Ille igitur hoc nouo onere sibi imposto, vt qui non minus rebus gerendis, quam contemplandis factus erat, Martio mense se in prouinciam contulit. factumque est, vt V. I. K. Aprilis in urbem ingrederetur: qui dies apud eos maxime celebris agitur, consecratus genitrici eius, qui salutem nobis dedit. summa igitur lætitia totius ciuitatis exceptus est: conataque est illa, quam spem conceperat animo de probitate & prudentia ipsius, externis etiam rebus, honoribusque omnibus indicare: certo enim sciebat futurum sibi illum potius esse optimum parentem, quam durum aliquem & auarum dominum, aut etiam fortunarum suarum expilatorem. in quo certe illi falsi non sunt: vt primum enim res illas attigit nullo negotio cognitum est, non minus ipsum in rebus iudicandis clementia vt & equitate, quam summo illo iure, quod sæpe merito reprehenditur, ac, si quis vere existimet, quod alio nomine appelleretur dignum est. Totos dies ille causis audiendis, controuersisque tollendis operam dabat: nec vnumquam molestum fane hoc, & odioso munere, præsertim homini in alijs curis studiisque educato, defatigabatur. hoc autem faciebat: naturamque ille suam, consuetudinemque flectebat, quia veræ gloriæ deditus erat, ac prodesse mortalibus, quacumque re poterat, studebat. quare quodcumque munus obiret, dignum viribus operaque sua, in ipsum totamente incumberebat. Erant hæc curæ cogitationesque hoc tempore Contareni; procurabatque ille comoda eius nobilissimæ ciuitatis: cum repente, inopinante illo, Roma litteræ venerunt, quæ ipsum ad aliud munus traducerent, in quo fane ille diutius versatus fuerat, quodque omnes

mnes numeros honestatis in se habebat. Cum enim seda-
 ri numquam potuissent vlla vllius opera iræ inter Franci-
 scum Gallorum regem, & Carolum V. imperatorem, sed
 cotidie magis nouis iniurijs inferendis inflammarentur
 eorum animi, gerereturque aut pararetur ab ipsis sem-
 per bellum tæterrimum, quod in singulos dies reip. Chri-
 stianæ grauissima vulnera imponeret, & ad internicio-
 nem denique redigeret maxime pias nationes, officij sui
 esse ratus est Paulus Pont. Max. tanto malo, si vlla ratio-
 ne posset, mederi; tantumque & tam sæuum incendium
 extinguere. quare mittendos sibi esse censuit seorsum ad
 ambos potentissimos reges, legatos, prudentissimos vi-
 ros & tanto oneri sustinendo pares: præclare enim scie-
 bat, quanta vis esset in ministris ad vnamquamq; rem ef-
 ficiendam; hancque curam, omnium maximam, requi-
 rere personas in primis sapientia & auctoritate prædi-
 tas atque ornatas. & non minus gratas acceptasque prin-
 cipibus ijs, quorum animos delinire ac flectere deberent.
 Elegit igitur, quem ad Cæsarem, in Hispanijs tunc degen-
 tem, mitteret, Gasparem Contarenum: & ad Gallorum
 regem ire voluit Iacobum Sadoletum; ambos viros pro-
 bos, atq; omni ingenij laude florentes; &, vt collegas in
 amplissimo sacerdotio, ita multis honestis artibus inter se
 coniunctos, ac maxime bonis omnibus probatos: quæ res
 gesta est sextili mense. Erat eo tempore Sadoletus Ro-
 mæ. quare significauit per litteras Pontifex Contareno,
 quid de illo statuisset: mandauitque, vt, quæ ad iter ne-
 cessaria erant, expediret: socium namque ipsius in hone-
 stissimo illo munere intra paucos dies in viam sedatu-
 rum. Hoc accepto nuntio ille, qui nullum vmquam vti-
 litatis aliorum causa laborem recusarat, quamuis ætate
 iam confectus esset, & satis imbecilla valetudine, æquo ta-
 men animo tulit sibi onus illud imponi. quod si animam
 etiam in ea legatione se profusurum esse certo scisset:
 tanta erat pietate præditus, & ita dicto audiens esse sum-
 mo Pontifici cupiebat, vt ipsam prorsus repudiaturus

S non

non fuerit. Appropinquabat sane illi mors, quæ tamen longe alia ratione, & vbi minime expectabatur, ipsum op-
presit: nec enim (vt a me nunc diligenter narrabitur) aut laboribus, aut defatigationibus nouis accelerata est.

Agebat Contarenus ætatis suæ annum LIX. in his cu-
ris, quas ostendi, toto animo occupatus: partem tamen illarum iam in id munus, quod instabat, deriuans. In-
cumbens igitur illis, quæ multæ profecto ac graues erant, molesto anni tempore, vt par esset ipsis sustinendis, ali-
quādo reficiendi sui causa se in propinquum vrbi locum conferebat: vbi manens & æstum declinaret, quo confi-
ciebatur domi, & aliquantulum a perpetuis suis labori-
bus animum relaxaret: nam siquid maioris momenti fu-
bito euenisset, facile illuc adibatur; vbi etiam potestatem sui omnibus faciebat. Locus autem valde animo ipsius,
temporique illi accommodatus, ac quo plurimum varijs de causis delectabatur, erat sacellum Diuæ Mariæ a Mon-
te vocatæ, cuius possessio procuratioque est sodalium Di-
uæ Iustinæ. Acciderat autem, vt illis ipsis diebus, qui primi Sextilis mēsis fuere, fratris filius, illius salutandi & visendi causa, Bononiam veniret, qui superiore anno Pa-
tauij inter sodales illos receptus fuerat: vocabatur vero nouo nomine, vt consuetudo est eorum, qui se sacris ali-
quibus initiant, Placidus. cum autem probus adolescens esset, feminaque non nullarum virtutum in se contine-
ret, a Contareno diligebatur, ille igitur primo apud suos in vrbe mansit in Diui Proculi dicato ipsis domicilio. vt tamen eo facilius frui posset Contarenus, ipseque itidem sitim suam expleret videndi virum, quem maxime opta-
bat, secum sanguine coniunctum, cuius etiam visendi alienigenæ desiderio flagrabant, impetrauit a suis, vt se il-
lic esse paterentur. quæ causa reliquis causis addita est fre-
quentandi recessum eum, diutiusque illic commorandi. Hic collis ab vrbe abest spatio mille passuum, amoenissi-
mus, & natura & arte factus ad animum multis modis pa-
scendum, atque omni honesta voluptate explendum. &
sane

fane, qui desideria optimi huius viri, gaudiaque cognita haberet: quod non magno negotio omnibus contingere potuit, qui familiariter cum eo vixissent: facile iudicaret paucos illos dies, quos illic traduxit, iucundissimos ei fuisse omnium, quos in vita umquam degustasset: vivebat enim cum sui amantissimo fratris filio, cumque alijs non nullis comitibus illius, eorundemque sacrorum socijs, honestis sane viris & eruditis: rem diuinam crebro faciebat; omnisque sermo illic erat de rebus, quibus maxime capiebatur. Cum igitur, ut traditum a me est, calores essent maximi, crebro in porticulam quandam declinandorum illorum causa veniebant: & ut illic frequentius deambulabant, ita etiam aliquando posita mensa cibum capiebant: vergit enim illa ad septemtriones; urbemque ipsam quasi ante pedes positam prospicit, planitiemque omnem, quæ ipsam cingit: quin etiam remotiores vrbes illinc commode cernuntur Mutina, Ferraria, aliaque nobilia oppida. quare non sine causa expectitur prospectus ille, paritque oculis incredibilem voluptatem: quamvis tunc, capto iucunditate illius, Contareno nihil tale timenti, exitium comparauerit: aura enim illa lenis, quæ flabat: frigidiusculusque aër; cum temperamentum corporis ipsius rarius esset, paruoque momento sæpe commoueretur; facile ad imas partes penetravit, sanguineque inflammato abscessum in latere creauit, e genere eorum, quæ ἀπὸ πύλου Græci vocant. quare statim febris consecuta est, quæ septimo die ipsum consumpsit; quamvis magna diligentia summorum medicorum curatus sit: simul ac enim primum cognouit se egrotare, Bononiam reuersus est. Ipse autem in primis naturam vimque eius morbi mature perspexit: tribus namque diebus, ante quam animam efflaret, omnem rem Ludouico Beccatello, vni e familiaribus suis, quo plurimum in rebus maioris ponderis utebatur, enarrauit. Dixit igitur grauitatem eius morbi non apparere: reconditasque corporis partes magis ipsum oppressisse, quam exterior-

res male habere: in promptuque esse. addiditque genus id morbi periculum magnum in se continere: quod si vires corporis eę forent, vt spatio trium quattuor ve dierum resisterent, sine dubio morbum ipsum impetum suum remissurum: se tamen magnopere vereri, ne contra ipse deficiat; naturaque penitus frangatur: intelligere enim se venę motum valde imbecillum esse. Cui ille, qui saluti ipsius omni studio prospiciebat, respondit, rogans vt abduceret paulisper animum ab his molestis cogitationibus, rationemque omnem sui curandi in prudentia diligentiaque medicorum positam esse vellet: affirmans præterea Deum optimum maximum, quem semper ille pie coluisset, ipsi præsidio futurum: esse autem accurate incumbendum valetudini recuperandę, vt cito mandatum sibi munus obiret, iterque ad imperatorem faceret. Ille vero statim hilari vultu, ad alium longe maiorem imperatorem sibi iter instare, dixit, idque ipsos breui cognituros: neque tamen se hoc dicere, quia mortem valde perhorrescat, parumq; animo æquo ferat se e vita discedere: intelligere enim se præclare quot quantaq; beneficia a Deo acceperit, quorum etiam pleraq; commemorauit, non glorię causa ostentationisque, cui tunc locus minime erat, verum vt se gratum esse erga auctorem illorum significaret. Inquit igitur se ortum esse ea in ciuitate, quę nulli earum cederet, quę in vniuerso terrarum orbe existunt: e familiaque, quę haud postremum locum in ea rep. teneret: consecutumque itidem illic esse honores non paruos: & vt domi, ita etiam foris gradus maximos dignitatis adeptum esse: vtramq; vitam se cum laude aliqua coluisse: & eam, quę in contemplatione rerum versatur, & eam, quę rebus agendis incumbit: peruenisse ad etatis annum LIX. quem terminum vitę non multi attingere potuerunt: quare secum quoque hac parte non male actum esse: canereque se debere vna cum sacro Hebręorum vate carmen, quod ad equum gratumque animum significandum pertinet, nomenque illius

lius laude gloriaque cumulandum, quia non tam liber-
liter se gesserit erga multos, neque tot bonis expleuerit
omnem populum gentemque. Vnum tantum sibi mole-
stum esse, quod, ut optabat, commodis quorundam te-
nuiorum hominum non prospexerit, qui sibi, postquam
ad sacrum illum honoris gradum ascenderit, fideliter mi-
nistrarint: sperare tamen se Deum optimum max. Ponti-
ficemque, cuius dignitati toto animo inseruierit, fortu-
nas eorum subleuatu-ros. Nec oblitus est suo opportuno
que tempore mandare custodi ipsius, ut priuilegium,
quod beneficii loco a Pontifice impetrarat, ad delicta pe-
nitus abstergenda traditum, sibi legeret, dum mente o-
rationeque confisteret. Cum hæc animo versaret, sane
constanti ac forti, atque hoc sermone semet consolare-
tur, suos, qui præsentibus aderant (ij autem erant, ut quisque
maxime illi acceptus probatusque fuerat) angebat, atque
ita perturbabat, ut lacrimas vix tenere possent: a quibus
tamen sibi diligenter temperabant, quamuis intellige-
rent ne magna quidem copia ipsarum spectante illo effu-
sarum, posse ipsum commoueri, & e statu illo animi de-
ijci. Eadem vero hominis prouidentia in intelligendo,
prædicandoque suis vite sue fine, exitu ipso comprobata
est, quæ in ceteris rebus iudicandis significandisque sæpe
apparuerat: crescente enim semper vi morbi, remedijsque
omnibus superatis, oppressus ille est; anima que effla-
uit. K. Sept. meridiæ. Quamuis autem horas cir-
citer sex antea voce oratus esset, non tamen sensu ani-
mi, intelligentiaque extremo illo tempore caruit, ut cer-
tis quibusdam notis indicijsque perspectum est; confiditque
clementia conseruatoris nostri, ut Christianum virum de-
cet; & cum aliter non posset, se spem omnem suam in eo
collocatam habere nutu, admonitus diligenter de hoc, si-
gnificauit. Ut vero se constantem in hoc, maximeque
pium præbuit, ita, quæ moris est consuetudinisque, non
solum magno, verum etiam alacri animo geri, custodi-
rique passus est. quæ sane, ut nuntia mortis, per terra fa-
ciunt

ciunt plerosque; ac valde omnes, qui non firmas radices egerunt in persuasionem Christianam, perturbant. Reliquit vero ille discessu suo suos omnes mœroris ac luctus plenissimos: ut vniuersam quoque ciuitatem dolore magno adfectam, quæ sane, quacumque ratione potuit, funus illius honestauit, & quam molesta ipsi optimi custodis mors fuisset, planum fecit. die autem, quæ secuta est mortem ipsius, funus ductum est. Orationem de laudibus eiusdem, & honeste acta cuncta vita, habuit Romulus Amazeus, disertus & nobilis orator, qui tunc in ea vrbe, domicilio quodam vetere omnium disciplinarum, & humaniores litteras docebat, & negotia publica reip. administrabat. corpus in Diui Proculi depositum est, eo consilio, ut Venetias postea comportaretur, in sepulchroque maiorum ipsius, clarissimorum virorum, collocaretur. Paulus III. nuntio allato de obitu Contareni, ægre admodum illum tulit: declarauitque quanti hominem fecisset, omni genere liberalitatis usus erga domum illius. nec tantum Pontifex Maximus, qui sæpe opera ipsius fideli & utili usus fuerat, verum etiam Romæ ceteri probi viri morte ipsius vehementer conflictati sunt. nam, quantum luctum eadem in patria excitarit, non facile dici potest. omnes denique, qui aliquando doctrinam illius gustarant, singularisque probitatis hominis specimen aliquod acceperant, publicam illam cladem existimarunt. Cuius autem collega quoque ipsius in amplissimo sacerdotio Petrus Bembo quantum dolorem cepisset ex graui morbo Contareni, desperataque iam a medicis salute, notum omnibus esse voluit: in epistola enim ad Flaminium Tomarotium, quomodo adfectus animo esset audito casu illo, & propinqua morte optimi & honestissimi viri, diligenter narrauit. Verbis ipsis, quum illustri loco posita sint: alioque sermone edita, supersedebam. Possem etiam aliorum multorum, doctorum & excellentium virorum, testimonia citare, qui quantum damnum morte illius factum esset, scriptis suis testati sunt:

in

in quibus etiam non nulli, qui ab eo vehementer dissentiebant de ratione viuendi, veroque cultu Christiani hominis, & acerrimi aduersarij opinionum, quas ille in Germania defendit, extiterunt: magnifice tamen de eruditione, continentiaque illius in illis ipsis libris, quibus sententias ipsius oppugnabant, locuti sunt. quod fere vfu venire non solet, vt a quibus de veritate homines dissentiant, non eosdem etiam conentur deformare, atque ita auctoritate omni ipsos spoliare. Et quoniam de dolore, quem illo tempore cepit Paulus III. mentionem feci, libet etiam commemorare, quod ab eodem illo familiari Contareni, & omnibus officijs cum eo coniuncto, Ludouico Beccatello, honesto in primis & fide digno viro, accepi, ad id confirmandum vehementer accommodatum: declarat enim mansisse diu in animo Pontificis egritudinem hanc, ac leui quoque momento refricari solitam tantam plagam. nisi forte aliquis putet sapientissimum illum senem cotidie magis, in magna penuria talium virorum, cognouisse quantum incommodum olim acceptum fuerit obitu eius viri, qui vt quietorum temporum ornamentum ingens, ita perturbatorum presidium firmum erat: quum enim ad se illum euocasset, opera ipsius quibusdam in rebus vsurus, diligenter ex eo quaesivit, an praesens forte ille adfuisset, quum fato Contarenius functus est: rogauitque vt diceret aliquid de institutis & vita illius. cui statim, mihi affirmauit ille, se respondisse id, quod erat: mirificam fuisse Contareni integritatem fidemque in ijs omnibus rebus gerendis, quae mandata illi ab ipso forent, intelligeret ve ipse sua sponte, facere ad dignitatem Romanae reip. conseruandam: virumque illum vera probitate praeditum fuisse, non ficta ac simulata, quam personam plerique, vt eo perueniant, quocupiant, sibi callide imponunt: vnumq; omnium Contarenorum veteres ac maxime ratas opiniones & animo probasse, & verbis etiam semper defendisse. quo sermone accepto commotum Pontificem Maximum, qui deambulabat,

labat, steterisse; manuque iterum percussisse mensam prope positam, dixisseque non sine gemitu quodam ac suspirio, quod indicauit euulsam fuisse penitus omnem ex animo ipsius suspicionem, quæ quondam eo inculcata de illo vocibus maleuolorum fuerat. Amisimus profecto magnum virum, ac valde utilem reip. nostræ ciuem. sed, ut alia, ita hoc magno constantique animo ferendum. Quoniam autem non semel dictum est in hac vita de magna labe animi quorundam, quum ab ipso illo vitio magnopere Contarenius abhorreret, qui alienam personam induentes (vnde Græco vocabulo, sumpto ab actoribus fabularum, vulgo ὑποκριταὶ appellantur) & eam quidem semper meliorem, vel optimam potius omnium, longe alij videri volunt, quam vere sint; atque ita magnis in rebus imponunt simplicibus hominibus, nihil inde mali suspicantibus, vnde plurimum ipsos expectare oportebat; non alienum esse duxi de hoc etiam differere: & si enim numquam defuerunt, qui fallacias & dolos horum nefariorum hominum aperirent, ac maxime illos esse cauendos in vita admonerent, numquam tamen ita probi viri eruditi & instructi fuerunt, ut satis possent artes eorum intelligere, atque insidias etiam vitare. In primis autem in pietatem nostram Christianam, quæ tota in simplicitate animi fundata est, radices egit, atque incommoda sæpe magna apud nos peperit hæc fraus. Quo maiore odio digni sunt hi pessimi mortales, qui in re, quæ quo magis pura integraque est, eo magis probatur, astutis consilijs vtuntur, ac dolos malos exercent. Hoc etiam aliquo modo significasse videtur doctissimus vir Plato, qui, hoc genus hominum notans, inquit. postremam iniustitiam esse, videri uelle optimū uirum, quum minime sis. Idemque ab Aeschilo, non solum graui poëta, sed etiam docto in disciplina Pythagorea prolatum est, quum ferret in cælum magnis laudibus Amphiarum, summum illum augurem, eundemque sanctissimum virum: inquit enim ipsum non studuisse quod mul-

ti faciunt, ut videretur optimus, verum ut esset. nam quod nos, malis multis doctos, reddunt etiam aliquando dubios & incertos: faciuntque, ut probos honestosque viros ab improbis & impuris distinguere nequeamus, non dici etiam potest quantopere hoc pacto obsint, cum apud Euripidem etiam sapiens antea semper habitus Theus, eo nomine suspectam habuerit eximiam probitatem, castitatemque filij: insimulatus enim falso Hippolytus, quod cubile ipsius violasset, quum se ille apud eum purgaret, quod vita sua ab eo scelere valde remota esset, fidem ea de causa non fecit: timuit enim pater ne tenuis victus, cultusque, quo filius delectabatur: abstinentiaque, a vescendis animantibus, simulata foret: simulque ne disciplina Orphei, quam ille profitebatur, familiaritasque demum Dianę, in qua se valde iactabat, ficta esset. quare in alteram partem miserabiliter peccauit. Sed eo redeamus vnde digressi sumus. Idem etiam intimus consilij Contareni: nec minus studiosus famę estimationisque huius optimi, ac pudentissimi viri, quem sibi in vita tamquam viuum quoddam exemplar probitatis proposuerat, notam, quam improbe vitę ipsius inurere preposterus quidam amicus studuit, hoc pacto deleuit. Narrat enim forte euenisse, ut illo ipso tempore, quo grauius Contarenius aegrotabat, Bernardinus Ochinus, illę nouę condendę Franciscanę familię dux & auctor, Bononiam venerit, Romam ad causam dicendam euocatus: insimulabatur enim in ijs contionibus, quas Venetijs habuerat non nulla dixisse, quę veteribus decretis Romanę reip. aduersabantur: additque habuisse illum litteras ad se scriptas a Giberto episcopo Veronensi, quibus a se petebat, ut diligenter ageret cum legato, ut hortaretur hominem ad sistendum se in iudicio: coramque ad ea, quę ipsi obieciabantur, defendenda: quum cognouisset ipsum timide ad id descendere, egereque stimulo quopiam & auctoritate magni alicuius & grauis viri: neque enim adhuc Gibertus hominis leuitatem inconstantiamque perspe-

T xerat.

xerat: is autem vesperi venerat; quum iam cenassent omnes, legatus tamen adhuc in lectulo vigilaret: qui, quum speraret morbum postridie leuiorem fore, vt commodius eum audire posset, loqui que cum ipso familiariter, iussit vt preberentur illi, quæ ad curandum corpus pertinerent: contigisse vero contra, vt ea nocte morbus ingrauesceret: quare mane legatum totum distentum fuisse in remedijs, quæ medici adhibenda iusserant, fumendis, nouisque curationibus: vnde factum fuerit, vt neq; de hospite illo, neque de alia vlla reagi cum eo potuerit. Bernardinus interim, cui in primis mala sua mens, malus que animus cognitus erat: atque umbras etiam, vt, qui sibi alicuius sceleris conscijs sunt, faciunt, reformidabat, cepit vereri ne astute illic detineretur: putabat enim fingere morbum legatum. quo metu homo oppressus (nam hoc verum esse non multo post e consilio, quod cepit perspectum est) non cessabat Ludouicum urgere, vt rogaret legatum potestatem sibi faceret abeundi; in quo ille ipsi non obtemperabat, putans breui fore vt melius esset legato: videbatur enim sibi perspexisse, cupere illum magnopere cum Bernardino loqui; qui sane vsque ad id tempus magnum sibi nomen ex facultate illa dicendi, & opinione sanctitatis conciliarat. Cum autem, magis magisque semper timore crescente, instaret, Ludouicus inportuno sane tempore coactus est, cum estu febris in lectulo legatus iactaretur, eo irrumpere, rogareque vt pateretur ipsum abire: in quo sane humanissimus vir ei morem gessit. quumque ad eum Bernardinus introductus esset, hæc ipsa verba protulit. Vides quo in statu sum. excusatio hæc apud te iusta sit: & ora, vt Deus opt. max. mihi propicius sit: feliciterque institutum iter perage. cui ille tantum, demisso (vt moris est) capite, respondit se prorsus ita facturum: ilicoque abiit. Hic est sermo, quem Bononiæ habuit cum sanctissimo, & modestissimo viro Bernardinus. nec verbum præterea additum est. qui tamen postea, quum susceptam uitæ rationem deseruisset:

set:

set: acerrimumque se hostem Pontificiæ potestatis præbuisset, vt se sapienter id fecisse ostenderet: a perdita que causa & flagitijs multis contaminata, merito defecisse: habereque se multos socios eius consilij probare vellet, non veritus est criminari amicum, memoriaq; ac litteris prodere: questum secum esse eo tempore Contarenum de moribus institutisq; Romanorum antistitum: & infectione seu atq; iniusta bonorum: huiuscemodiq; alia multa scribere prorsus inania, & quæ non solum a veritate abhorrerent, sed etiam vitæ eius, cui adfecta erant, nullo modo conuenirent. quæ cuncta Ludouicus (vt est vir optimus & omnis officij, quod in amicitia coli debeat, obferuâtissimus) asseuerabat, refellendi eius mendacij causa, & purgandæ innocentie uiri illius mortui, quem uiuum magnopere dilexerat, nec tantum hoc se ita habere, testimonio suo confirmabat, sed alios etiam testes huius rei producebat, qui præsentibus illic adfuerant: in quibus etiam nominabat Iulium Contarenum, fratris legati filium: qui post eius mortem & ob naturæ probitatem, & ob commendationem patris, creatus est Pont. Ciuitalis, cui præfecturæ regendæ præpositus antea fuerat. Cum hoc tanti momenti sit, ad integritatem Contareni ostendendam, abstergendamque maculam illi falso aspersam, volui totam rem, vt factam eam accepi: ac pene iisdem uerbis, quibus mihi exposita est, commemorare. Rebus autem gestis ab eo dum uixit enarratis, nunc quæ monumenta ingenij reliquerit, fructusque otij ipsius indicabo. prius tamen, quod adhuc ualet aliquid ad confirmandam doctrinam hominis, testimonium de ea re grauissimi & eruditissimi uiri citabo: quod additum superioribus testimonijs, quæ prodidi de eximio ingenio ipsius, præstantique cognitione omnium disciplinarum, vera esse declarabit: simulque non sinet quempiam dubitare, quomodo ille, in vita plerumque occupata, tot tamque præclara opera efficere potuerit, quæ multum etiam posteris profint, perpetuoque testentur, qualis ille, quan-

tusque vir fuerit. Ludouicus igitur, cui cognomen ferrei oris fuerit, nobilis philosophus, & qui multos annos in Bononiensi gymnasio summa cum laude & admiratione omnium, qui aliquando ipsum disputantem audierunt, matrem eam omnium optimarum artium coluit, mortuo Cōtareno, quum sermo ipsi esset institutus cum honestis quibusdam viris de damno, quod eo tempore factum esset interitu illius, plurimisque animi dotibus, ac maximis virtutibus, vna cum eo extinctis, inquit doloris plenus: (nam virum eum valde dilexerat, in familiaritatemque se eius insinuarat illo tempore, quo legati nomine urbem eam rexit.) Ego, quod mihi videor meo iure facere posse: nec enim malum me omnino esse existimatores harum rerum arbitror; adfirmo hunc hominem omnibus, quos aliquando cognoui in philosophiae studiis merito laudatos, qui sane non pauci fuere, prestitisse & scientia multarum rerum, & iudicii firmitate: ipsumque vere philosophi grauisimo nomine dignum fuisse iudico. Certe quum ego de aliqua re, propria eius studij, cum eo diserebam, videbar mihi prae illo minus quidam philosophus esse; vel potius nouus quispiam auditor, & plane rudis eius artis, quam profiterer, quare ad ipsum sepe me conferebam, vbi locus aliquis obscurior mihi negotium facefferet: in qua quaestione quum paulo antea ipse toto animo versatus essem, & aliquas etiam horas, euolutis pluribus voluminibus, praeterita die consumpsissem: ille vero, vt existimari potest, spatio multorum annorum nullam cogitationem de ipsa suscepisset, ita tamen apte & exquisite nodos illos dissoluebat, vt videretur diu multumque non multo antea de ea cogitasse. quare (inquit) sepe ego paene stupidus euasi; mihi que potius cum caelesti aliqua natura, quam cum mortali homine visus sum loqui: idque nunc, quia res ita se habet, verumque id prorsus est, praedico, nulla alia causa impulsus. quis enim non videt assentationi nunc locum non esse; quae praeterea a persona, quam sustineo longe semper abesse

abesse debet? Hęc asseueranter tunc ab illo prolata quum
essent, auxerunt magnopere opinionem, quam, qui ade-
rant, de præstanti Contareni ingenio antea in animis ha-
bebant. Sed etiam scripta, quanta fuerit eruditio ipsius,
aperiunt: quę sane, vt ordine a me tradantur, hæc sunt.
Edidit iuuenis adhuc (xxx. enim tertium ætatis annum
tunc agebat) librum contra iudicium Petri Mantuani do-
ctoris sui; nec tamen ea de causa minus pius, quamuis cō-
tra pietatem facere videretur, fuit: ille enim in omni ser-
mone suo adfirmare solitus erat, ex opinione sententiaq;
Aristotelis existimari debere animos nostros esse morta-
les. quum contra ipse, sedulo aduersus eum disputans, ci-
tatis multis locis, & tamquam tabulis obsignatis, ostende-
rit longe aliter principem Peripateticorum de ea re sen-
sisse: viderique potius immortalitate donatos ipsos Ari-
stotelem esse voluisse. cuius opinionis antea Plato, vnde
didicerat, sine vlla dubitatione fuerat. Argumenta autem
illa firma ad probandum & grauiā fuisse, opusque to-
tum valde elaboratum, perspicitur; quia acutissimus ille
physicus in libro, quo defendit opinionem illam suam;
acriter oppugnata ab eo, quem instruxerat, tradit eum
librum & doctissimum omnium & vberimum esse, qui
omni tempore materiam illam persecuti sunt: additque
videri prorsus eum diuina opera & manu fabricatum fuisse.
Scripsit etiam de Elementis libros quinque; in qui-
bus viam omnem, rationemque Aristotelis diligenter ex-
pressit: misit autem illos ad Mattheum Dandalum foro-
ris sue virum: cuius hic supra mentio cum magnis veris-
que ipsius laudibus facta est. Addidit his, in altiore phi-
losophiæ parte, libros quattuor, quos dicauit Paulo Iusti-
niano, nobilissimo & clarissimo suo ciui. qui odio rerum
humanarum, quum pertæsum esset varietatis ipsarum;
vt facilius diuinæ contemplaretur: deoque ipsi toto ani-
mo seruiret; in Etruscos montes cœtumque Camaldulen-
sium se contulerat. Hi libri ei, qui attente legerit, nullo
negotio patefacient, quæ fuerit vis animi ipsius, & quan-

ta

ta prudentia in rebus grauioribus tractandis. Sed idem etiam (vt melius adhuc intelligatur factum illum natura et studio fuisse ad personam eam sustinendam, quam ipsi multo postea sapientissimus Pontifex: multumque semper omni in re prouidens, imposuit) iuuenis adhuc, vitamque colens liberam, ac nullis sacris astrictam: occasio nem hanc eius rei nactus, quod familiaris ipsius Pontifex Bergomas destinatus fuerat, ipsum instituere cupiens, duos libros scripsit de officio eorum sacerdotum: finxitque ita atque informauit talem virum, quales si forent, quibus tantum hodie commissum est, non laboraremus. quis enim non fateatur pias in primis castasque fuisse cogitationes ipsius: totaque mente ac studio solitum esse in illis volutari optimum virum, postquam alium instruere & ornare in ea vita ausus est, quam ipse adhuc non attigerat: nec vmquam cogitarat, praecepta illa sibi utilia aliquando futura? Praeterea, quum orta quaestio esset in senatu de Pontificis max. potestate, diuinitus ne illa stabilita foret, an humanis consilijs regeretur: quumque multum de ea re illic in vtramque partem disputatum esset, domum reuersus, vt quid ipse de eo sentiret, ostenderet: omnique errore ciues suos liberaret, spatio vnus noctis libellum confecit, qui nunc excusus in manibus versatur. Sed, vt isdem etiam in suo proprioque ipsorum munere prodesset: effigiemque eius rei publicae, in qua natus erat, exprimeret, quinque libros confecit de magistratibus, reque publica Venetorum, qui itidem diuulgati sunt. Postquam vero in amplissimorum antistitum collegium cooptatus est, perlectis diligenter synopdis omnibus, quae varijs temporibus oblemendum statum Christianae reip. coactae sunt, in breue quoddam corpus grauissimas quasque ipsarum collegit: seruato temporum ordine: materiaque omni, quam persecutae sunt, demonstrata. Vtile vero mirifice potuit esse volumen illud ei synodo, de qua tunc summis contentionibus agebatur: quamque Paulus III. aduersarijs, reconciliandorum

rum animorum gratia, proponebat: multumque opis ad
ferre illis omnibus, qui in eo certamine versari deberent.
misit autem opus hoc multarum vigiliarum ad eum, cu-
ius maxime intererat, quid de ea re fieret: & qui eo tem-
pore tota mente in illam curam incumberebat. Absolu-
to autem illo, par huic opus; & quod eundem finem ha-
beret, aggressus est: scripsit enim quattuor libros de riti-
bus cerimonijsque nostrę religionis persuasionisq; Chri-
stianę, quę Sacramenta appellant: quibus libris comple-
xus est materiam illam omnem, & quę radix visque ipsa-
rum fuisset, declaravit: quidque demum pie credi, & cu-
stodiri de illis deberet, veris rationibus, argumentisq; sa-
tis firmis comprobavit. nam ipsum, argumento hoc sum-
pto, si, quod pollicitus erat, prestare voluisset, debuisse
omnem questionem, de qua nunc tot tantęque lites &
concertationes inter dissidentes partes reip. existunt, ex-
plicare planum & exploratum est. quare sic quoque pre-
clare instruxit & armavit illos, qui pro veritate commi-
nus congressuri erant cum hominibus magno errore in-
flatis, & causam eam malam obstinate defendentibus.
Ut autem libellum alium, admodum vtilem pravis opi-
nionibus ex animis hominum euellendis, conficeret, oc-
casionem hanc habuit. Factum est, quum ille Bononiam
legati nomine obtineret, ut vir prudens, salutisq; gre-
gis illius, qui fidei ipsius potestatique commissus foret,
ut pastorem bonum decet, valde studiosus, ad eum veni-
rēt, medicinam ab eo petens; rationemque accipere cu-
piens, qua saluum ipsum incolumemq; redderet, quum
graviter agrotare non parvam partem ipsius cognosset:
quam tamen totam rem ille ita tractari volebat, quum
honestam nobilemque ciuitatem regeret, ut ne ignomi-
nia illa notaretur, & tamen remedium cito adhiberet, ne
magis malum serperet. Consilium ipsius quum mirifi-
ce probasset Contarenius, multa animo reuoluens, ut e-
rat summus & accuratus medicus huius pestilentis mor-
bi, statuit demum ita rem esse agendam. Confecit tam-
quam

quam institutionem quandam breuem Christiani homi-
nis: collegitque, quæ magis mordere animum debent,
probra omnia: & ita, vt aperire ipsa oporteat cum do-
lore sacerdoti: illum autem commentariolum *υπομνημα*
appellauit. qui sane non vni illi ciuitati sanandæ factus vi-
deretur, sed Christianis omnibus in officio retinendis, &
ab illa contagione liberandis. eum vero grauis ille vir ad
suos comportauit, diulgatumque studio quodam & ar-
te effecit, vt vulgo reciperetur, cunctique se viæ illi te-
nendæ, legibusque seruandis astringerent: statim enim
probatus fuit omnibus, exceptis paucis illis, qui plane per-
diti ac desperati forent: posteaque & ipse formis excusus
est. Quum autem, vt gesta tunc res est, temporique illi
aptum fuit, nomen & ciuitatis & præfæcti ipsius in sacris
rebus curandis celauerim, illa postea patefacta, quum in
commodi nihil amplius inde nasci possit, deberi puto per-
sonam etiam a me indicari. Moronus enim Mutinensium
episcopus is fuit, qui & ipse non multo post ob singula-
rem prudentiam in rebus gerendis, præclarasque alias a-
nimi dotes, auctus dignitate est a Pontifice maximo: cu-
ius amplissimi sacerdotij insigne Bononiæ manibus suis
legatus capiti ipsius imposuit. Illustrauit etiam scho-
lijs quibusdam suis Contarenus multos obscuros locos in
epistolis Diui Pauli, quum ipsas accurate legeret, quo sa-
ne in studio toto animo occupatus erat, cum mors eum
oppressit. Sed etiam epistolas ipse non paucas conscri-
psit eruditas, & optimorum præceptorum plenas: vt li-
bellos etiam non nullos alios, aliquam occasionem illo-
rum conficiendorum nactus: præcipue autem studijs a-
micorum, varijsque eorum temporibus seruiens. in qui-
bus est quæstio diligenter explicata, perdifficilis sane, ma-
gni que semper momenti habita ad vitam bene beateque
degendam; qua traditur liberam esse potestatem nostrâ,
omnique nexu causarum ac necessitate solutam: veteres
illi *σοφιστικὴν* ipsam vocabant: & qui de fato disle-
runt, re huic contraria, necessario de ipsa disputationem
suscipiunt.

fusciunt. eum vero librum misit ad Victoriam Columnam: feminam lectissimam, & quæ ob eximium amorem erga virum mortuum, admirabilemque ingenij laudem in condendo carmine, maximo quoque honore digna est. Sed etiam, ut sorori suæ, quæ se in castissimum cœtum mulierum Muranarum coniecerat, morem gereret: animumque ipsius suavisimo cibo aleret in ea solitudine, cui se dicauerat, interpretatus est duos Hebræorum illorum cantus Italico nostræ ætatis sermone: cum enim ille doctrina ingenioque suo prodesse quoque alienis studeret; non visus sibi est posse suis vlllo modo deesse.

Quin etiam, eodem honesto desiderio incensus, ut utilitatibus fratrum suorum seruiret, qui crebro, mercaturis faciendis operam dantes, nauigabant, confecit libellum de cœstu maris, & quam causam reciproca illa fluctuum agitatio haberet, diligenter monstravit: qui tamen liber amico ipsius commodatus, magno adhibito studio, recuperari numquam potuit. Sed ne omnia diligenter minutiora ipsius opera, quæ plurima sunt, enumerem: in quibus tamen appareret specimen illius doctrinæ ac iudicij, finem faciam: possum enim vere adfirmare, quodcumque temporis vacuum a negotijs nanciscebatur, in his rebus ipsum consumere solitum: omnesque vigilias suas eum consueisse temporibus amicorum necessariorumque suorum consecrare: neque enim ostentationis & gloriæ causa huiuscemodi scriptiones suscipiebat: in hisque se dies atque noctes macerabat: quamuis iustus inde honos, nec magnopere reprehendendus consequatur: sed, ut dixi, uoluntati amicorum, commodisque indulgens: siue studijs suis memoriæque seruiens, a scribendo numquam cessabat.

PLVRES ORATIONES THVCYDIDIS,

conuersæ ab eodem : nec tamen omnes continentes.
quod suspicari licet factum esse , quia non
nullæ ipsarum , interiectæ inter
has , perierint .

Corcyræorum contio ad Athenienses.



VI subsidium ad eos rogatum Athenienses veniunt , a quibus nullam pro magno aliquo beneficio gratiam , nullumque ex fœdere auxilium deberi sibi intelligunt , id quod nos in præsentia facimus ; ij primum eam rem , maxime quidem vilitati illis esse doceant oportet : si minus , certe non detrimento : deinde memores sese gratosque fore : quarum quidem rerum si nulla plane confirmata est , minime debent irasci , cum eorû nihil , quæ postulauerant , impetrauerunt . Miserût igitur nos Corcyraei , qui ita vos auxilium rogemus , vt hæc firmissima (vt sperant) ad vos adferamus : quamquam accidit , vt vnum idemque nostrum institutum cum vobis nostris cum postulatis minime congruere videri possit , tum vero nobis hoc tempore inutile sit : nam , qui antehac numquam cuiquam nostra voluntate socij fuerimus , nunc id ipsum ab alijs implorare cogimur : vnaque in hoc Corinthiorum bello propter id ipsum deserti ab auxilio sumus , deque eo , quod antea nobis prudentiæ ascribebatur , cum minime cogemur alieno arbitrio , cum alterum auxilio iuuaremus , ipsi periclitari in bello , id modo nobis reliquum est , vt inconsulti homines , imbecillique animi iudicemur . Tametsi profligauimus nos quidem proxima nauali pugna ipsi per nos Corinthios : verumtamen , quoniam maioribus comparatis ex Peloponneso , reliquaue ex Græcia copijs bellum

bellum nobis inferre parant, neque domesticis nos opibus illorum impetum vlllo modo sustinere posse confidimus, summumque nostrum periculum agitur, si forte sub horum imperium redigamur, opem cum a vobis, tum a ceteris omnibus cogimur implorare: est autem æquum ignosci nobis, si non malitia, sed opinionis errore, ea audemus, quæ priori otio nostro sunt repugnantia. Quod si ea, quæ uolumus, a uobis impetrabimus, nempe casus hic nostræ necessitatis, multis uobis nominibus decori erit: primum quod non incommoda alijs ferentes, sed iniuriâ accipientes ope vestra tuebimini: deinde quod maxime necessario nostro tēpore amplexi nos, testatum beneficium vestrum clarissima memoria, maximeq; sempiterna collocabit: tum valemus nos classe post quidem vos plurimum. Ac spectate quam magnam vobis fors occasionem ostendat, quam hostibus vestris acerbam: etenim eæ copiæ, quas vobis esse adiunctas magnæ pecuniæ, magnæque gratiæ anteponeretis, sine periculo, sineque sumptu, non modo vltro sese vobis offerunt, sed adferunt præterea in vulgus quidem gloriam, a nobis autem quibus subuenitis, gratiam, vobis vero ipsis potentiam: quæ quidem per paucis vniquam vna omnia obtigerunt, paucique ita opem ab alijs imploratum veniunt, vt non minorem illis, vnde auxilium sibi postulant, vacuitatem periculorum atq; ornamentum apportent, quam ipsi inde ablati sint. Bellum autem, in quo nostra extare poterit utilitas, si qui vestrū sunt, qui nullum fore arbitrētur, ij errant longe: neq; sentiunt Lacedæmonios metu vestri bellum iam animo conceptum habere: Corinthios autem cum vobis esse inimicos, tum apud eos plurimum posse: atque eo nunc operam dare, vt antea vos occupent, & cum suo hoc in nos conatu implicent, ne propter commune odium contra se nobiscum conspiretis, neq; eos alterutrum frustretur, quin aut nobis damnum, aut sibi firmitudinē comparent. Vestrum est igitur recipiendis in amicitiam Corcyraeis, cupientibus quidem eos preuenire, præoccu-

pareque ipsorum insidias, potiusquam contra aliquid insidiarum moliri. Quod si contendent, non esse rectum suos a vobis colonos recipi, illud docendi sunt: colonias, quamdiu illis benigne sit a veteri ciuitate, tamdiu illam colere solere: vbi autem iniuria inferatur, alienari ab ea: non enim ut seruitutem perpetiantur deductæ sunt, sed ut iuris æquabilitatem cum ijs, qui domi remanent retineant. Iniuriam autem hos facere, id vero manifestum est: cum enim in iudicium de Epidamno vocarentur, armis maluerunt quam iure experiri. sitque adeo vobis pro disciplina id, quod in nos propinquos cognatosque suos patrarunt, ne vos infraudem deduci patiamini, neue, quod vos rogarint, temere faciatis. quem enim gratum hostibus fecisse maxime raro pæniterit, is quam diutissime tutus erit. Nec vero nobis recipiendis frangitis fœdus, quod cum Lacedæmonijs iktum est: cauetur enim quæ Græciæ ciuitates fœderi adscriptæ non essent, eas utri commodum sit licere sibi socias adiungere. Estque omnino illud haud quaquam ferendum, si his quidem licet naues ex fœderatis complere, prætereaque reliqua ex Græcia, nihiloque secius ex his, qui sub vestro imperio sunt: vobis autem cum hoc ipso auxilio, tum reliqua omni ope interdicent: ponentque in iniuria, si, quæ vos rogamus, ea auferemus a vobis. At vero nos longe sane plura habemus, in quibus vos, nisi exorari vos finetis, accusemus: nam nos quidem, quibus periculum intenditur, neque vobis sumus inimici, repellitis: hos vero, qui & hostes sunt vobis, & nos oppugnatum veniunt, tantum abest ut prohibeatis, vt etiam e finibus vestris conductas copias habere eos patiamini: id quod minime æquum est fieri a vobis: sed aut interdicere debetis ijs, qui vestræ ditionis mercede apud aliquos militant, ne apud hos mereant, aut nos quoque omnino quidem, vt videbitur, iuuare: maxime vero vt aperte in amicitiam receptos, tueamini. Ostenditur igitur, quod initio proposueram, multis de causis hanc rem vobis vtilitati esse, præcipueque quod eosdem habemus

mus inimicos, quod manifestissimum est argumentum :
eosque haudquaquam infirmos, sed qui nocere ijs, qui
a se defecerint, valeant. Nauali vero & non terrestri au-
xilium oblato, non idem habet incommodi ipsum repudia-
re. Itaque prohibendi vobis omnes sunt, si quidem pos-
sit, classes habere: sin minus, firmissimi quique amici
vobis adiungendi. Siquis vero ex usu vestro ea, quæ a no-
bis dicuntur, esse existimat: metuit autem, ne, si hæc secu-
ti eritis, sædus rumpatur, is tenere debet, suum hunc me-
tum, adiunctis viribus, pauciori hostibus fore: quod autem
illis animum auget, qui nos sententia sua non recipiunt,
minime firmum cum sit, apud validos hostes fore a metu
vacuum. Nec vero existimate de Corcyra magis nunc
consuli, quam de ipsis Athenis: quibus quidem haud re-
cte sane prospiciunt, qui præsentia modo intuentes, ad id
bellum, quod impendet, quodque adeo prope iam iam-
que adest, ciuitatem sibi adiungere dubitant, quæ concili-
ata alienatave magnas in vtramque partem habitura sit
opportunitates: est enim posita in eo cursu, qui est ex I-
talia atque ex Sicilia: ut cum inde ad Peloponnesios ire
classem, tum illinc eo transmittere, facile prohibere pos-
sit, tum summa eadem ad alia omnia est opportunitate.
Atque, ut perbreui comprehendam, vosque cum vniuer-
sos, tum vero singulos doceam, minime vobis commit-
tendum esse, ut nos destituatis. Tres omnino Græcis sunt
classes non contemnendæ: ea quæ apud vos est, nostra-
que, atque hæc Corinthiorum. quarum si vnam deser-
tis, necesse est duas in vnum coire: atque ita, ubi nos pri-
us Corinthij oppresserint, cum Corcyreis simul Pelopon-
nesijsque classe decertabitis: quod si nos rece-
peritis, nostras naues, quibuscum bel-
lum aduersus eos geratis,

ad vestras adiun-

getis.

Corinthiorum



VONIAM Corcyraei hi non modo de sese recipiendis, sed de nostra etiam iniuria, deque eo, quod oppugnari se a nobis rectum esse negent, differuerunt, nos quoque necesse est utraque de re pauca prius memorare, quam ad reliquam orationem accedamus: sic enim & de nostris postulatis certius, quod constituatis, habebitis: & quod hi vos rogant, non sine causa respuetis. Aiunt igitur sua factum esse temperantia, quod neminem antehac sibi socium adiunxerint: illi vero non virtute, sed malitia id instituerunt, quod facinorum suorum nec socios, nec vero testes habere, nec adeo, eos cum inuitarent, erubescere volebant. Tum ciuitas ipsa opportuno loco posita, cum proficisci ipsi nauibus minimum cogantur, & alios necessitate ad se appulso, quam plurimos excipiant, eos iniuriarum disceptatores constituit, quas ipsi alijs inferunt grauiores omnino, quam ut vilius fœderis pactio pati possit: atque in hac pulchra a fœderibus solutione, in qua se iactant, non illud spectatum est, ne in alienæ societatem iniuriæ traherentur, sed illud, ipsi ut per se iniuriam facerent: atque, ubi plus viribus valerent, vim inferrent: ubi clam essent, fraudarent: ubi quid adripuissent, nulla esset verecundia. Etenim viri boni si essent, quemadmodum dicunt, quominus sonites fuissent, eo illustrius suam virtutem, cum æquo parique iure viuerent, ostendere potuissent. Sed nec in alium quemquam, nec in nos tales extiterunt: cumque nostri sint coloni, semper a nobis dissiderunt: nunc bellum etiam faciunt. Dicunt autem non se ad iniuriam patientiam deductos esse: verum nos quoque negamus propterea a nobis eos in coloniam missos esse, ut contumelia ab illis adficeremur, sed ut principatum teneremus, & quod ad decet, ab illis coleremur. Reliquæ itaque coloniæ magnopere

gnopere nos obseruant, diligimurque a colonis plurimum: perspicuum est, si maiori ipsorum parti placemus, his solis recte nos meritoque displicere non posse: nec, contra quam decet, bello persecuturos ipsos fuisse, nisi in signi aliqua accepta contumelia: & tamen siquid aliquando a nobis peccatum esset, dolori nostro concedi id ab illis equum erat: nos autem horum moderationi vim afferre turpe putare. Verum contumelia & diuitiarum affluentia elati, cum alia multa in nos deliquerunt, tum Epidamnium, oppidum nostrum, quoad intestinis malis vexatum est, non vendicarunt; ubi vero nos subsidio venimus, ui captum occuparunt. At petiisse dicunt, uti hac de causa iure antea inter nos disceptaretur: qua quidem in re animaduertendum est, non qui iustitiam prætexat, quiq; ubi in tuto sit, tum demum in ius eat, eum aliquid dicere: sed qui, priusquam in certamen uenerit, factis pariter atque oratione æquitatem retinuerit. Nam hi qui dem non ante oppidum a se oppugnatum, sed ubi eam rem minime a nobis negligi intellexerunt, iustitiæ tandem splendorem obiecerunt: atque huc ueniunt, nec satis habent, quæ ipsi ea in re peccarunt, nisi uos quoque non belli, sed maleficij socios habere postulent, atque a nobis dissentientes secum consentire iubeant: illi uero tum adire uos debuerunt, cum procul aberant a periculo: neque id tempus expectare, cum & nos iniuriam accepimus, & ipsi in discrimen uenerunt, cumque uos, qui minime illorum potentiæ participes fuistis, nunc illis auxilium impertiamini, qui que ab illorum facinoribus multum afueritis, eque atq; ipsi a nobis accusentur: sed communicata pridem potentia, quæ deinde consecuta essent, ea quoque communia habere, nec tam inique inuidiam modo suorum uobiscum facinorum partiri. Docuimus igitur, cur & nos iustitia confisi huc uenimus, & ij uolenti iniusti que sint: nunc, cur eos a uobis recipi ius esse negemus, attendite. Quamquam enim fœdere cauetur, quæ ciuitates adscriptæ non sint, ijs licere cum alterutro

fese

se se coniungere : tamen haud ijs ea coniunctio permiffa est, qui alteri iniuriam faciant, fed ijs, qui, cum nemini se se subtrahant, praefidio egeant : quique ijs, a quibus recepti fint, si prudentes fuerint, pro pace bellum conflaturi non fint. id quod vobis, nisi audire nos voletis, vfu veni re neceffe est : non enim his tantum adiutores, fed etiam nobis pro faederatis hostes efficiemini : etenim si cum ijs vos coniugatis, minime felectis vobis cum ijs pugnare neceffe habebimus. Est igitur æquum maxime quidem v-trosque vt reijciatis : fin minus, contra atque illi postularunt, nobiscum vt contra eos conspiretis : cum Corinthijs enim fædus iecistis, cum Corcyraïs autem ne inducias quidem vmquam vllas pepigistis. Nec vero hunc morem institute eorum, qui ab alijs defecerunt, recipiendorum : quando ne nos quidem, cum a vobis Samij defecissent, deq; illis tuendis reliquorum Peloponnesiorum in contrarias partes sententiæ distraherentur, contra vos suffragium tulimus : aperteque restitimus, cum contenderemus quemque ad se pertinentes socios punire ius esse. Quod si, qui aliqua in re deliquerunt, eos ad vos receptos tuebimini, profecto extabunt de vestris haud pauciores, qui ad opem nostram confugiant. Quare contra vos magis eam rem, quam contra nos inducetis in morem. Ac iustas quidem postulandi causas, firmasq; Græcorum legibus has habuimus. quibus autem vos admo-neamus ac rogemus, vt eam nobis gratiam, quam debetis, referatis, hæc habemus : quam quidem nos, qui neq; hostes vobis sumus, vt damno : nec rursus amici, vt molestiæ vobis futuri fimus, nunc repetimus. Etenim cum longarum nauium quondam egeretis, ad Aeginetarum bellum id, quod supra Medorum res gestum est, naues a Corinthijs xx. numero accepistis : atq; hoc nostro beneficio : itemque illo de Samijs, cum perfecimus nos, quominus illos Peloponnesij armis defenderent, consecuti estis, Aeginetas vt superaretis, & Samios vlcisceremini : idque ipsum eo potissimum tempore accidit, cum homi-
nes

nes in hostem elati, omnia præ vna victoria contemnunt, cum & eos, qui præsto sint, tametsi antea hostes erant, tamen amicos putant: quique obstant, etiam si forte amici sunt, pro hostibus habent; quin proprias etiam res propter præsentis contentionis studium facere deteriores solent. Hæc vos animo repetere, hæc iuniores de maioribus natu discere debetis, atque ita statuere, paribus nos beneficijs remunerari vos equum esse; nec vero sic existimare; rectum quidem hoc esse, sed vtile fore bellum: ubi enim minimum turpitudinis, ibi utilitatis est plurimum. Tum autem bellum quidem, quod cum futurum Corcyrei dicerent, eius uos metu territantes iniuriam facere iubebant, incertum est: nec eo decet suspensos uos certas iam, præsentisque cum Corinthijs inimicitias suscipere; potiusque uestre erit moderationis, siquid antea suspitionis propter Megarenses susceperatis, id nunc obliterrere: posterius enim beneficium, tametsi leuius est, tempore quidem illatum, uel ad grauiores delendas iniurias satis uirium habet. Nec uero quod maritimas pollicentur copias, mouere id uos debet: firmiore enim potentia muniti sunt, qui ab æqualium iniurijs sibi temperant, quam qui quod adest tantum, quodque præsens est cogitantes, cum periculo augentur & crescunt. Et quoniam in id ipsum incidimus, in quo illud apud Lacedæmonios usurpatum est a uobis, suum quemque socium punire ius esse, nunc idem a uobis responsum expetimus: qui nostro cum suffragio beneficium cōsecuti fueritis, uestra sententia detrimentum inferre nobis non debetis. Par igitur pari referte: atque illud cogitate, hoc uobis tempus datum esse, in quo & qui adsint, amici in primis iudicentur: & qui obsint, hostes; ac Corcyræos hosce neque in societatem repugnantibus nobis recipite, nec iniuriam facientes adiuuate. Atque hæc si ita feceritis, cum officio fungemini, tum optime uobis ipsis consulētis.

X

*Antea qm pnta hec
sed potius paulatim, qm
pnta*

*Nonum aliquando beneficium
ut uetere iniuria delat.*

*Non est parum uti hys con-
silijs, ut non quidam copiant
in uerbo atq; id bene scribit
qul comparat. Sed n. supra
notu auctum iero cum
culo auctur et crescit. Et
Lept. Beneta Repa*

*non uenerat nel mis xpo de morie.
la. Ha fortuna
nel in alio fons
Deba Medesione una falken
gar. imus
videtur. Tacitus.*

*pa bellis populi offit gentes
nupte bellentes ab uis
principis domum de non
Euipus officio fugit
optine sibi conulit*

Corinthiorum contio ad Lacedaemonios.



Vobis uos fidentiores reddit Lacedaemo-
 nij de uestris publicis priuatissq; institu-
 tis, facit, ut minorem fidem habeatis a-
 lijs, siquid dixerimus: atque ex hoc mo-
 destiam vos quidem conseruatis, sed
 iidem in maiore externarum rerum i-
 gnoratione versamini. Nam cum saepenumero, quae no-
 bis ab Atheniēsis damna impenderent, predicaremus;
 non ut vnumquodque dictum est a nobis, sic vos perce-
 pistis, sed ita arbitrati estis, suarum quemque potius pri-
 uatim inimicitiarum causa ad dicendum accedere: eoque
 non antea quam illa euenirent, sed cum geruntur iam,
 hosce conuocatis socios, in quorum conuentu ut loqua-
 mur, magnopere scilicet ad nos pertinet: quoniam & ab
 Atheniensib. contumelia adfecti, & a vobis neglecti, pluri-
 ma de quibus queramur, habemus. Ac siquidem illi oc-
 culte iniuriam Graeciae inferrent, planum id nobis esset fa-
 ciendum, utpote cum eius rei vos essetis ignari: nunc au-
 tem quid opus est longa ijs oratione, quorum alios in ser-
 uitutem adductos, alijs insidias, in quibus nostri in primis
 socij, factas videtis? quae illi ad bellum, siquod forte geren-
 dum fuerit, iamdudum praeparata habent. Quorsum
 enim pertinuit, Corcyram repugnantibus vobis occu-
pare? aut Potideam obsidere? quorum alterum est op-
pidum maximo ad res Thraciae usui, alterum perma-
gnum scilicet nauium numerum Peloponneso suppedita-
bat. Atque haec culpa euenerunt vestra, qui post Me-
 dorum res primum munire eos urbem passi sitis, deinde
 longos muros constituere: atque adeo hoc quoque tem-
 pore non modo ijs, quos illi in seruitutem adduxerunt,
 sed vestris etiam socijs libertatem vos adimitis. siquidem
 non is, qui seruitute opprimit, sed qui, prohibere cum
 possit, aspernatur, is verius id agit; praesertim cum sibi vin-
 dicandae

Maximas enim et sententias
 sibi est. et sapientia quae proxi-
 mum principum arbitrio
 & recte praesere pariter

sapientia cuiusque regis & recte
 credere
 sal. de se. iuge
 me. dis.

Liber non is modo, qui liberis
 seruitutem parat, sed is qui
 prohibent una possit, vult
 reprehendere. Et ac deestatis
 maxime si liberis, & ijs
 nomen ac libertas sibi quibus
 praesentat conuenit.
 ad potestatem suam. ut perueniat
 deus. Liber in Hypocritis

dicandæ in libertatem Græciæ laudem asciscat. Vix igitur nunc tandem convenimus: ac ne nunc quidem certa de re: neque enim amplius, fiat nobis iniuria nec ne, sed quo maxime modo eam repellamus, quærendum erat. Nam hi quidem deliberata re, molientes iam abiecta cunctatione incertos animi inuadunt: tenemus enim quam Athenienses via, atque ut pedetemptim alios aggre-
diantur. Ac quamdiu quidem latere se vos, propter vestram tarditatem, arbitrati fuerint, minus confident: ubi vero animaduernerint intelligere quidem vos quægerantur, sed ea negligere, tum vero acriter incumbent. soli enim vos ex omnibus Græcis Lacedæmonij cunctamini, neque vi cuiquam, sed procrastinando resistitis: soli que non crescentes statim hostium opes, sed posteaquam duplicatæ sunt, tum demum eas tollitis. At enim cauti dicti estis. In eo igitur oratio plusquam res valuit. etenim & Medum ex ultimis orbis terræ finibus, antea in Peloponnesum inuectum scimus, quam vos satis ad occurrendum parati essetis: & iidem nunc Athenienses, qui haud quaquam tam longe quam ille, sed admodum prope absunt, negligitis: defendereque bellum quam ipsi inferre mauultis, fortunæq; cum longe validioribus, quam vos estis, certantes vos permittere: propterea quod & Barbaros ipsos quamplurima fefellisse tenetis, & ipsos vos Atheniensibus magis ijs rebus, in quibus ab illis offensum est, quam vestro subsidio restitisse. Nam spes quidem vestra quosdam iam, qui vobis credentes, eo imparati erant, perdidit. Nec vero existimare vos velim, odij potius, quam obiurgationis causa hæc a nobis commemorari: obiurgatio enim errantium est amicorum: accusatio autem iniuriam facientium inimicorum; tum nos; si quisquam est alius, idoneos esse profiteamur, qui alterum reprehendamus: præsertim cum multum inter vos, atque illos inter sit: id quod minime vos sentire nobis videmini, minimeque ratiocinati esse, quales Athenienses sunt, quibuscum futura vobis res est, quamque multum,


X 2 atque

*ne minuitur bonis, neque
difficultate.*

*In istis bene dixerunt
non laudantur, sed
nos*

atque adeo quam prorsus vobis antecellant : illi enim & ad nouandum prompti, & ad excogitandum acuti, & ad ea perficienda, quæ mente præceperint celeres sunt. vos contra quæ habetis conseruatis, nihil excogitatis, vixque necessaria quæ sunt, obitis. Illi rursus, & supra vires audent, & supra consilium experiuntur, & in rebus aduersis bona spe sunt : vestræ autem consuetudinis est, minus etiam, quam vires, quamque consilium vestrum ferat, suscipere, neque firmis rebus confidere, & aduersis leuatum iri vos desperare. Præterea illi strenui, vos tardi : illi multum peregrinantur, vos domi maxime manetis. sic enim illi existimant, sua profectioe aliquid sibi quæsitum iri : vos vero in eis quoque, quæ prompta iam parataque habetis, si ad alia aggressi fueritis, detrimenti aliquid accepturos vos putatis : iidem superatis hostibus plurimum progrediuntur, ac minimum, ipsi victi si sint, recedunt. Præterea corporibus quidem, tamquam maxime alienis : mentibus autem, ut proprijs, ubi patriæ profuturi sint, utuntur : atque ea, quæ animo perceperint, cum re non adsequuntur, suis se priuari rebus arbitrantur : quod siquid inuaserint, eoque potiti sint, parui id præ ijs, quæ effecturi sint, pendunt : si autem conata minime perfecterunt, alia rursus sperando id damnum sarciant : soli enim ea, quæ concupierunt, vno eodemque tempore sperant ac tenent : propterea quod quæ in animum ut facerent induxerunt, confestim aggrediuntur, ijsque in rebus omnem ætatem cum industria ac labore exigunt : & quoniam continenter in quærendo sunt occupati, partem quam minimum fruuntur, nec uero aliud esse, diem festum agere, putant, quam quæ agenda sunt, administrare : delidiosum autem otium æque in molestijs numerant, atque operosum negotium. Quo circa recte aliquis sic breui comprehendens dixerit, tales eos extitisse natura, ut neque ipsi quiescere possent, nec alios paterentur. Atque hac uobis tali constituta aduersaria ciuitate Lacedæmonij tamen cunctamini : atque ita statuitis, non
ijs

ijs mortalibus otium quam maxime esse diuturnum, qui
 re sane ac factis iustitiam colant: animi tamē eius esse intel
 ligantur, vt, si quis iniuria prouocauerit, minime id latu-
 rint: sed eo æquitatem metimini, vt neque alijs graues
 vos sitis, & dum iniuriam acceptā vlscimini, ne aliquid
 incommodi ipsi capiat: id quod vix adsequeremini, si
 vobis vestræ similis ciuitas finitima accidisset. Nunc ve-
 ro, id quod antea ostendimus, nimium antiquis institutis
 cum ijs agitis. Necessario enim, vt in artibus, quę nouis-
 sime gignuntur, ea excellunt. Ac quietæ quidem ciui-
 tati optimum est institutis stabilibus uti: qui vero multis
 occurrere coguntur, ij multa noua excogitent necesse
 est: eoque Atheniensium res propter varios illorum co-
 natus magis, quam vestræ renouatæ sunt. Verum sit in
 hunc vsque diem vestra cunctatio definita, ferteque cum
 alijs, tum vero Potidæatis auxilium ita, vt polliciti estis:
 atque in Atticam confestim impetum facite, ne homines
 amicos, cognatosque vestros inimicissimis prodatis: reli-
 quosque nos ad aliam aliquam amicitiam per desperatio-
 nem detrudatis: nec enim ea in re quicquam aut in deos,
 fœderis testes, aut in homines, qui audituri hæc sunt, pecca-
 bimus: rumpunt enim fœdus, non qui destituti ad alios
 sese conferunt, sed qui, quibus auxilio sese futuros iureiu-
 rando sanxerunt, eos destituunt. Quod si promptos præ-
 bere vos voletis, permanebimus: nec enim sine scelere ve-
 stram commutare amicitiam possumus, aut quemquam
 inuenire, quo cum æque ac vobiscum consueueri-
 mus. Hæc prudenter statuite: dateque ope-
 ram ne Peloponnesum, cuius principa-
 tum obtinetis, minus amplam,
 quam a maioribus acce-
 pistis, habea-
 tis.



Atheniensium contio ad Lacedæmonios.

Nob eam causam Lacedæmonij legati
 nos quidem sumus, vt, socios vestros cō
 tra diceremus, sed vt de quibus nos ciui
 tas misit, ea ageremus. Verumtamen
 cum haud paruam nos increpantium
 vociferationem audierimus, adsumus:
 minime nos quidem, vt ciuitatum criminationibus re
 spondeamus, quando neque nostra, nec vero illorum ad
 iudices tamen oratio haberetur: sed ne vos tantis de re
 bus facile socijs adfensi, minus prudens consilium capere
 tis: & simul ad omnem istam orationem, quæ habita est
 in nos, dicere volumus; docereque nos non immerito,
 quæ possidemus, tenere, & nostram non indignam esse
 ciuitatem, quæ aliquo in numero habeatur. Ac valde
 quidem prisca commemorare nihil attinet, quorum au
 ditionem magis, quam aspectum eorum, qui audituri
 sunt, testem habeamus. Medicas autem res, atq; ea, quo
 rum conscij vos estis, vsurpare, quamquam molesta est ea
 rum rerum assidua prædicatio, tamen necesse est. etenim
 si ea, quæ tunc cum periculo gessimus, vtilitatem habue
 runt, atque eius vos re participes fuistis, iniquum est nos
 verborum fructu, si quis est, vsque quaque priuari; nec
 vero deprecandi potius quicquam, quam testificandi o
 stendendiq; causa, qua cum ciuitate certamen vobis con
 stitutum sit, nisi prouideritis, verba faciemus. Itaque &
 ad Marathonem cum Barbaro nos manum per nos conse
 ruisse dicimus, & ille cum post rediisset, neque eius im
 petum vllō modo terra possemus sustinere, vniuersa ciui
 tate in naues imposita classe ad Salaminam vna cum cete
 ris decertasse: quæ quidem res eum cohibuit quominus,
 ad vnāquamque singulatim ciuitatem classe adpulsā,
 Peloponnesum vastaret, cum illæ contra tantum nauium
 numerum opem inter se mutuo ferre non possent: cuius
 quidem rei eius ipsius factum maximo est argumento: na
 uali

uali enim pugna victus, ut qui non iam easdem haberet copias, confestim cum maxima exercitus parte domum reuersus est. Quæ cum ita ceciderint, aperteque intellectum sit, in nauibus fortunas Græciæ consutisse, tria nos ad eam rem maxime vtilia subministrauimus, nauium maximum numerum, ducemq, hominem prudentissimum, atque animi eximiam quandam alacritatem. Ac nauium quidem quadringentarum numero duas tertias partes, aut paulo eo pauciores, ducem vero Themistoclem, cuius in primis opera perfectum est, uti nauibus in freto cōfligeretur: quæ res sine vlla dubitatione rem Græciæ publicam conseruauit. Itaque eam ob causam maxime ille homo peregrinus omnium, qui ad vos vnumquam accesserint, in honore apud vos fuit: animū vero summe promptum, summeque fortem præ nobis tulimus, qui cum pē destribus copijs subsidio nobis venisset nemo, cumque reliqui ad nos vsque iam in hostium essent potestatem redacti, statuimus vrbe relicta, corruptisque rebus nostris, communem tamen sociorum, qui reliqui erant, salutem non deferere, neque committere, ut dissipati inutiles illis essemus, sed nauibus conscensis fortunam experiri: nec vero suscensere, quod nos antea non defenderatis. Itaque illud adfirmare possumus, non maius nos a vobis beneficium accepisse, quam dederimus: vos enim incolumibus etiam tunc oppidis vestris, atque vte incolere in posterum vobis liceret, cum de vobis iam solliciti maximam partem non de nobis essetis, nobis succurristis. Itaque quamdiu nos incolumes fuimus, subsidio non venistis: nos autem ea vrbe, quæ iam nulla erat, nos cōmouimus: proque eo, quod tenui iam spe tenebatur, decertantes, vos pro nostra quidem parte, nosque ipsos saluos conseruauimus. Quod si aut initio ne agri vastarentur metuentes, Medo, id quod alij fecerunt, nos dedissemus, aut postea naues conscendere, utpote amissis iam omnibus bonis, ausi non essemus, nihil profecto erat, cur uos cum haud quaquam satis magnam pro hostium classe nauium facultat-

facultatem haberetis, proelio uelletis contendere, omnia
que illi sine ullo labore ex sententia successissent. Num
igitur Lacedæmonij cum propter summam, quæ in no-
bis eo tempore fuit, animi alacritatem, tum propter existi-
mandi prudentiam, propterque imperium hoc, quod
obtinemus, digni uidemur, qui non tanta inuidia apud
Græcos simus? Nec enim id ipsum imperium per vim oc-
cupauimus; sed cum uos, quod reliquum esset cum Bar-
baris belli persequi recusaretis, socij se ad nos contulerunt,
& ut ipsorum duces in bello essemus, rogauerunt, quod
nos ad hanc usque diem re ipsa primum coacti produxi-
mus, maxime quidem timore commoti, deinde dignita-
te, postremo etiam utilitate: nec enim tutum iam uisum
est, multorum odijs in nos excitatis; nonnullis etiam, qui
defecissent a nobis, euerfis, cum uos nō eque atque antea
amicos, sed suspectos atque infensos haberemus, deposito
imperio in periculum nos committere; præsertim cum,
ij, qui a nobis desciscerent, uobis sese adiungerent. Nec
uero accusandi sunt, qui in maximis periculis utilitati cō-
sulunt. Vos itaque Lacedæmonij sic Peloponnesi ciuita-
tibus præestis, ut uestrum in ea re commodum proposi-
tum habeatis. Quod si imperio eo tempore in perpetuum,
id quod nos fecimus, retinendo, odia in uos concita-
tissetis, exploratum habemus, cum socijs nō secus, ac nos
sumus, molesti essetis, coactum uos iri aut fortiter illis im-
perare, aut ipsi periculum subire. Quare nihil nos mi-
randum, nihil a cōmuni hominum consuetudine abhor-
rens, fecimus, quod & delatum nobis imperium recepi-
mus, neque nunc gloria, metu, utilitate, maximis qui-
dem rebus, inducti illud deponimus. Nec uero id adeo
nunc primum ortum est a nobis, sed ita semper compara-
tum fuit, ut potentior imbecillio rem coërceat. Tum ue-
ro digni eo nobis uidemur esse, ne uobis quidem secus iu-
dicantibus, quoad utilitatis quidem rationem haberi pla-
cuit. nunc autem ad honestatem abitis, qua proposita ne-
mo tamen umquam, cui uiribus aliquid consequi liceret,
ab eo

ab eo commodò obtinendo remotus est. Satis vero magnam laudem ijs merentur, qui cum, hominum secuti naturam, alijs dominantur, pro potentia non iniqui sunt. Itaque si qui ea, quæ nos obtinemus, acceperint, illos perfecturos putamus, ut qua nos sumus æquitate appareat: nam nobis quidem vituperatio, potiusquàm laus nostram ob æquitatem comparata est. Quod enim in rerum contractarum controuersijs cum socijs nostri iuris iacturam facimus: quodq; illi apud nos eisdem legibus iudicio nobiscum contendunt, litigiosi habemur: nec cuiquam in mentem venit cogitare, quid sit, cur ceteris, qui alibi gentium rerum potiuntur, minusque æqui, quam nos, sunt ijs, quos in ditione tenent, vitio id non detur: nam ubi vim adhibere licet, litigare nihil attinet. At hi aduersionem æquo parique iure nobiscum viuere, si paulum modo de eo, quod ipsi æquum esse opinantur, aut propter nostrum iudicium, aut propter eam, quæ imperio committatur, potentiam, aut quoquomodo, imminutum fuerit, non propterea, quod maxima illis pars remissa est, gratiam habent, sed aliquid ademptum esse ægrius ferunt, quam si a principio, repudiatis legibus, aperte iniuriam facere instituissemus. Namq; illud ne ipsi quidem sic disputarunt, inopem potenti non decere succumbere, sed nescio quo pacto circumueniri iudicio se, quam vi cogi, iracundius homines ferunt: in altero enim par pari iniuriam infert: in altero qui plus potest imbecilliori vim adfert. Itaque cum a Medis multo tractarentur asperius, sustinuerunt: nostrum autem imperium acerbum videri nihil mirum: semper enim id, quod instat præsensque est, ijs, qui sub alterius ditione sunt, graue est. Quod si sublatis nobis ad vos summa imperij redeat, nã vos bene uolentiam, quam propter nostri metum collectam habetis, si quidem eam mentem, qua fuistis, cum contra Medos imperium breui tempore obtinuistis, conseruatis, celeriter effundetis. Vos enim nec admisceri se alios vestris inter vos legibus permittitis, & qui aliquo exitis, neq; ijs

Y

ipsis

ipsis vtimini, neq; ijs, quibus reliqua Græcia viuere consuevit. Quamobrem etiam atque etiam deliberate: nec enim parua res agitur, neq; aliorum adducti voluntate ac querela proprium vobismet ipsis laborem imponite: atque in bello, quam multa improuisa accidunt, priusquam id susceperitis, prospicite: vbi enim longius ductum est, in graues & acerbos casus definere consuevit: a quibus æque vtrique absumus, atque vtram in partem euasurum sit, incertum periculosumque est. At homines mouendis bellis præpostere faciunt: rem enim precipiunt, quod erat posterum: vbi vero iam plectuntur, tum demum ad orationem redeunt. Nos igitur, qui nullo dum tali in errore neque ipsi sumus, neque versari vos videmus, edicimus vobis, vt dum integrum est, dum recta capere vtrisque consilia licet, ne sedus rumpatis, ne iusiurandum violetis: de controuersijs autem iure excedere disceptetis. Si minus, deos periurij vindices testati, qua vos præeuntes nos deducetis, ea vos belli auctores propulsabimus.

Contio Pericls.



IN pristina ego mea sententia maneo Athenienses, Peloponnesijs cedendum non esse: quamquam intelligo non eadem alacritate homines bellum cum suadetur, suscipere, & cum vsus venit, gerere solere: sed aduersis in rebus animo immutari consueuisse. Hoc igitur quoque tempore faciendum mihi esse video, vt nõ dissimilis fere sim auctor consilij. Quamobrem, qui mihi assensi fueritis, cõmuni sententię, si quid forte secus ceciderit, vt opem ferre memineritis, æquum erit: aut ne si ex sententia quidem successerit, vllam vobis prudentiæ partem vindicetis. Fieri enim potest, vt aduersi rerum casus temeritatem ipsi in se habeant, non minus, quam hominum cogitatio-

tationes: eamque adeo ob causam, vbi quicquid contra ac ratio postulet, euenit, fortunam accusare solemus. Lacedæmonij igitur cum iam antea inimico sese in nos animo esse præseferabant, tum vel maxime id hoc tempore aperte ferunt: cum enim in fædere sit; si quid controuersioria, uti de ea re iure inter nos disceptemus: ab utroque autem, quod vterque habeat, teneatur, numquam nec ex iure agere nobiscum, cum iudicium ipsi accipere voluerunt. Bello scilicet malunt, quam oratione de controuersijs disceptare: nec iam huc expostulatum, sed imperatum, veniunt: iubent enim discedere nos a Potidæa, et Aeginæ leges suas iuraque reddere: tum plebiscitum, quod de Megarensibus factum est, rescindere: Græciam etiam suis ut legibus uti permittamus, qui ad nos nouissimi venerunt, edicunt nobis. Nec vero, quod ad Megarensium plebiscitum adtinet: id enim illi obijciunt in primis, quo etiam sublato bellum futurum negant, existimare vos velim, paruum ob causam bellum vos habituros, si de eo delendo recusaueritis, neque arbitrari culpam in vobis residere, quod leui de causa ad arma ieritis: nam parua hac in re vestrum omne firmamentum agitur: quo enim animo sitis temptamini, atque in hoc si parueritis, perinde quasi metu adducti in eo quoque dicto audientes futuri sitis, continuo maius aliud aliquid imperabitur: quod si contra enitemini, efficietis profecto, ut illi faciendum sibi esse intelligant, ut se se nobis æquiores posthac præbeant. Protinus igitur considerate, vtrum obedire nullo dum dāno facto malitis, an, id quod mihi utilius videtur, parua æque & magna de causa bellum suscipere, neque vlla in re succumbere, atque earum, quas habetis, rerum possessionem sine ullo metu in posterum retinere. Etenim cum pares, ante factum ea de re iudicium, paribus satisfactionem imperant, siue ea de magnis, siue de paruis sit controuersijs, eadem est libertatis imminutio. Quod autem ad bellum atque ad vtriusque;

Y 2 no-


nostrum facultates adtinet, nihilo nos inferiores futuros esse de me, dum singula persequor, cognoscite. Sua Peloponnesij manu agros colunt & officinas exercent: pecuniam nec priuatam, nec in ærario habēt. Diuturni præterea belli, atque etiam transmarini rudes insolentesque sunt, ut pote bellis inter se ob paupertatem leuibus contendere adfueti: qui vero huiusmodi sunt, neque naues complere, neque terrestres exercitus sæpius summittere possunt, præsertim cum a priuatis suis rebus absint, & de suo impendant, & mare præterea clausum habeant.

Huc accedit, quod bella prompta magis parataque pecunia; quam vectigalis extortaque vi sustinet: at homines agricolæ, atque opifices promptiores ad bellandum corporibus sunt, quam pecunia: illa enim ex periculis salua exitura sperant: hanc antea consumptum iri metuunt: præsertim cum id, quod usu euenturum verisimile est, bellum sua opinione longius ducetur: nam vno quidem proelio vel totius Græciæ impetum Peloponnesij, quiq; cum illis consentiunt, sustinere possunt: bellum autem contra haudqua; suo similem hostium apparatus gerere, nullo modo poterunt: quippe qui commune concilium, ut si quid subito opus sit, celeriter administretur, nullum habent: & pares in dicenda sententia alienigenæ que inter se cum sint, de suis quisque rebus sollicitus est: hæc autem exitus habere nullos consueuerunt, cum alij aliquos vlcisci maxime cupiant, alij res suas quam minimum detrimenti capere: cumque longo interuallo conueniant, breui de rep. cōsultant, maximam temporis partem in re quisque sua agenda distinetur: tum singuli suam sibi negligentiam minime obsuturam putant: alij enim curæ fore, atq; ita sibi quoq; prospectum iri sperant. Itaq; dum hoc singuli separatim opinantur, interire vniuersam remp. non intelligunt. Valde etiam rei illos pecuniariæ angustia morabitur: tarde. n. illā conficient, coq; cunctari cogentur. At reigerendæ occasio instabilem celeremq; motum habet. Nihil est autem, quod circumuallari

uallari nos ab ijs metuamus, aut cur eorū timeamus classem: nam urbem huic parem opponere, etiam si per hostem liceat, difficile est: nedum intra hostium fines, idque ipsum nostras nobis pariter contra munitiones obijciētibz. Quod si castellum communierint: alicuius illi quidem agri nostri, incursionibus, transfugis ve ad se recipiendis, nocebunt parti: sed vallo simul circumunire nos, & quominus classe, qua valemus plurimum, ad eorum fines penetremus, eosque vlciscamur, prohibere non poterunt: plus enim nobis maritimarum rerum exercitatio ad pedestre bellum, quam illis terrestrium vsus ad nauale attulit. Nec vero nauticarum rerum scientiam facile illi adipisci poterunt: quandoquidem ne vos quidem plene dum eam percepistis: quamuis a Medicis confestim rebus in id magno studio incubueritis. Qui igitur homines agricolæ, iidemque maris insueti, quibus ne exerceri quidem per nos licebit, quia semper cum magno nauium numero in statione contra illos erimus, quicquam quod operæpretium sit, efficere poterunt? contra paucas enim naues in statione manentes fortunam pugnae temptarent, cum multitudine freta erit inscitia: tanto autem nauium numero circumsepti quiescent, in exercitatioque imperitiores erunt, eoque etiam ignauiores. Artis enim, si quicquam aliud, res nautica est: nec subcisiuis operis, cumque vacamus, ediscitur, sed ipsa potius nullum ab operis vacuum tempus relinquit: at enim pecuniam, quæ Olympijs, quæque Delphis est, tollent: nautasque, quos peregrinos habemus, maiori stipendio allectos a nobis conabuntur abducere: ipsique, atque inquilini naues opplebunt. Magni omnino id referret: nisi illis nos aduersarij simus: nunc autem, præterquam quod nos hostes habent, illud quoque, quod maximum est, accedit, quod gubernatoribus, reliquisque nautis, ciuibz utimur Atheniensibus: ijsque cum numero, tum scientia inter reliquos totius Græciæ omnes, præstantibus. Tum nemo e mercede conductis domo cum periculo exulare,

re, ac minori propofita ſpe, maioris paucorum dierum ſtipendij cauſa, cum ijs ſe ſe coniungere, atque eandem belli fortunam ſubire volet. Ac Peloponneſiorum quidem res hoc fere loco ſunt: noſtræ vero cum ijs incommodis, quibus eos laborare a me demonſtratum eſt, uacant, tum haud paulo meliores ſunt: etenim ſi intra fines illi noſtros pedefres copias introducent, nos in ipſorum nauibus proficiſcemur, nec vero cum Peloponneſi pars modo aliqua, Attica autem vel omnis vaſtabitur, conferenda tamen hæc erunt: alios enim illi agros parare ſine prælio ac dimicatione non poterunt: nos magnam agrorum vim cum in inſulis, tum in continenti habebimus: maximum eſt enim maris imperium obtinere: id quod ex eo intelligere licet: etenim inſulam ſi incoleremus, qui magis vacui a periculo forèt, ne capi vñquam expugnariq; poſſent: id ipſum igitur, quam proxime poteſtis, animo in præſentia verſantes, ſpretis agris ædificijsq; maris modo, atque vrbis cuſtodiam retinete: neq; earum rerum iactura & dolore incenſi cum Pelopõneſijs manum conferite: longe enim nobis multitudine antecedunt, vt, ſi eos deuicerimus, paulo poſt tamen contra haud quaq; minores eorum copias de integro pugnandum nobis ſit: ſi autem aliquid offendemus, etiam a ſocijs quibus noſtra nixa eſt ciuitas, relinquemur: nec enim, vbi non ſatis virium ad ſe ſe bello perfequendos nobis ſupereſſe animaduenerint, in officio continebuntur. Quamobrem non de agris nobis ædificijsq; nimio opere deplorandum eſt; ſed de corporibus: neq; enim per ea homines parantur, ſed illa homines parant. quin equidem, perſuaderi ſi id vobis poſſe conſiderem, hortarer uos, vti vltro ipſi ex vrbe egreſſi ea ſponte veſtra corrumperetis, quo perſpectum Lacedæmonijs eſſet, nihil hæc vos mouere, nec eorum quidem cauſa obtemperaturos eſſe. Multa præterea ad ſpem victoriæ habeo, modo non vno eodemq; tempore bellum gerere atque imperium propagare velitis; neque præterquam, quæ bellum hoc habet pericula, vltro aliqua

aliqua addatis; nam me quidem nostra propriaque pecca-
 ta magis, quam hostium consilia terrent. Verum alio lo-
 co hæc quidem vna cum factis ipsis exponentur. nunc
 cum ijs responsis hos dimittendos censeo: Megarensis
 nos fori & portuum potestatem facturos, cum Lacedæ-
 monij neque nos, neque socios nostros oppido prohibe-
 bunt; quando neutrum ne fieret, fædere exceptum est.
 Ciuitates autem suis legibus vti iubebimus, si, cum fædus
 quoque icimus, suis eas legibus vtentes habebamus: &
 cum suis ipsi quoque ciuitatibus permiserint, vt nō quo-
 modo Lacedæmonijs commodum est, sed vt suo quæq;
 arbitrato leges habeant institutas: tum iudicium nos ex
 fædere accipere paratos esse: neque bellum priores illatu-
 ros, sed inferentibus restituros; hæc enim cum iusta sunt,
 tum vero digna, quæ ab hac ciuitate respondeantur. Il-
 lud autem tenendum est, necessarium esse bellum: idque
 quo alacrius suscipietur a nobis, eo minus acriter insta-
 bunt hostes. Maxima vero, quæ sunt pericula, ea cum
 priuatis, tum populis, maximam etiam gloriam pariunt.
 Itaque parentes nostri, cum Medos contra, inijs haud
 quaquam tantis, orsi consisterent, fortunis relictis omni-
 bus: cumq; plus consilij, quam secundarum rerum, plus
 animi, quam virium haberent, Barbaros propullarunt,
 atque hæc, qualia nunc sunt, effecerunt: quibus ignauio-
 res nos esse haud quaquam decet. Hostem igitur
 omni ratione repellamus, atque enitamur,
 vti hæc ne minora, quam
 acceperimus, po-
 steris
 nostris prodamus,



Oratio, qua Pericles laudavit ciues suos, in hoc bello
interfectos.



LERIQUE eorum, qui antea ex hoc lo-
co dixerunt, eum, qui orationem hanc
ad vetus institutum addiderit, collau-
darunt; propterea quod eam de ijs, qui
in praelijs interfecti sepelirétur, haberi
præclarum esset: mihi vero satis futu-
rum fuisse videtur, si ijs, qui re virtutem præstiterunt, re-
rum etiam honos haberetur, cuiusmodi hæc sunt, quæ
hoc tempore circum sepulchrum illud publice compara-
ta videtis: neque vno in homine recte secusve ad fidem
faciendam dicente multorum laus in discrimen adduce-
retur: difficilis enim est in dicendo mediocritas ea de re,
in qua vix opinio veritatis comprobetur: nam conscius
quidem auditor ac benevolus minus fortasse pronuntia-
tum arbitrabitur, quam quod ipse tenet cupitque: im-
peritus autem vel redundare aliquid, siquid maius, quam
suum efficere possit ingenium, audierit, propter invidi-
am existimabit: eo enim usque aliena laus audiendo to-
leratur, quoad quisque se quoque, quod de alio audit, de
se præstare posse confidit: in quo autem superari se sen-
tiunt, invident, eoque fidem non habent. Verumta-
men, quoniam a veteribus comprobatum est præclare hoc
habere, me quoque necesse est legi obsequi, dareque ope-
ram, ut ad cuiusque vestrum opinionem voluntatemque,
quam possum proxime, oratione accedam: Ordiam igitur
a maioribus primum: æquum est enim, simulque ad
hoc tempus accommodatum, hunc illis memoriæ hono-
rem tribui. Etenim cum terram hanc jidem continen-
ter tenuerint, liberam eam per virtutem posteris deinceps
ad hoc usque tempus tradiderunt. Atque cum hi
laudem merentur, tum vero etiam magis patres nostri:
cum enim ad ea, quæ acceperant, tantum addidissent,
quantum

*Dissemper qui re honore
prestitere remm etiam hono-
re dedit.*

*bonè imitari in prefatione de
xandro Bern.*

*Saxony quippe est veteri
tuta ad regnum et bene et
autis pariter legibus quæ no-
ra in iure sunt
homo in ista non legibus mutatis
ab iure. Et rectior et iustior
et rectoris et iustior et iustior
archis arguendum iustis.*

quantum hoc est imperium, quod obtinemus, magno id labore partum nobis reliquerunt; id quod multum quoque ab ipsis nobis præsertim, qui grandiores natum sumus, propagatum est, ciuitasque omni pacis bellicæ apparatus quam copiosissime instructa. Atque ego bellicas res, quoque modo singula bello parta habeamus, ac si quando vel ipsi, vel patres nostri, aut a Barbaris illatum nobis, aut a Græcis magno animo bellum propulsauius, ne longior notis de rebus fuisse uidear, præteribo: meque ad horum laudationem conuertam, si quibus studiis adepti hæc sumus, qualique republica, quibusue moribus hæc magna euaserunt, ante dixerò: hæc enim cum huic tempori congruere, tum vniuersæ ciuium atque exterorum frequentię auditu non inutilia esse existimo. Nam ea nostra resp. est, quæ non aliorum instituta æmuletur, multi que nos sibi proponunt exemplar potius, quam ipsi alios imitemur: ac nomen quidem, propterea quod non a paucis teneretur, sed gereretur a multis, a populi sibi potestate inuenit: legibus vero priuata quidem in re eadem est iuris omnibus æquabilitas constituta: dignitate autem ut quisque in aliquo excellit, ita alijs in republica præfertur: neque in honoribus mandandis, certo potius generi, quam virtuti fauimus: nec vero ob paupertatem, qui aliqua modo re prodesse ciuitati possit, quamquam dignitatis splendor absit, repellitur. Libere vero nos cum in republica administranda gerimus, tum vero in quotidiana inter nos vitæ consuetudine minime sumus suspiciosi: neque alijs, si quando voluptate potiantur, irascimur: nec vero tristitiam, minime noxiam illam: quidem sed tamen odiosam visu præteximus. Ac qui in priuata vitæ cōsuetudine minime difficles sumus, a republica violanda metu omnium maxime deterremur: & cum magistratibus continenter dicto sumus audientes, tum vero legibus paremus: ijsque in primis, quæ de ijs, qui per iniustitiam opprimantur, iniuria prohibendis scitæ sunt, quæque cum scriptæ non

AA sint,

Reig. Hfene 210

ne magni pondere

sint, communi omnium consensu ignominiam irrogant. Multa vero apud nos animo ad requiem conceduntur: sunt enim nobis certa anniuersaria sacra instituta, ludique: tum lauta priuatis res domestica atque elegans est, cuius quotidiana oblectatione tristitiam excutiant; adportantur autem propter vrbs magnitudinem ex omnibus terris ad nos omnia: contingitque nobis, vt eos fructus, quos hæc terra gignit, atq; eos, qui apud alias gentes nascuntur, æque proprios habeamus. In rei vero militaris studio, ijs rebus hostibus antecellimus: vrbs enim nostra omnibus semper patet, neque vlla lege peregrinos pellimus, ab vllaue disciplina, aut spectaculo excludimus, quod minime absconditum siqui ex hostibus aspexerint, adiuuentur: nec enim commentatione, aut dolo tam in re gerenda, quam virtute propria nitimur. Atq; illi quidem sic educantur, vt statim a pueris magno labore sese ad fortitudinem exerceant: nos vero lenius instituti, nihilo secius eque, atque illi, equalibus nos periculis obijcimus. cui rei illud argumento est, quod neq; singulatim Lacedæmonij intra fines nostros, sed vniuersi exercitum ducunt; & nos, vbi in aliorum fines inuasimus, haud magno negotio, pro suis dimicantes fortunis bello plerumque superamus: cum vniuersis autem copijs nostris nulli vmquam hostes conflixerunt; propterea quod vno eodemque tempore maritimis rebus studemus, & diuersis in locis terra bellum gerimus. Quod si aliquando cum aliqua exercitus nostri parte manum conseruerint, ac non nullos prælio vicerint, omnes se se nos fudisse gloriantur, uictique ipsi rursus si sint, ab vniuersis nobis superatos se prædicant. Quocirca si ab otio magis, quam a laborum exercitatione atque a virtute, natura nobis potius, quam legibus tradita, profecti venire in discrimen velimus, supersit nobis, vt laborem in rebus asperis, antequam venerint, ne præceperimus, & vbi ad eas iam ventum sit, non minorem quam ij, qui continenter laborando male habitati sint, virtutem præste-

præstemus. Atque cum ijs in rebus ciuitas nostra admiratione digna est, tum vero etiam in alijs: elegantiam enim cum parsimonia adamamus, & sapientiæ studio sine desidia delectamur: diuitiarum vero fructum in illarum usu, ubi tempus postulet, potius, quam in verborum magnificentia ponimus. nec vero cuiquam turpe apud nos est de sua paupertate confiteri, sed eam non re euitare id vero multo est turpius: præterea ijsdem rem suam familiarem, ijsdem publicam gerere licet: quinimo ne ij quidem, qui in opere faciundo occupantur, penitus sunt in republica rudes: soli enim nos, si qui hæc non attingunt omnino, non inertes eos, sed rudes reipublicæ ciues iudicamus. In deliberando autem ijsdem aut recte de rebus diiudicamus, aut recte nobis in mentem venit; neque ij sumus, qui ita existimemus, dicta factis obesse, sed illud potius si, anteaquam oratione edoctus fueris, rem susceperis. Itaque in eo quoque maxime præcellimus, quod ijsdem excellenti animi magnitudine sumus, &, quidquid agimus considerate cogitateque agimus. At ceteris inscitia confidentiam adfert, cognitio ignauiam. Optimi vero iure illi habentur, qui cum asperas ac iucundas res facile internoscant, ne sic quidem vllum adire periculum recusent. Quod autem ad benignitatem adtinet, contra nos, ac vulgo adsolet, facimus: non enim accipiemus, sed dandis beneficijs amicitias nobis comparamus: firmiter enim in eo, de quo bene promeritus sis, utpote quæ propter beneuolentiam debeatur manet gratia: quæ vero retuleris, ea imbecillior est: non enim beneuolentia adductum beneficium contulisse, sed, quod te debere intelligeres, dissoluisse arbitrantur: tum soli omnium non utilitatis cogitatione, sed ipsius liberalitatis fidentia audacter benefici sumus. Atque, ut in pauca conferam, cum vniuersa nostra ciuitas totius Græciæ quasi ludus est, atque institutio, tum singuli quique, ut mihi quidem videntur, corporibus ad varia multipliciaque rerum genera cum dignitate ac lepore habiles sumus. Atque hæc non in ver

borum magnificentia temporis causa posita esse, sed fa-
 ctorum veritate niti, hoc ipsum ciuitatis nostræ imperi-
 um, quod ijs moribus partum habemus, ostendit: sola
 enim ex omnibus huius memorię, si quis periculum de
 se fecerit, ditionem vincit ac famam: solaq; ea est, a qua
 neq; bellum inferentes hostes calamitatem accepisse pu-
 deat: neque, in quos dominetur, parere se se indigno
 querantur domino. Magna vero opum nostrarum mo-
 numenta (neque enim eę in testatę sunt) cum habeamus,
 cum ijs, qui nunc sunt, hominibus, tum vero etiam po-
 steris magnam nostri admirationem relinquemus. Nec
 adeo Homerus laudator nobis, adhibendus est, aut alius
 quispiam, qui versibus in pręsentia modo delectet, sed
 ab existimatione rerum gestarum veritas discrepet: ad
 omnia enim maria, terrasque omnes, virtute nobis adi-
 tum patefecimus: atque omnibus in locis sempiterna se-
 cundarum, aduersarumque rerum monumenta extruxi-
 mus. Pro tali igitur ciuitate cum hi, quod eam sibi eripi
 pati non possent, fortissimo pręstantissimoque animo
 dimicantes occiderunt, tum ceteros pro eadem omnem
 excipere laborem decet: cuius etiam rei causa in ijs, quę
 ad eam pertinent fui ipse longior; quo scilicet ostende-
 rem, non pari vobis conatu enitendum esse, atque ijs,
 quorum in republica hæc paria non sunt: simulque vt
 horum laudationem ijs, quę a me exposita sunt, argu-
 mentis confirmarem: pleraque enim ad eos ipsos perti-
 nent: nam in quibus ego ciuitatem laudaui, ijs horum,
 taliumque virtus illam ornavit. Nec adeo multorum
 Gręcorum res gestę eęque, atque horum, par orationi
 pondus habere reperientur. Atque equidem reor, ho-
 rum hunc exitum, qui & primus indicauit & postremus
 confirmauit, hominis declarare virtutem: nam, qui cete-
 ris rebus minus aliquando probi fuerint, eos bellicam su-
 am in patria tuenda virtutem extollere æquum est: male
 enim facta benefactis delent: magisque profuerunt pu-
 blice, quam priuatim nocuerunt. At horum nemo vel
 pro

propter diuitias, quod ijs diutius frui magnificeret, languidior fuit; vel propter paupertatis effugiendæ, atque aliquando abundandi spem, periculum distulit: hostium autem pœnas sumere sua ipsorum salute optabilius cum ducerent, simulque statuerent omnium periculorum hoc esse pulcherrimum, illos vlcisci, atque has appetere laudes voluerunt; & incertum quidem rei bene gerendæ euentum spei mandarunt: id autem, quod semel a se approbatum haberent, factis committendum statuerunt: cumque plus in eo ponerent, vt, pugnando si quid aduersi accidisset, ferrent, quam vt cedendo salutem consequerentur, verborum quidem ignominiam fugerunt; rem autem corporibus subierunt, minimoque fortunæ ac temporis momento cum summa potius spe, quam pauore vllò tenerentur, e vita discesserunt. Atque hi quidem merito tales in patriam extiterunt. Qui autem reliqui sunt, ij eam debent in hostem mentem dari sibi optare, quæ offensionis, non virtutis habeat minus; nec ex oratione solum vtilitatem attendere, quam pluribus apud vos, quibus ea nihilo secius nota est, persequi facile licet, quantum in conseruanda patria, hostibusque propulsandis boni insit, commemorantem; sed potius eius vires quotidie re intuentes, illius amore incendi: quæ cum magnæ nobis visæ fuerint, illud cogitare debemus, ab ijs parta hæc esse, qui recta cum cognoscerent, tum etiam auderent, quique cum turpitudinis verecundia rem gererent: nec vero si quid conati aliquid offenderant, faciendum sibi esse existimabant, vt sua propterea ciuitatem virtute priuarent, sed præmium omnium præclarissimum ipsi permittebant: cum enim corpora publice traderent, priuatim, quæ numquam consenesceret, laudem acquirebant: clarissimumque monumentum consequentur, nō tam quidem illud, in quo siti ipsi sunt, quam in quo apud omnes quæcumque aut verborum, aut rerum occasio sese dederit, illorum gloria perpetuis laudibus celebrata conditur. Clari enim viri vniuersum orbem

hem terrarum sepulchrum habent, atque eos non tantum domesticis in bustis inscripta elogia apud suos celebrant, quantum apud exterarum nationes non scripta, nec operum magis, quam cogitationis vniuscuiusque animo; ac menti illorum memoria obuersatur. Hos igitur vos nunc imitati beatam vitam in libertate: libertatem vero in fortitudine ponite, atque in re bellica periculum subire nolite spernere: nec enim miserorum est magis, quibus nulla meliorum sit rerum expectatio, mortem contemnere, quam eorum, quorum vitæ in contrariam partem conuersio etiam nunc agitur: præsertim quibus siquid aduersi euenerit, magna mutatio futura sit: vehementius enim viros quidem generosos cum turpitudine coniunctum incommodum angit, quam cum animi robore communi in spe simul nata sensuque carens mors. Quo circa ne vos quidem, quicumque horum parentes adestis, miserabor potius, quam consolabor: nec enim ignoratis varijs vos multiplicibusque miserijs natos: præclare vero cum illis agitur, si quibus decora hæc obtigerint, qualis horum interitus est, vesterque luctus, quibusque vitæ fuerit felicitas equalis. Nec vero me fugit, quã difficile factu sit, hæc cuiquam persuaderi: præsertim cum persæpe futurum sit, vt aliorum res secundæ, quibus vos quoque aliquando florueritis, vobis memoriam refricent: nec enim cum ijs, quæ numquam experti sumus, bonis caremus, dolori ea res est, sed cum ea, quibus adsueuimus, eripiuntur. Verumtamen qui quidem liberos etiam nunc procreare per etatem possunt, consolari se se nouæ spe sobolis debent: filijs enim alijs suscipiendis, cum priuatim eorum, qui extincti sunt, obliuiscuntur, tum vero ciuitati dupliciter proderunt; quod ea neque ab hominibus deferetur, & protectior erit. Nec enim euenire potest, vt æqui bonique aliquid ab his cogitur, qui collatis in commune pro virili cuiusque parte liberis, periculum non equauerunt. Qui vero maiores natu estis, quibus maxima vitæ pars, quod lucro est appone

nendum, beate acta est, quæ reliqua sit, breuem fore cogitate, atque eam ipsam ista horum gloria eleuate: sola enim laudis cupiditas senescit numquam: nec vero languida atque iners ætas pecuniam modo, quod non nulli dicere solent, confectatur, sed dignitatem. Magnum vero certamen horum filijs, fratribusque paratum video: eum enim, qui non sit, extollere omnes laudibus consueverunt. Itaque cum excellenti virtute fueritis, vix tum demum non pares, sed aliquanto tamen deteriores, quam hi, dicemini: viuis enim inuidetur ab eiusdem laudis æmulis: qui vero e medio excesserunt, eos hominum beneuolentia sine vlla obrectatione honorat. Quod si mihi de mulierum quoque officio non nihil dicendum est, quæ quidem viris estis orbatæ, breue est, quod de re tota præcipiam: etenim si vestra congruere cum natura vultis, magno id vobis honori erit, cum quam minimum de vestris cum vitijs, tum etiam bonis ad homines fama emanabit. Hæc nos quoque non inutilia habuimus, quæ, huic legi obsecuti, oratione persequeremur. Ac vobis quidem partim iam, qui humanantur decorati sunt, partim vero eorū liberis, quoad e pueris excesserint, ex hac die publice alimenta ciuitas præbebit, quæ vtilem in primis tallium certaminum coronam ijs, reliquisque omnibus decreuit. Etenim qui maxima virtuti præmia proponunt, eorum fortissimi ciues rempublicam gerunt. Sed iam, vbi suum quique luxerint, discedite.

Contio Periclis ad Athenienses.



IN ME mihi inopinata vestra in me accidit iracundia: et enim in simulari me sentio, eamque ob causam contionem aduocaui: uti, si quid aut mihi iniuria infensi estis, aut aduersis in rebus animo succumbitis, admonerem vos atque exostularem. Nam equidem sic existimo, magis vni-
uer

uerſa rep. ſtante fortunataque, priuatos iuuari, quam ſingulorum ciuium ſecundis rebus, illa afflicta: vt enim priuatim aliquis fortuna ſit optima, euerſa tamē rep. ipſum quoque concidere neceſſe eſt: at contra, qui in beata ciuitate miſer ipſe ſit, multo magis ſeruatur incolumis. Quod ſi ad ſingulorum ciuium tolerandas calamitates fatiſ reſp. virium habet; illius autem ærumnas ferre ſinguli nequeunt, quid eſt, cur non omnes illi opem feramus? cur ve domeſticis incommodis exanimati rei p. conſeruande curam dimittamus? id quod vos facitis, meque huius belli auctorem, voſque adeo ipſos, qui mihi ea de re adſenſi eſtis, accuſatis. habeoque ego voſ infeſtos, qui ſum is maxime, qui & recte ſentire, & id, quod ſentiam, cōmode nihilo, quam alij, minus eloqui poſſim: idemq; patriæ amans, idem incorruptus integerque ſim. Namq; cogitare ſi quis poteſt, ſed oratione, quod vult, plane explicare nequit, perinde eſt, quaſi nihil illi in mentem venerit: qui vero vtrumque præſtiterit, is, ſi in ſenſus ciuitati ſit, haud quaquam eodem modo amice quicquam dixerit. quod ſi adſit id quoque: pecuniæ autem non reſiſtatur, proſecto vniuerſa illa hanc vnā ob rem venalia ſint. Quocirca ſi hæc in me præter ceteros modica eſſe rati, de ſuſcipiēdo bello mihi adſenſi eſtis, iniuſte nimirū nunc, quaſi iniuriam fecerim, culpam ſuſtineo. etenim ſi vtrumuis licet, bene alioqui cōſtitutis rebus, ſummę ſtultitiæ ſit bellum ſuſcipere: cum autem ita res reddiſſet vt vel cedentibus continuo in alterius ditionem cadendum eſſet, vel reſiſtentibus cum periculo dimicandum; qui illud reſuſerit periculum, magis quam qui exceperit, reprehendendus eſt. Atqui equidem idem ſum, nec a priſtina ſententia diſcedo, ſed voſ immutati eſtis: etenim cū hæc vobis perſuadebantur, integri ſcilicet eratis: cum pænitet, detrimentum accepiſtis. Ergo propter conſilij veſtri imbecillitatem factum eſt, ego vt non recte ſenſiſſe videar: quoniam id, quod moleſtum eſt, doloris quidem ſenſum in vno quoque iam efficit; vtilitatis vero fructu

fructus remotus adhuc obscurusque est: tantaque rerum, commutatione facta, idque in breui, imbecillus animus uester est ad constanter in sententia permanendum: frangunt enim animos, atque abijciunt, quæ subita atque improuisa præterque omnem rationem eueniunt: qualia sunt quæ uobis acciderunt, in primisque pestilentia. Verum tamen qui tantam ciuitatem incolatis, quique in ea dignis institutis educati sitis, omnem fortunam subire paratos esse decet: neque gloriam uestram obscurari pati: æque enim homines solent eos, qui quam habent dignitatem, eam per ignauiam amittunt, accusare; atque eos, qui qua indigni sint, eam sibi per temeritatem arrogant, odisse. Quapropter rem familiarem deplorare desinite, ad salutem reip. incumbite: nam quod ad laborem adtinet, qui necessario in bello sustinendus est, ne nimis magnus ille sit: ac nihilominus tamen hostes superaturi simus, ea quidem de re satis profecto uobis esse debent, quæ alias sæpe in eam sententiam a me dicta sunt; nihil esse, cur merito reformidare bellum hoc deberetis: sed illud tamen ostendam, quod neque venire uobis in mentem de uestris ad imperium obtinendum opibus mihi uideatur, nec ego antea commemorauim, nec uero ne hoc quidem tempore dicerem, ueritus scilicet ne inflatus gloriari uiderer, nisi timore uos præter modum exterritos intelligerem. Etenim uestris uos modo socijs imperare arbitramini: ego uero illud defendo, cum duo sint omnino, quæ perspicuum habeant usum, mare scilicet, & terra; alteri uos uniuerso dominari, non modo quoad tenetis nunc, uerum etiam quoad progredi uoletis: tanta enim nauium facultate nauigantes uos, non rex, non ulla alia natio est, quæ impedire hoc tempore possit. Quamobrem maiores omnino hæ mihi opes videntur, quam ut cum agrorum ædificiorumque, quibus priuari uos magnum ducitis, usu comparanda uobis sit. Minime igitur grauius hæc ferte, sed potius leniter: diuitiarumque istas delicias, huius magnitudinem imperij spectantes, paruipendite,

BB

dite,

dite: atque ita cogitate: si in libertatem incubuerimus, illamque conseruabimus, eam ipsam facile per se hæc esse recuperaturam: qui vero alterius parent imperio, ij ea quoq; , quæ antea parta habuerint, amittere consuerunt. Nec vero committamus vt vtraque re inferiores, quam patres nostri fuerunt, deprehendamus: qui non ab alio tradita hæc, sed suo parta labore, & tenuerunt, & conseruata a se, nobis prodiderunt: turpius est enim quæ habeas, ea tibi eripi, quam, quæ acquirere coneris, ea adsequi non posse. In hostes autem animo non fidenti modo, sed etiam despicienti ire debetis. Nam fiduciam quidem, fortunata stultitia, vel ignauo pepererit; despicientiam vero conscientia modo, quantum quisque hostibus consilio anteeat, id quod in vobis est, efficit: si quidem pari fortunæ condicione animum prudentia communit aduersariorum contemptione: & spei, cuius in rebus dubijs omnis vis ac robur est, nihil magnopere confidit: sed suis viribus consilioque, cuius prouidentia multo est certior, nixa est. Ciuitatis igitur maiestati, quam propter imperium obtinet, quandoquidem ea vniuersi gloriari soletis, succurrite: nec enim laborem fugere, aut ne honores quidem consecrari debetis: nec vero existimate vna modo de re esse certamen, an pro libertate seruitutem habeatis: sed etiam de imperio amittendo agi, deque periculo, quod vobis ab ijs imminet, quos propter imperium infestos inimicosque habetis: quod quidem vobis imperium, ne, si qui sint quidem, qui metu atque inertia adducti hoc tempore ad iustitiam remigrare velint, deponere iam liceat: iam enim illud quasi tyrannidem obtinetis, quam occupare, iniustum habetur: deponere, periculosum est. Nam hi quidem per breui temp. si hæc alijs persuadeant, aut sicubi ipsi per se suo arbitratu viuant, euerterint: nec enim stabilis est inertia, quæ non industria comitatu instructa sit: nec in ea ciuitate, quæ imperium obtineat, sed in ea, quæ alteri pareat, ad tranquillam est seruitutem utilis. Vos vero neque a talibus ciuibus

bus induci vos patiamini : neque mihi, cui de suscipiendo bello adfensi estis, ne si irruentes quidem hostes ea in nos fecerunt, quibus par fuit imperium recusantes, affici, infensi sitis. Nam pestilentia quidem hæc, omnibus improuisa, vnaque omnium rerum maxime inopinata accidit : propter quam certo scio aliquanto me etiam magis odio vobis esse, haud meo quidem merito, nisi si quid etiam vobis boni, non ratione, sed casu, euenerit, id quoque mihi assignaturi estis : sed quæ diuinitus accidunt, ut necessitas cogit : quæ ab hostibus inferuntur, ut virtus postulat, ita ferenda sunt : isque mos ciuitati antea fuit. eum vos manere finite ; cogitateque huius urbis nomen summa esse apud omne mortales gloria : propterea quod in rebus aduersis animo non deficiat, quodque maximum ciuium numerum, laboresque quam plurimos, bellis gerendis consumpserit, maximasque ad hoc usque tempus opes habeat : quarum quidem in perpetuum, si quid etiam aliquando nobis accidat : naturalis est enim rerum omnium imminutio, posteris memoria relinquitur, quod & Græci Græcis quam plurimis imperauimus, & maximis bellis partim cum vniuersis ; partim cum singulis contendimus, urbemque omnibus bonis vndique refertam ac maximam incoluimus. Atque hæc, inertes qui sunt, fortasse reprehendent : qui vero moliri aliquid, atque agere cupiunt, etiam æmulabuntur : quibus autem opes nullæ sunt, inuidebunt. Sed omnes : qui hoc sibi sumunt, ut alijs imperent, odiosi inuisque in præsentia sunt. Verumtamen qui maximis in rebus inuidiam subeunt, prudens cōsiliū ineunt : odium enim minime diuturnum est : at splendor in præsens, atque in posterum gloria perpetuis laudibus celebrata, sempiterna est. Vos igitur id, quod in reliquum tempus honestum futurum est, nec est in præsentia turpe, cogitatione præcipientes, omnibus iam paratis rebus vtrumque vobis conseruate : neque ad Lacedæmonios de pace mittite, neque præsentibus malis premi vos præ vobis ferte. Nam

BB 2

qui

qui rebus aduersis animo minime franguntur, et re maxime resistunt, ij & populorum & priuatorum fortissimi sunt.

*Oratio Plataeorum legatorum ad Lacedæmonios
in exercitu.*



RE M iniustam facitis Archidame atque Lacedæmonij, minimeque vobis ac patribus vestris dignam, qui exercitum in Plataeorum fines introducatis: Pausanias enim ille Cleombroti filius, Lacedæmonius, cum Græciam Medorum dominatu, vna cum ijs Græcis, qui pugnae illius, quæ apud nos facta est, periculum subire non recusarunt, liberaasset, immolatis in Plataeorum foro Ioui liberatori hostijs, omnibusque adhibitis socijs, urbem atque agrum Plataeis reddidit, suisque legibus uti voluit, nec bellum illis vlllo tempore quemquam iniuste, aut seruitutis iniungendæ causâ facere; si minus, auxilium omnes socios, pro suis quemque viribus, ferre. Hæc igitur patres vestri virtutis nobis atque alacritatis, qua in adeundis periculis illis fuimus, præmia tribuerunt. At vos contra, quam illi censuerunt, facitis: vna enim cum Thebanis, nobis inimicissimis, seruitutem oppressum nos venitis. Quamobrem deos, in illo federe testes interpositos, tum patrios vestros, nostrosque hosce penates, testati, edicimus vobis, ne quam Plataeorum finibus iniuriam inferatis: neque iusiurandum violetis, sed, quemadmodum Pausanias sanxit, nostris nos legibus uti permittatis.

Archidami

Archidami, Lacedæmoniorum regis, defensio.



EQVVM vos quidem Platæei dicitis, si modo cum dictis facta consentient. In libertate igitur, quam Pausaniæ permissu habetis, cum ipsi remanete, tum vero alios, qui illorum socij periculorum vobiscū eo tempore coniurarunt, nunc autem Atheniensium imperio subiecti sunt, vindicate: horum enim ceterorumque libertatis recuperandæ causa tantus hic conatus, bellumque hoc excitatum est, cuius vos æquum est maxime quidem participes esse, ac vos quoq; iusiurandum conseruare: si minus, at saltem quiescere, remque vestram agere, neutriusque esse partis: atque in amicitiam quidem utrosque recipere: in belli autem societatem neutros. & his quidem contenti erimus.

Defensio altera Archidami, contra responsum, quod dederant legati illi.



TVOS urbem Lacedæmonijs nobis atque ædificia tradite, finesque monstrate; tum arbores, & si qua præterea habetis, quorum iniri numerus possit, nobis adnumerate: ipsi autem in quas-cumque commodum est partes, tantisper dum bellum est, cedite, atque eo confecto, nos, quæ acceperimus, reddemus vobis. Interim apud nos deposita habebimus, colemusque, & quod vobis futurum sit satis, pensabitur.

Cnotio

*Contio Platæensium legatorum ad suos ciues, renuntiantium
legationem, qua functi fuerant ad Athenienses.*



VM antehac Plataenses, ex qua die
vos sibi socios asciuerunt, omisisse
se se vos tueri Athenienses negant,
tum hoc quoq; tempore vestras in
iurias pro suis se viribus non negle-
cturos esse cōfirmant. Itaque a vo-
bis per iusiurandum illud, quod ma-
iores vestri iurarunt, ne quid noui cōsiliij capiatis, postu-
lant.

*Contio Cnemi, præfecti classis Lacedæmoniorum, cum
instaret naualis pugna.*



VPERIVS Peloponnesij nauale præ-
lium, si qui forte sunt, qui eo commo-
ti, futurum quoque extimescant, non
iustam causam ad formidinem habent:
minus enim paratis nobis, quod vos
non ignoratis, commissum est, cum ad
pedestrem potius expeditionem, quam ad naualem pu-
gnam nauigaremus: aduersa præterea multis in rebus for-
tuna vsi sumus: tum nonnulla etiam nos, vtpote tunc pri-
mum nauali prælio decertantes, propter insolentiam se-
fellerunt. Quapropter neque ob ignauiam victi sumus,
nec animum, qui non plane superatus sit, sed aliquam e-
tiam nunc in se habeat excusationem, aduerso rerum e-
uentu retundi decet, sed ita existimare casu labi homines
posse, sed animo semper eisdem erecto stare. Nec vero
vbi virtus adsit, inscitiae quemquam excusatione vsu-
timere licet, nec vos tantum vsu posteriores estis, quan-
tum virtute anteitis: horum autem scientia, qua maxime
exterremini, siquidem fortitudinem habeat, quæ didice-
rit, ea cum ventum in discrimen sit, & meminisse, & ex-
plicare poterit: sine animi vero magnitudine nulla in ar-
te

te satis est in periculis præsidij : excutit enim memoriam
pavor : ars autem sine animi robore nullo est vsui. Illo-
rum igitur artificio vestram virtutem obijcite: timori au-
tem, qui propter aduersum prælium in animos vestros
inuasit, quod imparatos tunc vos offenderint, opponite.
Itaque eo illos vincitis, quod & nauium numero præsta-
tis, & prope vobis amicam terram, vbi parati in armis præ-
sto vobis milites sunt, prælium committitis. Fit autem
fere, vt qui plures, paratioresque sint, ij victoriam conse-
quantur. Itaque omnia vobis ad vnum firma esse reperi-
mus, nec accidere posse, vt vlla in re merito labamur:
quin ea ipsa, in quibus antea offendimus, comparata nunc
pro disciplina nobis erunt. Magna igitur fiducia guber-
natores nauæque suum quisque munus obite: nec ve-
ro locum, qui cuique attributus sit, deferite: nam nihilo
secius a nobis, quam a superioribus ducibus instructi in
prælium proficiscemini, neque nos cuiquam, cur turpis
esse debeat, causam relinquemus. Quod si quis omnino
decreuerit ignauus esse, is pro delicto pœnam sustinebit:
fortes autem pro virtute præmium ferent.

*Contio Phormionis, ducis Atheniensium, ad exer-
citum naualem.*



V M perterritos vos nauium multi-
tudine milites animaduertam, cum-
que turpe factu existimem, quæ mini-
me formidolosa sunt, ea extimescere,
conuocaui vos. Nam illi quidem, pri-
mum quod victi antea superatiq; a vo-
bis sunt, ac ne ipsi quidem pares vobis sese esse confidunt,
propterea non equum in certamen descenderunt, sed na-
uium multitudinem coëgerunt: deinde id vnum, quo
maxime freti ad vos eunt: magnos enim in re militari
quasi suo sibi iure spiritus sumunt, nulla alia re confisi
sperant, quam quod cum propter vsu, quem in terre-
stri-

bus habent, pleraque ex sententia gesserint, idem quoque in re nautica usu venturum arbitrantur. At hoc, si ea id in re illis adiumento est, nos certe hoc tempore plurimum praestabimus: nec enim illis virtute cedimus, sed, quod alteri in altero maiorem habemus usum, propterea maiore sumus fiducia: huc accedit, quod Lacedaemonij, qui propter auctoritatem imperium in socios obtinent, inuitos plerumque in periculum trahunt: numquam enim longe superati illi iterum rem proelio committerent. Ne igitur illorum formidaueritis audaciam: multo vero vos illis maiori iustiorique estis formidini; tum quod antea superastis, tum quod ita animum illi induxerunt, nisi praclarum quoddam virtutis specimen daturi essetis, numquam vos commissuros fuisse, ut contra consisteretis. Nam qui numero praestant aduersarijs, sicut hi, copijs magis, quam animo nixi, proelium ineunt: qui vero multis partibus sunt inferiores, neque vlla necessitate coguntur, propter excellens animi robur resistere audent, quae reputantes hi, rei admiratione commoti, potius quam consentaneo apparatu nos metuunt. Multi vero exercitus, quod usum in re militari non haberent, sunt etiam qui propter timiditatem a paucioribus sunt superati: quarum rerum utraque a nobis hoc tempore longe abest. proelium vero ego minime intra sinum mea quidem sponte committam, nec adeo eo proficiscar: etenim scio paucioribus nauibus, celeritate & scientia praestantibus, contra maiorem nauium minus peritarum, numerum aduersariam esse locorum angustiam. Nec enim modo & ratione quisquam, nisi ex longo intervallo prospectus fuerit, incitare se in hostes, neque, cum forte laborarit, tempore regredi poterit; nec vero hostium naues diducere, nec celeritate eludere, quae sunt propria munera nauium, remorum pulsu & celeritate praestantium: sed naualem pugnam pedestrem facere necesse habeat, in quo maior nauium numerus plus potest. Haec igitur ego, quoad fieri poterit, providebo. Vos pro nauibus

estote

estote parati in armis, præsertim cum paruo interposito spatio incurfus futurus sit: quæque iussi eritis, celeriter administrate, atque ordinem in re gerenda, ac silentium plurimi facite, quo modo multa bellicis in rebus, præcipueque naualibus pugnis prodest administrare: ac pristina virtute vestra illis resistite. Magnum vero certamen, vtrum Peloponnesijs rerum nauticarum spem præcidatis, an de Atheniensibus mari metum augeatis. Iterum igitur atque iterum vos moneo, vt plerosque horum victos a vobis esse memineritis: semel autem superatus animus similiter eadem experiri pericula nescit.

Contio Mitylenæorum ad Lacedæmonios.



SCIMVS Lacedæmonij, socijque in more positum hoc esse Græcorum, vt qui in bellis defecerint, pristinaque amicitiam deseruerint, ijs, a quibus recipiuntur, quatenus ea re iuuantur, lætitiæ sint; sed ijdem, habiti veterum amicorum proditores, improbi iudicentur: idque iudicium haud sane iniquum est, si modo qui defecerint, atque ij, a quibus sese disiunxerint, parem inter se nacti sint animi voluntatem, paresq; cum viribus, tum preparatione fuerint, neque vlla iusta defectionis causa intercesserit: quæ quidem nobis atque Atheniensibus secus obtigerunt: nec ea re improbi cuiquam videri debemus, quod in honore apud hos in pace habiti, in periculis illos deserimus: differendum est enim nobis de iustitia in primis ac fide, præsertim qui in societatem recipi postulemus: nam nulla est neque priuatis stabilis amicitia, neque populis firma societas, quæ non mutua virtutis opinione, & morum reliquis in rebus similitudine nitatur: studiorum enim dissimilitudines rerum quoq; discordias gignunt. Est igitur nobis societas cum Atheniensibus inita bello Medico, illo scilicet tempore, cum vos negotio destiti-

CC stis

stis: illi autem extrema belli persecuti sunt: nec tamen Græciæ seruituti Atheniensium addicendæ, sed eius Medorum dominatu liberandæ, societatem coiuiimus: itaq; quamdiu æquo illi imperarunt iure, duces eos alacri animo secuti sumus. At postquam ex Medorum quidem inimicijs permultum remitti: sociorum autem seruitutem in angustum ab illis adduci animaduertimus, metuere sane iam tunc incepimus: sed cum singuli seorsum ab alijs, id quod in tam magno varioque sententiarum numero accidere necesse fuit, se defendere socij non possent, omnes seruitute oppressi sunt, præter nos atque Chios. Ergo nos, quibus leges ac libertas nomine dumtaxat relicta est, socij consortesque belli fuimus, cum iam Atheniensibus ducibus parum fidei haberemus: erant enim nobis pro disciplina, quæ illi antea gesserant: neque enim consentaneum est, vt eos sustulerint, quibuscum vna nobiscum ictum habuerint fædus, & reliquis, vbi se patrandi facultas ostenderit, non idem paræt. Etenim, si omnes etiam nunc libertatem retineremus, minus esset metuendum, nequam illi nouam rem molirentur: nunc autem, qui plerosque seruitute oppresserint: nobiscum autem æquo adhuc iure viuant, verissimile est grauius id, quam ante, esse laturos: quibus scilicet maxima succubuerit pars, cum ijs solos nos exæquari: idque eo magis, quod illis opes, nobis solitudo atque inopia adaucta est: solus enim vtrinque par mutuusque metus fidelis est fæderum custos. Nam si qui sunt, qui moliri contra quippiam cupiant, quoniam id nulla res superiores conantur, deterrentur: nobis autem ob eam causam libertas relicta est, quod orationis honestate, consilijque itinere ac fallaciæ, aditum sibi ad dominationem occupandam facilius munire posse, quam virium via armorumque, sperant. Testimonioque simul id esse voluerunt: equo namque fœdere socios nullo modo belli eius participes futuros fuisse, nisi ij, in quos illi impetum facerent, in aliquo deliquissent: tum potentissimos quos
que

que in maxime infirmos primum concitarunt, ut eos ipsos cum ad extremum reseruassent, amputatis circumcisisq; reliquis, imbecilliores ad expugnandum haberent. Nam a nobis si duxissent initium, omnibus cum sua uetiam tunc integris, tum locum, ubi consisterent habentibus, non tam facile eos subegissent: non nihil etiam nostra illis classis terroris iniecit, ne quando aut ipsa per se, aut vobis, aliquibus ve alijs adiuncta, eos in periculum arcesseret; tum multum quoq; nostro in ciuitatem eorum, ac principes deinceps obsequio ad incolumitatem profectum est. Nec tamen ne sic quidem, nisi hoc interuenisset bellum, diu hoc prestare nobis videmur potuisse: coniecturam enim de alijs facimus. Quæ nam igitur ista firma fuit amicitia? quæ ista secura sane libertas? in qua inuiti nos mutuo amplexaremur, atq; illi in bello nos metu adducti colerent, nos illis contra in otio idem præstaremus, ac fidem, quam beneuolentia confirmare plurimum apud alios consuevit, nos timoris præsidio munitam haberemus: metuque potius, quam amore copulati in societate contineremur: atque utricumque patrandi impunitas prius addidisset animum, princeps is peccandi initium facturum esset. Quocirca si quis est, qui nos sceleris condemnet, propterea quod, cum illi ea, quæ in nos edituri erant flagitia, traherent, ipsi anteuertimus: nec itidem dum certum sciremus, si quid de eo acturi essent, expectauimus, non rectam ille rationem init: etenim si illorum insidijs nostras opponere nobis licuisset, illisq; rem trahentibus eodem nobis modo cunctandi data esset facultas, quid erat causæ, cur æqui paresque cum illis essemus, eorum obtemperaremus imperio? Cum igitur, utricumque vellent, uti in nos impetum facerent, illorum esset arbitrij, nostri quoque arbitrij est, ut, ubi visum sit, anticipemus obistere. Has nos defectionis, Lacedæmonij socijque, defensiones causasque habuimus, cum audientibus ad intelligendum iure nos fecisse, perspicuas, tum vero ad perterrendos nos, atque ut salutem aliqua

CC 2 nobis

nobis ratione quæreremus hortandos firmas: antea quoque nos quidem id conatos, quo tempore, cum etiam nunc pax esset, de defectione ad vos misimus, atque a vobis reiecti eo conatu destitimus. Nunc autem a Bæotijs inuitati e vestigio paruimus: duplicemque rati sumus defectionem nostram futuram; alteram a Græcis, ne vna cum Atheniensibus vexandi nobis essent vniuersi, sed vna cum libertatis auctoribus, seruitute liberandi; alteram, vt ab Atheniensibus deficeremus, quo minus posthac ab illis tolleremur, sed ipsi anteuertemus. Verum præpropera iparataque paulo magis nostra defectio fuit: quo etiam magis receptis nobis subsidium celeriter mittere debetis, vt, & quibus decet, auxilio esse vos cognosci possit, simulque hostibus vt detrimento sitis. Nam tempus quidem magis nunc idoneum est, quam vniquam antea: Athenienses enim & pestilentia exhausti sunt, & sumptibus: naues autem illorum partim circum vestra sunt littora, partim contra nos dispositæ sunt: vt verisimile sit; si pedestribus copijs simul & nauibus in eos hac quoque æstate impetum feceritis, nullam eos nauium facultatem habituros. Quare aut vobis ad se proficiscentibus non resistent, aut ab vtrisque discedent. Nec vero existimare quisquam debet, pro alienis fortunis proprium vos subire periculum: si quis est enim, cui Lesbos longinqua videatur, illi propinqua ex ea vtilitas extabit. At non in Atheniensium finibus bellum geretur: verum in illorum, quibus Athenienses iuuantur: ex sociorum enim vectigalibus pecunia illis reficitur, quæ quidem edomit nobis, etiam adaucta erunt: propterea quod nulli posthac deficient, vnaque ad Atheniensium facultates nostræ addentur, simul & durior nos erimus condicione, quam ij, qui seruituti antea addicti sunt. Quod si vos auxilium præsto nobis animo foretis; cum ciuitatem nauibus abundantem, id quod vobis maxime deest, adiungetis vobis, & Athenienses, abductis illorum socijs, facilius delebitis, fidentius namque cuncti se ad vos adplicabunt; tum, in quo

quo accusamini, quod ijs, qui ad vos defecerint, non subuenitis, eius rei culpam effugietis. Quod si libertatis vindices profiteri vos cognitum fuerit, bellicas opes vestras multum ea re confirmabitis. Vos igitur spem illam, quam in vobis Græci repositam habent: Iouemque hunc olympium, cuius in templo nō secus ac supplices sumus, veriti, Mitylenæis in fidem atque amicitiam receptis succurrite: noliteque nos respuere, qui proprio capitis nostri periculo commune omnibus emolumentum, siquidem ex sententia successerit: contraque, si nihil a vobis impetrauerimus, magis etiam commune detrimentum adferamus. Tales igitur vos præbete, quales vos viros esse Græci confidunt, qualesque noster hic postulat metus.

Contio Tentiapli.



Go Mitylenas protinus contendendum Alcida ducesque Peloponnesij, prius, quam de nostro aduentu auditum sit, quo in statu sumus, censeo: exitimandum est enim, multa nos apud hostes, quippe qui modo vrbe potiti sint, sine præsidio offensuros: maxime quidem mari, quā nec illi hostium incursum verentur, & nobis vsu euenit, vt plurimum valeamus: sed pedestrem quoque manum, credibile est, vtpote ratam se vicisse, dispersam incautius in tectis esse. Itaque si improviso simul, & noctu, in homines impetum fecerimus, spero equidem ab ijs nos adiutos, si qui reliqui in vrbe sunt, qui nobis cupiant, esse victuros. Nec vero periculum reformidate, sed ita cum animis vestris cogitate, nullis alijs in rebus inane illud belli, quod fertur, quam in talibus esse positum: quas quidem qui ipsi in se cauerint duces, atque eas vbi in hoste animaduernerint, rei bene gerendę occasionem non dimiserint, ijs quam plurima ex sententia eueniunt.

Quasi argumentum duarum, quæ sequuntur orationum, ex auctoris verbis expressum.



VM populus Atheniensis multis de causis Mitylenensium defectionē acerbissime tulisset, simulatque eos per Pachetem receptos esse certior factus est, plebiscitum confestim per iram fecit, ut omnes puberes interficerentur, ac sine vlla mora cum eo plebiscito celeriter misit; qui in omnem Mitylenensium ciuitatem sœuere eum extemplo iuberet. Postridie eius diei, deferuescente iam iracundia, multi rei acerbitem accusare: plerosque tam immanis sententiæ pænitere; Mitylenensium vero legati, qui forte Athenis aderant, vna cum ijs Atheniensibus, qui ipsorum rebus fauebant, vbi molliri ciuitas visa est, in spem miseri veniunt mitigari populum posse, atque ad humaniorem aliquam sententiam traduci. Qui cum per amicos anxij sollicitique id agerent, cumq; omnibus ad pedes prostrati supplices flentesq; iacerent atq; eos, qui pridie quoque ab alijs dissenserant, plebiscitumq; illud improbauerant, adiutores haberent; ecce tibi Cleo Cleæneti filius, hesternæ illius sententiæ auctor, vir natura vnus ex omnibus ciuibus violentissimus & auctoritate idem apud populum longe maxima, is plebis inconstantiam increpitans, ut ciuitatis labantem iam voluntatem confirmaret, & plebiscitum, quod se maxime contendente auctore factum esset, tueretur, aduocata con-
tione, ad hunc fere modum loquutus est.

Contio Cleonis.



NTELLEXI equidem & sæpe alias, & maxime hoc tempore, cum vestra vos de Mitylenæis sententiæ penitet, liberos populos alijs imperare nequire: ad fueti enim securæ inter vos, minimeq; insidiosæ vitæ rationi, eundem morem erga socios quoque vestros retinetis: nec quidquid, aut illorum oratione adducti peccaueritis, aut misericordia commoti dissolutiores fueritis, non socijs gratum, sed periculosum vobis langorem vestrum esse intelligitis: haud animo reputantes imperium hoc, quod obtinetis, tyrannidem esse: illos contra vos consilia inire, vobisque inuitos parere. Haud vos beneficijs magno quidem vestro detrimento dandis, sed cum viribus magis, quam illorum in vos beneuolentia vt valeatis perficeretis, dicto vt vobis audientes sint, eos adducetis: illud certe minime omnium ferendum, si, quæ semel statuerimus, eorum firmum erit nihil: neque intelligemus commodius administrari rempublicam, quæ minus præclaris legibus, verum stabilibus vtatur, quam eam, quæ optimas leges habeat, sed parum ratas: plusq; habere vtilitatem inscitiam modestiæ compotem, quam intemperantia præditam perspicaciam: meliusque fere ab ijs, qui paulo sunt tardiores, quam ab ijs, qui ingenij præstent acumine, respublicas geri. Nam hi quidem anteire legibus prudentia, & in omni de republica disputatione superiores discedere videri volunt; quasi vero non maioribus in rebus antea prudentiâ ostentarint: atq; ijs quidem rebus ciuitates hi labefactant. Qui uero intelligentiæ suæ minus cōfidunt, ij nec suo plus, q̃ legum consilio tribuunt, nec se idoneos esse arbitrantur, qui recte dicentis sententiā refutent: & cum existimatores in neutram partem propēsi sint, potius q̃ aduersarij, plerisq; in reb. recte statuūt: id quod uos quoq; præstare debetis, neq; eloquentiæ ui, & prudentiæ conten-

contentione elati contra, atque ipsi sentiat, ciuibus vestris suadete. Nam quod ad me adtinet, in eadem equidem sententia perseuero, atque eos miror, qui de Mitylenæis iterum retulerunt, moramque quæsiuerunt, id quod ijs vtile est, qui iniuriam intulerint; siquidem iracundia demum obtusa, qui læsus est, in eum, qui lacessierit, inuadit: at contra, cum vindictio quam maxime propinqua iniuriæ acceptæ est, tum, paribus nixa viribus, iustissimas pœnas repetit: tum eum quoque admiror, quicumque ille futurus est, qui contraditurus sit, & faciendum sibi esse existimet, ut Mitylenensium scelera vtilitati nobis, nostras autem calamitates detrimento socijs esse ostendat; atque aut eloquentia fretus id, quod vobis summe placitum est, non ita decretum esse pugnabit, aut, suo compendio ductus, eleganti elaborataque oratione ad aliam vos sententiam traducere conabitur. Res certe publica talium concertationum præmia alijs tribuit, periculum ipsa subit, cuius sane quidem rei culpa in vobis refidet, qui certamina hæc perperam administratis: etenim dictorum spectatores, rerum autem auditores esse consueuistis. Nam & de futurarum rerum euentu ex disertorum hominum oratione statuitis, & quæ facta iam sunt, nihilo plus fidei ijs, quæ oculis cernitis, quam ijs, quæ sando auditis, habentes, quanta ea ornata orationis vbertas fecerit, tanti aestimatis: qui, cum ea dicuntur, quæ a consuetudine abhorrent, per facile capi soletis: quæ vero approbantur in vulgus, ea respuitis, in vnaquaque re noui tati seruientes: vsitata autem & quotidiana contemnentes: datisque operam maxime quidē pro se quisque, talia quædam ut dicere ipsi possitis: si minus in eo inter vos pugnatis, ut ne tardius, quæ dicta, sunt percepisse videamini: quod si qua acutius aliquis dixerit, in ijs vos & approbatione & intelligentia vestra præeundis prompti: in prospiciendo autem, quos ea euentus habitura sunt, tardistis: cumque alia prope dixerim omnia, quam quæ in vita hac communi versantur, vestigetis, ne in ijs quidem ipsis,

ipsis, quæ ante oculos posita sunt, sapitis satis; ac prorsus audiendi voluptate deliniti, sophistarum potius spectatoribus, quam de republica consultantibus similes confideretis. Quibus ego a rebus abducere vos conor, doceoque Mitylenæos vnam quidem ciuitatem, maximam vobis fecisse iniuriam. Nam siqui sunt, qui cum imperium nostrum perferre non possent, aut siqui hostium coactu a nobis defecerint, ueniam equidem illis tribuo: qui vero & insulam incolant, & mœnia habeant, quique cum hostes nostros mari modo vereantur, quo tempore triremium præsidio aduersus eos muniti essent, cum suis legibus viuerent, cumque honos illis a nobis, ut quibus maxime, haberetur, hæc patrauerint, quid aliud egisse eos dicamus, quam ut insidiarentur nobis, magisque in nos eos inuadere, quam a nobis euadere voluisse? (defectio certe eorum est, quibus per vim inferatur iniuria) de disseque operam, ut ubi cum inimicissimis nobis sese coniunxissent, tollerent nos: id quod acerbius est, quam si ipsi per se, nacti vires, bellum intulissent. Nec vero aliorum calamitates, qui, cum a vobis defecissent, in potestatem nostram redacti sunt, sibi exemplo habuerunt: nec adeo beatæ illorum res, ne in discrimen irruerent, illos retardarunt. sed præcipientes audacia, plusque quam quantum suæ vires: minus autem, quam quantum voluntas ferebat, spei habentes, bellum susceperunt, atque equitati uim anteposuerunt. Nam, quo maxime tempore uincere se posse arbitrati sunt, nulla laceßiti iniuria, impetum in uos fecerunt: sic enim fere fit, ut eæ ciuitates, quibus maxime ne copinantibus, ut, uel breue modo ad tempus, fortunatæ sint, acciderit, insolentia efferantur: plerumque autem quæ consilio ac ratione, quam quæ fortuito prospere hominibus euenerunt, stabiliora sunt: faciliusque fere aduersam fortunam refellimus, quam secundam conseruamus. Quod utinam nullo umquam præcipuo, præter ceteros, a nobis habiti honore mitylenæi fuissent: neque enim hunc in locum eorum progressa es-

DD set

set audacia. Nam omnino sic est hominum ingenium, ut obsequentia contemnant, repugnantia admirentur. Luant igitur nunc saltem scelere suo dignas pœnas, neque culpa in principes translata populus supplicio liberetur: æque enim omnes ad uestram perniciem incubuerunt: qui si ad uos sese contulissent (erat enim in illorum potestate) rursus nunc ciuitate fruerentur: uerum, fortunam cum paucis experiri tutius arbitrati, vna cum ijs deficere maluerunt. Ac cum animis uestris cogitate, eque quem ex omnibus socijs non leui quaque de causa defecturum a vobis esse existimetis, si easdem ijs pœnas constituetis, qui hostium coactu, atque ijs, qui sua voluntate a vobis defecerint, cum libertatem, si conata perfecerint, propositam habeant: sin autem minus, nullam tamen insanabilem plagam accepturi sint: at vos de vnaquaque ciuitate capitum, ac fortunarum uestrarum in discrimen venietis: & bene re gesta, tamen urbem recipietis perditam, & vectigalia, quibus opes uestrę nituntur, in reliquum tempus amittetis: siquid autem secus acciderit, ad eos, quos habemus hostes, alios addetis: atque id tempus, quod maxime in ijs propulsandis, qui inimici iam vobis sunt, ponendum erat, inferendo socijs uestris bello consumetis: non igitur spes ostendatur, siue quæ oratione persuadet, siue quæ pecunia paratur, fore ut illorum scelera humana patiamur: nec enim imprudentes nocuerunt, sed scientes insidiati sunt: misericordiam autem error habet. Itaque cum a principio equidem pugnaui, tum vero nunc contendo, ne id, quod ante sciuitis, irritum faciatis, neque tribus ad imperium obtinendum maxime inutilibus rebus, misericordia, orationis dulcedine, & clementia in fraudem induci vos patiamini. Nam & misericordia paribus tribuenda est, non ijs, quos neque contra in futurum quicquam misereat, & in perpetuum hostes vobis esse ipsa res cogat: & qui dicendo aures uestras suauitate permulcent oratores, ijs alijs minoribus in rebus campus non deerit.

Nam

Nam nunc quidem brevis voluptatis fructu nimio ciuitas multaretur : ipsis autem pro bene dictis bene facta commodaque tribuentur : clementia vero aduersus eos exercenda est, quos deinceps vobiscum coniunctos, non in eos, quos similiter, atque antea hostes habituri sumus. Atque ut in vnum conferam, si mihi assensi eritis, ea facietis, quæ iusta in Mitylenæos sunt, & in remp. vestram salutaria : sin aliter statuetis, nec illi gratiam habebunt, & ipsi vestro vosmet iudicio condemnabitis : iniuste enim vos imperium, si quidem iure hi defecerunt, obtinetis : quod si contra, quam deceat, tamen faciendum id vobis esse statuistis, contra quoque, quam honestum sit, vtilitatis causa in eos animaduertite ; nisi forte principatum dimittere mauultis, & sine omni periculo ad officium vos conuertere : ac pares ab illis pœnas repetite, ne maior nostra, qui insidijs obstitimus, quam eorum, qui insidias fecerint, videatur esse lentitudo : illud animo versantes, quales illos existimandum sit in vos futuros fuisse, si vicissent : præsertim cum ab ijs initium iniuriæ inferendæ ortum sit. Nam, qui sine causa quempiam læserunt, ij acerrime vrgere, sanguinemque solent appetere, superstitis scilicet inimici periculo commoti : Etenim qui ab eo, a quo minime fuit necesse, perculsus sit, is capitalior, si forte euaserit, hostis est, quam qui pari etiam nunc condicione inimicitias gerit. Ne igitur vos ipsi pdideritis, sed mala, quæ ab ipsis accepissetis, vobis ante oculos atque in conspectu statuite : faciteque ut etiam atque etiam recordemini, ut omnia minoris aestimaueritis, quam ut illi vestras in manus deuenirent : ac par pari nunc referte, neque in ipso negotio subito relanguescite : quantaque vobis acerbitas modo imminuerit, memoria retinete : & cum ab ijs dignas pœnas repetite, tum in posterum documentum socijs vestris statuite fore, ut, quicumq; defecerint, morte multentur : hac enim re intellecta, minus posthac cogemini, posthabitis

D D 2 hosti

hostibus, cum socijs vestris bellum gerere.

Hæc quoque sunt expressæ Thucydide.

Ad hæc Diodotus, Eucratis filius, qui in priore quoq; contione vehementer Cleonis sententiæ, de Mitylenæis necandis, restitisset, cum in sug gestum venisset, ita respondit.



Ecce eos, qui iterum de Mitylenæis referunt, reprehendo; nec eos, qui magnis de rebus sæpius deliberari que-
runtur, laudo: duas autem res maxime consilio inimicas, ac rationi esse existimo, festinationem, atque iracundiam; quorum alterum amentiam, alterum inscitiam, & leuitatem habet. Quod si quis orationem rerum agenda-
rum magistratam negat, atque in eo pugnat, nã ille aut stultus est, aut sua id priuatim aliquid refert: stultitiæ est enim aliquid præterea esse statuere, quo futuris mini meque perspicuis de rebus differi posset: priuatim vero interest, cum turpe aliquid persuadere in animo habeas, bene autem te de re minime honesta dicere posse diffidas, bene calumniari, atque cum aduersarios, tum vero etiam auditores exterrere. Illi enim uero omnium maxime molesti sunt, qui alterius sententiam pretio addictam criminantur: etenim cum stultitiæ is, qui nihil forte per suaferit, arguitur, imprudens habitus magis, quam improbus discedit: cui vero obiecta est auaritia, is, & cum persuaferit, suspectus est, & cum id minus sit affecutus, præter stultitiam improbitatis etiam reus fit. Ac ne e rep. quidem id est, quippe quæ metu suis consiliarijs priuetur, multumque adeo illi prospectum sit, si huiusmodi ciuib; nulla ad dicendum facultas fuerit: minimum enim in se fiduciæ ad peccandum habebunt. Quandoquidem boni ciuis est, non metu exterritis ijs, qui cõtra dicturi sint, sed æquo certamine contendente superiorem in dicendo discessisse iudicari: prudentis autem ciui-
ta-

tatis, qui plurima sapienter suaverit, eum haud honore
 amplificare, sed ne de ea quidem, quam is obtinet, digni-
 tate quicquam detrahere: contraque, qui minus pruden-
 ter senserint, illis eam rem non modo fraudi, sed ne dede-
 cori quidem esse censere: sic enim neque is, cui ex senten-
 tia euenerit, quo etiam plurius habeatur, contra, atque i-
 pse sentiat, dicendo, gratiam aucupabitur: nec cui mi-
 nus successerit, ipse quoque, quo sibi aliquid conciliet
 gratie, sese contioni venditabit: quæ contra a nobis fuit:
 atq; huc accedit, ut si quis sui quidem questus causa, sed
 quæ nihilo tamen minus ad remp. pertineant, dicere in
 suspicionem venerit, ob tenuis auaritiæ opinionis inui-
 diam, certo remp. utilitatis fructu priuamus: atq; eo res
 deducta est, ut, quæ recta sunt, si simpliciter sincereq; di-
 cantur, nihilominus suspiciosa sint, quam quæ impro-
 ba sunt: ut æque necesse habeat, qui maxime pernitiōsa
 suadere cupiat, populum inducere, atque is, qui salutare
 aliquid adferat, mendacio fidem facere: solaque hæc est
 ciuitas, cui propter peruersam calliditatem aperte sineq;
 circuitione prodesse nemo possit: nam, si quis aliquid at-
 tulerit, quod perspicue bonum sit, delitescere tamen in
 eo occulte fraudis aliquid ac furti veremini. quare in tam
 suspiciosa ciuitate, institutisq; his vestris, maximis de re-
 bus dicentibus nobis longius prospiciendum est, quam
 vos, quibus breue ad cogitandum spatium fuit, provide-
 tis; præsertim cum suasio nostra legibus teneatur, vestra
 autem auditio libera solutaque sit: etenim si eadem, qui
 sua sit, ac qui in eam sententiā est, pæna plecteretur, pro-
 fecto haud paulo vos cōsideratius iudicaretis: nam nunc
 quidem, quacumque de re facti sitis iratiores, si quando
 aliquid forte offendistis, eius, qui auctor fuerit, senten-
 tiam vnā multatis: vestras autem, quæ multæ in eius er-
 roris societate fuerunt, absoluitis. Ego sane equidem
 non eo in contionem ascendi, ut Mitylenensium causam
 agerem, nec vero eos rursus ut accusarem: nec enim de
 illorum iniurijs, si sapimus, suscepta nobis est hoc tempo-
 re

re contentio, de nostra recte ineunda ratione: neque enim, ne si aperuero quidem plurimum eos peccasse, propterea occidendos illos censebo, nisi id reip. conducat: neque cōtra, quamquam nonnihil illos loci veniē reliquisse ostendero, nisi ea res ad remp. pertineat, ignoscendum statuam: puto enim de futuris magis vos rebus, quam de præsentibus consuli. Itaque in quo Cleo maxime nitentur, cum contenderet multum in posterum ad defensionem coërcendas profuturum, si quis ei rei pœnam capitis constituerit, in eo ego quoque ex altera parte futuris nifus, ab illo vehementer dissentio: enimvero haud æquum esse existimo præ illius speciosa ratione vtilem meam a vobis sententiam respui: etenim illius oratio, propterea quod magis ius sequeretur, ob præsentem vestram in Mitylenæos iracundiam fortasse vos traxerit: non. n. iudicio cum ijs contendimus, vt iuris ratio habenda sit, sed de illis deliberamus, qua nam potissimum conditione plurimum reip. nostræ sint profuturi. Multa igitur singulis in ciuitatibus, eaque haud quaquam huic paria, sed multo leuiora peccata capite sancita sunt: attamen elati spe periculum non reformidant: nemo autem desperans conata se perficere posse maius aliquod facinus suscipit. Ac sepe, quæ minus, aut suis viribus, aut externis auxilijs instructa ciuitas defecisse visa est, hoc freta id incœpit: natura enim omnes publice priuatimque ad peccandum ferimur; qui quidem impetus nulla lege coerceri potest: nam per omnia suppliciorum sunt homines genera peruagati, siquid ab inferenda improbos iniuria deterrere possent: ac verisimile est grauissimis antiquitus criminibus mitiores fuisse pœnas constitutas: sed cum illæ temporis diuturnitate negligenterentur, capitalia pleraque euaserunt: perfringitur tamen id quoque. Aut igitur metus maior aliquis inueniendus est, aut ne in hoc quidem satis est roboris ponendum. Nam egestas necessitatem, audaciam porrigit, incitat: copiar, contumeliæ & arrogantię iniustitiam ministrant: tum ceteri itidem casus

sus dolore, ut quisque maiore aliqua vi premitur, præcipientes in pericula trahunt: spes in primis, atque amor; illud enim præeuntem hæc subsequitur; atque hic ingressionem meditans, illa secundum fortunæ euentum proponens, pleraque turbant ac miscent: atque hæc, quoniam latent, perspicuis malis peiora sunt. Ipsa præterea fortuna multa ad instigandum congerit; nam nec opinantibus non numquam sese offert, atque imparatos in discrimen trahit, ipsasque præcipue, præter ceteros, ciuitates impellit, utpote quæ res maximas, libertatem aut etiam in alios imperium, propositas habeant; simul se quisque stulte, quam quanti sit, carius æstimat. Atque omnino nec fieri potest, magneque inscitiae est, cum summo humanum ingenium studio ad aliquid agendum incubuit, legum seueritate, villo ve alio acerbioris genere deteritum iri, existimare. Quare nec pena capitis freti, tamquam eam vadem acceperimus, minus prudens consilium inire debemus: nec quicquam statuere, quo spes ijs, qui defecerint, ad sanitatem reuertendi, peccatumque suum celeriter corrigendi præcidatur; sic enim cogitate. Nam sic quidem, si qui, cum defecerint, sustinere se non posse sentiant, integri adhuc, ut, & quod impensum sit, in præsentia farcire, & vectigal deinceps pendere valeant, in deditionem veniant: illo autem modo ecquos putatis fore, qui non se multo acrius, quam nunc, ad tolerandam obsidionem comparent, atque eam, quam longissime possint, producant: quippe cum nihil referre intelligant, tarde ne sese, an celeriter dederint? Quid igitur? ea res non ne vobis damno erit? cum in obsidionem sumptum facere cogemini, propterea quod nullum compositioni locum reliquum feceritis, & vrbe potiti, perditam ciuitatem recipietis, vectigalque, quod ex ea percipitis, in reliquum amittetis? At qui hoc vno maxime hostibus resistimus. Quamobrem non est nobis committendum, ut seueri potius peccatorum iudices cum simus, damno afficiamur, quam ut modera-

tione

tione in puniendo adhibita in futurum prospiciamus, ut
 integris ciuitatibus firmiora vectigalia habeamus. Nec
 vero in legum seueritate, sed in rerum procuratione sa-
 tis esse ad custodiam praesidij existimemus, contra qui-
 dem, ac nunc facimus: etenim si quis, cum liber esset, atq;
 imperio per vim opprimeretur, iure se se in libertatem
 vindicarit, acerbè nos in eum receptum animaduerti-
 mus. Atqui liberorum populorum defectiones non a-
 critè puniendæ, sed acriter cauendæ sunt, præripiendum
 quæ, ut ne in eam quidem cogitationem deueniant: at,
 cum in ditionem recepti sint, culpa quam minimum di-
 latanda est. Ac videte, quam vehementer hoc etiam no-
 mine, si Cleonis sententiam secuti fueritis, erraturi sitis:
 nam nunc singularum vobis ciuitatum populus fauet
 ac cupit, nec cum principib. sua voluntate coniurat, cum
 quæ armis opprimitur, continuo defectionis auctoribus
 hostis est. Itaq; multitudine nos aduersariæ ciuitatis no-
 bis amica ac socia bellum gerimus. Quod si populum Mi-
 tylenæum interfeceritis, qui a defectionis consilio afuit,
 &, cum primum arma capiendi potestas data est, ultro no-
 bis urbem tradidit, præterq; quod ijs, qui bene de vobis
 meriti sunt, necandis iniuriam facietis, id etiam statuetis,
 quo nihil nobilitati possit esse optatius: ciuitatibus enim
 ad defectionem impulsis populi auxilium paratum habe-
 bunt: siquidem exemplum vos statuetis, idem vos sup-
 plicium ijs, qui scelus in se admiserint, atque ijs, qui ex-
 tra noxam sint, cōstituere; quinimo, si maxime illi in cul-
 pa sint, dissimulandum id esset, ne, qui vni nobis amici re-
 liqui sunt, hostes fierent. Atq; equidem multo hoc ma-
 gis ad imperium tuendum conducere arbitror, si scien-
 tes iniuriam perpetiemur, quam si vel iure, quos mini-
 me expediat, interfecerimus. nam Cleonis quidem sentē-
 tia penam, quæ vtilitatem eadem cum iustitia copulet, in-
 uenire non potest. At vos præstare hæc statuite, nec mi-
 sericordiæ quicquam aut clementiæ tribuite; quibus re-
 bus ne ego quidem abduci vos velim, sed ijs ipsis, quæ a
 me

me expositæ sunt, rationibus persuasi Mitylenensium, quos Paches pro fontibus misit, otiose causam cognoscite, reliquos oppido uti iubete: hæc enim cum in futurum recta sunt, tum in præsens hostibus formidabilia. Nam, qui consilio nititur, plus hostibus nocet, quam qui sine animi ratione viribus.

Hæc est epistola illa, cui CASA respondit, ea, quæ hic collocata est. & incipit.

Quum forte.

PETRVS VICTORIVS

I. O. CASAE ARCHIEP.

BENEVENTANO S.



VI alias quasdam ad te scribendi occasiones omisi, ne te in magnis Reipublicæ rebus vehementer occupatum, magis impedirem, diuque mihi ab hoc officij genere temperaui: nunc quum casus tulerit, ut tecum communicare aliquid debeam de ijs, quæ ad studia litterarum pertinent, quibus te scio valde, atque ex animo delectari: facere non potui, quin statim ad te epistolam hanc exararim. Hoc autem si aliquis fortasse hoc tempore factum reprehendet, atque ineptum putabit, te non omnino (quæ tua est humanitas) contempturum confido. Quin contra solet potius varietas rerum oblectare, & animum fessum grauioribus curis, assiduisque cogitationibus huiuscemodi aliquis sermo e sinu musarum promptus, reficere, atque recreare. Quum igitur hic adolescētibus nostris, qui Græcæ linguæ perdiscendæ studiosi sunt, Orestem fabulâ Euripidis interpretarer, veni ad eum locum, vbi Helena persuasa ab Electra, filiæ Hermionæ parteis illas imponit

EE por-

portandi comam suam, ea de causa cefam, ceteraque, quibus moris erat ea etate mortuos munerari, ad sepulcrum Clytemnestra: ut honorem cum forori haberet, seque magno dolore affectam esse ex acerbo illius interitu significaret. Post quae verba, quum Electra, plena admirationis, exclamet: naturaeque vim incredibilem esse in utramque partem affirmet, siue boni aliquid, siue mali ab initio vitae illa hominibus dilargitur, ac statim, quod in vniuersum protulerat, illi ipsi rei, de qua agebatur, ac commodet: dixi, me putare, loqui ipsam de pulchritudine Helenae: quam tantam fuisse ostendere vult, quemadmodum sane omnium sermone illa ferebatur, ut facto hoc, quod vnum maxime corrumpere ipsam ac labefactare potuit, violata nulla ex parte sit: adiunxiq; in eam mentem venisse poetam, eruditum valde atque ingeniosum virum, magnopere verisimile esse, ut quum in manibus Helenae personam haberet, induceretque illam fecisse, quod rationibus ipsius magnopere contrarium erat, deprauareque poterat id bonum, quo illa ceteris mulieribus antecellebat: cogitarit, an ipsi contigisset, quod alijs, minore pulchritudine praeditis, necessario euenisset: idque nullo modo factum esse ostendere voluerit: quod multum valet ad famam peruulgatam de illa, confirmandam: constantique omnium opinioni de eximia specie corporis ipsius respondet: simulq; commemoravi, non me fallere, Graecas declaratiunculas aliter locum capere, & ab hac sententia discrepare, quarum tamen auctoritas apud me nulla foret, quum multis signis intelligi possit, ipsas alicuius esse, vel plurium potius, qui superiore aetate vixerint, quum extinctae iam ita in Graecia bonae artes essent, ut vix scintillae aliquae veteris eruditionis in ipsa restarent. Nam quod ille putauit hoc Electram protulisse, quia pristinam & innatam malitiam in animo Helenae manere adhuc ex facto illo cognouit: leue admodum ac nugatorium me illud existimare ostendi, ad indicandam naturae ipsius prauitatem, quae multis atq; insignibus facinoribus

cinoribus notata erat. Si namque, quod interpres arguit ipsam fecisse, eo animo ac consilio Helena fecisset, in tenui re illa peccasset, nec satis iustam causam exclamandi Electra habuisset. Neque enim decet eam valde mirari, quum vsitatum aliquid quotidianumque fit: nec vocem eo tempore tollere oportet. Affinis enim tunc Helena illi culpæ fuisset, cui omnes mulieres vulgo obnoxie sunt: cunctæ namque formæ suæ conseruandæ uehementer studiosæ sunt: cauentque quicquam facere, quod gloriam illam suam imminuat. Vt autem hoc infirmum admodum argumentum eius rei demonstrandæ fuisset, ita quod ipse cogitauit, magni momenti esse ad id significandum affirmaui: quod etiâ inde perspicui posset, quia Terentius in Phormione, quum induceret seruum admirabilem quandam ac nouam pulchritudinem Virginis cuiusdam commemorantem, facit illum his signis ipsam declarare: exponit enim eam inuentam fuisse huiuscemodi quodam habitu corporis, vestituq; , qui tamen ipsam maculare nullo pacto potuit: comicus enim hic quoque eadem ratione insitam a natura, & ingentem fuisse pulchritudinem illam significare uoluit: inquit igitur apud eum Geta-Virgo pulchra, & quo magis diceret, nihil aderat adiumenti ad pulchritudinem: capillus passus, nudus pes, ipsa horrida: lacrumæ, vestitus turpis: ut ni vis boni in ipsa inesset forma, hæc formam extinguerent. Sed quid dico Terentium, studeoque hoc, testimonio etiam illius comprobare? qui sane non omnino eodem argumento utitur, quum vetus ipsius interpres Donatus tradat Apollodorum, unde fabulam hanc vertit Terentius, fecisse tonsorem ipsum nuntium, non adolescentem, qui forte in tonstrinam venisset: qui tonsor apud eum diceret, se nuper puellæ comam ob luctum abstulisse: totumq; se effunderet, verisimile est in eam pulchritudinē celebrandam, quam facto illo, maxime inimico pulchritudini, non vidit immutatam. Addit autem idem eruditus Grammaticus, varietatis huius rationem reddens, se

EE 2 sci

scire, hoc Terentium mutasse: ne externis moribus spectatorem Romanum offenderet. Nam quod videtur huic meæ sententiæ aduersari in Græcis verbis: docui aliter capiendum esse, atque interpres ille Græcus accepisset: intelligo, inquam, quod apud poëtam est *παρ' ἄκρας ὡς ἀπὲρ θειετέλχας*: valet enim *παρ' ἄκρας*, prope partem illam capillorum, quæ capiti hæret, tamquam Electra dixerit, ad cutem Helenam comam totondisse: quem magnum ornatum muliebris corporis quum penitus, pietati seruiens, sibi dempsisset, nō tamen ipsam inde turpem redditam. Nec existimari debere hoc insolens esse, quod poeta uocarit summos capillos partem illam, quæ quasi radix ipsorum est: qui enim tondere cæsariem incipiunt, ad eam partem postremo perueniunt: præcipueque in muliebri coma, quæ prolixa est valde, atque pendet e uertice, uidetur ipsa recte summa appellari potuisse. Addidi etiam, me arbitrari, si poëta diuersa ratione vltimam partem capillorum intelligere voluisset, ipsam præpositionem *παρ'* additurum non fuisse: quæ fortasse causa fuerit auctori eius scholij, vt erraret, qui hoc non animaduertisset, & magis communem, vltimatamque notionem eius nominis secutus esset. Cumque molestum præterea sit, quod sequitur, *ὅτι δ' ἡ παλαιὰ γυνή*: qui enim quempiam eundem esse ait, qui olim fuerit, & naturam ipsius moresque, & formam, effigiemque corporis in eo conseruatam esse intelligere potest, grauissimusque scriptor ac magnæ inter Græcos auctoritatis, contrariam in partem usurpet hanc vocem: confesus sum, hoc me magis perturbare: Plutarchus enim, solitus sæpe locis illustribus poetarum sensus suos explicare, in Alcibiadis vita, institutisque connumerandis, vbi narrat, quomodo ille Lacedæmone vixerit, ac, quemadmodum ingenium suum ad tempus versarit, quum ostendisset, quid pronūtiari de ipso potuerit, si quis tantum, quæ extra posita in eo forent, quæque; ille simularet, spectasset: addidit, si quis contra mentem adhibuisset ad veros ipsius animi motus;

sa-

factaq; exclamari recte potuisse, ὅτι γὰρ παλαίγυνος. Quā
uis enim summa arte celasset sua vitia, eruperant tamen
illa nonnullis in rebus, & idem, qui Athenis fuerat, im-
probissimus scilicet ac flagitiosissimus iuuenis, illic quo-
que esse Alcibiades intelligebatur. Huiuscemodi tamen
voces antiquorum poetarum, quę sermone omnium po-
stea celebrabantur, ac vim prouerbiorum obtinebant, di-
storqueri sæpe, ac longe alio sensu, quam quo primum
editę forent, pronuntiari solitas esse affirmari: quod mul-
tis huius ipsius auctoris exemplis nullo negotio posset
comprobari. Id autem huic ipsi loco me arbitrari eue-
nisse, nec sane durum uideri debere, a corporis aspectu
ad animi vim indicandam hoc Plutarchum transtulisse;
ut quod ab auctore de muliere prolatum fuerat, ipse, ijs-
dem verbis retentis, manifesto viro accommodauit: qua-
re me putare posse, hanc quoque tanti viri auctoritatem
sustineri. Quod vero statim Electra Helenam execra-
tur, & in odium Deorum immortalium venire optat, ut
principium maximorum malorum & sibi ipsi, & fratri,
& vniuersę Gręcię, videri quoque sententiam meam ad
iuuare: specie enim corporis, non prauitate animi He-
lena tanta exitia parauerat: similemque locum hunc esse
Homericō illi, quum grauissimi senes, qui Priamo assi-
debant, laudata pulchritudine eiusdem mulieris, atque
in cælum testimonio suo sublata, intelligentes tamen,
quanta incommoda ipsa Troianis hominibus intulisset:
utile rebus suis esse dixerunt, ut illa eo, vnde venerat, re-
dideret, nec apud se diutius, futura semper ipsis, filijsq; de-
trimento, maneret. Hęc mihi tunc, ut alia nonnulla hu-
iuscemodi occurrerunt, quibus sententiam meam com-
probarem, ut sit, quum semel aliquis opinionem aliquā
suam de aliqua re amare cœpit: tuetur enim eam stu-
diose, atque omnia vndiq; ad eam confirmandam rapit.
Exposui tamen me nulla alia re tantopere fretum ita as-
seuerare, quantum elegantis illius, ac necessarij sensus op-
portunitate: quam φαντασίαν si poeta reliquisset, puta-
rem

rem non sine causa in hoc loco acumen ingenij ipsius de
siderari potuisse. Ecce autem postridie quidam ex ijs,
qui me audiunt, ad me veniunt, & cum tabellis quidem,
vt Cicero ait, obsignatis; qui docent, tibi longe aliter de
hac re videri: afferuntq; epistolam quandam tuam versi
bus scriptam, in qua manifesto contra me stas. Cohorru
igitur subito atque animo concidi, postquam vidi mihi
tecum rem futuram, quem nulla in re aduersarium me
habiturum vmquam putavi: & a cuius iudicio, si id scis
sem, numquam discrepasse. Magna est autem aucto
ritas tua merito apud hos: atque id & sua sponte ipsi fa
ciunt, vt probent, atque admirentur doctrinam, & ele
gantiam ingenij tui, & meis etiam assiduis vocib. ad hoc
incitantur. Quare quomodo me geram in hac re, non
facile mecum statuere possum: atque id, quia veritatem
huius rei non perspicio: neque enim metuerem opinio
nem meam condemnare, & palam me in errore versa
tum confiteri. Decreui igitur te huius quaestionis iudi
cem sumere, atq; ita tibi omnem rem examinandam tra
dere: vt quum tu rursus, ipsa diligenter ponderata, ostē
das te in illa tua vetere sententia perdurare: pollicear
prorsus me ita quoque firmiter crediturum: & omnia,
quae contra facere videntur, argumenta nullius ponde
ris existimaturum. Vale, & me, quod iam pridem feci
sti, ama. Florentia Idib. Decemb. MDLVI.


FINIS.

207

Series chartarum.


•b A B C D E F G H I K L M N O P Q R S T V X Y
A A B B C C D D E E.

Omnes sunt Duerniones.



Florentię apud hæredes Bernardi Iuntæ.
Anno Domini MDLXIII.





210 - 2

10 & 11/15

Car

